

Namo tassa bhagavato arahato sammāsambuddhassa

Dīghanikāye

Sīlakkhandhavaggaabhinavaṭṭikā

(Dutiyo bhāgo)

2. Sāmaññaphalasuttavaṇṇanā

Rājāmaccaḥāvaṇṇanā

150. Idāni sāmaññaphalasuttassa saṃvaṇṇanākkamo anuppattoti dassetuṃ “**evaṃ...pe... sutta**”ntiādīmāha. Tattha **anupubbapadavaṇṇanā**ti anukkamena padavaṇṇanā, padaṃ padaṃ pati anukkamena vaṇṇanāti vuttaṃ hoti. Pubbe vuttañhi, uttānaṃ vā padamaññatra vaṇṇanāpi “anupubbapadavaṇṇanā” tveva vuccati. Evañca katvā “**apubbapadavaṇṇanā**”tipi paṭhanti, pubbe avaṇṇitapadavaṇṇanāti attho. Duggajanapadaṭṭhānavisesasampadādiyogato padhānabhāvena rājūhi gahitaṭṭhena evaṃnāmakaṃ, na pana nāmamattenāti āha “**tañhi**”tiādi. Nanu mahāvagge **mahāgovindasutte** āgato esa purohito eva, na rājā, kasmā so rājasaddavacanīyabhāvena gahitoti? Mahāgovindena purohitena pariggahitampi cetam reṇunā nāma magadharājena pariggahitamevāti atthasambhavato evaṃ vuttaṃ, na pana so rājasaddavacanīyabhāvena gahito tassa rājābhāvato. Mahāgovindapariggahitabhāvakittanañhi tadā reṇuraññā pariggahitabhāvūpalakkhaṇaṃ. So hi tassa sabbakiccakārako purohito, idampi ca loke samudāciṇṇaṃ “rājakammapasutena katampi raññā kata”nti. Idaṃ vuttaṃ hoti – mandhāturaññā ceva mahāgovindaṃ bodhisattaṃ purohitamañāpetvā reṇuraññā ca aññehi ca rājūhi pariggahitattā rājagahanti. Keci pana “mahāgovindo”ti mahānubhāvo eko purātano rājāti vadanti. **Pariggahitattā**ti rājadhānībhāvena pariggahitattā. Gayhatīti hi **gahaṃ**, rājūnaṃ, rājūhi vā gahanti **rājagahaṃ**. Nagarasaddāpekkhāya napuṃsakaniddeso.

Aññepettha pakāreti nagaramāpanena raññā kārītasabbagehattā **rājagahaṃ**, gijjhakūṭādīhi pañcahi pabbatehi parikkhattattā pabbatarājehi parikkhattagehasadisanti **rājagahaṃ**, sampannabhavanatāya rājamānaṃ gehanti **rājagahaṃ**, susaṃvihitārakkhatāya anattāhahitukāmena upagatānaṃ paṭirājūnaṃ gahaṃ gahaṇabhūtanti **rājagahaṃ**, rājūhi disvā sammā patiṭṭhāpitattā tesam gahaṃ gehabhūtanti **rājagahaṃ**, āramarāmaṇeyyatādīhi rājati, nivāsasukhatādīna ca sattehi mamattavasena gayhati pariggayhatīti **rājagahanti** edise pakāre. Nāmamattameva pubbe vuttanayenāti attho. So pana padeso visesatṭhānabhāvena ulārasattaparibhogoti āha “**taṃ paneta**”ntiādi. Tattha “**buddhakāle, cakkavattikāle cā**”ti idaṃ yebhuyyavasena vuttaṃ aññadāpi kadāci sambhavato, “**nagaraṃ hoti**”ti ca idaṃ upalakkhaṇameva manussāvāsasseva asambhavato. Tathā hi vuttaṃ “**sesakāle suññaṃ hoti**”tiādi. **Tesanti** yakkhānaṃ. **Vasavananti** āpānabhūmibhūtaṃ upavanaṃ.

Avisesenāti vihārabhāvasāmaññena, saddantarasannidhānasiddhaṃ visesaparāmasanamantarenāti attho. Idaṃ vuttaṃ hoti – “pātimokkhasaṃvarasaṃvuto viharati, (a. ni. 5.101; pāci. 147; pari. 441) paṭhamaṃ jhānaṃ upasampajja viharati, (dha. sa. 160) mettāsahagatena cetasā ekaṃ disaṃ pharivā viharati, (dī. ni. 3.71, 308; ma. ni. 1.77, 459, 509; 2.309, 315; 3.230; vibha. 642) sabbanimittānaṃ amanasikārā animittaṃ cetosamādhim upasampajja viharati”tiādīsu (ma. ni. 1.459) saddantarasannidhānasiddhena visesaparāmasanena yathākkamaṃ iriyāpathavihārādivisesavihārasamaṅgīparidīpanaṃ, na evamidaṃ, idaṃ pana tathā visesaparāmasanamantarena aññataravihārasamaṅgīparidīpananti.

Satipi ca vuttanayena aññataravihārasamaṅgīparidīpane idha iriyāpathasaṅkhātavisesavihārasamaṅgīparidīpanameva sambhavatīti dasseti “**idha panā**”tiādīnā. Kasmā pana saddantarasaṅkhātavisesavacane abhāvato eva. Visesavacane hi asati visesamicchatā viseso payojitabboti. Apica iriyāpathasamāyogaparidīpanassa atthato siddhattā tathādīpanameva sambhavatīti. Kasmā cāyamatto siddhoti? Dibbavihārādīnampi sādharāṇato. Kadācīpi hi iriyāpathavihārena vinā na bhavati tamantarena attabhāvaparīharaṇābhāvato.

Iriyaṃ pavattaṃ **iriyā**, kāyikakiriyā, tassā pavattanupāyabhāvato pathoti **iriyāpatho**, ṭhānaniṣajjādayo. Na hi ṭhānaniṣajjādiavattāhi vinā kañci kāyikaṃ kiriyāṃ pavattetuṃ sakkā, tasmā so tāya pavattanupāyoti vuccati. Viharati pavattati etena, viharāṇamattaṃ vā tanti **vihāro**, so eva vihāro tathā, atthato panesa ṭhānaniṣajjādiākārappavatto catusantirūpappabandhova. Divi bhavo **dibbo**, tattha bahulaṃ pavattiyā brahmapārisajjādidevaloke bhavoti attho, yo vā tattha dibbānubhāvo, tadatthāya saṃvattatīti **dibbo**, abhiññābhinihārādivasena vā mahāgatikattā **dibbo**, sova vihāro, dibbabhāvāvaho vā vihāro **dibbavihāro**, mahaggatajjhānāni. **Nettiyaṃ** [netti. 86 (atthato samānaṃ)] pana catasso āruppasamāpattiyō āneñjavihārāti visuṃ vuttaṃ, taṃ pana mettājjhānādīnaṃ brahmavihārātā viya tāsāṃ bhāvanāvisesabhāvaṃ sandhāya vuttaṃ. **Aṭṭhakathāsu** pana dibbabhāvāvahasamaññato tāpi “dibbavihārā” tveva vuttā. Brahmānaṃ, brahmabhūtā vā hitūpasamhārādivasena pavattiyā seṭṭhabhūtā vihārāti **brahmavihārā**, mettājjhānādivasena pavattā catasso appamaññāyo. Ariyā uttamā, anaññasādharaṇattā vā ariyānaṃ vihārāti **ariyavihārā**, catassopi phalasaṃpattiyō. Idha pana rūpāvacaracattajjhānaṃ, tabbasena pavattā appamaññāyo, cattajjhānikaaggaphalasaṃpattī ca bhagavato dibbabrahmaariyavihārā.

Aññataravihārasamaṅgīparidīpananti tāsamekato appavattattā ekena vā dvīhi vā samaṅgībhāvaparidīpanaṃ, bhāvalopenāyaṃ bhāvappadhānena vā niddeso. Bhagavā hi lobhadosaṃhassane loke sakapaṭipattiyā veneyyānaṃ vinayanatthaṃ taṃ taṃ vihāre upasampajja viharati. Tathā hi yadā sattā kāmesu vipaṭipajjanti, tadā kira bhagavā dibbena vihārena viharati tesāṃ alobhakusalāmūluppādanatthaṃ “appeva nāma imaṃ paṭipattiṃ disvā ettha rucimuppādetvā kāmesu virajjeyyu”nti. Yadā pana issariyatthaṃ sattesu vipaṭipajjanti, tadā brahmavihārena viharati tesāṃ adosakusalāmūluppādanatthaṃ “appeva nāma imaṃ paṭipattiṃ disvā ettha rucimuppādetvā adosena dosaṃ vūpasameyyu”nti. Yadā pana pabbajitā dhammādhikaraṇaṃ vivadanti, tadā ariyavihārena viharati tesāṃ amohakusalāmūluppādanatthaṃ “appeva nāma imaṃ paṭipattiṃ disvā ettha rucimuppādetvā amohena mohaṃ vūpasameyyu”nti. Evañca katvā imehi dibbabrahmaariyavihārehi sattānaṃ vividhaṃ hitasukhaṃ harati, iriyāpathavihārena ca ekaṃ iriyāpathabādhanāṃ aññena iriyāpathena vicchinditvā aparipatantaṃ attabhāvaṃ haratīti vuttaṃ “aññataravihārasamaṅgīparidīpana”nti.

“**Tenā**”tiādi yathāvuttasaṃvaṇṇanāya guṇadassanaṃ, tasmāti attho, yathāvuttatthasamatthanaṃ vā. Tena iriyāpathavihārena viharatīti sambandho. Tathā vadamāno pana **viharatīti** ettha **vi**-saddo vicchedanattahajotako, “**haratī**”ti etassa ca neti pavattatīti atthoti ñāpeti “**ṭhitopi**”tiādīnā vicchedanayanākārena vuttattā. Evañhi sati tattha kassa kena vicchindanaṃ, kathaṃ kassa nayananti antolīnacodanaṃ sandhāyāha. “**So hi**”tiādīti ayampi sambandho upapanno hoti. Yadi pi bhagavā ekeneva iriyāpathena cirataraṃ kālaṃ pavattetuṃ sakkoti, tathāpi upādinnakassa nāma sarīrassa ayaṃ sabhāvoti dassetuṃ “**ekaṃ iriyāpathabādhana**”ntiādi vuttaṃ. **Aparipatantanti** bhāvanapuṃsakaniddeso, apatamaṇaṃ katvāti attho. Yasmā pana bhagavā yattha katthaci vasanto veneyyānaṃ dhammaṃ desento, nānāsamāpattīhi ca kālaṃ vītināmento vasati, sattānaṃ, attano ca vividhaṃ sukhaṃ harati, tasmā vividhaṃ haratīti viharatīti evampettha attho veditabbo.

Gocaragāmanidassanatthaṃ “rājagahe”ti vatvā buddhānāmanurūpanivāsattṭhānadassanatthaṃ puna “ambavane”ti vuttanti dassento “**idamassā**”tiādīmāha. **Assāti** bhagavato. **Tassāti** rājagahasaṅkhātassa

gocaragāmassa. Yassa samīpavasena “rājagahe”ti bhummavacanam pavattati, sopi tassa samīpavasena vattabboti dasseti “**rājagahasamīpe ambavane**”ti iminā. **Samīpattheti** ambavanassa samīpatthe. **Etanti** “rājagahe”ti vacanam. **Bhumavacananti** ādhāravacanam. Bhavanti etthāti hi **bhumam**, ādhāro, tadeva vacanam tathā, bhumme pavattam vā vacanam vibhatti **bhumavacanam**, tena vuttam tathā, sattamīvibhattiyuttapadanti attho. Idam vuttam hoti – kāmam bhagavā ambavaneveva viharati. Tassamīpattā pana gocaragāmadassanatham bhummavacanavasena “rājagahe”tipi vuttam yathā tam “gaṅgāyaṃ gāvo caranti, kūpe gaggakula”nti cāti. Aneneva yadi bhagavā rājagahe viharati, atha na vattabham “ambavane”ti. Yadi ca ambavane, evampi na vattabham “rājagahe”ti. Na hi “pāṭaliputte pāsāde vasatī”tiādīsu viya idha adhikaraṇādhikaraṇassa abhāvato adhikaraṇassa dvayaniddeso yutto siyāti codanā anavakāsā katāti daṭṭhabham. Kumārabhato eva **komārabhacco** sakatthavuttipaccayena, niruttinayena vā yathā “bhisaggameva bhesajja”nti. “**Yathāhā**”tiādinā khandhakapālivasena tadattham sādheti. Kasmā ca ambavanam jīvakasambandham katvā vuttanti anuyogena mūlato paṭṭhāya tamattham dassento “**ayam panā**”tiādimāha.

Dosābhisannanti vātapittādivasena ussannadosam. **Virecivāti** dosappakopato vivecivā. **Siveyyakam dussayuganti** siviratthe jātam mahaggham dussayugam. **Divasassa dvattikkhattanti** ekasseva divasassa dvivāre vā tivāre vā bhāge, bhummatthe vā etam sāmivacanam, ekasmiṃyeva divase dvivāram vā tivāram vāti attho. **Tambapaṭṭavaṇṇenāti** tambalohapaṭṭavaṇṇena. **Sacivarabhattenāti** cīvarena, bhattena ca. “**Tam sandhāyā**”ti iminā na bhagavā ambavanamatteveva viharati, atha kho evam kate vihāre. So pana tadadhikaraṇatāya visum adhikaraṇabhāvena na vuttoti sandhāyabhāsitamattham dasseti. Sāmaññe hi sati sandhāyabhāsitaniddhāraṇam.

Aḍḍhena teḷasa **aḍḍhateḷasa**. Tādisehi **bhikkhusatehi**. Aḍḍho panettha satasseva. Yena hi payutto tabbhāgavācako aḍḍhasaddo, so ca kho paṇṇāsāva, tasmā paññāsāya ūnāni teḷasa bhikkhusatānīti attham viññāpetum “**aḍḍhasatenā**”tiādi vuttam. Aḍḍhameva satam satassa vā aḍḍham tathā.

Rājatīti attano issariyasampattiyā dibbati sobhati ca. **Raṇjetīti** dānādinā, sassamedhādinā ca catūhi saṅgahavatthūhi rameti, attani vā rāgam karotīti attho. **Ca**-saddo cettha vikappanatto. Janapadavācino puthuvacanaparattā “**magadhāna**”nti vuttam, janappadāpadesena vā tabbāsikānam gahitattā. **Raṇṇōti** pitu bimbisāraṇṇō. Sasati hiṃsatīti **sattu**, verī, ajātoyeveva sattu **ajātasattu**. “**Nemittakehi niddiṭṭho**”ti vacanena ca ajātassa tassa sattubhāvo na tāva hoti, sattubhāvassa pana tathā niddiṭṭhattā evam voharīyatīti dasseti. Ajātasseeva pana tassa “raṇṇō lohitaṃ piveyya”nti deviyā dohaḷassa pavattattā ajātoyevesa raṇṇō sattūtipi vadanti.

“**Tasmi**”ntiādinā tadattham vivarati, samattheti ca. **Dohaḷoti** abhilāso. **Bhāriyeti** garuke, aññesaṃ asakkuṇeyye vā. **Asakkontīti** asakkuṇamānā. **Akathentīti** akathayamānā samānā. **Nibandhitvāti** vacasā bandhitvā. **Suvaṇṇasatthakenāti** suvaṇṇamayena satthakena, ghanasuvaṇṇakatenāti attho. Ayomayañhi raṇṇō sarīram upanetum ayuttanti vadanti. Suvaṇṇaparikkhatena vā ayomayasatthenāti atthepi ayamevādhippāyo. **Bāhuṃ phālāpetvāti** lohitasirāvedhavasena bāhuṃ phālāpetvā. Kevalassa lohitassa gabbhiniyā dujjīrabhāvato udakena sambhinditvā pāyesi. **Haññissatīti** haññissate, āyatim hanīyateti attho. Nemittakānam vacanam tatham vā siyā, vitatham vāti adhippāyena “**puttoti vā dhītāti vā na paññāyati**”ti vuttam. “**Attano**”tiādinā aññampi kāraṇam dassetvā nivāresi. Raṇṇō bhāvo **rajjam**, rajjassa samīpe pavattatīti **oparajjam**, ṭhānantaram.

Mahāti mahatī. Samāse viya hi vākyepi mahantasaddassa mahādeso. **Dhurāti** gaṇassa dhurabhūtā, dhorayhā jeṭṭhakāti attho. **Dhuram nīharāmīti** gaṇadhuramāvahāmi, gaṇabandhiyam nibbattessāmīti vuttam hoti. “**So na sakkā**”tiādinā puna cintanākāram dasseti. **Iddhipāṭihāriyenāti** ahimekhalikakumāraṇṇavikubbaniddhinā. **Tenāti** appāyukabhāvena. **Hīti** nipātamattam. **Tena hīti** vā uyyojanathe nipāto. Tena vuttam “kumāram...pe... uyyojeṣī”ti. **Buddho bhavissāmīti** ettha itī-saddo idamattho, iminā khandhake āgatanayenāti attho. **Pubbe khoti**tiādihipi khandhakapāliyeveva (cūḷava. 339).

Potthaniyanti churikaṃ. Yaṃ “nakhara”ntipi vuccati, **divā divaseti** (dī. ni. ṭī. 1.150) divasassapi divā. Sāmyatthe hetamaṃ bhummavacanamaṃ “divā divasassā”ti aññattha dassanato. Divassa divasetipi vaṭṭati akārantassapi divasaddassa vijjamānattā. Nepātikampi divāsaddamicchanti saddavidū, majjhanhikavelāyanti attho. Sā hi divasassa viseso divasoti. “**Bhīto**”tiādi pariyāyo, kāyathambhanena vā **bhīto**. Hadayamaṃsacalanena **ubbiggo**. “Jāneyyumaṃ vā, mā vā”ti parisāṅkāya **ussāṅki**. Nāte sati attano āgacchamānabhayavasena **utrasto**. **Vuttappakāraṇti** devadattena vuttākāraṃ **vippakāraṇti** apakāraṃ anupakāraṃ, viparītakkiccam vā. **Sabbe bhikkhūti** devadattaparisaṃ sandhāyāha.

Acchindivāti apanayanavasena vilumpitvā. **Rajjenāti** vijitena. Ekassa rañño āṇāpavattiṭṭhānaṃ “rajja”nti hi vuttamaṃ, rājabhāvena vā.

Manaso attho icchā **manoratho** ra-kārāgamaṃ, ta-kāralopaṅca katvā, cittassa vā nānārammaṇesu vibbhamakaraṇato manaso ratho iva **manoratho**, mano eva ratho viyāti vā **manorathoti** neruttikā vadanti. **Sukiccakārimhīti** sukiccakārī amhi. **Avamānanti** avamaññaṃ anādaraṃ. **Mūlaghaccanti** jīvitā voropanaṃ sandhāyāha, bhāvanapumaṃsakametaṃ. Rājakulānaṃ kira satthena ghātaṇaṃ rājūnāmanāciṇṇaṃ, tasmā so “**nanu bhante**”tiādimāha. **Tāpanagehaṃ** nāma uṇhagahāpanagehaṃ, taṃ pana dhūmeneva acchinnā. Tena vuttamaṃ “**dhūmaghara**”nti. **Kammakaraṇatthāyāti** tāpana kammakaraṇatthameva. Kenaci chādītattā ucco aṅgoti **uccaṅgo**, yassa kassaci gahaṇatthamaṃ paṭicchanno unnatāṅgoti idha adhippeto. Tena vuttamaṃ “**uccaṅgaṃ katvā pavisitumaṃ mā dethā**”ti. “**Ucchaṅge katvā**”tipi pāṭho, evamaṃ sati majjhimaṅgova, ucchaṅge kiñci gahetabbaṃ katvāti attho. **Moḷiyanti** cūḷāyaṃ “chetvāna moḷiṃ varagandhavāsita”ntiādisu (ma. ni. aṭṭha. 2.1; saṃ. ni. aṭṭha. 2.2.55; apa. aṭṭha. 1.avidūrenidānakathā; bu. vaṃ. aṭṭha. 27.avidūrenidānakathā; jā. aṭṭha. 1.avidūrenidānakathā) viya. Tenāha “**moḷiṃ bandhitvā**”ti. **Catumadhurenāti** sappisakkaramadhunālīkerasnehasaṅkhātehi catūhi madhurehi abhisāṅkhatapānavisesenāti vadanti, taṃ mahādhammasamādānasuttapāḷiyā (ma. ni. 1.473) na sameti. Vuttañhi tattha “dadhi ca madhu ca sappi ca phāṇitaṅca ekajjhaṃ saṃsaṭṭha”nti, (ma. ni. 1.485) **tadaṭṭhakathāyāṅca** vuttamaṃ “**dadhi ca madhu cāti** suparisuddhaṃ dadhi ca sumadhuraṃ madhu ca. **Ekajjhaṃ saṃsaṭṭhanti** ekato katvā missitaṃ āluḷitaṃ. **Tassa tanti** tassa taṃ catumadhurabhesajjaṃ pivato”ti “attupakkamena maraṇaṃ na yutta”nti manasi katvā **rājā tassā sarīraṃ lehitvā yāpeti**. Na hi ariyā attānaṃ vinipātentī.

Maggaphalasukhenāti maggaphalasukhavatā, sotāpattimaggaphalasukhūpasañhitena caṅkamaṇa yāpetūti attho. **Hāressāmīti** apanessāmi. **Vitaccitehīti** vigataaccitehi jālavigatehi suddhaṅgārehi. **Kenaci saññattoti** kenaci sammā ñāpito, ovaḍitoti vuttamaṃ hoti. **Massukaraṇatthāyāti** massuvisodhanatthāya. **Manamaṃ karoṭhāti** yathā rañño manamaṃ hoti, tathā karoṭha. **Pubbeti** purimabhava. **Cetiyaṅgaṇeti** gandhapupphādīhi pūjanaṭṭhānabhūte cetiyassa bhūmitale. **Nisajjanatthāyāti** bhikkhusaṅghassa nisīdanatthāya. **Paññattakaṭasārakanti** paññapetabbauttamakilaṅgaṃ. Tathāvidho kilaṅgo hi “kaṭasārako”ti vuccati. **Tassāti** yathāvuttassa kammadvayassa. Taṃ pana manopadosavaseneva tena katanti daṭṭhabbaṃ. Yathāha –

“Manopubbaṅgamā dhammā, manoseṭṭhā manomayā;
Manasā ce paduṭṭhena, bhāsati vā karoti vā;
Tato naṃ dukkhamanveti, cakkamaṃva vahato pada”nti. (dha. pa. 1; netti. 90);

Paricārakoti sahāyako. Abhedepi bhedamiva vohāro loke pākaṭoti vuttamaṃ “**yakkho hutvā nibbattī**”ti. Ekāyapi hi uppādakiriyāya idha bhedavohāro, paṭisandhivasena hutvā, pavattivasena nibbattīti vā paccekamaṃ yojetabbaṃ, paṭisandhivasena vā pavattanasāṅkhātaṃ sātisayanibbattanaṃ ñāpetumaṃ ekāyeva kiriyā padadvayena vuttā. Tathāvacanāñhi paṭisandhivasena nibbattaneyeva dissati “makkaṭako nāma devaputto hutvā nibbatti (dha. pa. aṭṭha. 1.5) kaṅṭako nāma...pe... nibbatti, (jā. aṭṭha. 1.avidūrenidānakathā) maṅḍūko nāma...pe... nibbattī”tiādisu viya. Dvinnamaṃ vā padānaṃ bhāvatthamapekkhitvā “yakkho”tiādisu sāmīatthe paccattavacanamaṃ kataṃ purimāya pacchimavisesanato, paricārakassa...pe... yakkhassa bhāvena nibbattīti attho, hetvatthe vā ettha tvā-

saddo yakkhassa bhāvato pavattanahetūti. Assa pana rañño mahāpuññassapi samānassa tattha bahulaṃ nibbattapubbatāya ciraparicitanikanti vasena tattheva nibbatti veditabbā.

Taṃ divasamevāti rañño maraṇadivaseyeva. **Khobhetvāti** puttasnehassa balavabhāvato, taṃsahajātapīti vegassa ca savipphāratāya taṃ samuṭṭhānarūpadhammehi pharaṇavasena sakalasarīraṃ āloḷetvā. Tenāha “**aṭṭhimiṅjaṃ āhacca aṭṭhāsī**”ti. **Pituguṇanti** pituno attani sinehaguṇaṃ. Tena vuttaṃ “**mayi jātepi**”tiādi. **Vissajjetha vissajjethāti** turitavasena, sokavasena ca vuttaṃ.

Anuṭṭhubhitvāti achaddetvā.

Nālāgirihatthiṃ muñcāpetvāti ettha **iti**-saddo pakārattho, tena “abhimārapurisasenādippakārenā”ti pubbe vuttappakāratthayaṃ paccāmasati, katthaci pana so na diṭṭho. **Pañca vatthūnīti** “sādhu bhante bhikkhū yāvajīvaṃ āraññikā assū”tiādinā (pārā. 409; cūḷava. 343) vinaye vuttāni pañca vatthūni. **Yācitvāti** ettha yācanaṃ viya katvāti attho. Na hi so paṭipajjitukāmo yācatīti ayamatto **vinaye** (pārā. aṭṭha. 2.410) vuttoyeva. **Saññāpessāmīti** cintevā saṅghabhedam katvāti sambandho. Idañca tassa anikkhattadhuratādassanavasena vuttaṃ, so pana akatepi saṅghabhede tehi saññāpetiyeva. **Uṇhalohitanti** balavasokasamuṭṭhitaṃ uṇhabhūtaṃ lohitaṃ. **Mahānirayeti** avīciniraye. **Vitthārakathānayo**ti ajātasattupāsādanādivasena vitthārato vattabbāya kathāya nayamattaṃ. Kasmā panettha sā na vuttā, nanu saṅgītikathā viya **khandhake** (cūḷava. 343) āgatāpi sā vattabbāti codanāya āha “**āgatattā pana sabbam na vutta**”nti, khandhake āgatattā, kiñcimattassa ca vacanakkamassa vuttattā na ettha koci virodhoti adhippāyo. “**Eva**”ntiādi yathānusandhinā nigamaṇaṃ.

Kosalaraññoti pasenadikosalassa pitu mahākosalarañño. Nanu videhassa rañño dhītā vedehīti attho sambhavatīti codanamapaneti “**na videharañño**”ti iminā. Atha kenatṭhenāti āha “**paṇḍitādhivacanameta**”nti, paṇḍitavevacanaṃ, paṇḍitanāmanti vā attho. Ayaṃ pana padattho kena nibbacanenāti vuttaṃ “**tatrāya**”ntiādi. **Vidantīti** jānanti. **Vedenāti** karaṇabhūtena ñāṇena. “**Ihāti**”ti etassa pavattatītipi attho **ṭikāyaṃ** vutto. **Vedehīti** idha nadādigāṇoti āha “**vedehiyā**”ti.

Soyeva aho **tadaho**, sattamīvacanena pana “**tadahū**”ti padasiddhi. **Etthāti** etasmiṃ divase. Upasaddena visiṭṭho vasasaddo upavasaneyeva, na vasanamatte, upavasanañca samādānamevāti dassetuṃ “**sīlenā**”tiādi vuttaṃ. Ettha ca **sīlenāti** sāsane ariyuposathaṃ sandhāya vuttaṃ. **Anasanenāti** abhuñjanamattasaṅkhātāṃ bāhiruposathaṃ. **Vā**-saddo cettha aniyamatto, tena ekaccaṃ manoduccaritaṃ, dussīlyādiñca saṅgañhāti. Tathā hi gopālakuposatho abhijjhāsahagatassa cittassa vasena vutto, nigaṇṭhuposatho mosavajjādivasena. Yathāha visākhuposathe “so tena abhijjhāsahagatena cetasā divasaṃ atināmetī”ti, (a. ni. 3.71) “iti yasmiṃ samaye sacce samādapetabbā, musāvāde tasmīṃ samaye samādapetī”ti (a. ni. 3.71) ca ādi.

Evam adhippetatthānurūpaṃ nibbanaṃ dassetvā idāni atthuddhāravasena nibbanaṇurūpaṃ adhippetatthaṃ dassetuṃ “**ayaṃ panā**”tiādimāha. **Etthāti** uposathasaddo. Samānasaddavacanīyānaṃ anekappabhedānaṃ atthānamuddharaṇaṃ **atthuddhāro** samānasaddavacanīyesu vā atthesu adhippetasseva atthassa uddharaṇaṃ **atthuddhāro**tipi vaṭṭati. Anekattadassanañhi adhippetatthassa uddharaṇatthameva. Nanu ca “atthamattaṃ pati saddā abhinivisanti”tiādinā atthuddhāre codanā, sodhanā ca heṭṭhā vuttāyeva. Apica visesasaddassa avācakabhāvato pātimokkhuddesādivisayopi uposathasaddo sāmāññarūpo eva, atha kasmā pātimokkhuddesādivisesavisayo vuttoti? Saccametaṃ, ayaṃ panattho tādisaṃ saddasāmāññamanādiyitvā tattha tattha sambhavatthadassanavaseneva vuttoti, evaṃ sabbattha. Sīladiṭṭhivasena (sīlasuddhivasena dī. ni. 1.150) upetehi samaggehi vasīyati na uṭṭhīyatīti **uposatho**, pātimokkhuddeso. Samādānavasena, adhiṭṭhānavasena vā upecca ariyavāsādiatthāya vasitabbo āvasitabboti **uposatho**, sīlaṃ. Anasādivasena upecca vasitabbo anuvasitabboti **uposatho**, vatasamādānasaṅkhāto upavāso. Navamahatthikulapariyāpanne hatthināge kiñci kiriyamanapekkhitvā taṃkulasambhūtatāmattaṃ pati ruḷhivaseneva **uposathoti** sāmāññā, tasmā tattha nāmapaññatti veditabbā. Arayo upagantvā useti dāhetīti **uposatho**, usasaddo dāhetipi saddavidū

vadanti. Divase pana uposatha saddapavatti aṭṭhakathāyaṃ vuttāyeva. **“Suddhassa ve sadāphaggū”**tiādīsu **suddhassāti** sabbaso kilesamalābhāvena parisuddhassa. **Veti** nipātamattaṃ, byattanti vā attho. **Sadāti** niccakālampi. **Phaggūti** phagguṇīnakkhattameva yuttaṃ bhavati, niruttinayena cetassa siddhi. Yassa hi sundarikabhāradvājassa nāma brāhmaṇassa phagguṇamāse uttaraphagguṇīyuttadivase titthanhānaṃ karontassa saṃvaccharampi katapāpapavāhanaṃ hotīti laddhi. Tato taṃ vivecetum idaṃ majjhimāgamāvare mūlapaṇṇāsake vatthasutte bhagavatā vuttaṃ. **Suddhassuposatho sadāti** yathāvuttakilesamalassuddhiyā parisuddhassa uposathaṅgāni, vatasamādānāni ca asamādiyatopi niccakālaṃ uposathavāso eva bhavatīti attho. **“Na bhikkhave”**tiādīsu **“abhikkhuko āvāso na gantabbo”**ti nīharitvā sambandho. **Upavasitabbadivasoti** upavasana karaṇadivaso, adhikaraṇe vā tabbasaddo daṭṭhabbo. Evañhi aṭṭhakathāyaṃ vuttanibbacanena sameti. Antogadhāvadhāraṇena, aññatthāpohanena ca nivāraṇaṃ sandhāya **“sesadvayanivāraṇattha”**nti vuttaṃ. **“Pannarase”**ti padamārabha divasavasena yathāvuttanibbacanaṃ katanti dassento **“teneva vutta”**ntiādīmāha. Pañcadasannaṃ tithīnaṃ pūraṇavasena **“pannaraso”**ti hi divaso vutto.

“Tāni ettha santī”ti ettakeyeva vutte nanvetāni aññatthāpi santīti codanā siyāti taṃ nivāretum **“tadā kirā”**tiādī vuttaṃ. Anena bahuso, atisayato vā ettha taddhitavisayo payuttoti dasseti. Cātumāsī, cātumāsīnti ca paccayavisesena itthilingeyeva pariyāyavacanaṃ. **Pariyosānabhūtāti** ca pūraṇabhāvameva sandhāya vadati tāya saheva catumāsaparipuṇṇabhāvato. **Idhāti** pāliyaṃ. Tīhi ākārehi pūretīti **puṇṇāti** atthaṃ dasseti **“māsapuṇṇatāyā”**tiādīnā. Tattha tadā kattikamāsassa puṇṇatāya **māsapuṇṇatā**. Purimapuṇṇamito hi paṭṭhāya yāva aparā puṇṇamī, tāva eko māsoti tattha vohāro. Vassānassa utuno puṇṇatāya **utupuṇṇatā**. Kattikamāsalakkhitassa saṃvaccharassa puṇṇatāya **saṃvaccharapuṇṇatā**. Purimakattikamāsato pabhuti yāva aparakattikamāso, tāva eko kattikasamvaccharoti evaṃ saṃvaccharapuṇṇatāyāti vuttaṃ hoti. Lokikānaṃ matena pana māsavasena saṃvaccharasamaññā lakkhitā. Tathā ca lakkhaṇaṃ garusaṅkantivasena. Vuttañhi **jotisatthe** –

“Nakkhattena sahodaya-matthaṃ yāti sūramanti;
Tassa saṅkaṃ tatra vattabbaṃ, vassaṃ māsakamenevā”ti.

Minīyati divaso etenāti **mā**. Tassa hi gatiyā divaso minitabbo **“pāṭipado dutiyā, tatiyā”**tiādīnā. **Ettha puṇṇoti** etissā rattiyā sabbakalāpāripūriyā puṇṇo. Candassa hi soḷasamo bhāgo **“kalā”**ti vuccati, tadā ca cando sabbāsampi soḷasannaṃ kalānaṃ vasena paripuṇṇo hutvā dissati. Ettha ca **“tadahuposathe pannarase”**ti padāni divasavasena vuttāni, **“komudiyā”**tiādīni tadekadesarattivasena.

Kasmā pana rājā amaccaparivuto nisinno, na ekakovāti codanāya sodhanālesam dassetuṃ pāḷipadattameva avatvā **“evarūpāyā”**tiādīnipi vadati. Etehi cāyaṃ sodhanāleso dassito **“evaṃ ruciyamānāya rattiyā tadā pavattattā tathā parivuto nisinno”**ti. **Dhoviyaṃ mānadisābhāgāyāti** etthāpi viyasaddo yojetabbo. **Rajatavimānaniccharitehīti** rajatavimānato nikkhantehi, rajatavimānappabhāya vā vipphuritehi. **“Visaro”**ti idaṃ muttāvalīādīnampi visesanapadaṃ. Abbhaṃ dhūmo rajo rāhūti ime cattāro upakkilesā pāḷinayena (a. ni. 4.50; pāci. 447). **Rājāmaccehīti** rājakulasamudāgatehi amaccehi. Atha vā anuyuttakarājūhi ceva amaccehi cāti attho. **Kaṅcanāsaneti** sīhāsane. **“Raññaṃ tu hemamāsanam, sīhāsanamatho vāḷabījanitthī ca cāmara”**nti hi vuttaṃ. **Kasmā nisinnoti** nisīdanamate codanā. **Eta** nti kandaṃ, pabodhanaṃ vā. **Itīti** iminā hetunā. **Nakkhatta** nti kattikānakkhattaṇaṃ. Sammā ghoṣitabbaṃ etarahi nakkhattanti **saṅghuṭṭhaṃ**. Pañcavaṇṇakusumehi lājena, puṇṇaghaṭehi ca paṭimaṇḍitaṃ ghāresu dvāraṃ yassa tadetaṃ nagaraṃ **pañca...pe... dvāraṃ. Dhajo** vaṭo. **Paṭāko** paṭṭoti sīhāliyā vadanti. Tadā kira padīpujjalanāsīsenā katanakkhattaṃ. Tathā hi **ummādantijātakādīsipi** (jā. 2.18.57) kattikamāse evameva vuttaṃ. Tenāha **“samujjalitadīpamālālaṅkatasabbadisābhāga”**nti. **Vīthi** nāma rathikā mahāmaggo. **Racchā** nāma anibbiddhā khuddakamaggo. Tattha tattha nisinnavasena samānabhāgena pāṭiyekkaṃ nakkhattakīlaṃ anubhavamānena samabhikiṇṇanti vuttaṃ hoti. **Mahāaṭṭhakathāyaṃ** evaṃ vatvāpi tattheva iti sannīṭhānaṃ katanti attho.

Udānaṃ udāhāroti atthato ekaṃ. **Mānanti** mānapattaṃ kattubhūtaṃ. Chaḍḍanavasena **avaseko**. Sotavasena **ogho**. **Pītivacananti** pītisamuṭṭhānavacanāṃ kammabhūtaṃ. **Hadayanti** cittaṃ kattubhūtaṃ. **Gahetunti** bahi aniccharaṇavasena gaṇhituṃ, hadayantoyeva ṭhapetuṃ na sakkotīti adhippāyo. Tena vuttaṃ “**adhikaṃ hutvā**”tiādi. Idaṃ vuttaṃ hoti – yaṃ vacanaṃ paṭiggāhaka nirapekkhaṃ kevalaṃ ulārāya pītiyā vasena sarasato sahasāva mukhato niccharati, tadevidha “udāna”nti adhippetanti.

Dosehi itā gatā apagatāti **dosinā** ta-kārassa na-kāraṃ katvā yathā “kilese jito vijitāvīti jino”ti āha “**dosāpagatā**”ti. Yadi pi sutte vuttaṃ “cattārome bhikkhave candimasūriyānaṃ upakkilesā, yehi upakkilesehi upakkiliṭṭhā candimasūriyā na tapanti na bhāsanti na virocanti. Katame cattāro? Abbhā bhikkhave...pe... mahikā. Dhūmo rajo. Rāhu bhikkhave candimasūriyānaṃ upakkilesa”ti, (cūlava. 447) tathāpi tatiyupakkilesassa pabhedadassana vasena aṭṭhakathānayena dassetuṃ “**pañcahi upakkilesehi**”ti vuttaṃ. Ayamatto ca ramaṇīyādisaddayogato ñāyatīti āha “**tasmā**”tiādi. Anīya-saddopi bahulā katvatthābhidhāyako yathā “niyyānikā dhammā”ti (dha. sa. dukamātikā 96) dasseti “**ramayati**”ti iminā. Juṅhāvasena rattiyā surūpattamāha “**vuttadosavimuttāyā**”tiādinā. Abbhādayo cettha vuttadosā. Ayañca hetu “**dassituṃ yuttā**”ti etthāpi sambajjhitabbo. Tena kāraṇena, utusampattiyā ca pāsādikatā datṭhabbā. Īdisāya rattiyā yutto divaso māso utu saṃvaccharoti evaṃ divasamāsādīnaṃ **lakkhaṇā** sallakkhaṇupāyā **bhavituṃ yuttā**, tasmā lakkhitabbāti **lakkhaṇiyā**, sā eva **lakkhaṇā** ya-vato ṇa-kārassa ṇa-kārādesavasena yathā “pokkharāṇṇo sumāpitā”ti āha “**divasamāsādīna**”ntiādi.

“Yaṃ no payirupāsato cittaṃ pasīdeyyā”ti vacanato **samaṇaṃ vā brāhmaṇaṃ vāti** ettha paramatthasamaṇo, paramatthabrāhmaṇo ca adhippeto, na pana pabbajjāmatthasamaṇo, na ca jātimattabrāhmaṇoti vuttaṃ “**samītapāpatāyā**”tiādi. Bahati pāpe bahi karotīti **brāhmaṇo** niruttinayena. Bahuvacane vattabbe ekavacanāṃ, ekavacane vā vattabbe bahuvacanāṃ vacanabyattayo vacanavipallāsoti attho. Idha pana “payirupāsato”nti vattabbe “payirupāsato”ti vuttattā bahuvacane vattabbe ekavacanavasena vacanabyattayo dassito. Attani, garuṭṭhāniye ca hi ekasmimpi bahuvacanappayogo niruḷho. **Payirupāsato**ti ca vaṇṇavipariyāyaniddeso esa yathā “payirudāhāsī”ti. Ayañhi bahulaṃ diṭṭhapayogo, yadidaṃ parisadde ya-kārapare vaṇṇavipariyāyo. Tathā hi akkharacintakā vadanti “pariyādīnaṃ rayādivaṇṇassa yarādīhi vipariyāyo”ti. **Yanti** samaṇaṃ vā brāhmaṇaṃ vā. **Iminā sabbenapi vacanenāti** “ramaṇīyā vatā”tiādivacanena. **Obhāsanimittakammanti** obhāsabhūtaṃ nimittakammaṃ, pariyyattaṃ nimittakaraṇanti attho. **Mahāparādhatāyāti** mahādosatāya.

“**Tena hi**”tiādi tadatthavivaraṇaṃ. **Devadatto cāti** ettha ca-saddo samuccayavasena atthupanayane, tena yathā rājā ajātasattu attano pitu ariyasāvakaṃ satthu upaṭṭhākaṃ ghātanena mahāparādho, evaṃ bhagavato mahānatthakarassa devadattassa apassayabhāvenāpīti imamatthaṃ upaneti. **Tassa piṭṭhichāyāyāti** vohāramattaṃ, tassa jīvakaṃ piṭṭhiapassayena, taṃ pamukhaṃ katvā apassāyāti vuttaṃ hoti. **Vikkhepapacchedanattanti** vakkhamānāya attano kathāya uppajjanakavikkhepassa pacchindanattthaṃ, anuppajjanattanti adhippāyo. Tenāha “**tassaṃ hi**”tiādi. **Asikkhitānanti** kāyavacīsaṃyamane vigatasikkhānaṃ. **Kulūpaketī** kulamupagate satthāre. **Gahitāsāratāyāti** gahetabbaguṇasāravigatatāya. **Nibbikkhepanti** añṇesamapanayanavirahitaṃ.

Bhaddanti avassayasampannatāya sundaraṃ.

151. Ayañcattho imāya pāḷicchāyāya adhigato, imamatthameva vā antogadhaṃ katvā pāḷiyamevaṃ vuttanti dasseti “**tenāha**”tiādinā. Asatthāpi samāno satthā paṭiññāto yenāti **satthupaṭiññāto**, tassa abuddhassāpi samānassa buddhapaṭiññātassa “ahameko loke atthadhammānusāsako”ti ācariyapaṭiññātabhāvaṃ vā sandhāya evaṃ vuttaṃ. “**So kirā**”tiādinā anussutimattaṃ pati porāṇaṭṭhakathānayova kirasaddena vutto. Esa nayo parato makkhalipadanibbanepi. **Ekūnadāsasatam pūrayamānoti** ekenūnadāsasatam attanā saddhiṃ anūnadāsasatam katvā pūrayamāno. Evaṃ jāyamāno cesa maṅgaladāso jāto. **Jātarūpenevāti** mātukucchito vijātaveseneva,

yathā vā sattā anivatthā apārutā jāyanti, tathā jātarūpeneva. **Upasaṅkamantī**ti upagatā bhajantā honti. **Tadeva pabbajjaṃ aggahesī**ti tadeva naggarūpaṃ “ayameva pabbajjā nāma siyā”ti pabbajjaṃ katvā aggahesi. **Pabbajjimsūti** taṃ pabbajitamanupabbajjimsu.

“**Pabbajitasamūhasaṅkhāto**”ti etena pabbajitasamūhatāmattena saṅgho, na niyyānikadiṭṭhivisuddhasīlasāmaññavasena saṃhatattāti dasseti. **Assa atthīti** assa satthupaṭiññātassa parivārabhāvena atthi. “**Saṅghī gaṇī**”ti cedam pariyaṃyavacanam, saṅketamattato nānanti āha “**svevā**”tiādi. **Svevāti** ca pabbajitasamūhasaṅkhāto eva. Keci pana “pabbajitasamūhasasena **saṅghī**, gahaṭṭhasamūhasasena **gaṇī**”ti vadanti, taṃ tesam matimattam gaṇe eva loke saṅgha-saddassa nirulhattā. Acelakavatacariyādi attanā parikappitamattam **ācāro**. **Paññāto pākaṭo** saṅghīādibhāvena. **Appiccho santuṭṭhoti** atthato ekaṃ. Tattha labbhamānāpicchatam dassetuṃ “**appicchatāya vatthampi na nivāsetī**”ti vuttam. Na hi tasmim sāsanike viya santagunāniggūhaṇalakkhaṇā appicchatā labbhati. **Yasoti** kittisaddo. Taranti etena saṃsāroghanti evam sammatatāya laddhi **tittam** nāma “sādhū”ti sammato, na ca sādhūhi sammatoti atthamāha “**aya**”ntiādinā. Na hi tassa sādhūhi sammatatā labbhati. **Sundaro sappurisoti** dvidhā attho. **Assutavatoti** assutāriyadhammassa, kattutthe cetam sāmivacanam. “Imāni me vatasamādānāni ettakam kālam suciṇṇāni”ti bahū rattiyo jānāti. Tā panassa rattiyo cīrakālabhūtāti katvā “**cīram pabbajitassā**”tiādi vuttam, antatthaaññapadatthasamāso cesa yathā “māsajāto”ti. Atha tassa padadvayassa ko visesoti ce? Cīrapabbajitaggaṇeṇassa buddhisīlatā, rattaññūggaṇeṇa tattha sampajānatā dassitā, ayametassa visesoti. Kiṃ pana attham sandhāya so amacco āhāti vuttam “**acīrapabbajitassā**”tiādi. **Okappanīyāti** saddahanīyā. **Addhānanti** dīghakālam. Kittako pana soti āha “**dve tayo rājaparivaṭṭe**”ti, dvinnam, tiṇṇam vā rājūnam rajjānūsānapaṭipāṭiyoti attho. “Addhagato”ti vatvāpi puna katam vayagggaṇam osānavayāpekkham padadvayassa atthavisesasambhavatoti dasseti “**pacchimavaya**”nti iminā. **Ubhayanti** “addhagato, vayoanuppatto”ti padadvayam.

Kājaro nāma eko rukkhaviseso, yo “paṇṇakarukkho”tipi vuccati. Disvā viya anattamanoti sambandho. Pubbe pītārā saddhim satthu santikam gantvā desanāya sutapubbataṃ sandhāyāha “**jhānā...pe...kāmo**”ti. **Tilakkhaṇabbhāhatanti** tīhi lakkhaṇehi abhiggaṭitam. **Dassanenāti** nidassanamattam. So hi disvā tena saddhim allāpasallāpam katvā, tato akiriyavādam sutvā ca anattamano ahoṣi. **Guṇakathāyāti** abhūtaguṇakathāya. Tenāha “**suṭṭhutam anattamano**”ti. Yadi anattamano, kasmā tuṅhī ahoṣīti codanam visodheti “**anattamano samānopī**”tiādinā.

152. Gosālāyāti evaṃnāmake gāmeti vuttam. Vassānakāle gunnam paṭiṭṭhitasālāyāti pana atthe tabbasena tassa nāmam sātisayamupannaṃ hoti bahulamanaññasādhāraṇattā, tathāpi so porāṇehi ananussutoti ekaccavādo nāma kato. “**Mā khalīti sāmiko āhā**”ti iminā tathāvacanamupādāya tassa ākhyātapadena samaññāti dasseti. Saññāya hi vattumicchāya ākhyātapadampi nāmikam bhavati yathā “aññāsikoṇḍaṇṇo”ti (mahāva. 17). **Sesanti** “so paṇṇena vā”tiādivacanam.

153. Dāsādīsu sirivaḍḍhakādināmamiva **ajitoti** tassa nāmamattam. Kesehi vāyito kambalo yassātipi yujjati. **Paṭikiṭṭhataranti** nihīnataram. “**Yathāhā**”tiādinā aṅguttarāgame tikanipāte makkhalisutta (a. ni. 3.138) māhari. **Tantāvutānīti** tante vītāni. “**Sīte sīto**”tiādinā chahākārehi tassa paṭikiṭṭhataram dasseti.

154. Pakujjhati sammādiṭṭhikesu byāpajjātīti **pakudho**. **Vaccam katvāpīti** ettha pi-saddena bhojanam bhujjivāpi kenaci asucinā makkhitvāpīti imamattham sampiṇḍeti. **Vālikāthūpam katvāti** vatasamādānasīsenā vālikāsañcayam katvā, tathārūpe anupagamanīyaṭṭhāne puna vatam samādāya gacchatīti vuttam hoti.

156. “Gaṇṭhanakilesa”ti etassa “palibundhanakilesa”ti atthavacanam, saṃsāre paribundhanakicco khattavatthuputtadārādivisayo rāgādikilesoti attho. “**Evaṃvāditāyā**”ti iminā laddhivasenassa nāmam, na panatthatoti dasseti. Yāva hi so maggena samugghāṭito, tāva atthiyeva.

Ayaṃ pana vacanattho – “natthi mayhaṃ gaṇṭho”’ti gaṇḥātīti **nigaṇṭhoti**. **Nāṭassāti** evaṃnāmakassa.

Komārabhaccajīvakakathāvaṇṇanā

157. Sabbathā tuṇhībhūtabhāvaṃ sandhāya “**esa nāga...pe... viyā**”’ti vuttaṃ. **Supaṇṇoti** garuḷo, garuḷo vā sakkaṭamatena. “Ḍa-lāna’ maviseso”’ti hi tattha vadanti. Yathādhippāyaṃ na vattatīti katvā “**anatto vata me**”’ti vuttaṃ. **Upasantassāti** sabbathā saññamena upasamaṃ gatassa. Jīvakassa tuṇhībhāvo mama adhippāyassa maddanasadiso, tasmā tadeva tuṇhībhāvaṃ pucchitvā kathāpanena mama adhippāyo sampādetabboti ayamettha rañño adhippāyoti dassento “**hatthimhi kho panā**”’tiādīmāha. **Kinti** kāraṇapucchāyaṃ nipātoti dasseti “**kena kāraṇenā**”’ti iminā, yena tuvaṃ tuṇhī, kiṃ taṃ kāraṇanti vā atthaṃ dasseti. Tattha yathāsambhavaṃ kāraṇaṃ uddharitvā adhippāyaṃ dassetuṃ “**imesa**”’ntiādi vuttaṃ. **Yathā etesanti** etesaṃ kulūpako atthi yathā, imesaṃ nu kho tiṇṇaṃ kāraṇaṃ aññatarena kāraṇena tuṇhī bhavasīti pucchati adhippāyo.

Kathāpetīti kathāpetukāmo hoti. **Pañcapatiṭṭhitenāti** ettha pañcahi aṅgehi abhimukhaṃ ṭhitenāti attho, pādajāṇu kappara hattha sisasaṅkhātāni pañca aṅgāni samaṃ katvā onāmetvā abhimukhaṃ ṭhitenā paṭhamaṃ vanditvāti vuttaṃ hoti. Yampi vadanti “navakatarenupāli bhikkhūna vuddhatarassa bhikkhuno pāde vandantena ime pañca dhamme ajjhattaṃ upaṭṭhāpetvā pādā vanditabbā’ tiādikaṃ (pari. 469) vinayapāḷimāharitvā ekamaṣakaraṇaṇāñjalipaggahaṇapādasambāhanapemagāravupaṭṭhāpanavasena pañcapatiṭṭhitavandanā”’ti, tametthānadhippettaṃ dūrato vandane yathāvuttapañcaṅgassa aparipuṇṇattā. Vandanā cettha paṇamanā añjalipaggahaṇakarapuṭasamāyogo. “**Pañcapatiṭṭhitena vanditvā**”’ti ca kāyapaṇāmo vutto, “**mama satthuno**”’tiādinaṃ pana vacīpaṇāmo, tadubhayapurecarānucaravasena manopaṇāmoti. Kāmaṃ sabbāpi tathāgatassa paṭipatti anaññasādhāraṇā acchariyabbhutarūpāva, tathāpi gabbhokkanti abhijāti abhinikkhamaṇa abhisambodhi dhammacakkappavattana (saṃ. ni. 5.1081; paṭi. ma. 3.30) yamakapāṭihāriyadevorohanāni sadevake loke ativiya supākaṭāni, na sakkā kenaci paṭibāhitunti tāniyevettha uddhaṭāni.

Itthaṃ imaṃ pakāraṃ bhūto pattoti **itthambhūto**, tassa ākhyānaṃ **itthambhūtākhyānaṃ**, soyevattho **itthambhūtākhyānattho**. Atha vā itthaṃ evaṃpakāro bhūto jātoti **itthambhūto**, tādisoti ākhyānaṃ **itthambhūtākhyānaṃ**, tadevattho **itthambhūtākhyānattho**, tasmim upayogavacananti attho. **Abbhuggatoti** ettha hi **abhisaddo** padhānavasena itthambhūtākhyānatthajotako kammappavacanīyo abhibhavitvā uggamanakiriyaṃ pakāraṃ dīpanato, tena payogato “taṃ kho pana bhagavanta”’nti idaṃ upayogavacanāṃ sāmīatthe samānampi appadhānavasena itthambhūtākhyānatthadīpanato “itthambhūtākhyānatthe”’ti vuttaṃ. Tenevāha “**tassa kho pana bhagavatoti attho**”’ti. Nanu ca “sādhū devadatto mātarābhī”’ti ettha viya “taṃ kho pana bhagavanta”’nti ettha abhisaddo appayutto, kathamettha taṃpayogato upayogavacanāṃ siyāti? Atthato payuttattā. Atthasaddapayogesū hi atthapayogoyeva padhānoti. Idaṃ vuttaṃ hoti – yathā “sādhū devadatto mātarābhī”’ti ettha abhisaddapayogato itthambhūtākhyāne upayogavacanāṃ kataṃ, evamidhāpi “taṃ kho pana bhagavantaṃ abhi evaṃ kalyāṇo kittisaddo uggato”’ti abhisaddapayogato itthambhūtākhyāne upayogavacanāṃ katanti. Yathā hi “sādhū devadatto mātarābhī”’ti ettha “devadatto mātarābhī mātuvisaye, mātuviyā vā sādhu”’ti evaṃ adhikaraṇatthe, sāmīatthe vā bhummavacanassa, sāmivacanassa vā pasaṅge itthambhūtākhyānajotakena kammappavacanīyena abhisaddena payogato upayogavacanāṃ kataṃ, evamidhāpi sāmīatthe sāmivacanappasaṅge yathā ca tattha “devadatto mātuvisaye, mātu sambandhī vā sādhattappakārapatto”’ti ayamattho viññāyati, evamidhāpi “bhagavato sambandhī kittisaddo abbhuggato abhibhavitvā uggamanappakārapatto”’ti ayamattho viññāyati. Tattha hi devadattaggahaṇaṃ viya idha kittisaddaggahaṇaṃ, “mātara”’nti vacanaṃ viya “bhagavanta”’nti vacanaṃ, sādhusaddo viya uggatasaddo veditabbo.

Kalyāṇoti bhaddako. Kalyāṇabhāvo cassa kalyāṇaguṇavisayatāyāti āha “**kalyāṇaguṇasamannāgato**”’ti, kalyāṇehi guṇehi samannāgato tabbisayatāya yuttoti attho. Taṃ

visayatā hettha samannāgamo, kalyāṇaguṇavisayatāya tannissitoti adhippāyo. **Setṭhoti** pariyāyavacanepi eseva nayo. Setṭhaguṇavisayatā eva hi kittisaddassa setṭhatā “bhagavāti vacanam setṭham, bhagavāti vacanamuttama”ntiādīsu (visuddhi. 1.142; pārā. aṭṭha. 1.verañjakaṇḍavaṇṇanā; udā. aṭṭha. 1; itivu. aṭṭha. nidānavaṇṇanā; mahāni. aṭṭha. 49) viya. “Arahaṃ sammāsambuddho”tiādīnā guṇānaṃ saṃkittanato, saddanīyato ca vaṇṇoyeva kittisaddo nāmāti āha “**kittiyevā**”ti. Vaṇṇo eva hi kittetabbato **kitti**, saddanīyato **saddoti** ca vuccati. Kittipariyāyo hi saddasaddo yathā “uḷārasaddā isayo, guṇavanto tapassino”ti. Kittivasena pavatto saddo **kittisaddoti** bhinnādhikaraṇataṃ dasseti “**thutighoso**”ti iminā. Kittisaddo hettha thutipariyāyo kittanamabhitthavanam kittīti. Thutivasena pavatto ghoso **thutighoso**, abhitthavudāhāroti attho. Abhisaddo abhibhavane, abhibhavanañcetta ajjhottharaṇamevāti vuttam “**ajjhottharivā**”ti, anaññasādhāraṇe guṇe ārabba pavattattā abhibyāpetvāti attho. Kinti-saddo abhuggatoti codanāya “itipi so bhagavā”tiādīmāhāti anusandhiṃ dassetuṃ “**kinti**”ti vuttam.

Padānaṃ sambajjhanam **padasambandho**. So **bhagavāti** yo so samatiṃsa pāramiyo pūretvā sabbakilese bhañjitvā anuttaram sammāsambodhiṃ abhisambuddho devānamatidevo sakkānamatisakko brahmānamatibrahmā lokanātho bhāgyavantatādīhi kāraṇehi sadevake loke “bhagavā”ti patthaṭṭakittisaddo, so bhagavā. Yaṃ tam-saddā hi nicasambandhā. “Bhagavā”ti ca idamādiṭṭhapaṇaṃ satthu nāmakittanam. Tenāha āyasmā dhammasenāpati “bhagavāti netam nāmaṃ mātarā kataṃ, na pitarā kata”ntiādi (mahāni. 6; cūḷani. 2). Parato pana “bhagavā”ti padaṃ guṇakittanam. Yathā kammatṭhānikena “araha”ntiādīsu navasu ṭhānesu paccekaṃ itipisaddam yojetvā buddhaguṇā anussarīyanti, evamidha buddhaguṇasaṃkittakenāpīti dassento “**itipi arahaṃ...pe... itipi bhagavā**”ti āha. Evañhi sati “araha”ntiādīhi navahi padehi ye sadevake loke ativiya pākaṭā paññātā buddhaguṇā, te nānappakārato vibhāvītā honti “itipi”ti padadvayena tesam nānappakāratādīpanato. “Itipetaṃ bhūtaṃ, itipetaṃ taccha”ntiādīsu (dī. ni. 1.6) viya hi **iti**-saddo idha āsannapaccakkhakarāṇattho, **pi**-saddo sampiṇḍanatto, tena ca nesam nānappakārabhāvo dīpito, tāni ca guṇasallakkhaṇakāraṇāni saddhāsampannānaṃ viññujātikānaṃ paccakkhāni honti, tasmā tāni saṃkittentena viññunā cittassa sammukhībhūtāneva katvā saṃkittetabbānīti dassento “**iminā ca iminā ca kāraṇenāti vuttam hoti**”ti āha. Evañhi nirūpetvā kittente yassa saṃkitteti, tassa bhagavati ativiya pasādo hoti.

Ārakattāti kilesehi suvidūrattā. **Arīnanti** kilesārīnaṃ. **Arānanti** saṃsāracakkassa arānaṃ. **Hatattāti** viddhamṣitattā. **Paccayādīnanti** cīvarādipaccayānañceva pūjā visesānañca. **Rahābhāvāti** cakkhuraḥādīnamabhāvato. Rahopāpakaraṇābhāvo hi padamanatikkamma rahābhāvoti vuttam. Evampi hi yathādhīppetamattho labbhatīti. **Tatoti** visuddhimaggato (visuddhi. 1.123). Yathā ca visuddhimaggato, evaṃ taṃsamvaṇṇanāya **paramatthamañjūsāyaṃ** (visuddhi. ṭī. 1.124) nesam vitthāro gahetabbo.

Yasmā jīvako bahuso satthu santike buddhaguṇe sutvā ṭhito, diṭṭhasaccatāya ca satthusāsane vigatakathamkatho, satthuguṇakathane ca vesārajjappatto, tasmā so evaṃ vitthārato eva āhāti vuttam “**jīvako panā**”tiādi. “**Ettha cā**”tiādīnā sāmattiyaṭṭhamāha. **Thāmo** desanāññāneva, **balam** pana dasabalaññam. **Vissatthanti** bhāvanapuṃsakapadaṃ, anāsānkanti attho.

Pañcavaṇṇāyāti khuddikādivasena pañcapakārāya. **Nirantaram phuṭam ahosi** katādhikārabhāvato. Kammantarāyavasena hissa rañño guṇasarīram khatūpahataṃ hoti. Kasmā panesa jīvakameva gamanasajjāya āṇāpetīti āha “**imāyā**”tiādi.

158. “Uttama”nti vatvā na kevalam uttamabhāvoyevettha kāraṇam, atha kho appasaddatāpīti dassetuṃ “**assayānarathayānāni**”tiādi vuttam. Hatthiyānesu ca nibbisevanameva gaṇhanto hatthiniyopi kappāpesi. **Padānupadanti** padamanugatam padaṃ purato gacchantassa hatthiyānassa pade tesam padaṃ katvā, padasaddo cettha padavaḷaṅge. **Nibbutassāti** sabbakilesadarathavūpasamassa. **Nibbutehvāti** appasaddatāya saddasaṅkhobhanavūpasameheva.

Kareṇūti hatthinipariyāyavacanam. Kaṇati saddam karotīti hi **kareṇu**, karova yassā, na dīgho dantoti vā **kareṇu**, “**kareṇukā**”tipi pāṭho, niruttinayena padasiddhi. **Ārohanasajjanam** kuthādīnam bandhanameva. **Opavayhanti** rājānamupavahitum samattham. “**Opaguyha**”ntipi paṭhanti, rājānamupagūhitum gopitum samatthanti attho. “**Evaṃ kirassā**”tiādi paṇḍitabhāvavibhāvanam. **Kathā vattatīti** laddhokāsabhāvena dhammakathā pavattati. “Rañño āsaṅkānivattanattham āsannacārībhāvena hatthinīsu itthiyo nisajjāpitā”ti (dī. ni. tī. 1.158) **ācariyadhammapālattherena** vuttam. Aṭṭhakathāyam pana “itthiyo nissāya purisānam bhayaṃ nāma natthi, sukham itthiparivuto gamissāmi”ti tattha kāraṇam vuttameva. Imināpi kāraṇena bhavitabbanti pana ācariyena evaṃ vuttam siyā. Rañño paresam dūrupasaṅkamanabhāvadassanattam tā purisavesam gāhāpetvā āvudhahatthā kāritā. **Hatthinikāsatānīti** ettha hatthinīyo eva hatthinikā. “Pañca hatthinīyā satānī”tipi katthaci pāṭho, so ayuttova “pañcamattehi bhikkhusatehi”tiādīsu (pārā. 1) viya īdisesu pacchimāpadassa samāsasseva dassanato. **Kassacidevāti** sannipatite mahājane yassa kassaci eva, tadaññesampi āyatim maggaphalānamupanissayoti āha “**sā mahājanassa upakārāya bhavissatī**”ti.

Paṭivedesīti nāpesi. **Upacāravacananti** vohāravacanamattam teneva adhippetatthassa aparīyosānato. Tenāha “**tadeva attano ruciyaṃ karohī**”ti. Imināyeva hi tadatthapariyosānam. **Maññasīti** pakatiyāva jānāsī. **Tadevāti** gamanāgamanameva. Yadi gantukāmo, gaccha, atha na gantukāmo, mā gaccha, attano ruciyevettha pamāṇanti vuttam hoti.

159. Pāṭiekkāyeva sandhivasena **paccekā**. “Mahañca”nti pade karaṇatthe paccattavacananti āha “**mahatā**”ti. Mahantassa bhāvo **mahañcam**. Na kevalam niggahītantavaseneva pāṭho, atha kho ākārantavasenāpīti āha “**mahaccātipi pālī**”ti. Yathā “khattiyā”ti vattabbe “khatyā”ti, evaṃ “mahatīyā”ti vattabbe mahatyā. Puna ca-kāram katvā mahaccāti sandhivasena padasiddhi. Pulliṅgavasena vattabbe itthiliṅgavasena vipallāso **liṅgavipariyāyo**. Visenañhi bhīyyo visesyalingādigāhakam. **Tiyojanasatānanti** paccekam tiyojanasataparimaṇḍalānam. **Dvinnam mahāraṭṭhānam issariyasirīti** aṅgamagadharaṭṭhānamādhipaccamāha. Tadattam vivarati “**tassā**”tiādīnā. **Paṭimukkaveṭhanānīti** ābandhasiroveṭhanāni. **Āsattakhaggānīti** aṃse olambanavasena sannaddhāsīni. **Maṇidaṇḍatomareti** maṇidaṇḍaṅkuse.

“**Aparāpī**”tiādīnā padasā parivārā vuttā. Khujjavāmanakā vesavasena, kirātasavaraandhakādayo jātivāsena tāsam paricārakiniyo dassitā. **Vissāsikapurisāti** vassavare sandhāyāha. Kulabhogaissariyādivasena mahatī mattā pamāṇametesanti **mahāmattā**, mahānubhāvā rājāmaccā. **Vijjādhataruṇā viyāti** mantānubhāvena vijjāmayiddhisampannā vijjādharakumārakā viya. **Raṭṭhiyaputtāti** bhojaputtā. Raṭṭhe paricārāntīti hi luddakā **raṭṭhiyā**, tesam nānāvudhaparicayatāya rājabhaṭṭabhūtā puttāti attho, antaraṭṭhabhojakānam vā puttā **raṭṭhiyaputtā**, khattiyā bhojarājāno. “Anuyuttā bhavantu te”tiādīsu viya hi **ṭikāyam** (dī. ni. tī. 1.159) vutto bhojasaddo bhojakavācakoti daṭṭhabbam. **Ussāpetvāti** uddham pasāretvā. **Jayasaddanti** “jayatu mahārājā”tiādijayapaṭibaddham saddam. **Dhanupantiparikkhepoti** dhanupantiparivāro. Sabbattha taṃgāhakavasena veditabbo. **Hatthighaṭṭāti** hatthisamūhā. **Paharamānāti** phusamānā. **Aññamaññasanḥaṭṭanāti** avicchedagamanena aññamaññasambandhā. **Seṇiyoti** gandhikaseṇīdussikaseṇīdayo “anapaloketvā rājānam vā saṅgham vā gaṇam vā pūgam vā seṇim vā aññatra kappā vuṭṭhāpeyyā”tiādīsu (pāci. 682) viya. “Aṭṭhārasa akkhobhiṇī seṇiyo”ti katthaci likhanti, so anekesupi potthakesu na diṭṭho. Anekasaṅkhyā ca senā heṭṭhā gaṇitāti ayuttoyeva. Tadā sabbāvudhato sarova dūragāmīti katvā sarapatanātikkamappamāṇena rañño parisam saṃvidahati. Kimatthanti āha “**sace**”tiādi.

Sayam bhāyanatṭhena **cittutrāso bhayaṃ** yathā tathā bhāyatīti katvā. Bhāyitabbe eva vatthusmiṃ bhayato upaṭṭhite “bhāyitabbamida”nti bhāyitabbākārena tīraṇato **ñāṇam bhayaṃ** bhayato tīretīti katvā. Tenevāha **visuddhimagge** (visuddhi. 2.751) “bhayatupaṭṭhānañāṇam pana bhāyati, na bhāyatīti? Na bhāyati. Tañhi ‘atītā saṅkhārā niruddhā, paccuppanā nirujjhanti, anāgatā nirujjhissanti’ti tīraṇamattameva hotī”ti. Bhāyanatṭhānatṭhena **ārammaṇam bhayaṃ** bhāyati etasmāti katvā. Bhāyanahetuṭṭhena **ottappam bhayaṃ** pāpato bhāyati etenāti katvā. **Bhāyānakanti** bhāyanākāro. **Tepīti**

dīghāyukā devāpi. **Dhammadesananti** pañcasu khandhesu pannarasalakkhaṇapaṭimaṇḍitaṃ dhammadesanaṃ. **Yebhuyyenāti** ṭhapetvā khīṇāsavadeve tadaññesaṃ vasena bāhullato. Khīṇāsavattā hi tesam cittutrāsabhayampi na uppajjati. Kāmaṃ **sīhōpamasuttaṭṭhakathāyaṃ** (a. ni. aṭṭha. 2.4.33) cittutrāsabhayampi tadatthabhāvena vuttaṃ, idha pana pakaraṇānurūpato ñāṇabhayameva gahitaṃ. **Samveganti** sahottappañāṇaṃ. **Santāsanti** sabbaso ubbijjanaṃ. Bhāyitabbaṭṭhena bhayameva bhīmabhāvena bheravanti **bhayabheravaṃ**, bhītabbavatthu. Tenāha “**āgacchati**”ti, etaṃ naraṃ taṃ bhayabheravaṃ āgacchati nūnāti attho.

Bhīruṃ pasamsantīti pāpato bhāyanato utrāsanaṃ bhīruṃ pasamsanti paṇḍitā. **Na hi tattha sūranti** tasmim pāpakaraṇe sūraṃ pagabbhadhamśinaṃ na hi pasamsanti. Tenāha “**bhayā hi santo na karonti pāpa**”nti. Tattha **bhayāti** pāputrāsato, ottappahetūti attho.

Chambhitassāti thambhitassa, tha-kārassa cha-kārādeso. Tadatthamāha “**sakalasarīracalana**”nti, bhayavasena sakalakāyapakampananti attho. Uyyodhanaṃ **sampahāro**.

Eketi uttaravihāravāsino. “**Rājagahe**”tiādi tesamadhippāyavivaraṇaṃ. Ekekasmim mahādvāre dve dve katvā **catusaṭṭhi khuddakadvārāni**. “**Tadā**”tiādinā akāraṇabhāve hetuṃ dasseti.

Idāni sakavādaṃ dassetuṃ “**ayaṃ panā**”tiādi vuttaṃ. “**Jīvako kirā**”tiādi āsaṅkanākāradassanaṃ. **Assāti** ajātasatturañño. **Ukkaṇṭhitoti** anabhirato. Chattaṃ ussāpetukāmo maññeti sambandho. **Bhāyitvāti** bhāyanahetu. **Tassāti** jīvakassa. Sammasaddo samānattho, samānabhāvo ca vayanāti āha “**vayassābhilāpo**”ti. Vayena samāno **vayasso** yathā “**ekarājā harissavaṇṇo**”ti (jā. 1.2.17). Samānasaddassa hi sādesamicchanti saddavidū, tena abhilāpo ālapanam tathā, ruḥhīniddeśo esa, “**mārisā**”ti ālapanamiva. Yathā hi mārisāti niddukhatābhilāpo sadukkhepi nerayike vuccati “**yadā kho te mārisa saṅkunā saṅku hadaye samāgaccheyyā**”tiādisu, (ma. ni. 1.512) evaṃ yo koci sahāyo asamānavayopi “**sammā**”ti vuccatīti, tasmā sahāyābhilāpo icceva attho. Kacci na vañcesīti pāḷiyā sambandho. “**Na palambhesī**”ti vuttepi idha parikappatthova sambhavatīti vuttaṃ “**na vippalambheyyāsī**”ti, na palobheyyāsīti attho. Kathāya sallāpo, so eva nigghoso tathā.

Vinasseyyāti cittavighātena vihaññeyya. “**Na taṃ devā**”tiādivacanaṃ sandhāya “**daḥham katvā**”ti vuttaṃ. Turitavasena idamāmeditanti dasseti “**taramānovā**”ti iminā. “**Abhikkama mahārājā**”ti vatvā tattha kāraṇaṃ dassetuṃ “**ete**”tiādi vuttanti sasambandhamatthaṃ dassento “**mahārāja corabalaṃ nāmā**”tiādimāha.

Sāmaññaphalapucchāvaṇṇanā

160. Ayaṃ bahidvāraḥkoṭṭhakokāso **nāgassa bhūmi nāma**. Tenāha “**vihārassā**”tiādi. **Bhagavato tejoti** buddhānubhāvo. **Raṇṇo sarīraṃ phari** yathā taṃ soṇadaṇḍassa brāhmaṇassa bhagavato santikaṃ āgacchantassa antovanasaṇḍagatassa. “**Attano aparādham saritvā mahābhayaṃ uppajji**”ti idam sedamuñcanaṃ kāraṇadassanaṃ. Na hi buddhānubhāvato sedamuñcanaṃ sambhavati kāyacittapassaddhihetubhāvato.

Eketi uttaravihāravāsino yeva. Tadayuttamevāti dasseti “**iminā**”tiādinā. **Abhimāreti** dhanuggahe. **Dhanapālanti** nāḷagirim. So hi tadā nāgarehi pūjitadhanarāsino labbhanato “**dhanapālo**”ti voharīyati. Na kevalaṃ diṭṭhapubbato yeva, atha kho pakatiyāpi bhagavā saññātoti dassetuṃ “**bhagavā hī**”tiādimāha. **Ākiṇṇavaralakkhaṇoti** battimsa mahāpurisalakkhaṇe sandhāyāha. **Anubyañjanapaṭimaṇḍitoti** asītānubyañjane (jinālaṅkāraṭīkāya vijātamaṅgalavaṇṇanāyaṃ vitthāro). **Chabbaññāhi rasmīhīti** tadā vattamānā rasmiyo. **Issariyalīlāyāti** issariyavilāsena. Nanu ca bhagavato santike issariyalīlāya pucchā agāravoyeva siyāti codanāya “**pakati hesā**”tiādimāha, pakatiyā pucchanaṃ na agāravoti adhippāyo. Parivāretvā nisinnena bhikkhusaṅghena pure katepi atthato tassa **purato nisinna** nāma. Tenāha “**parivāretvā**”tiādi.

161. Yena, tenāti ca bhummattthe karaṇavacananti dasseti “**yattha, tatthā**”ti iminā. Yena maṇḍalassa dvāraṃ, tenūpasāṅkamīti sampattabhāvassa vuttattā idha upagamanameva yuttanti āha “**upagato**”ti. **Anucchavike ekasmiṃ padeseti** yattha viññujātikā aṭṭhaṃsu, tasmim. Ko panesa anucchavikapadeso nāma? Atidūratādichanisajjadosavirahito padeso, napacchatādiṭṭhanisajjadosavirahito vā. Yathāhu aṭṭhakathācariyā –

“Na pacchato na purato, nāpi āsannadūrato;
Na kacche no paṭivāte, na cāpi onatunnate;
Ime dose vissajjetvā, ekamantaṃ ṭhitā ahū”ti. (khu. pā. aṭṭha. evamiccādipāṭhavaṇṇanā; su. ni. aṭṭha. 2.261);

Tadā bhikkhusaṅghe tuṅhībhāvassa anavasesato byāpitabhāvaṃ dassetuṃ “**tuṅhībhūtaṃ tuṅhībhūta**”nti vicchāvacaṇaṃ vuttanti āha “**yato...pe... mevā**”ti, yato yato bhikkhutoti attho. Hatthena, hatthassa vā kukatabhāvo **hatthakukkuccaṃ**, asaṅṅamo, asampajaññakiriyā ca. Tathā **pādakukkuccanti** etthāpi. **Vā**-saddo avuttavikappane, tena tadaññopi cakkhusotādiasaṅṅamo natthīti vibhāvito. Tattha pana cakkhuasaṃyamo sabbapaṭṭhamo dunnivārito cāti tadabhāvaṃ dassetuṃ “**sabbālaṅkārapaṭimaṇḍita**”ntiādi vuttaṃ.

Vippsannarahadamivāti anāvilodakasaramiva. Yenetarahi...pe... iminā me...pe... hotūti sambandho. Añño hi atthakkamo, añño saddakkamoti āha “**yenā**”tiādi. Tattha kāyika-vācasikena upasamena laddhena mānasikopi upasamo anumānato laddho evāti katvā “**mānasikena cā**”ti vuttaṃ. **Silūpasamenāti** silasaṅṅamena. Vuttamatthaṃ lokapakatīyā sādheṇto “**dullabhaññī**”tiādimāha. **Laddhāti** labhitvā.

Upasamanti ācārasampattisaṅkhātāṃ saṃyamaṃ. “**Eva**”ntiādinā tathā icchāya kāraṇaṃ dasseti. **Soti** ayyako, udayabhaddo vā. “**Kiñcāpi**”tiādi tadattha-samatthanaṃ. **Ghātessatiyevāti** taṃkālāpekkhāya vuttaṃ. Tenāha “**ghātesī**”ti. Idañhi sampatipekkhavaṇṇanaṃ. **Pañcarivarivaṭṭoti** pañcarājarivarivaṭṭo.

Kasmā evamāha, nanu bhagavantamuddissa rājā na kiñci vadatīti adhippāyo. **Vacībhedeti** yathāvuttaudānavacībhede. **Tuṅhī niravoti** pariyaṇavacaṇametāṃ. “**Aya**”ntiādi cittajānanākāradassanaṃ. Ayaṃ...pe... na sakkhissatīti ṇatvāti sambandho. **Vacaṇānantaranti** udānavacaṇānantaraṃ. **Yenāti** yattha padese, yena vā sotapathena. **Yena pemanti** etthāpi yathārahamesa nayo.

Katāparādhassa ālapanāṃ nāma dukkaranti sandhāya “**mukhaṃ nappahotī**”ti vuttaṃ. “Āgamā kho tvaṃ mahārāja yathāpema”nti vacanaiddiṭṭhaṃ vā tadā tadatthadīpanākārena pavattaṃ nānāyavicittaṃ bhagavato madhuravacaṇampi sandhāya evaṃ vuttanti daṭṭhabbaṃ. Ekampi hi atthaṃ bhagavā yathā sotūnaṃ ṇāṇaṃ pavattati, tathā deseti. Yaṃ sandhāya aṭṭhakathāsu vuttaṃ “bhagavatā abyākataṃ tantipadaṃ nāma natthi, sabbesaññeva atthopi bhāsito”ti. **Pañcahākārehi** iṭṭhāniṭṭhesu samabhāvādisaṅkhātehi pañcahi kāraṇehi. Vuttañhetāṃ **mahānidese** (mahāni. 38, 162) –

“Pañcahākārehi tādī iṭṭhāniṭṭhe tādī, cattāvīti tādī, tiṇṇāvīti tādī, muttāvīti tādī, taṃnidese tādī.

Kathaṃ arahā iṭṭhāniṭṭhe tādī? Arahā lābhēpi tādī, alābhēpi, yasepi, ayasepi, pasaṃsāyapi, nindāyapi, sukhepi, dukkhepi tādī, ekaṃ ce bāhaṃ gandhena limpeyyuṃ, ekaṃ ce bāhaṃ vāsiyā taccheyyūṃ, amusmiṃ natthi rāgo, amusmiṃ natthi paṭighaṃ, anunayapaṭighavippahīno, ugghātinighātivītivatto, anurodhavirodhasamatikkanto, evaṃ arahā iṭṭhāniṭṭhe tādī.

Kathaṃ arahā cattāvīti tādī? Arahato...pe... thambho, sārāmbho, māno, atimāno, mado,

pamādo, sabbe kilesā, sabbe duccharitā, sabbe darathā, sabbe pariāhā, sabbe santāpā, sabbā kusālābhisaṅkhārā cattā vantā muttā pahīnā paṇinissaṭṭhā, evaṃ arahā cattāvīti tādī.

Kathaṃ arahā tiṇṇāvīti tādī? Arahā kāmoghaṃ tiṇṇo, bhavoghaṃ tiṇṇo, diṭṭhogaṃ tiṇṇo, avijjogaṃ tiṇṇo, sabbhaṃ saṃsārapathaṃ tiṇṇo uttiṇṇo nittiṇṇo atikkanto samatikkanto vītivatto, so vuṭṭhavāso ciṇṇacaraṇo jātimaraṇasaṅkhayo, jātimaraṇasaṃsāro (mahāni. 38) natthi tassa punabbhavoti, evaṃ arahā tiṇṇāvīti tādī.

Kathaṃ arahā muttāvīti tādī? Arahato rāgā cittaṃ muttaṃ vimuttaṃ suvimuttaṃ, dosā, mohā, kodhā, upanāhā, makkhā, paḷāsā, issāya, macchariyā, māyāya, sāṭṭheyyā, thambhā, sārāmbhā, mānā, atimānā, madā, pamādā, sabbakilesehi, sabbaduccharitehi, sabbadarathehi, sabbapariāhehi, sabbasantāpehi, sabbākusalābhisaṅkhārehi cittaṃ muttaṃ vimuttaṃ suvimuttaṃ; evaṃ arahā muttāvīti tādī.

Kathaṃ arahā taṃniddeṣā tādī? Arahā ‘sīle sati sīlavā’ ti taṃniddeṣā tādī, ‘saddhāya sati saddho’ ti, ‘vīriye sati vīriyavā’ ti, ‘satiyā sati satimā’ ti, ‘samādhimhi sati samāhito’ ti, ‘paññāya sati paññavā’ ti, ‘vijjāya sati tevijjo’ ti, ‘abhiññāya sati chaḷabhiñño’ ti taṃniddeṣā tādī, evaṃ arahā taṃniddeṣā tādī’ ti.

Bhagavā pana sabbesampi tādīnamatisayo **tādī**. Tenāha “**suppatiṭṭhito**” ti. Vuttampi cetāṃ bhagavatā **kālakārāmasuttante** “iti kho bhikkhave tathāgato diṭṭhasutamutaviññātabbesu dhammesu tādīyeva tādī, tamhā ca pana tādīmhā añño tādī uttaritaro vā paṇītataro vā natthīti vadāmī” ti (a. ni. 4.24). Atha vā pañcavidhāriyiddhisiddhehi pañcahākārehi tādīlakkaṇe suppatiṭṭhitoti attho. Vuttañhetāṃ āyasmatā dhammasenāpatinā **paṭisambhidāmagge** –

“Katamā ariyā iddhi? Idha bhikkhu sace ākaṅkhati ‘paṭikūle appaṭikūlasaññī vihareyya’ nti, appaṭikūlasaññī tattha viharati, sace ākaṅkhati ‘appaṭikūle paṭikūlasaññī vihareyya’ nti, paṭikūlasaññī tattha viharati, sace ākaṅkhati ‘paṭikūle ca appaṭikūle ca appaṭikūlasaññī vihareyya’ nti, appaṭikūlasaññī tattha viharati, sace ākaṅkhati ‘appaṭikūle ca paṭikūle ca paṭikūlasaññī vihareyya’ nti, paṭikūlasaññī tattha viharati, sace ākaṅkhati ‘paṭikūle ca appaṭikūle ca tadubhayaṃ abhinivajjetvā upekkhako vihareyyaṃ sato sampajāno’ ti, upekkhako tattha viharati sato sampajāno’ ti (paṭi. ma. 3.17).

Bahiddhāti sāsanato bahisamaye.

162. Esāti bhikkhusaṅghassa vandanākāro. Tamatthaṃ lokasiddhāya upamāya sādhetuṃ “**rājāna**” ntiādi vuttaṃ. **Okāsanti** pucchitabbaṭṭhānaṃ.

Na me pañhavissajjane bhāro atthīti satthu sabbattha appaṭihataññācāratāya atthato āpannāya dassanaṃ. “Yadī ākaṅkhasī” ti vuttēyeva hi esa attho āpanno hoti. **Sabbhaṃ te vissajjessāmīti** etthāpi ayaṃ nayo. “Yaṃ ākaṅkhasi, taṃ pucchā” ti vacaneneva hi ayamattho sījḥati. Asādhāraṇaṃ sabbaññupavāraṇanti sambandho. Yadī “yadākaṅkhasī” ti na vadanti, atha kathaṃ vadantīti āha “**sutvā**” tiādi. Padesaññeyeva ṭhitattā tathā vadantīti veditabbaṃ. Buddhā pana sabbaññupavāraṇaṃ pavārentīti sambandho.

“Pucchāvuso yadākaṅkhasī” tiādīni suttapadāni yesaṃ puggalānaṃ vasena āgatāni, taṃ dassanattaṃ “**yakkhanarindadevasamaṇabrāhmaṇaparibbājakāna**” nti vuttaṃ. Tattha hi “**pucchāvuso yadākaṅkhasī**” ti ālavakassa yakkhassa okāsakaraṇaṃ, “**puccha mahārājā**” ti narindānaṃ, “**puccha vāsavā**” tiādi devānamindassa, “**tena hī**” tiādi samaṇānaṃ, “**bāvarissa cā**” tiādi brāhmaṇānaṃ, “**puccha maṃ sabhiyā**” tiādi paribbājakānaṃ okāsakaraṇanti daṭṭhabbaṃ. **Vāsavā**ti devānamindālapanānaṃ. Tadeṭaṇhi **sakkapañhasutte**. **Manasicchasīti** manasā icchasi.

Katāvakāsāti yasmā tumhe mayā katokāsā, tasmā bāvarissa ca tuyhaṃ ajitassa ca sabbesaṅca sesānaṃ yaṃ kiñci sabbhaṃ saṃsayamaṃ yathā manasā icchatha, tathā pucchavho pucchathāti yojanā. Ettha ca bāvarissa saṃsayamaṃ manasā pucchavho, tumhākaṃ pana sabbesaṃ saṃsayamaṃ manasā ca aññathā ca yathā icchatha, tathā pucchavhoti adhippāyo. Bāvarī hi “attano saṃsayamaṃ manasāva pucchathā”ti antevāsike añāpesi. Vuttañhi –

“Anāvaraṇadassāvī, yadi buddho bhavissati;
Manasā pucchite pañhe, vācāya vissajessatī”ti. (su. ni. 1011);

Tadetaṃ **pārāyanavagge**. Tathā “puccha maṃ sabhiyā”tiādi.

Buddhabhūminti buddhaṭṭhānaṃ, āsavakkhayañānaṃ, sabbaññutaññānaṅca. **Bodhisattabhūmi** nāma bodhisattaṭṭhānaṃ pāramīsambharaṇaṅnaṃ, bhūmisaddo vā avatthāvācako, buddhāvattamaṃ, bodhisattāvattahāyanti ca attho. Ekattanayena hi pavattesu khandhesu avatthāyeva taṃ tadākāranissitā.

Yo bhagavā bodhisattabhūmiyaṃ padesañāṇe ṭhito sabbaññupavāraṇaṃ pavāresi, tassa tadeva acchariyanti sambandho. Kathanti āha “**koṇḍañña pañhānī**”tiādi. Tatha **koṇḍaññāti** gottavasena sarabhaṅgamālapanti. **Viyākaroḥīti** byākaroḥi. **Sādhurūpāti** sādhusabhāvā. **Dhammoti** sanantano paveṇidhammo. **Yanti** āgamanakiriyāparāmasanaṃ, yena vā kāraṇena āgacchati, tena viyākaroḥīti sambandho. **Vuddhanti** sīlapaññādīhi vuddhippattaṃ, garunti attho. **Esa bhāroti** saṃsayupacchedanasāṅkhāto eso bhāro, āgato bhāro tayā avassaṃ vahitabboti adhippāyo.

Mayā katāvakāsā bhonto pucchantu. Kasmāti ce? Ahañhi taṃ taṃ vo byākarissaṃ ñatvā sayamaṃ lokamamaṃ, parañcāti. **Sayanti** ca sayameva parūpadesena vinā. Evaṃ sarabhaṅgakāle sabbaññupavāraṇaṃ pavāresīti sambandho.

Pañhānanti dhammayāgapañhānaṃ. **Antakaranti** niṭṭhānakamaṃ. **Suciratenāti** evaṃ nāmakena brāhmaṇena. **Putṭhanti** pucchitumaṃ. **Jātiyāti** paṭisandhiyā, “vijātiyā”tipi vadanti. Paṃsum kīlanto sambhavaṅkumāro nisinnova hutvā pavāresīti yojetabbaṃ.

Tagghāti ekaṃsatthe nipāto. **Yathāpi kusalo tathāti** yathā sabbadhammakusalo sabbadhammavidū buddho jānāti katheti, tathā te ahamakkhissanti attho. **Jānāti**-saddo hi idha sambandhamupagacchati. Yathāha “yena yassa hi sambandho, dūraṭṭhampi ca tassa ta”nti (sārattha. ṭī. 1. paṭhamamahāsaṅgītikathāvaṇṇanā). Jānanā cettha kathanā. Yathā “iminā imaṃ jānāti”ti vuttovāyamattho ācariyena. **Rājā ca kho taṃ yadi kāhati vā, na vāti** yo taṃ idha pucchitumaṃ pesesi, so korabyarājā taṃ tayā pucchitamattamaṃ, tayā vā puṭṭhena mayā akkhātamatthamaṃ yadi karotu vā, na vā karotu, ahaṃ pana yathādhammaṃ te akkhissaṃ ācikkhissāmīti vuttaṃ hoti. **Jātakatṭhakathāyaṃ** pana –

“**Rājā ca kho tanti** ahaṃ taṃ pañhaṃ yathā tumhākaṃ rājā jānāti jānitumaṃ sakkoti, tathā akkhissaṃ. Tato uttari rājā yathā jānāti, tathā yadi karissati vā, na vā karissati, karontassa vā akarontassa vā tassevetamaṃ bhavissati, mayhaṃ pana doso natthīti dīpetī”ti (jā. aṭṭha. 5.16.172) –

Jānāti-saddo vākyadvayasādhāraṇavasena vutto.

163. Sippameva sippāyatanaṃ āyatanasaddassa tabbhāvavuttittā. Apica sikkhitabbatāya sippaṅca taṃ sattānaṃ jīvitavuttiiyā kāraṇabhāvato, nissayabhāvato vā āyatanañcāti **sippāyatanaṃ**. **Seyyathidanti** ekova nipāto, nipātasamudāyo vā. Tassa te katameti idha atthoti āha “**katame pana te**”ti. Ime katametipi paccekamattho yujjati. Evaṃ sabbattha. Idañca vattabbāpekkhanavasena vuttaṃ, tasmā te sippāyatanikā katameti attho. “Puthusippāyatanānī”ti hi sādharmaṇato sippāni uddisitvā upari taṃtaṃsippūpajīvinova niddiṭṭhā puggalādhiṭṭhānāya kathāya. Kasmāti ce? Papañcaṃ pariharitukāmatā.

Aññathā hi yathādhīppetāni tāva sippāyatanāni dassetvā puna taṃtaṃsippūpajīvinopi dassetabbā siyuṃ tesamevettha padhānato adhippetattā. Evañca sati kathāpapañco bhavēyya, tasmā taṃ papañcaṃ pariharitūṃ sippūpajīvīhi taṃtaṃsippāyatanāni saṅgahetvā evamāhāti tamatthaṃ dassetuṃ “**hatthārohātīādīhi ye taṃ taṃ sippaṃ nissāya jīvanti, te dassetī**”ti vuttaṃ. Kasmāti āha “**ayañhī**”tiādi. Sippaṃ upanissāya jīvantīti **sippūpajīvino**.

Hatthimārohanatīti **hatthārohā**, hatthāruḷhayodhā. Hatthiṃ ārohāpayantīti **hatthārohā**, hatthācariya hatthivejja hatthimeṇḍādayo. Yena hi payogena puriso hatthino ārohanayoggo hoti, taṃ hatthissa payogaṃ vidhāyantānaṃ sabbesampetesāṃ gahaṇaṃ. Tenāha “**sabbepī**”tiādi. Tattha **hatthācariyā** nāma ye hatthino, hatthārohakānañca sikkhāpakā. **Hatthivejjā** nāma hatthibhisakkā. **Hatthimeṇḍā** nāma hatthīnaṃ pādarakkhakā. Hatthiṃ maṇḍayanti rakkhantīti hatthimaṇḍā, teyeva **hatthimeṇḍā**, hatthiṃ minenti sammā vidahanena hiṃsantīti vā **hatthimeṇḍā**. **Ādi**-saddena hatthīnaṃ yavapadāyakaḍayo saṅgaṇhāti. **Assārohāti** etthāpi suddhahetukattuvasena yathāvuttova attho. Rathe niyuttā **rathikā**. **Ratharakkhā** nāma rathassa āṇirakkhakā. Dhanuṃ gaṇhantīti **dhanuggahā**, issāsā, dhanuṃ gaṇhāpentīti **dhanuggahā**, dhanusippasikkhāpakā dhanvācariyā.

Celena celapaṭākāya yuddhe akanti gacchantīti **celakā**, jayaddhajagāhakāti āha “**ye yuddhe**”tiādi. **Jayadhajanti** jayanatthaṃ, jayakāle vā paggaḥitadhajaṃ. **Puratoti** senāya pubbe. Yathā tathā thite senike byūhavicāraṇavasena tato tato calayanti uccālentīti **calakāti** vuttaṃ “**idha rañño**”tiādi. Sakuṇagghīādayo viya maṃsapiṇḍaṃ parasenāsamūhasaṅkhātāṃ piṇḍaṃ sāhasikatāya chetvā chetvā dayanti uppatitvā uppatitvā niggacchantīti **piṇḍadāyakā**. Tenāha “**te kirā**”tiādi. Sāhasaṃ karontīti **sāhasikā**, teyeva mahāyodhā. **Piṇḍamivāti** tālaphalapiṇḍamivāti vadanti, “maṃsapiṇḍamivā”ti (dī. ni. tī. 1.163) ācariyena vuttaṃ. Sabbattha “ācariyenā”ti vutte **ācariyadhammapālattherova** gahetabbo. Dutiyavikappe piṇḍe janasaṃmūhasaṅkhāte sammadde dayanti uppatantā viya gacchantīti **piṇḍadāyakā**, **daya**-saddo gatiyaṃ, aya-saddassa vā da-kārāgamena nipphatti.

Uggatuggatāti saṅgāmaṃ patvā javaparakkamādivasena ativiya uggatā. **Tadevāti** parehi vuttaṃ tameva sīsaṃ vā āvudhaṃ vā. **Pakkhandantīti** vīrasūrabhāvena asajjamānā parasenamanupavisanti. Thāmajavabalaparakkamādisampattiyā mahānāgasadisatā. Tenāha “**hatthiādīsūpi**”tiādi. **Ekantasūrāti** ekacarasūrā antasaddassa tabbhāvavuttito, sūrabhāvena ekākino hutvā yujjhanakāti attho. **Sajalīkāti** savammikā. Sannāho kaṅkaṭo vammaṃ kavaco uracchado jālikāti hi atthato ekaṃ. **Sacammikāti** jālikā viya sarīraparittāṇena cammena sacammikā. **Cammakañcukanti** cammamayakañcukaṃ. **Pavisitvāti** tassa anto hutvā, paṭimuñcitvāti vuttaṃ hoti. **Saraparittāṇaṃ** cammanti cammapaṭisibbitaṃ celakaṃ, cammamayaṃ vā phalakaṃ. **Balavasinehāti** sāmīni atisayapemā. **Gharadāsayodhāti** antojātadāsapariyāpanā yodhā, “**gharadāsikaputtā**”tipi pāṭho, antojātadāsīnaṃ puttāti attho.

Ālāraṃ vuccati mahānasaṃ, tattha niyuttā **ālārikā**. **Pūvikāti** pūvasampādakā, ye pūvameva nānappakārato sampādetvā vikkiṇantā jīvanti. Kesanakhasaṅṭhapanādivasena manussānaṃ alaṅkāravidhiṃ kappenti saṃvidahantīti **kappakā**. Cuṇṇavilepanādīhi malaharaṇavaṇṇasampādanavidhinā nhāpentī nahānaṃ karontīti **nhāpikā**. Navantādividhinā pavatto gaṇanagantho antarā chiddābhāvena **acchiddakoti** vuccati, tadeva paṭhentīti **acchiddakapāṭhakā**. Hatthena adhippāyaviññāpanaṃ, gaṇanaṃ vā **hatthamuddā**. Aṅgulisaṅkocanañhi **muddāti** vuccati, tena ca viññāpanaṃ, gaṇanaṃ vā hoti. **Hatthasaddo** cettha tadekadesesu aṅgulīsu daṭṭhabbo “na bhuñjamāno sabbāṃ hatthaṃ mukhe pakkhipissāmī”tiādīsu (pāci. 618) viya, tamupanissāya jīvantīti **muddikā**. Tenāha “**hatthamuddāyā**”tiādi.

Ayakāro kammārakārako. **Dantakāro** bhamakāro. **Cittakāro** lepacittakāro. **Ādi**-saddena koṭṭakalekhakavilīvakāraññakārādārūkarādīnaṃ saṅgaho. **Diṭṭheva dhammeti** imasmiṃyeva atabhāve. Karaṇanipphādanavasena **dassetvā**. **Sandiṭṭhikamevāti** asamparāyikatāya sāmāṃ daṭṭhabbaṃ, sayamanubhavitabbaṃ attapaccakkhanti attho. **Upajīvantīti** upanissāya jīvanti. **Sukhitanti** sukhappattaṃ. Thāmabalūpetabhāvova piṇṇananti āha “**piṇṇitaṃ thāmabalūpeta**”nti. **Uparīti** devaloke.

Tathā **uddhantipi**. So hi manussalokato uparimo. Aggaṃ viyāti **aggaṃ**, phalaṃ. “Kammassa katattā phalassa nibbattanato taṃ kammassa aggisikhā viya hoti”ti ācariyena vuttaṃ. Apica **sagganti** uttamaṃ, phalaṃ. **Sagganti** suṭṭhu aggaṃ, rūpasaddādidasavidhaṃ attano phalaṃ nipphādetuṃ arahatīti attho. Suaggikāva niruttinayena **sovaggikā**, dakkhiṇāsaddāpekkhāya ca sabbattha itthiliṅganiddeso. **Sukhoti** sukhūpāyo iṭṭho kanto. **Aggeti** ulāre. Attanā paribhuñjitabbaṃ bāhiraṃ **rūpaṃ**, attano vaṇṇapokkharatā **vaṇṇoti** ayametesam viseso. Dakkhanti vaḍḍhanti etāyāti **dakkhiṇā**, pariccāgamayaṃ puññanti āha “**dakkhiṇaṃ dāna**”nti.

Maggo sāmāññaṃ samitapāpasankhātassa samaṇassa bhāvoti katvā, tassa vipākattā ariyaphalaṃ **sāmāññaphalaṃ**. “**Yathāhā**”tiādinā mahāvaggasamuyuttapāḷivasena tadatthaṃ sādheti. **Taṃ esa rājā na jānāti** ariyadhammassa akovidatāya. Yasmā panesa “dāsakassakādibhūtānaṃ pabbajitānaṃ lokato abhivādanādilābho sandiṭṭhikaṃ sāmāññaphalaṃ nāmā”ti cintetvā “atthi nu kho koci samaṇo vā brāhmaṇo vā īdisamatthaṃ jānanto”ti vīmaṃsanto pūraṇādike pucchitvā tesam kathāya anadhigatavitto bhagavantampi etamatthaṃ pucchi. Tasmā vuttaṃ “**dāsakassakopamaṃ sandhāya pucchati**”ti.

Rājāmaccāti rājakulasamudāgatā amaccā, anuyuttakarājāno ceva amaccā cātipi attho. **Kaṇhapakkhanti** yathāpucchite atthe labbhamānadiṭṭhigatūpasamhitam saṃkilesapakkham. **Sukkapakkhanti** tabbidhuraṃ upari suttāgataṃ vodānapakkham. **Samaṇakolāhalanti** samaṇakotūhalaṃ taṃ taṃ samaṇavādānaṃ aññamaññavirodhaṃ. **Samaṇabhaṇḍananti** teneva virodhena “evaṃvādīnaṃ tesam samaṇabrāhmaṇānaṃ ayaṃ doso, evaṃvādīnaṃ tesam ayaṃ doso”ti evaṃ taṃ taṃ vādassa paribhāsanam. **Issarānuvattako hi lokoti** dhammatādassanena tadatthasamatthanam. Attano desanākosallena **rañño bhāraṃ karonto**, na tadaññena paravambhanādikāraṇena.

164. Nu-saddo viya no-saddopi pucchāyaṃ nipātoti āha “**abhijānāsi nū**”ti. **Ayañcāti** ettha ca-saddo na kevalaṃ abhijānāsipadeneva, atha kho “pucchitā”ti padena cāti samuccayattho. Kathaṃ yojetabboti anuyogamapaneti “**idañhī**”tiādinā. **Pucchitā nūti** pubbe pucchaṃ kattā nu. **Naṃ puṭṭhabhāvanti** tādisaṃ pucchitabhāvaṃ abhijānāsi nu. **Na te sammutṭhanti** tava na pamuṭṭhaṃ vatāti attho. **Aphāsukabhāvoti** tathā bhāsanena asukhabhāvo. **Paṇḍitapatirūpakānanti** (sāmaṃ viya attano sakkārānaṃ paṇḍitabhāsānaṃ) āmaṃ viya pakkānaṃ paṇḍitā bhāsānaṃ. (Dī. ni. ṭī. 1.163) **pāḷipadaatthabyañjanesūti** pāḷisaṃkhāte pade, tadatthe tappariyāpannakkhare ca, vākyapariyāyo vā byañjanasaddo “akkharaṃ padaṃ byañjana”ntiādīsu (netti. 28) viya. Bhagavato rūpaṃ sabhāvo viya rūpamassāti **bhagavantarūpo**, bhagavā viya ekantapaṇḍitoti attho.

Pūraṇakassapavādaṇṇanā

165. **Ekamidāhanti** ettha **idanti** nipātamaṃ, ekaṃ samayamicceva attho. Sammodeti sammodanaṃ karotīti **sammodaniyaṃ**. Anīyasaddo hi bahulā katvatthābhidhāyako yathā “niyyānikā”ti, (dha. sa. suttantadukamātikā 97) sammodanaṃ vā janetīti **sammodaniyaṃ** taddhitavasena. Saritabbanti **sāraṇiyaṃ**, saraṇassa anucchavikanti vā **sāraṇiyaṃ**, etamatthaṃ dassetuṃ “**sammodajanakaṃ saritabbayuttaka**”nti vuttaṃ, saritabbayuttakanti ca saraṇānucchavikanti attho.

166. **Sahatthāti** sahattheneva, tena suddhakattāraṃ dasseti, **añattiyāti** pana hetukattāraṃ, nissaggiyathāvarādayopi idha sahattha karaṇeneva saṅgahitā. **Hatthādīnīti** hatthapādakaṇṇanāsādīni. Pacanaṃ dahanam vibādhananti āha “**daṇḍena uppīlentassā**”ti. **Papañcasūdaniyaṃ** nāma **majjhimāgamaṭṭhakathāyaṃ** pana “**pacato**”ti etassa “tājentassa vā”ti (ma. ni. aṭṭha. 3.97) dutiyopi attho vutto, idha pana tajjanaṃ, paribhāsanañca daṇḍena saṅgahetvā “daṇḍena uppīlentassa icceva vutta”nti (dī. ni. ṭī. 1.166) ācariyena vuttaṃ, adhunā pana potthakesu “tājentassa vā”ti pāṭhopi bahuso dissati. **Sokanti** sokakāraṇam, socanantipi yujjati kāraṇasampādanena phalassapi kattabbato. **Parehīti** attano vacanakarehi kammabhūtehi. **Phandatoti** ettha parassa phandanavasena suddhakattuttho na labbhati, atha kho attano phandanavasenevāti āha “**paraṃ phandantaṃ phandanakāle sayampi**

phandato’ti, attanā katena parassa vibādhanapayogena sayampi phandatoti attho. **“Atipātāpayato**’ti padaṃ suddhakattari, hetukattari ca pavattatīti dasseti **“hanantassāpi hanāpentassāpi**’ti iminā. **Sabbatthāti** **“ādiyato**’tiādīsu. **Karaṇakāraṇavasenāti** sayamkāraparamkāravasena.

Gharabhittiyā anto ca bahi ca sandhi **gharasandhi**. Kiñcipi asesetvā niravaseso lopo vilumpanaṃ **nillopoti** āha **“mahāvilopa**’nti. Ekāgāre niyutto vilopo **ekāgāriko**. Tenāha **“ekamevā**’tiādi. **“Paripanthē tiṭṭhato**’ti ettha acchindanathameva tiṭṭhatīti ayamatto pakaraṇato siddhoti dasseti **“āgatāgatāna**’ntiādinā. **“Parito sabbaso panthe hananaṃ paripantho**’ti (dī. ni. 1.166) ayamattohi ācariyena vutto. **Karomīti saññāyāti** sañcetanikabhāvamāha, tenetaṃ dasseti **“sañcicca karotopi na kariyati nāma, pageva asañciccā**’ti. **Pāpaṃ na kariyatīti** pubbe asato uppādetuṃ asakkuṇeyyattā pāpaṃ akatameva nāma. Tenāha **“natthi pāpa**’nti.

Yadi evaṃ kathaṃ sattā pāpe pavattantīti attano vāde parehi āropitaṃ dosamapanetukāmo pūraṇo imamatthampi dassetīti āha **“sattā panā**’tiādi. Saññāmettaṃ **“pāpaṃ karontī**’ti, pāpaṃ pana natthevāti vuttaṃ hoti. Evaṃ kirassa hoti – imesaṃ sattānaṃ hiṃsādikiriyaṃ attānaṃ na pāpuṇāti tassa niccatāya nibbikāratā, sarīraṃ pana acetanaṃ kaṭṭhakalingarūpamaṃ, tasmim vikopitepi na kiñci pāpanti. Pariyanto vuccati **nemi** pariyosāne ʔhitattā. Tena vuttaṃ ācariyena **“nisitakhuramayanaṃ**’ti (dī. ni. 1.166). Dutiyavikappe cakkapariyosānameva pariyanto, khurena sadiso pariyanto yassāti **khurapariyanto**. Khuraggahaṇena cettha khuradhārā gahitā tadavarodhato. Pāliyaṃ **cakkenāti** cakkākāraṇakāraṇa āvudhavisesena. Taṃ maṃsakhalakaraṇasaṅkhātāṃ nidānaṃ kāraṇaṃ yassāti **tatonidānaṃ**, **“paccattavacanassa toādeso, samāse cassa lopābhāvo**’ti (pārā. aṭṭha. 1.21) aṭṭhakathāsu vutto. **“Paccattatthe nissakkavacanampi yujjati**’ti (sārattha. 1. paṭhamamahāsaṅgītikathāvaṇṇanā) **ācariyasāriputtatthero**. **“Kāraṇatthe nipātasamudāyo**’tipi akkharacintakā.

Gaṅgāya dakkhiṇadisā appatirūpadeso, uttaradisā pana patirūpadesoti adhippāyena **“dakkhiṇaṅce**’tiādi vuttaṃ, tañca desadisāpadesena tannivāsino sandhāyāti dassetuṃ **“dakkhiṇatīre**’tiādimāha. Hananadānakiriyaṃ hi tadāyattā. **Mahāyāganti** mahāvijitarañño yaññasadisampi mahāyāgaṃ. Damasaddo indriyaṃvarassa, uposathasīlassa ca vācakoti āha **“indriyadameṇa uposathakammenā**’ti. Keci pana uposathakammenā’ti idaṃ indriyadamassa viṣesanaṃ, tasmā **“uposathakammabhūtena indriyadamenā’ti**’ atthaṃ vadanti, tadayuttameva tadubhayatthavācakattā damasaddassa, atthadvayassa ca viṣesavuttito. Adhunā hi katthaci potthake vā-saddo, ca-saddopi dissati. **Sīlasaṃyamenāti** tadaññena kāyikavācasikasamaṃvarena. **Saccavacanenāti** amosavajjena. Tassa viṣeṇa vacanaṃ loke garutarapuññasammatabhāvato. Yathā hi pāpadhammesu musāvādo garutaro, evaṃ puññadhammesu amosavajjo. Tenāha bhagavā **itivuttake** –

“Ekadhammaṃ atītassa, musāvādissa jantuno;
Vitiṇṇaparalokassa, natthi pāpaṃ akāriya’nti. (itivu. 27);

Pavattīti yo karoti, tassa santāne phaluppādapaccayabhāvena uppatti. Evañhi **“natthi kammaṃ, natthi kammaphala**’nti akiriyaṃvādassa paripuṇṇatā. Sati hi kammaphale kammānamakiriyaṃbhāvo kathaṃ bhavissati. **Sabbathāpīti** **“karoto**’tiādinā vuttana sabbappakārenapi.

Labujanti likucaṃ. **Pāpapuññānaṃ kiryameva paṭikkhipati**, na raññā puṭṭhaṃ sandiṭṭhikaṃ sāmāññaphalaṃ byākarotīti adhippāyo. Idañhi avadhāraṇaṃ vipākapaṭikkhepanivattanatthaṃ. Yo hi kammaṃ paṭikkhipati, tena atthato vipākopi paṭikkhittoyeva nāma hoti. Tathā hi vakkhati **“kammaṃ paṭibāhantenāpi**’tiādi (dī. ni. aṭṭha. 1.170-172).

Paṭirājūhi anabhivhanāyabhāvena viṣeṇa jītanti **vijitaṃ**, ekassa rañño āṇāpavattideso. **“Mā mayhaṃ vijite vasathā**’ti apasādanā pabbajitassa pabbājanasaṅkhātā viheṭṭhanāyevāti vuttaṃ **“viheṭṭhetabba**’nti. Tena vuttassa atthassa **“evameta**’nti upadhāraṇaṃ sallakkhaṇaṃ **uggaṇhanaṃ**,

tadaminā paṭikkhipatīti āha “**sārato aggaṇhanto**”ti. Tassa pana atthassa addhaniyabhāvāpādanavasena cittena sandhāraṇaṃ **nikkujjanam**, tadaminā paṭikkhipatīti dasseti “**sāravaseneva...pe... aṭṭhapento**”ti iminā. **Sāravasenevā**ti uttamavaseneva, avitathattā vā parehi anuccālito thirabhūto attho apheggubhāvena sāroti vuccati, taṃvasenevāti attho. **Nissaraṇanti** vaṭṭato niyyānaṃ. **Paramatthoti** aviparītattho, uttamassa vā ñāpassārammaṇabhūto attho. **Byañjanaṃ pana tena uggahitañceva nikkujjitañca** tathāyeva bhagavato santike bhāsītattā.

Makkhaligosālāvādavaṇṇanā

168. Ubhayenāti hetupaccayapaṭisedhavacanena. “**Vijjamānamevā**”ti iminā sabhāvato vijjamānasseva paṭikkhipane tassa aññānameva kāraṇanti dasseti. **Samkilesapaccayanti** samkilissanassa malīnassa kāraṇaṃ. **Visuddhipaccayanti** samkilesato visuddhiyā vodānassa paccayaṃ. **Attakāreti** paccattavacanassa e-kāravasena padasiddhi yathā “vanappagumbe yathā phusitagge”ti, (khu. pā. 13; su. ni. 236) paccattatthe vā bhummavacanaṃ yathā “idampissa hoti sīlasmī”nti (dī. ni. 1.194), tadevatthaṃ dasseti “**attakāro**”ti iminā. So ca tena tena sattena attanā kātabbakammaṃ, attanā nipphādetabbapayogo vā. Tenāha “**yenā**”tiādi. **Sabbaññutanti** sammāsambodhiṃ. **Tanti** attanā katakammaṃ. **Dutiyapadenā**ti “natthi parakāre”ti padena. **Parakāro ca nāma** parassa vāhasā ijjanakapayogo. Tena vuttaṃ “**yam parakāra**”ntiādi. **Ovādānusāsanti** ovādabhūtamanusāsaniṃ, paṭhamaṃ vā ovādo, pacchā anusāsani. “Parakāra”nti padassa upalakkhaṇavasena atthadassanañcetam, lokuttaradhamme parakārāvassayo natthīti āha “**ṭhapetvā mahāsatta**”nti. Atthevesa lokiyadhamme yathā taṃ amhākaṃ bodhisattassa ālārudake nissāya pañcābhiññālokiyasamāpatilābho, tañca pacchimabhavikamahāsattaṃ sandhāya vuttaṃ, paccekabodhisattassapi ettheva saṅgaho tesampi tadabhāvato. **Manussasobhagayanti** manussesu subhagabhāvaṃ. **Evanti** vuttappakārena kammavādassa, kiriyavādassa ca paṭikkhipanena. **Jinacakketi** “atthi bhikkhave kammaṃ kaṇhaṃ kaṇhavipāka”ntiādi (a. ni. 4.232) nayappavatte kammānaṃ, kammaphalānañca atthitāparidīpane buddhasāsane. Paccanīkakathanam pahāradānasadisanti “**pahāraṃ deti nāmā**”ti.

Yathāvuttaattakāraparakārābhāvato eva sattānaṃ paccattapurisakāro nāma koci natthīti sandhāya “**natthipurisakāre**”ti tassa paṭikkhipanaṃ dassetuṃ “**yenā**”tiādi vuttaṃ. “Devattampi”tiādinā, “manussasobhagayata”ntiādinā ca **vuttappakārā**. “Bale patiṭṭhitā”ti vatvā vīriyamevidha balanti dassetuṃ “**vīriyam katvā**”ti vuttaṃ. Sattānañhi diṭṭhadhammikasamparāyika nibbānasampattiāvahaṃ vīriyabalaṃ natthīti so paṭikkhipati, nidassanamattañcetam vodāniyabalassa paṭikkhipanaṃ samkilesikassāpi balassa tena paṭikkhipanato. Yadi vīriyādīni purisakāravevacanāni, atha kasmā tesam visuṃ gahaṇanti āha “**idaṃ no vīriyenā**”tiādi. **Idaṃ no vīriyenā**ti idaṃ phalaṃ amhākaṃ vīriyena pavattaṃ. **Pavattavacanapaṭikkhepakaraṇavasenā**ti aññesaṃ pavattavohāravacanassa paṭikkhepakaraṇavasena. Vīriyathāmaparakkamasambandhanena pavattabalavādīnaṃ vādassa paṭikkhepakaraṇavasena “natthi bala”nti padamiva sabbānipetāni tena ādīyantīti adhippāyo. Tañca vacanīyatthato vuttaṃ, vacanatthato pana tassā tassā kiriyāya ussannaṭṭhena **balam**. Sūravīrabhāvāvahaṭṭhena **vīriyam**. Tadeva dalābhāvato, porisadhuraṃ vahantena pavattetabbato ca **purisathāmo**. Paraṃ paraṃ ṭhānaṃ akkamanavasena pavattiyā **purisaparakkamoti** veditabbaṃ.

Rūpādīsu sattavisattatāya **sattā**. Assanaṃpassanaṃavasena pavattiyā pāṇanato **pāṇā**ti iminā atthena samānepi padadvaye ekindriyādivasena pāṇe vibhajivā sattato visesaṃ katvā esa vadatīti āha “**ekindriyo**”tiādi. Bhavanti **bhūtā**ti sattapāṇapariyāyepi sati aṇḍakosādīsu sambhavanaṭṭhena tato visesāva, tena vuttāti dasseti “**aṇḍa...pe... vadatī**”ti iminā. **Vatthikoso** gabbhāsāyo. Jīvanato pāṇaṃ dhārento viya vaḍḍhanato **jīvā**. Tenāha “**sāliyavā**”tiādi. **Ādisaddena** viruḷhadhammā tiṇarukkhā gahitā. Natthi etesaṃ samkilesavisuddhīsu vaso sāmattihiyanti **avasā**. Tathā **abalā avīriyā**. Tenāha “**tesa**”ntiādi. **Niyatā**ti niyamanā, achejjasuttāvutassa abhejjamaṇino viya niyatappavattitāya gatijātibandhāpavaggavasena niyāmoti attho. **Tattha tatthā**ti tāsū tāsū jātīsu. **Channaṃ abhijātīnaṃ** sambandhībhūtānaṃ **gamaṇaṃ** samavāyena samāgamo. Sambandhīnirapekkhopi bhāvasaddo sambandhīsaḥito viya pakatiyatthavācakoti āha “**sabhāvoyevā**”ti, yathā kaṇṭakassa tikkhatā,

kapitthaphalādīnaṃ parimaṇḍalatā, migapakkhīnaṃ vicittākāratā ca, evaṃ sabbassāpi lokassa hetupaccayamantarena tathā tathā pariṇāmo akuttimo sabhāvoyevāti attho. Tena vuttaṃ “**yenā**”tiādi. Pariṇamaṇaṃ nānappakāratāpatti. **Yenāti** sattapāṇādinā. Yathā bhavitabbaṃ, tathevāti sambandho.

Chaḷabhijātiyo parato vitthārīyissanti. “Sukhañca dukkhañca paṭisaṃvedentī”ti vadanto makkhali adukkhamasukhabhūmiṃ sabbena sabbam na jānātīti vuttaṃ “**aññā adukkhamasukhabhūmi natthīti dassetī**”ti. Ayaṃ “sukhañca dukkhañca paṭisaṃvedentī”ti vacanaṃ karaṇabhāvena gahetvā vuttā ācariyassa matī. Potthakesu pana “**aññā sukhadukkhabhūmi natthīti dassetī**”ti ayameva pāṭho diṭṭho, na “adukkhamasukhabhūmi”ti. Evaṃ sati “chasvevābhijātīsū”ti vacanaṃ adhikaraṇabhāvena gahetvā chasu eva abhijātīsu sukhadukkhapāṭisaṃvedanaṃ, na tehi aññattha, tāyeva sukhadukkhabhūmi, na tadaññāti dassetīti vuttanti veditabbaṃ. Ayameva ca yuttataro paṭikkhepitabbassa atthassa bhūmivasena vuttattā. Yadi hi “sukhañca dukkhañca paṭisaṃvedentī”ti vacanena paṭikkhepitabbassa dassanaṃ siyā, atha “aññā adukkhamasukhā natthī”ti dasseyya, na “adukkhamasukhabhūmi”ti dassanahetuvacanassa bhūmiatthābhāvato. Dasseti cetam tāsam bhūmiyā abhāvameva, tena viññāyati ayaṃ pāṭho, ayañcattho yuttataroti.

Pamukhayonīnanti manussesu khattiyabrāhmaṇādivasena, tīracchānādīsu sīhabyagghādivasena padhānayanīnaṃ, padhānatā cettha uttamatā. Tenāha “**uttamayonīna**”nti. **Saṭṭhi satānīti** cha sahasāni. “Pañca ca kammuno satānī”ti padassa atthadassanaṃ “**pañca kammāsātāni cā**”ti. “**Eseva nayo**”ti iminā “kevalaṃ takkamattakena niratthakaṃ diṭṭhiṃ dīpetī”ti imamevatthamatidisati. Ettha ca “**takkamattakenā**”ti vadanto yasmā takkikā avassayabhūtatahatthaggahaṇaṇaṅkusanayamantarena niraṅkusatāya parikkappanassa yaṃ kiñci attanā parikkappitaṃ sārato maññamānā tatheva abhinivissa tattha ca diṭṭhigāhaṃ gaṇhanti, tasmā na tesam diṭṭhivatthusmiṃ viññūhi vicāraṇā kātābbāti imamadhīpāyaṃ vibhāveti. **Kecīti** uttaravihāravāsino. **Pañcindriyavasenāti** cakkhādīpañcindriyavasena. Te hi “cakkhusotaghānājivhākāyasaṅkhātāni imāni pañcindriyāni ‘pañca kammānī’ti titthiyā paññapenti”ti vadanti “kāyavacīmanokammāni ca ‘tīṇi kammānī’ti”. **Kammanti laddhīti** tadubhayaṃ oḷārikattā paripuṇṇakammanti laddhi. Manokammaṃ anolārikattā upaḍḍhakammanti laddhīti yojanā. “Dvāsāṭṭhi paṭipadā”ti vattabbe sabhāvaniruttiṃ ajānanto “dvāṭṭhipaṭipadā”ti vadatīti āha “**dvāsāṭṭhi paṭipadā**”ti. Saddaracakā pana “dvāsāṭṭhiyā salopo, attamā”ti vadanti, tadayuttameva sabhāvaniruttiyā yogato asiddhattā. Yadi hi sā yogena siddhā assa, evaṃ sabhāvaniruttiyeva siyā, tathā ca sati ācariyānaṃ matena virujjhatīti vadanti. “Cullāsīti sahasāni”tiādikā pana aññatra diṭṭhapayogā sabhāvaniruttiyeva. Dissati hi **visuddhimaggādīsu** –

“Cullāsīti sahasāni, kappā tiṭṭhanti ye marū;

Na tveva tepi tiṭṭhanti, dvīhi cittehi samohitā”ti. (visuddhi. 2.715; mahāni. 10, 39);

Ekasmiṃ kappeti catunnamasaṅkhyeyyakappānaṃ aññatarabhūte ekasmiṃ asaṅkhyeyyakappe. Tatthāpi ca vivatṭatṭhāyīsaññitaṃ ekameva sandhāya “**dvāṭṭhantarakappā**”ti vuttaṃ. Na hi so assutasāsanadhammo itare jānāti bāhirakānamavisayattā, ajānanto evamāhāti attho.

Urabbhe hananti, hantvā vā jīvitaṃ kappentīti **orabbhikā**. Esa nayo **sākuṇikā**dīsupi. **Luddāti** vuttāvasesakā ye keci cātuppadaajīvikā nesādā. Māgavikapadasmiñhi rohitādīmagajātiyeva gahitā. Bandhanāgāre niyojenti **bandhanāgārikā**. **Kurūrakammantāti** dāruṇakammantā. **Ayaṃ** sabbopi kaṇhakammapasutatāya **kaṇhābhijātīti vadati** kaṇhassa dhammassa abhijāti abbhuppatti yassāti katvā. **Bhikkhūti** buddhasāsane bhikkhū. **Kaṇṭaketi** chandarāge. Saññogavasena tesam pakkhipanaṃ. Kaṇṭakasadisachandarāgena saññuttā bhuñjantīti hi adhippāyena “**kaṇṭake pakkhipitvā**”ti vuttaṃ. Kasmāti ce? Yasmā “te paṇitapaṇīte paccaye paṭisevanti”ti tassa micchāgāho, tasmā ñāyaladdhepi paccaye bhuñjamānā ājīvakasamayassa vilomagāhitāya paccayesu kaṇṭake pakkhipitvā khādanti nāmāti vadati **kaṇṭakavuttikāti** kaṇṭakena yathāvuttena saha jīvikā. **Ayañhissa pāḷiyevāti** ayaṃ makkhalissa vādāpanā attanā racitā pāḷiyevāti yathāvuttamatthaṃ samattheti. Kaṇṭakavuttikā eva nāma **eke** apare **pabbajitā** bāhirakā santi, te nīlābhijātīti **vadatīti** attho. Te hi savisesam attakilamathānuyogamanuyuttā.

Tathā hi te kaṅṭhake vattantā viya bhavantīti **kaṅṭhakavuttikā**ti vuttā. Nīlassa dhammassa abhijāti yassāti **nīlabhijāti**. Evamita resupi.

Amhākaṃ saññojanagaṅṭho natthīti vādino bāhirakapabbajitā **nigaṅṭhā**. Ekameva sātakaṃ paridahantā **ekasātakā**. Kaṅṭhato parisuddho nīlo, tato pana lohitotiādinā yathākkamaṃ tassa parisuddhaṃ vādaṃ dassetuṃ “**ime kirā**”tiādi vuttaṃ. **Paṇḍaratarā**ti bhuñjananahānapaṭikkhepādivatasamāyogena parisuddhatarā kaṅṭhanīlamupādāya lohitassāpi parisuddhabhāvena vattabbato. **Odātavasanā**ti odātavattaparidahanā. **Acelakasāvaka**ti ājīvakasāvaka bhūtā. **Te kira** ājīvaka laddhiyā visuddhacittatāya nigaṅṭhehipi **paṇḍaratarā** haliddābhānampi purime upādāya parisuddhabhāvappattito. “**Eva**”ntiādinā tassa chandāgamanam dasseti. Nandādinam sāvaka bhūtā pabbajitā **ājīvaka**. Tathā **ājīvakiniyo**. Nandādayo kira tathārūpaṃ ājīvaka paṭipattim ukkaṃsaṃ pāpetvā ṭhitā, tasmā nigaṅṭhehi ājīvakasāvakehi pabbajitehi paṇḍaratarā vuttā paramasukkābhijātīti ayaṃ tassa laddhi.

Purisabhūmiyoti padhānaniddeso. Itthīnampi hetā bhūmiyo esa icchateva. **Satta divaseti** accantasañño gavaṇaṃ, ettakampi mandā momūhāti. **Sambādhaṭṭhānatoti** mātukucchiṃ sandhāyāha. **Rodanti ceva viravanti ca** tamanussarivā. Khedanam, kīlanañca khiḍḍāsaddeneva saṅgahetvā **khiḍḍābhūmi** vuttā. Padassa nikkhipanaṃ **padanikkhipanaṃ**. Yādā tathā padaṃ nikkhipituṃ samattho, tadā **padavīmaṃsabhūmi nāmā**ti bhāvo. Vatāvataṃsa **jānanakāle**. **Bhikkhu ca pannakoti**ādi pi tesam bāhirakānaṃ pāḷiyeva. Tattha **pannakoti** bhikkhāya vicaraṇako, tesam vā paṭipattiyā paṭipannaṃ. **Jinoti** jinno jarāvasena hīnadhātuko, attano vā paṭipattiyā paṭipakkhaṃ jinitvā ṭhito. So kira tathābhūto dhammampi kassaci na kathesi. Tenāha “**na kiñci āhā**”ti. Oṭṭhavadanādivippakāre katēpi khamanavasena na kiñci kathetīti vadanti. **Alābhinti** “so na kumbhimukhā paṭiggaṅṭhāti”tiādinā nayena mahāsīhanādasutte (dī. ni. 1.394; ma. ni. 1.155) vuttaalābhahetusamāyogena alābhiṃ. Tatoyeva jighacchādubbalaparetatāya sayanaparāyanatṭhena **samaṇaṃ pannabhūmīti vadati**.

Ājīvavuttisatānīti sattānamājīvabhūtāni jīvikāvuttisatāni. “Paribbājakasatānī”ti vuccamānēpi cesa sabhāvaliṅgamajānanto “**paribbājakasate**”ti vadati. Evamaññesupi. Tenāha “**paribbājakapabbajjāsātānī**”ti. Nāgabhaṇaṃ **nāgamaṇḍalam** yathā “mahīmsakamaṇḍala”nti. Paramāṇuādi **rajo**. **Pasuggahaṇena** eḷakajāti gahitā. **Migaggahaṇena** rurugavayādi migajāti. **Gaṅṭhimhī**ti phaḷumhi, pabbeti attho. Cātumahārājikādibrahmakāyikādivasena, tesañca antarabhedavasena **bahū devā**. Tattha cātumahārājikānaṃ ekaccaantarabhedo **mahāsamayassutta**na (dī. ni. 2.331) dīpetabbo. “**So panā**”tiādinā ajānanto panesa bahū devepi satta eva vadatīti tassa appamaṇataṃ dasseti. **Manussāpi anantā**ti dīpadesakulavaṃsājīvādivibhāgavasena. Pisācā eva **pesācā**, te aparapetādivasena **mahantamahantā**, bahutarāti attho. Bāhirakasamaye pana “chaddantadahamandākiniyo kuvāḷiyamucalindanāmena voharitā”ti (dī. ni. ṭī. 1.168) ācariyena vuttaṃ.

Gaṅṭhikāti pabbagaṅṭhikā. Pabbagaṅṭhimhi hi pavuṭasaddo. **Mahāpapātā**ti mahātaṭṭā. Pārisesanayena **khuddakapapātasatāni**. Evaṃ supinesupi. “**Mahākappino**”ti idaṃ “mahākappāna”nti atthato veditabbaṃ. Saddato panesa ajānanto evaṃ vadatīti na vicāraṇakkhamam. Tathā “**cullāsīti satahassānī**”ti idampi. So hi “caturāsīti satahassānī”ti vattumasakkonto evaṃ vadati. Saddaracakā pana “caturāsītiyā tulopo, cassa cu, rassa lo, dvittañcā”ti vadanti. **Ettakā mahāsarā**ti etappamaṇavatā mahāsarato, sattamahāsaratoṭi vuttaṃ hoti. **Kirā**ti tassa vādānussavane nipāto. **Paṇḍitopi...pe... na gacchati**, kasmā? Sattānaṃ saṃsaraṇakālassa niyatabhāvato.

“Acelakavatena vā aññena vā yena kenacī”ti vuttamatidīsati “**tādisenevā**”ti iminā. **Tapokammenā**ti tapakaraṇena. Etthāpi “tādisenevā”ti adhikāro. Yo...pe... visujjhati, so aparipakkaṃ kammaṃ paripāceti nāmāti yojanā. **Antarā**ti caturāsītimahākappasatasahassānamabbhantare. **Phussa phussā**ti patvā patvā. **Vuttaparimāṇaṃ kālanti** caturāsītimahākappasatasahassapamāṇaṃ kālam. Idaṃ vuttaṃ hoti – **aparipakkaṃ** saṃsaraṇanimittaṃ kammaṃ silādinā sīghaṃyeva visuddhappattiyā

paripāceti nāma. Paripakkam kammaṃ phussa phussa kālena paripakkabhāvānāpādanena **byantiṃ** vigamaṇaṃ **karoti nāmāti. Doṇenāti** pariminanadoṇatumbenā. Rūpakavasenaṭṭho labbhatīti vuttaṃ “**mitaṃ viyā**”ti. Na hāpanavaḍḍhanaṃ paṇḍitabālavasenaṭṭi dasseti “**na saṃsāro**”tiadinā. Vaḍḍhanaṃ **ukkaṃso. Hāpanaṃ avakaṃso.**

Katasuttaguḷeti katasuttavaṭṭiyaṃ. **Paletīti** pareti yathā “abhisamparāyo”ti, (mahāni. 69; cūḷani. 85; paṭi. ma. 3.4) ra-kārassa pana la-kāraṃ katvā evaṃ vuttaṃ yathā “palibuddho”ti (cūḷani. 15; mi. pa. 3.6). So ca curādigaṇavasena gatiyanti vuttaṃ “**gacchati**”ti. Imāya upamāya cesa sattānaṃ saṃsāro anukkamena khīyateva, na vaḍḍhati paricchinnarūpattāti imamatthaṃ vibhāvetīti āha “**sutte khīṇe**”tiadi. **Tatthevāti** khīyanaṭṭhāneyeva.

Ajitakesakambalavādavaṇṇanā

171. Dinnanti deyyadhammasīsena dānacetanāyeva vuttā. Taṃmukhena ca phalanti dasseti “**dinnassa phalābhāva**”nti iminā. Dinnañhi mukhyato annādivatthu, taṃ kathamesa paṭikkhipissati. Esa nayo **yiṭṭhaṃ hutanti** etthāpi. Sabbasādhāraṇaṃ mahādānaṃ **mahāyāgo.** Pāhunabhāvena kattabbasakkāro **pāhunakasakkāro. Phalanti** ānisaṃsaphalaṃ, nissandaphalañca. **Vipākoti** sadisaphalaṃ. Caturāṅgasamannāgate dāne ṭhānantarādīpatti viya hi ānisaṃso, **saṅkhabrahmaṇassa** dāne (jā. 1.10.39) tāṇalābhamattaṃ viya nissando, paṭisandhisāṅkhātaṃ sadisaphalaṃ vipāko. **Ayaṃ loko, paralokoti** ca kammunā laddhabbo vutto phalābhāvameva sandhāya paṭikkhipanato. Paccakkhadīṭṭho hi loko kathaṃ tena paṭikkhitto siyā. “**Sabbe tattha tattheva ucchijjanti**”ti iminā kāraṇamāha, yattha yattha bhavayoniādīsu ṭhitā ime sattā, tattha tattheva ucchijjanti, nirudayavināsavasena vinassantīti attho. **Tesūti** mātāpitūsu. **Phalābhāvavaseneva vadati,** na mātāpitūnaṃ, nāpi tesu idāni kariyamānasakkārāsakkārānamabhāvavasena tesam loke paccakkhattā. Pubbuḷassa viya imesaṃ sattānaṃ uppādo nāma kevalo, na cavitvā āgamanapubbako atthīti dassanattaṃ “natthi sattā opapātikā”ti vuttanti āha “**cavitvā upapajjanakā sattā nāma natthi**”ti. Samaṇena nāma yāthāvato jānantena kassaci akathetvā saññatena bhavitabbaṃ, aññathā ahopurisikā nāma siyā. Kiñhi paro parassa karissati, tathā ca attano sampādanassa kassaci avassayo eva na siyā tattha tattheva ucchijjanatoti imamatthaṃ sandhāya “**ye imaṇca...pe... pavedenti**”ti āha. Ayaṃ aṭṭhakathāvasesako attho.

Catūsu mahābhūtesu niyutto **cātumahābhūtikō,** atthamattato pana dassetuṃ “**cātumahābhūtamayo**”ti vuttaṃ. Yathā hi mattikāya nibbattaṃ bhājanaṃ mattikāmayam, evamayampi catūhi mahābhūtehi nibbatta cātumahābhūtamayoti vuccati. **Ajjhattikapathavīdhātūti** sattasantānagatā pathavīdhātu. **Bāhirapathavīdhātūti** bahiddhā mahāpathaviṃ, tena pathavīyeva kāyoti dasseti. **Anugacchatīti** anubandhati. **Ubhayenāpīti** padadvayenapi. **Upeti upagacchatīti** bāhirapathavikāyato tadekadesabhūtā pathavī āgantvā ajjhattikabhāvappatti hutvā sattabhāvena saṅṭhitā, sā ca mahāpathavī ghaṭṭadīgatapathavī viya idāni tameva bāhiraṃ pathavikāyaṃ samudāyabhūtaṃ puna upeti upagacchati, sabbaso tena bāhirapathavikāyena nibbisesataṃ ekībhāvameva gacchati attho. **Āpādisupi eseva nayoti** ettha pajjunna mahāsamuddato gahitāpo viya vassodakabhāvena punapi mahāsamuddaṃ, sūriyaraṃsito gahitaindaggisaṅkhātatejo viya punapi sūriyaraṃsim, mahāvāyukkhandhato niggatamahāvāto viya punapi mahāvāyukkhandhaṃ upeti upagacchati parikappanāmattena dīṭṭhigatikassa adhippāyo.

Manacchatthāni indriyānīti manameva chatthaṃ yesaṃ cakkhusotaghānajiṃhākāyānaṃ, tāni indriyāni. **Ākāsaṃ pakkhandanti** tesam visayabhāvāti vadanti. Visayīgahaṇena hi visayāpi gahitā eva honti. Kathaṃ gaṇitā mañcapañcamāti āha “**mañco ceva...pe... attho**”ti. Āḷāhanaṃ susānanti atthato ekaṃ. **Guṇāguṇapadānīti** guṇadosakoṭṭhāsāni. **Sarīrameva vā padāni** taṃtaṃkiriyāya pajjitabato. **Pārāvatapakkhivaṇṇānīti** pārāvataṃ nāma pakkhino vaṇṇāni. “**Pārāvatapakkhivaṇṇāni**”ti pāṭho, pārāvatasakuṇassa pattavaṇṇānīti attho. **Bhasmantāti** chārikāpariyantā. Tenāha “**chārikāvasānamevā**”ti. Āhutiśaddenattha “dinnaṃ yiṭṭhaṃ huta”nti vuttappakāraṃ dānaṃ sabbampi

gahitanti dasseti “**pāhunakasakkārādibhedam dinnadāna**”nti iminā, virūpekasesaniddeso vā esa. **Atthoti** adhippāyato attho saddato tassa anadhigamitattā. Evamīdisesu. Dabbanti muyhantīti dattū, bālapuggalā, tehi **dattūhi**. Kiṃ vuttaṃ hotīti āha “**bālā denti**”tiādi. Pāḷiyam “loko atthī”ti mati yesam te **atthikā**, “atthī”ti cedam nepātikapadam, tesam vādo atthikavādo, tam **atthikavādam**.

Tatthāti tesu yathāvuttesu tīsu micchāvādīsu. **Kammaṃ paṭibāhati** akiriyavādibhāvato. **Vipākaṃ paṭibāhati** sabbena sabbaṃ āyatim upapattiyā paṭikkhipanato. **Vipākanti** ca ānisamsanissandasadisaphalavasena tividhampi vipākaṃ. **Ubhayam paṭibāhati** sabbaso hetupaṭisedhaneneva phalassāpi paṭisedhitattā. **Ubhayanti** ca kammaṃ vipākampi. So hi “ahetū appaccayā sattā saṃkilissanti, visujjhanti cā”ti vadanto kammaṃ viya vipākassāpi saṃkilesavisuddhīnam paccayattābhāvajotanato tadubhayam paṭibāhati nāma. **Vipāko paṭibāhito hoti** asati kammaṃ vipākābhāvato. **Kammaṃ paṭibāhitam hoti** asati vipāke kammaṃ niratthakatāpattito. **Itīti** vuttatthanidassanam. **Atthatotī** sarūpato, viṣuṃ viṣuṃ tamtamdiṭṭhidīpakabhāvena pāḷiyam āgatāpi tadubhayapaṭibāhakāvāti attho. Paccekam tividhadīṭṭhikā eva te ubhayapaṭibāhakattā. “**Ubhayappaṭibāhakā**”ti hi hetuvacanam hetugabbhattā tassa visesanassa. **Ahetukavādā cevāti**tiādi paṭiññāvacanam tapphalabhāvena nicchitattā. Tasmā vipākapaṭibāhakattā **natthikavādā**, kammaṃ paṭibāhakattā **akiriyavādā**, tadubhayapaṭibāhakattā **ahetukavādāti** yathālābham hetuphalatāsambandho veditabbo. Yo hi vipākapaṭibāhanena natthikadiṭṭhiko ucchedavādī, so atthato kammaṃ paṭibāhanena akiriyadiṭṭhiko, ubhayapaṭibāhanena ahelikadiṭṭhiko ca hoti. Sesadvayepi eseva nayo.

“**Ye vā panā**”tiādinā tesamanudiṭṭhikānam niyāmokkantinicchayo vutto. Tattha **tesanti** pūraṇādīnam. **Sajjhāyantīti** tam diṭṭhidīpakam gantham yathā tathā tehi katam uggahetvā paṭhanti. **Vīmaṃsantīti** tassa attham vicārenti. “**Tesa**”ntiādi vīmaṃsanākāradassanam. “Karoto...pe... ucchijjati”ti evam vīmaṃsantānam tesanti sambandho. **Tasmim ārammaṇeti** yathāparikappite kammaphalābhāvādike “karoto na kariyati pāpa”ntiādi nayappavattāya micchādassanasāṅkhātāya laddhiyā ārammaṇe. **Micchāsati santiṭṭhatīti** micchāsatisāṅkhātā laddhisahagatā taṇhā santiṭṭhati. “Karoto na kariyati pāpa”ntiādivasena hi anussavūpaladdhe atthe tadākāraparivitakkanehi saviggahe viya sarūpato cittassa paccupaṭṭhite cirakālaparicayena “evameta”nti nijjhānakkhamabhāvūpagamane, nijjhānakkhantiyā ca tathā tathā gahite punappunam tatheva āsevantaṃ bahulīkarontassa micchāvitaṅkena samānīyamānā micchāvāyāmuṃpatthambhitā atamabhāvampi “tamabhāva”nti gaṇhantī micchāladdhisahagatā taṇhā musā vitatham saraṇato pavattanato micchāsati vuccati. **Caturaṅguttaraṭīkāyampi** (a. ni. aṭṭha. 2.4.30) cesa attho vuttoyeva. Micchāsāṅkappādayo viya hi micchāsati nāma pāṭiyekko koci dhammo natthi, taṇhāsīsena gahitānam catunnampi akusalakkhandhānametaṃ adhivacananti **majjhimāgamatṭhakathāyampi sallekhasuttavaṇṇanāyam** (ma. ni. aṭṭha. 1.83) vuttaṃ.

Cittam ekaggam hotīti yathāsakam vitakkādīpaccayalābhena tasmim ārammaṇe avatṭhitatāya anekaggatam pahāya ekaggam appitam viya hoti, cittasīna cettha micchāsamādhi eva vutto. So hi paccayavisesehi laddhabhāvanābalo īdise ṭhāne samādhānapatirūpakakiccaroyeva hoti vālavijjanādīsu viyāti daṭṭhabbam. **Javanāni javantīti** anekakkhattum tenākārena pubbabhāgiyesu javanavāresu pavattesu sannīṭṭhānabhūte sabbapacchime javanavāre satta javanāni javanti. “**Paṭhamajavane satekicchā honti, tathā dutiyādīsū**”ti idam dhammasabhāvādassanameva, na pana tasmim khaṇe tesam tikicchā kenaci sakkā kātunti dassanam tesveva ṭhatvā sattamajavanassa avassamuppajjamānassa nivattitum asakkuṇeyyattā, evam lahuparivatte ca cittavāre ovādānusāsana vasena tikicchāya asambhavato. Tenāha “**buddhānampi atekicchā anivattino**”ti. **Ariṭṭhakaṇṭakasadisāti** ariṭṭhabhikkhakaṇṭakasāmaṇerasadisā, te viya atekicchā anivattino micchādiṭṭhigatikāyeva jātāti vuttaṃ hoti.

Tatthāti tesu tīsu micchādassanesu. **Koci ekam dassanam okkamati**ti yassa ekasmimyeva abhiniveso, āsevanā ca pavattā, so ekameva dassanam okkamati. **Koci dve, koci tīnipīti** yassa dvīsu,

tīsupi vā abhiniveso, āsevanā ca pavattā, so dve, tīṇipi okkamati, etena pana vacanena yā pubbe “iti sabbpete atthato ubhayappaṭibāhakā” tiādinā ubhayappaṭibāhakatāmukhena dīpitā atthato siddhā sabbadiṭṭhikatā, sā pubbabhāgiyā. Yā pana micchattaniyāmokkantibhūtā, sā yathāsakaṃ paccayasamudāgasiddhito bhinnārammaṇānaṃ viya visesādhigamānaṃ ekajjhaṃ anuppattiyā aññamaññaṃ abbokiṇṇā evāti dasseti. “**Ekasmiṃ okkantepī**” tiādinā tissannampi diṭṭhīnaṃ samānasāmatthiyataṃ, samānaphalatañca vibhāveti. Saggāvaraṇādinā hetā samānasāmatthiyā ceva samānaphalā ca, tasmā tissopi cetā ekassa uppannāpi abbokiṇṇā eva, ekāya vipāke dinne itarā tassā anubalappadāyikāyoti daṭṭhabbaṃ. “**Patto saggamaggāvaraṇāncevā**” tiādiṃ vatvā “**abhabbo**” tiādinā tadevatthaṃ āvikaroti. **Mokkhamaggāvaraṇanti** nibbānaphabhūtassa ariyamaggassa nivāraṇaṃ. **Pagevāti** paṭikkhepatthe nipāto, mokkhasaṅkhataṃ pana nibbānaṃ gantuṃ kā nāma kathāti attho. Apica **pagevāti** pā eva, paṭhamatarameva mokkhaṃ gantumabhabbo, mokkhagamanatopi dūrataramevāti vuttaṃ hoti. Evamaññatthāpi yathārahaṃ.

“**Vaṭṭakhāṇu nāmesa satto**” ti idaṃ vacanaṃ neyyatthameva, na nītatthaṃ. Tathā hi vuttaṃ **papañcasūdaniyaṃ** nāma **majjhimāgamatṭhakathāyaṃ** “kiṃ panesa ekasmiṃyeva attabhāve niyato hoti, udāhu aññasmimpīti? Ekasmiṃyeva niyato, āsevanavasena pana bhavantarepi taṃ taṃ diṭṭhiṃ roctiyevā” ti (ma. ni. aṭṭha. 3.103). Akusalañhi nāmetaṃ abalaṃ dubbalaṃ, na kusalaṃ viya sabalaṃ mahābalaṃ, tasmā “ekasmiṃyeva attabhāve niyato” ti tatha vuttaṃ. Aññāthā sammattaniyāmo viya micchattaniyāmoṃpi accantiko siyā, na ca accantiko. Yadevaṃ vaṭṭakhāṇujotānā kathaṃ yujjeyyāti āha “āsevanavasenā” tiādi, tasmā yathā **sattaṅguttarapāliyaṃ** “sakimṃ nimuggopi nimuggo eva bālo” ti [a. ni. 7.15 (atthato samānaṃ)] vuttaṃ, evaṃ vaṭṭakhāṇujotānāpi vuttā. Yādise hi paccaye paṭicca ayaṃ taṃ taṃ dassanaṃ okkanto, puna kadāci tappaṭipakkhe paccaye paṭicca tato sīsukkipanamaṃ na hotīti na vattabbaṃ. Tasmā tatha, (ma. ni. aṭṭha. 3.102) idha ca aṭṭhakathāyaṃ “**evarūpassa hi yebhuyyena bhavato vuṭṭhānaṃ nāma natthī**” ti yebhuyyaggahaṇaṃ kataṃ, iti āsevanavasena bhavantarepi taṃtaṃdiṭṭhiyā rocanato yebhuyyenassa bhavato vuṭṭhānaṃ natthīti katvā vaṭṭakhāṇuko nāmesa jāto, na pana micchattaniyāmassa accantikāyāti nīharitvā nītabbatthatāya neyyatthamidaṃ, na nītatthanti veditabbaṃ. Yaṃ sandhāya **abhidhammepi** “arahā, ye ca puthujjanā maggaṃ na paṭilabhissanti, te rūpakkhandhañca na pariṇānanti, vedanākkhandhañca na pariṇānissanti” tiādi (yama. 1.khandhayamaka 210) vuttaṃ. **Pathavigopakoti** yathāvuttakāraṇena pathavipālako. Tadattaṃ samatthetuṃ “**yebhuyyenā**” tiādi vuttaṃ.

Evaṃ micchādiṭṭhiyā paramasāvajjānusārena sotūnaṃ satimuppādentō “**tasmā**” tiādimāha. Tattha **tasmāti** yasmā evaṃ saṃsārakhāṇubhāvassāpi paccayo apanṇakajāto, tasmā parivajjeyyāti sambandho. **Akalyāṇajananti** kalyāṇadhammavirahitajanaṃ asādhujanaṃ. **Āsīvisanti** āsumāgatahalāhalaṃ. **Bhūtikāmoti** diṭṭhadhammikasamparāyikaparamatthānaṃ vasena attano guṇehi vuḍḍhikāmo. **Vicakkhaṇoti** paññācakkhunā vividhatthassa passako, dhīroti attho.

Pakudhakaccāyanavādavaṇṇanā

174. “Akaṭā” ti ettha ta-kārassa ṭa-kārādesoti āha “**akatā**” ti, samena, visamena vā kenacipi hetunā akatā, na vihitāti attho. Tathā **akaṭavidhāti** etthāpi. Natthi katavidho karaṇavidhi etesanti **akaṭavidhā**. Padadvayenāpi loke kenaci hetupaccayena nesam anibbattabhāvaṃ dasseti. Tenāha “**evam karohī**” tiādi. **Iddhiyāpi na nimmitāti** kassaci iddhimato cetovasippattassa puggalassa, devassa, issarādino ca iddhiyāpi na nimmitā. **Animmāpitāti** kassaci animmāpitā. Kāmaṃ saddato yuttaṃ, atthato ca purimena samānaṃ, tathāpi pāliyamatṭhakathāyañca anāgatameva agahetabbabhāve kāraṇanti dasseti “**taṃ neva pāliya**” ntiādinā.

Brahmajālasuttasamvaṇṇanāyaṃ (dī. ni. aṭṭha. 1.30) **vuttatthameva**. Idamettha yojanāmatthaṃ – vañjhāti hi vañjhapasuvañjhātālādayo viya aphaḷā kassaci ajanakā, tena pathavikāyādīnaṃ rūpādijanabhāvaṃ paṭikkhipati. Rūpasaddādayo hi pathavikāyādīhi appaṭibaddhavuttikāti tassa laddhi. Pabbatassa kūṭamiva ṭhitāti **kūṭatṭhā**, yathā pabbatakūṭaṃ kenaci anibbattitaṃ kassaci ca anibbattakaṃ,

evametepehi sattakāyāti adhippāyo. Yamidaṃ “bījato ankurādi jāyati”ti vuccati, taṃ vijjamānameva tato nikkhamati, na avijjamānaṃ, itarathā aññatopi aññassa upaladdhi siyā, evametepehi sattakāyā, tasmā **esikaṭṭhāyiṭṭhitāti**. **Ṭhitattāti** nibbikārabhāvena suppatiṭṭhitattā. **Na calantīti** na vikāramāpajjanti. Vikārabhāvato hi tesam sattannaṃ kāyānaṃ esikaṭṭhāyiṭṭhitatā, aniñjanañca attano pakatiyā avaṭṭhānameva. Tenāha “**na vipariṇamanti**”ti. **Pakatinti** sabhāvaṃ. Avipariṇāmadhammattā eva **na aññamaññaṃ upahananti**. Sati hi vikāramāpādetabbabhāve upaghātakatā siyā, tathā anuggahetabbabhāve sati anuggāhakatāpīti tadabhāvaṃ dassetuṃ pāliyaṃ “**nāla**”ntiādi vuttaṃ. Pathavīyeva kāyekadesattā **pathavikāyo** yathā “samuddo diṭṭho”ti, **pathavisamūho vā** kāyasaddassa samūhavācakkatā yathā “hatthikāyo”ti. Jīvasattamānaṃ kāyānaṃ niccatāya nibbikārabhāvato na hantabbatā, na ghātetabbatā ca, tasmā neva koci hantā, ghātetā vā atthīti dassetuṃ pāliyaṃ “**sattannaṃ tveva kāyāna**”ntiādi vuttaṃ. Yadi koci hantā natthi, kathaṃ tesam sathappahāroti tattha codanāyāha “**yathā**”tiādi. Tattha **sattannaṃ tvevāti** sattannaṃeva. **Itisaddo** hettha nipātamatam. **Pahatanti** paharitaṃ. Ekatothārādikaṃ **sattham**. Antareneva pavisati, na tesu. Idaṃ vuttaṃ hoti – **kevalaṃ** “ahaṃ imaṃ jīvitā voropemi”ti tesam tathā **saññāmatameva**, hananaghātanādi pana paramatthato nattheva kāyānaṃ avikopaniyabhāvato.

Nigaṇṭhanāṭaputtavādavaṇṇanā

177. Cattāro yāmā bhāgā catuyāmaṃ, catuyāmaṃ eva **cātuyāmaṃ**. Bhāgattho hi idha **yāma**-saddo yathā “rattiyā paṭhamo yāmo”ti (saṃ. ni. aṭṭha. 3.368). So panettha bhāgo saṃvaralakkhitoti āha “**catukoṭṭhāsena saṃvarena saṃvuto**”ti, saṃyamatto vā **yāmasaddo** yamaṃ saññamaṃ yāmoti katvā. “Yatatto”tiādīsu viya hi anupasaggopi saupasaggo viya saññamatthavācako, so pana catūhi ākārehīti āha “**catukoṭṭhāsena saṃvarena**”ti. Ākāro koṭṭhāsoti hi atthato ekaṃ. Vārito sabbavāri yassāyaṃ **sabbavārivārito** yathā “agyāhito”ti. Tenāha “**vāritasabbaudako**”ti. Vārisaddena cettha vāriparibhogo vutto yathā “rattūparato”ti. Paṭikkhitto sabbasītodako tapparihbhogo yassāti tathā. **Tanti** sītodakaṃ. **Sabbavāriyuttoti** saṃvaralakkhaṇamattaṃ kathitaṃ. **Sabbavāridhutoti** pāpanijjaralakkhaṇaṃ. **Sabbavāriphuṭoti** kammakkhayalakkhaṇanti imamattaṃ dassento “**sabbenā**”tiādīmāha, **sabbena pāpavāraṇena yuttoti** hi sabbappakārena saṃvaralakkhaṇena pāpavāraṇena samannāgato. **Dhutapāpoti** sabbena nijjaralakkhaṇena pāpavāraṇena vidhutapāpo. **Phuṭṭhoti** aṭṭhannampi kammānaṃ khepanena mokkhattappatiyā kammakkhayalakkhaṇena sabbena pāpavāraṇena phuṭṭho, taṃ patvā ṭhitoti attho. “Dveyeva gatiyo bhavanti, anañña”tiādīsu (dī. ni. 1.258; 2.34; 3.199, 200; ma. ni. 2.384, 398) viya gamusaddo niṭṭhānatthoti vuttaṃ “**koṭṭipattacitto**”ti, mokkhādhigamena uttamamariyādappattacittoti attho. Kāyādīsu indriyesu saṃyamatabbassa abhāvato **saṃyaticitto**. Atīte hettha ta-saddo. Saṃyamatabbassa avasesassa abhāvato **suppatiṭṭhitacitto**. **Kiñci sāsānānulomanti** pāpavāraṇaṃ sandhāya vuttaṃ. **Asuddhaladdhitāyāti** “atthi jīvo, so ca siyā nicco, siyā anicco”ti (dī. ni. ṭī. 1.177). Evamādimalīnaladdhitāya. **Sabbāti** kammapakativibhāgādivisayāpi sabbā nijjhānakkhantiyo. **Diṭṭhiyevāti** micchādiṭṭhiyo eva jātā.

Sañcayabelatṭhaputtavādavaṇṇanā

179-181. **Amarāvikkhepe vuttanayo evāti** brahmajāle amarāvikkhepavādavaṇṇanāyaṃ (dī. ni. aṭṭha. 1.61) vuttanayo eva. Kasmā? Vikkhepabyākaraṇabhāvato, tattheva ca tattha vikkhepavādassa āgatattā.

Paṭhamasandiṭṭhikasāmaññaphalavaṇṇanā

182. **Pīletvāti** telayantena uppīletvā, iminā rañño ābhogamāha. Vadato hi ābhogavasena sabbattha atthanicchayo. Aṭṭhakathācariyā ca tadābhogaññū, paramparābhatatthassāvirodhino ca, tasmā sabbattha yathā tathā vacanokāsaladdhabhāvamattena attho na vutto, atha kho tesam vattumicchitavasenāti gahetabbaṃ, evaṃca katvā tattha tattha atthuddhārādivasena atthavivecanā katāti.

183. Yathā te ruceyyāti idāni mayā pucchiyamāno attho yathā tava citte ruceyya, tayā citte rucethāti attho. Kammatthe hetam kiriyāpadam. Mayā vā dāni pucchiyamānamattham tava sampadānabhūta roceyyātipi vaṭṭati. Gharadāsiyā kucchismiṃ jāto **antojāto**. Dhanena kīto **dhanakkīto**. Bandhaggāhagahito **karamarānīto**. Sāmameva yena kenaci hetunā dāsabhāvamupagato **sāmamdasabyopagato**. Sāmanti hi sayameva. **Dāsabyanti** dāsabhāvam. Koci dāsopi samāno alaso kammaṃ akaronto “kammakāro”ti na vuccati, so pana na tathābhūtoti visesanametanti āha “**analaso**”tiādi. **Dūratoti** dūradesato āgataṃ. **Paṭhamamevāti** attano āsannataratthānupasaṅkamanato pageva puretameva. **Uṭṭhahatīti** gāravavasena uṭṭahitvā tiṭṭhati, paccuṭṭhātīti vā attho. **Pacchāti** sāmikassa nipajjāya pacchā. **Sayanato avuṭṭhiteti** rattiyā vibhāyanavelāya seyyato avuṭṭhite. **Paccūsakālatoti** atītarattiyā paccūsakālato. **Yāva sāmīno rattim niddokkamananti** aparāya bhāvinīyā rattiyā padosavelāyaṃ yāva niddokkamanam. Yā atītarattiyā paccūsavelā, bhāvinīyā ca padosavelā, etthantare sabbakiccam katvā pacchā nipatatīti vuttam hoti. **Kim kāramevāti** kim karaṇīyameva kinti pucchāya kātabbato, pucchitvā kātabbaveyyāvaccanti attho. Paṭissaveneva samīpacāritā vuttāti āha “**paṭisuṇanto vicarati**”ti. Paṭikuddham mukham oloketum na visahatītipi dasseti “**tuṭṭhapahaṭṭha**”nti iminā.

Devo viyāti ādhipaccaparivārādīsamannāgato padhānadevo viya, tena maññe-saddo idha upamatthoti ñāpeti yathā “akkhāhataṃ maññe aṭṭhāsī rañño mahāsudassanassa antepuram upasobhayamāna”nti (dī. ni. 2.245). **So vatassāhanti** ettha so vata assam ahanti padacchedo, so rājā viya ahampi bhaveyyam. Kenāti ce? Yadi puññāni kareyyam, tenāti atthoti āha “**so vata aha**”ntiādi. **Vatasaddo** upamāyam. Tenāha “**evarūpo**”ti. **Puññānīti** ulārataram puññam sandhāya vuttam aññadā katapuññato ulārāya pabbajjāya adhippetattā. “**So vatassāya**”ntipi pāṭhe so rājā viya ayam ahampi assam. Katham? “Yadi puññāni kareyya”nti atthasambhavato “**ayamevattho**”ti vuttam. **Assanti** hi uttamapurisayoge aham-saddo appayuttopi ayam-saddena parāmasanato payutto viya hoti. So aham evarūpo assam vata, yadi puññāni kareyyanti paṭhamapāṭhassa atthamicchanti keci. Evam sati dutyiapāṭhe “ayamevattho”ti avattabbo siyā tattha ayam-saddena aham-saddassa parāmasanato, “so”ti ca parāmasitabbassa aññassa sambhavato. **Yanti** dānam. **Satabhāgampīti** satabhūtam bhāgampi, raññā dinnadānam satadhā katvā tattha ekabhāgampīti vuttam hoti. **Yāvajivam na sakkhissāmi dātunti** yāvajivam dānatthāya ussāham karontopi satabhāgamattampi dātum na sakkhissāmi, tasmā pabbajissāmīti pabbajjāyam ussāham katvāti attho. “**Yamṇunā**”ti nipāto parivittakanattheti vuttam “**evam cintanabhāva**”nti.

Kāyena pihitoti kāyena saṃvaritabbassa kāyadvārena pavattanakassa pāpadhammassa saṃvaraṇavasena pidahito. Ussukkavacanavasena panattho vihareyya-padena sambajjhittabbattāti āha “**akusalapavesanadvāram thaketvā**”ti. Hutvāti hi seso. **Akusalapavesanadvāranti** ca kāyakammabhūtanamakusalānam pavesanabhūtam kāyaviññattisaṅkhātam dvāram. **Sesapadadvayepīti** “vācāya saṃvuto, manasā saṃvuto”ti padadvayepi. **Ghāsacchādanena paramatāyāti** ghāsacchādanapariyesane sallekhasena paramatāya, ukkaṭṭhabhāve vā saṅghito ghāsacchādanamattameva paramam pamāṇam koṭi etassa, na tato param kiñci āmisajātam pariyesati, paccāsisati cāti **ghāsacchādanaparamo**, tassa bhāvo **ghāsacchādanaparamatātipi** aṭṭhakathāmuttako nayo. Ghasitabbo asitabboti ghāso, āhāro, āhuso chādeti paridahati etenāti **acchādanam**, nivāsanam, apica ghasanam **ghāso**, āhuso chādīyate **acchādananti**tipi yujjati. **Etadatthampīti** ghāsacchādanatthāyāpi. **Anesananti** ekavīsatividhampi ananurūpamesanam.

Vivekaṭṭhakāyānanti gaṇasaṅgaṅkato pavivitte ṭhitakāyānam, sambandhībhūtanam kāyavivekoti sambandho. **Nekhammābhīratānanti** jhānābhīratānam. **Paramavodānappattānanti** tāya eva jhānābhīratīyā paramam uttamam vodānam cittavisuddhiṃ pattānam. **Nirupadhīnanti** kilesūpadhiabhisāṅkhārūpadhīhi accantavigatānam. Visāṅkhāram vuccati nibbānam, tadadhigamanetā **visāṅkhāragatā**, arahanto, tesam. “**Evam vutte**”ti iminā **mahāniddese** (mahāni. 7, 9) āgatabhāvam dasseti. Ettha ca paṭhamo viveko itarehi dvīhi vivekehi sahāpi vattabbo itaresu siddhesu tassāpi sijjhanato, vinā ca tasmim siddhepi itare samasijjhanato. Tathā dutyopī. Tatiyo pana itarehi saheva

vattabbo. Na vinā itaresu siddhesuyeva tassa sijjhanatoti daṭṭhabbam. “**Gaṇasaṅgaṇikam pahāya**”tiādi tadadhippāyavibhāvanam. Tatha gaṇe janasaṃnāgame sannipatanam **gaṇasaṅgaṇikā**, taṃ **pahāya. Kāyena eko viharati** vicarati puggalavasena asahāyattā. Citte kilesānam sannipatanam **cittakilesasaṅgaṇikā**, taṃ **pahāya. Eko viharati** kilesavasena asahāyattā. Maggassa ekacittakkhaṇikattā, gotrabhuādīnaṅca ārammaṇakaraṇamattattā na tesam vasena sātisaṃyā nibbutisukhasamphanā, phalasaṃpattinirodhasaṃpattivasena pana sātisaṃyāti āha “**phalasaṃpattiṃ vā nirodhasaṃpattiṃ vā**”ti. Phalapariyosāno hi nirodho. **Pavisitvāti** saṃpajjanavasena antokatvā. **Nibbānam patvāti** ettha ussukkavacanametam ārammaṇakaraṇena, cittacetasaṅgaṇam nirodhena ca nibbutipajjanassa adhippetattā. **Codanatteti** jānāpetum ussāhakarāṇatthe.

184. Abhiharitvāti abhimukhabhāvena netvā. **Nanti** tathā pabbajjāya viharantaṃ. **Abhihāroti** nimantanavasena abhiharaṇam. “Cīvarādīhi payojanam sādhesāmi”ti vacanasesena yojanā. Tathā “yenattho, taṃ vadeyyāthā”ti. **Cīvarādivekallanti** cīvarādīnam lūkhatāya vikalabhāvam. **Tadubhayampīti** tadeva abhihāradvayampi. **Sappāyanti** sabbagelaññāpahaṇavasena upakārāvahaṃ. Bhāvino anattassa ajananavasena paripālanam rakkhāgutti. Paccuppanassa pana anattassa nisedhavasena paripālanam āvaraṇagutti. Kimatthiyam “dhammika”nti visesananti āha “**sā panesa**”tiādi. **Vihārasīmāyāti** upacārasīmāya, lābhasīmāya vā.

185. Kevalo yadi-evaṃ-saddo pubbe vuttatthāpekkhakoti vuttam “**yadi tava dāso**”tiādi. **Evam santeti** evaṃ labbhamāne sati. Dutiyam upādāya paṭhamabhāvo, tasmā “paṭhama”nti bhaṇanto aññassāpi atthitam dīpeti. Tadeva ca kāraṇam katvā rājāpi evamāhāti dassetum “**paṭhamanti bhaṇanto**”tiādi vuttam. **Tenevāti** paṭhamasaddena aññassāpi atthitādīpaneneva.

Dutiyasandiṭṭhikasāmaññaphalavaṇṇanā

186. Kasatīti vilekhati kasim karoti. **Gahapatikoti** ettha **ka**-saddo appatthoti vuttam “**ekagehamatte jeṭṭhako**”ti. Idaṃ vuttam hoti – gahassa pati **gahapati**, khuddako gahapati **gahapatiko** ekasmiññeva gehamate jeṭṭhakattāti, khuddakabhāvo panassa gehavasenevāti katvā “ekagehamatte”ti vuttam. Tena hi anekakulajeṭṭhakabhāvam paṭikkhipati, gaham, gehanti ca atthato samānameva. **Karasaddo** balimhīti vuttam “**balisaṅkhāta**”nti. **Karotīti** abhinipphādeti sampādeti. **Vaḍḍhetīti** uparūpari uppādanena mahantaṃ sannicayam karoti.

Kasmā tadubhayampi vuttanti āha “**yathā hī**”tiādi. Appampi pahāya pabbajitum dukkaranti dassanaṅca pageva mahantanti viññāpanattham. Esā hi kathikānam pakati, yadidaṃ yena kenaci pakārena atthantaraviññāpananti. Appampi pahāya pabbajitum dukkarabhāvo pana majjhimanikāye majjhimapaṇṇāsake **laṭukikopamasuttana** (ma. ni. 2.148 ādayo) dīpetabbo. Vuttañhi tatha “seyyathāpi udāyi puriso daliddo assako anāḷhiyo, tassa”ssa ekaṃ agāraṃ oluggaviluggam kākātidāyim naparamarūpaṃ, ekā khaṭopikā oluggaviluggā naparamarūpā”ti vitthāro. Yadi appampi bhogaṃ pahāya pabbajitum dukkaram, kasmā dāsavārepi bhogaggahaṇam na katanti āha “**dāsavāre panā**”tiādi. **Attanopi anissaroti** attānampi sayamanissaro. Yathā ca dāsassa bhogāpi abhogāyeva parāyattabhāvato, evaṃ nītayopīti dāsavāre nītiparivaṭṭaggahaṇampi na katanti daṭṭhabbam. Parivaṭṭati paramparabhāvena samantato āvaṭṭatīti **parivaṭṭo**, nītiyeva. Tenāha “**nītiyeva nītiparivaṭṭo**”ti.

Pañītataraśāmaññaphalavaṇṇanā

189. Tanti yathā dāsavāre “evamevā”ti vuttam, na tathā idha kassakavāre, tadavacanam kasmāti anuyuñjeyya ceti attho. **Evamevāti vuccamāneti** yathā paṭhamadutiyāni sāmaññaphalāni paññattāni, tathāyeva paññāpetum sakkā nu khoti vutte. **Evarūpāhīti** yathāvuttadāsakassakūpamāsadisāhi upamāhi. **Sāmaññaphalam dīpetum pahoti** anantapaṭibhānatāya vicittanayadesanabhāvato. **Tatthāti** evaṃ dīpane. **Pariyantam nāma natthi** anantanayadesanabhāvato, savane vā asantosanena bhīyyo bhīyyo

sotukāmatājananato sotukāmatāya pariyantaṃ nāma natthīti attho. **Tathāpīti** “desanāya uttaruttarādhikanānāyavicittabhāve satipī”ti (dī. ni. ƒ. 1.189) ācariyena vuttaṃ, satipi evaṃ apariyantabhāvetipi yujjati. Anumānaññāna **cintetvā**. **Upari visesanti** taṃ ƒhapetvā tadupari visesameva sāmāññaphalaṃ **puccanto**. Kasmāti āha “**savane**”tiādi. Etena imamatthaṃ dīpeti – anekatthā samānāpi saddā vatticchānupubbikāyeva taṃtadatthadīpakāti.

Sādhukaṃ sādhuṭi ekatthametam sādhusaddasseva ka-kārena vaḍḍhetvā vuttattā. Teneva hi sādhuḥkasaddassatthaṃ vadantena sādhusaddo atthuddhārasena udāhaṭo. Tena ca nanu sādhuḥkasaddasseva atthuddhāro vattabbo, na sādhusaddassāti codanā nisedhitā. **Āyācaneti** abhimukhaṃ yācane, abhipatthanāyanti attho. **Sampaṭicchāneti** paṭiggahaṇe. **Sampahaṃsaneti** saṃvijjamaṇaṅuṇavasena haṃsane tosane, udaggaṭākaraṇeti attho.

Sādhu dhammarucīti gāthā ummādanāyātake (jā. 2.18.101).

Tatthāyamaṭṭhakathāvinicchayapaveṇī – sucaritadhamme rocetūti **dhammaruci**, dhammaratoti attho. Tādiso hi jīvitam jahantopi akattabbaṃ na karoti. **Paññāṇavāti** paññavā ñānasampanno. **Mittānamaddubbhoti** mittānaṃ adussanabhāvo. “Adūsako anupaghātako”ti (dī. ni. ƒ. 1.189) ācariyena vuttaṃ. “Adrubbho”tipi pāṭho da-kārassa dra-kāraṃ katvā.

Daḥhikammeti sātaccakiriyaṃ. **Āṇattiyanti** āṇāpane. **Idhāpīti** sāmāññaphalepi. **Assāti** sādhuḥkasaddassa. “Suṇohi sādhuḥkaṃ manasi karohī”ti hi sādhuḥkasaddena savanamanasikārānaṃ sātaccakiriyaṃ tadāṇāpanampi jotitaṃ hoti. Āyācaneneva ca uyyojanasāmāññato āṇatti saṅgahitāti na sā viṣuṃ atthuddhāre vuttā. Āṇārahassa hi āṇatti, tadanarahassa āyācananti viseso. **Sundarepīti** sundaratthepe. Idāni yathāvuttena sādhuḥkasaddassa atthattayena pakāsitaṃ visesaṃ dassetuṃ, tassa vā atthattayassa idha yogyaṃ vibhāvetuṃ “**daḥhikammatthena hī**”tiādi vuttaṃ. **Suggahitaṃ gaṇhantoti** suggahitaṃ katvā gaṇhanto. **Sundaranti** bhāvanapūṣakaṃ. **Bhaddakanti** pasatthaṃ, “**dhamma**”nti iminā sambandho. **Sundaraṃ bhaddakanti** vā savanānuggahaṇe pariyaṃyavacanam.

Manasi karohīti ettha na ārammaṇapaṭipādanalakkhaṇo manasikāro, atha kho vīthipaṭipādanajavanapaṭipādanamanasikārapubbake citte ƒhapanalakkhaṇoti dassento “**āvajja, samannāharā**”ti āha. **Avikkhittacittoti** yathāvuttamanasikāradvayapubbakāya cittapaṭipāṭiyā ekārammaṇe ƒhapanavasena anuddhatacitto hutvā. **Nisāmeḥīti** suṇāhi, anaggharatanamiva vā suvaṇṇamañjūsāya dullabhadhammaratanam citte paṭisāmeḥītipi attho. Tena vuttaṃ “**citte karohī**”ti. Evaṃ padadvayassa paccekam yojanāvasena atthaṃ dassetvā idāni paṭiyogīvasena dassetuṃ “**apicā**”tiādi vuttaṃ. Tattha **soṭindriyavikkhepavāraṇam** savane niyojanavasena kiriyantarapaṭisedhanato, tena sotaṃ odahāti atthaṃ dasseti. **Manindriyavikkhepavāraṇam** manasikārena daḥhikammaniyojanena aññacintāpaṭisedhanato. **Byañjanavipallāsaggāhavāraṇam** “sādhuḥka”nti visesetvā vuttattā. **Atthavipallāsaggāhavāraṇepi** esa nayo.

Dhāraṇūpaparikkhādīsūti ettha **ādi**-saddena tulanatīraṇādike, diṭṭhiyā suppaṭivedhe ca saṅgaṇhāti. Yathādhippetamatthaṃ byañjeti pakāseti, sayametenāti vā **byañjanaṃ**, sabhāvanirutti, saha byañjanenāti **sabyañjano**, byañjanasampannoti attho. Sahappavatti hi “samppannatā samavāyātā vijjamaṇatā”tiādinā anekavidhā, idha pana sampannatāyeva tadaññassa asambhavato, tasmā “saha byañjanenā”ti nibbacaṇam katvāpi “byañjanasampanno”ti (dī. ni. ƒ. 1.189) attho ācariyena vuttoti daṭṭhabbaṃ, yathā taṃ “na kusalā akusalā, kusalapaṭipakkhā”ti (dha. sa. 1) araṇīyato upagantabbato anudhātabbato **attho**, catupārisuddhisīlādi, saha atthenāti **sāttho**, vuttanayena atthasampannoti attho. Sādhuḥkapadaṃ ekameva samānaṃ āvuttinayādivasena ubhayattha yojetabbaṃ. Kathanti āha “**yasmā**”tiādi. **Dhammo** nāma tanti. **Desanā** nāma tassā manasā vavattāpīṭāyā tantiyā desanā. **Attho** nāma tantiyā attho. **Paṭivedho** nāma tantiyā, tantiatthassa ca yathābhūtāvabodho. Yasmā cete dhammadesanāṭṭhapaṭivedhā sasādīhi viya mahāsamuddo mandabuddhīhi dukkhogāhā, alabbhaneyyapaṭiṭṭhā ca, tasmā gambhīrā. Tena vuttaṃ “**yasmā...pe... manasi karohī**”ti. Ettha ca paṭivedhassa dukkarabhāvato dhammatthānaṃ dukkhogāhatā, desanāññāssa dukkarabhāvato desanāya,

uppādetumasakkuṇeyyatāya, tabbisayaññuppattiyā ca dukkarabhāvato paṭivedhassa dukkhogāhatā veditabbā. Yamettha vattabbaṃ, taṃ **nidānavañṇanāyaṃ** vuttameva.

“Suṇāhi sādhuḥka”nti **“sādhukaṃ manasi karohī”**ti vadanto na kevalaṃ atthakkamato eva ayaṃ yojanā, atha kho saddakkamatopi ubhayattha sambandhattāti dasseti. **“Sakkā mahārājā”**ti idhāpi “aññampi diṭṭheva dhamme sandiṭṭhikaṃ sāmāññaphalaṃ...pe... paṇītataṛaṇcā”ti idamanuvattatī āha **“evaṃ paṭiññātaṃ sāmāññaphaladesana”**nti. Vitthārato bhāsanti atthameva daḷhaṃ karoti **“desessāmīti saṃkhittadīpana”**ntiādinā. Hi-saddo cettha luttaniddiṭṭho. Idaṃ vuttaṃ hoti – **desanaṃ** nāma uddisanaṃ. **Bhāsanaṃ** nāma niddisanaṃ paribyattakathanaṃ. Tenāyamatto sambhavatīti yathāvuttamatthaṃ sagāthāvaggasaṃyutte **vaṅgīsasutte** (saṃ. ni. 1.214) gāthāpadena sādhetuṃ **“tenāhā”**tiādi vuttaṃ.

Sālikāyiva nigghosoti sālikāya nigghoso viya, yathā sālikāya ālāpo madhuro kaṇṇasukho pemaṇīyo, evanti attho. **Paṭibhānanti** cetassa visesanaṃ liṅgabhedassapi visesanassa dissanato yathā “guṇo pamāṇa”nti. **Paṭibhānanti** ca saddo vuccati paṭibhāti taṃtadākārena dissatīti katvā. **Udīrayīti** uccārayi, vuccati vā, kammaḡabbhañcetaṃ kiriyāpadaṃ. Iminā cetāṃ dīpeti – āyasmantaṃ dhammasenāpatiṃ thometukāmena desanābhāsanaṃ visesaṃ dassentena pabhinnapaṭisambhidena **āyasmatā vaṅgīsattherena** “saṅkhittena, vitthārenā”ti ca visesanaṃ kataṃ, tenāyamatto viññāyatīti.

Evaṃ vutteti “bhāsissāmī”ti vutte. “Na kira bhagavā saṅkhepeveva desessati, atha kho vitthārenapi bhāsissatī”ti hi taṃ padaṃ sutvāva **ussāhajāto** sañjātussāho, haṭṭhatuṭṭhoti attho. Ayamācariyassa adhippāyo. Apica “tena hi mahārāja suṇohi sādhuḥkaṃ manasi karohi, bhāsissāmī”ti vuttaṃ sabbampi uyyojanapaṭiññākaraṇappakāraṃ ussāhajananakāraṇaṃ sabbeneva ussāhasambhavato, tasmā **evaṃ vutteti** “suṇohi, sādhuḥkaṃ manasi karohi, bhāsissāmī”ti vutte sabbeveva tīhipi padehi ussāhajātoti attho daṭṭhabbo. **Paccassosīti** pati assosi bhagavato vacanasamanantareveva pacchā assosi, “sakkā pana bhante”tiādinā vā pucchitvā puna “evaṃ bhante”ti assosīti attho. Taṃ pana patissavanaṃ atthato sampaṭicchanamevāti āha **“sampaṭicchi, paṭiggahesī”**ti. Teneva hi “iti attho”ti avatvā **“iti vuttaṃ hotī”**ti vuttaṃ.

190. “Athassa bhagavā etadvocā”ti vacanasambandhamattaṃ dassetvā “etaṃ avocā”ti padaṃ vibhajitvā atthaṃ dassento **“idānī”**tiādimāha. **“Idhā”**ti iminā vuccamānaṃ adhikaraṇaṃ tathāgatassa uppattiṭṭhānabhūtaṃ lokamevādhippetanti dasseti **“desopadese nipāto”**ti iminā. Desassa upadisanaṃ **desopadeso**, tasmim. Yadi sabbattha desopadese, athāyamatto na vattabbo avuttepi labbhamānattāti codanāyāha **“svāya”**ntiādi. Sāmāññabhūtaṃ idhasaddaṃ gaṇhitvā “svāya”nti vuttaṃ, na tu yathāvisesitabbaṃ. Tathā hi vakkhati “katthaci padapūraṇamattamevā”ti (dī. ni. aṭṭha. 1.190). **Lokaṃ upādāya vuccati** lokasaddena samānādhikaraṇabhāvato. **Idha loketi** ca jātikkhetaṃ, tatthāpi ayaṃ cakkavālo adhippeto. **Sāsanamupādāya vuccati** “samaṇo”ti saddantarāsannidhānato. Ayañhi catukaṅguttarapāḷi. Tattha **paṭhama samaṇoti** sotāpanno. **Dutiyo samaṇoti** sakadāgāmī. Vuttañhetāṃ tattheva –

“Katamo ca bhikkhave paṭhama samaṇo? Idha bhikkhave bhikkhu tiṇṇaṃ saṃyojanānaṃ parikkhayā sotāpanno hotī”ti, (a. ni. 4.241) “katamo ca bhikkhave dutiyo samaṇo? Idha bhikkhave bhikkhu tiṇṇaṃ saṃyojanānaṃ parikkhayā rāgadosamohānaṃ tanuttā sakadāgāmī hotī”ti (a. ni. 4.241) ca ādi.

Okāsanti kañci padesamupādāya vuccati **“tiṭṭhamānassā”**ti saddantarāsannidhānato.

Idheva tiṭṭhamānassāti imissaṃyeva indasālaguhāyaṃ paṭiṭṭhamānassa, **devabhūtassa me satoti** devabhāvena, devo hutvā vā bhūtassa samānassa. **Meti** anādarayoge sāmivacanaṃ. Puna **meti** kattutthe. Idañhi sakkapañhato udāhaṭaṃ.

Padapūraṇamattameva okāsāpadisanassāpi asambhavena atthantarassa abodhanato. Pubbe vuttaṃ tathāgatassa uppattiṭṭhānabhūtameva sandhāya “**loka**”nti vuttaṃ. Purimaṃ uyyojanapaṭiññākaraṇavisaye ālapananti puna “**mahārājā**”ti ālapati. “Araha”nti ādayo saddā vitthāritāti yojanā. Atthato hi vitthāraṇaṃ saddamukheneva hotīti ubhayattha saddaggahaṇaṃ kataṃ. Yasmā pana “aparehipi aṭṭhahi kāraṇehi bhagavā tathāgato”tiādīnā (udā. aṭṭha. 18; itivu. aṭṭha. 38) tathāgata-saddo **udānaṭṭhakathādīsu**, “araha”nti ādayo ca **visuddhimaggaṭṭikāyaṃ** (visuddhi. ṭī. 1.130) aparehipi pakārehi vitthāritā ācariyena, tasmā tesu vuttanayenapi tesamattho veditabbo. Tathāgatassa sattanikāyantogadhatāya “idha pana sattaloko adhippeto”ti vatvā tathāyaṃ yasmimṃ sattanikāye, yasmiṃca okāse uppajjati, taṃ dassetuṃ “**sattaloke uppajjamānopi cā**”tiādī vuttaṃ. **Na devaloke, na brahmaloketi** ettha yaṃ vattabbaṃ, taṃ parato āgamissati.

Tassāparenāti tassa nigamassa aparena, tato bahīti vuttaṃ hoti. **Tatoti mahāsālato. Orato majjheti** abbhantaraṃ majjhimapadeso. **Evam paricchineti** pañcanimittabaddhā sīmā viya pañcahi yathāvuttanimittehi paricchinne. **Aḍḍhateyyayojanasateti** paṇṇāsayojanehi ūnatiyojanasate. Ayañhi majjhimajanapado mudiṅgasaṅṭhāno, na samaparivaṭṭo, na ca samacaturasso, ujukena katthaci asītiyojano hoti, katthaci yojanasatiko, tathāpi cesa kuṭilaparicchidena miniyamāno pariyanta parikkhepato navayojanasatiko hoti. Tena vuttaṃ “**navayojanasate**”ti. **Asītimahātherāti** yebhuyyavasena vuttaṃ sunāparantakassa puṇṇattherassāpi mahāsāvakesu pariyāpannattā. Sunāparantajanapado hi paccantavisayo. Tathā hi “candanamaṇḍalamāḷapaṭiṅgahaṇe bhagavā na tattha aruṇaṃ uṭṭhapeti”ti **majjhimāgama-** (ma. ni. aṭṭha. 4.397) **saṃyuttāgamaṭṭhakathāsu** (saṃ. ni. aṭṭha. 3.4.88-89) vuttaṃ. **Sārappattāti** kulabhogissariyādivasena, sīlasārādivasena ca sārabhūtā. **Brāhmaṇagahapatikā**tibrahmāyupokkharasītiādībrāhmaṇā ceva anāthapiṇḍikādigahapatikā ca.

Tatthāti majjhimapadeso, tasmimyeva “uppajjati”ti vacane vā. **Sujātāyāti** evaṃnāmikāya paṭhamaṃ saraṇagamanikāya **yasattheramātuyā**. Catūsu panetesu vikappesu paṭhamaṃ buddhabhāvāya āsannatarapaṭipattidassanavasena vutto. Āsannatarāya hi paṭipattiyā ṭhitopi “uppajjati”ti vuccati uppādassa ekantikattā, pageva paṭipattiyā matthake ṭhito. Dutīyo buddhabhāvāvahapabbajjato paṭṭhāya āsannamattapaṭipattidassanavasena, tatiyo buddhakaradhammapāripūrito paṭṭhāya buddhabhāvāya paṭipattidassanavasena. Na hi mahāsattānaṃ antimabhavūpapattito paṭṭhāya bodhisambhārasambharaṇaṃ nāma atthi buddhatthāya kāmāgamayamāneneva tattha paṭiṭṭhanato. Catuttho buddhabhāvakaradhammasamārambhato paṭṭhāya bodhiyā niyatabhāvadassanena. Bodhiyā hi niyatabhāvappattito pabhuti “buddho uppajjati”ti viññūhi vattaṃ sakkā uppādassa ekantikattā. Yathā pana “sandanti nadiyo”ti sandanakiriyāya avicchedamupādāya vattamānappayogo, evaṃ uppādattāya paṭipajjanakiriyāya avicchedamupādāya catūsopi vikappesu “**uppajjati nāmā**”ti vuttaṃ, pavattāparatavattamānavacanañcetam. Catubbidhañhi vattamānalakkhaṇaṃ saddasatthe pakāsitaṃ –

“Niccavattā samīpo, pavattuparato tathā;
Pavattāparato ceva, vattamāno catubbidho”ti.

Yasmā pana buddhānaṃ sāvakanāṃ viya na paṭipāṭiyā iddhividhaññādīni uppajjanti, saheva pana arahattamaggena sakalopi sabbaññūtaññāṇādiguṇarāsi āgato nāma hoti, tasmā tesam nippattasabbakiccattā arahattaphalakkhaṇe uppanno nāmāti **ekaṅguttaravaṇṇanāyaṃ** (a. ni. aṭṭha. 1.1.170) vuttaṃ. Asati hi nippattasabbakiccatte na tāvatā “uppanno”ti vattumarahati. **Sabbapaṭhamaṃ uppannabhāvanti** catūsu vikappesu sabbapaṭhamaṃ “tathāgato sujātāya...pe... uppajjati nāmā”ti vuttaṃ tathāgatassa uppannatāsankhātāṃ atthibhāvāṃ. Tadeva **sandhāya uppajjati vuttaṃ** buddhabhāvāya āsannatarapaṭipattiyā ṭhitasseva adhippetattā. Ayameva hi attho mukhyato uppajjati vattabbo. Tenāha “**tathāgato...pe... attho**”ti.

Ettha ca “uppanno”ti vutte atītakālavasena koci atthaṃ gaṇheyyāti tannivattanatthaṃ “uppanno hoti”ti vuttaṃ. “Uppannā dhammā”tiādīsu (dha. sa. tikamātikā 17) viya hi idha uppannasaddo paccuppannakāliko. Nanu ca arahattaphalāsamaṅgīsañkhāto uppannoyeva tathāgato pavedanadesanādīni

sādhēti, atha kasmā yathāvutto arahattamaggapariyosāno uppajjamānoyeva tathāgato adhippeto. Na hi so pavedanadesanādini sādheti madhupāyāsabhojanato yāva arahattamaggo, tāva tesam kiccānamasādhanatoti? Na hevaṃ daṭṭhabbaṃ, buddhabhāvāya āsannatarapaṭipattiyam ṭhitassa uppajjamānassa gahaṇeneva arahattaphalāsamaṅgīsaṅkhātassa uppannassāpi gahitattā. Kāraṇaggahaṇeneva hi phalampi gahitaṃ tadavinābhāvittā. Iti pavedanadesanādisādhakassa arahattaphalāsamaṅginopi tathāgatassa gahetabbattā neyyatthamidaṃ ‘‘uppajjati’’ti vacanaṃ daṭṭhabbanti. Tathā hi **āṅguttaraṭṭhakathāyaṃ** (a. ni. aṭṭha. 1.1.170) uppajjamāno, uppajjati, uppannoti tīhi kālehi atthavibhajane ‘‘dīpaṅkarapādāmūle laddhabyākaraṇato yāva anāgāmiphalaṃ uppajjamāno nāma, arahattamaggakkhaṇe pana uppajjati nāma, arahattaphalakkhaṇe uppanno nāmā’’ti vuttaṃ. Ayamettha **ācariyadhammapālattherassa** mati. Yasmā pana **ekaṅguttaraṭṭhakathāyaṃ** ‘‘ekapuggalo bhikkhave loke uppajjamāno uppajjati’’ti (a. ni. 1.170) suttapadavaṇṇanāyaṃ ‘‘imasimipi sutte arahattaphalakkhaṇāmyeva sandhāya uppajjati’’ti vuttaṃ, ‘‘uppanno hotīti ayañhettha attho’’ti (a. ni. aṭṭha. 1.1.170) āgataṃ, tasmā idhāpi arahattaphalakkhaṇameva sandhāya uppajjati vuttanti dasseti ‘‘sabbapaṭhamam uppannabhāvaṃ sandhāya’’ti iminā. Tenāha ‘‘**uppanno hotīti ayañhettha attho**’’ti. **Sabbapaṭhamam uppannabhāvanti** ca sabbaveneyyānaṃ paṭhamataraṃ arahattaphalavasena uppannabhāvanti attho. ‘‘**Uppanno hotī**’’ti ca iminā arahattaphalakkhaṇavasena atītakālam dasseti. Ayameva ca nayo āṅguttaraṭṭhākārena **ācariyasāriputtattherena** adhippetoti.

So bhagavāti yo so tathāgato ‘‘araha’’ntiādinā pakittitagaṇo, so bhagavā. Idāni vattabbaṃ imasaddena nidasseti vuccamānatthassa parāmasanato. Idaṃ vuttaṃ hoti – nayidaṃ mahājanassa sammukhamattaṃ sandhāya ‘‘imaṃ loka’’nti vuttaṃ, atha kho ‘‘sadevaka’’ntiādinā vakkhamānaṃ anavasesapariyādānaṃ sandhāyāti. ‘‘**Saha devehi sadevaka**’’ntiādinā yathāvākyam padanibbacaṃ vuttaṃ, yathāpadaṃ pana ‘‘sadevako’’tiādinā vattabbaṃ, ime ca taggaṇasaṃviññānābāhiratthasamāsā. Ettha hi avayavena viggaho, samudāyo samāsatto hoti lokāvayavena kataviggahena lokasamudāyassa yathārahaṃ labbhamānattā. Samavāyajotakasahasaddayoge hi ayameva samāso viññāyati. **Devehīti** ca pañcakāmāvacaradevehi, arūpāvacaradevehi vā. **Brahmunāti** rūpāvacarārūpāvacarabrahmunā, rūpāvacarabrahmunā eva vā, bahukattukādīnamiva nesam siddhi. **Pajātattāti** yathāsakaṃ kammakilesehi pakārena nibbattakattā.

Evam vacanatthato attham dassetvā vacanīyatthato dassetuṃ ‘‘**tatthā**’’tiādi vuttaṃ. **Pañcakāmāvacaradevaggahaṇam** pārisesañāyena itaresam padantarehi visuṃ gahitattā. **Chaṭṭhakāmāvacaradevaggahaṇam** paccāsattiñāyena. Tattha hi māro jāto, tannivāsī ca. Yasmā cesa dāmarikarājaputto viya tattha vasitattā pākaṭo, tasmā santesupi aññesu vasavattimahārājādīsu pākaṭatarena teneva visesetvā vuttoti, ayañca nayo **majjhimāgamatṭhakathāyaṃ** (ma. ni. aṭṭha. 2.290) pakāsitova. Māraggaṇena cettha taṃsambandhino devāpi gahitā okāsalokena saddhim satta lokassa gahaṇato. Evañhi vasavattisatta lokassa anavasesapariyādānaṃ hoti. **Brahmakāyikādibrahmaggaṇampi** paccāsattiñāyena. **Paccatthikapaccāmittasamaṇabrāhmaṇaggahaṇanti** paccatthikā eva paccāmittā, teyeva samaṇabrāhmaṇā, tesam gahaṇam tathā, tena bāhirakasamaṇabrāhmaṇaggahaṇam vuttaṃ, nidassanamattañcetam apaccatthikapaccāmittānampi tesam iminā gahaṇato. **Samitapāpabāhitapāpasamaṇabrāhmaṇaggahaṇanti** pana sāsānikasamaṇabrāhmaṇānaṃ gahaṇam veditabbaṃ. Kāmaṃ ‘‘sadevaka’’ntiādivisesanānaṃ vaseneva sattavisayopi lokasaddo viññāyati samavāyatthavasena tulyayogavisayattā tesam, ‘‘salomako sapakkhako’’tiādīsu pana vijjamānatthavasena atulyayogavisayepi ayaṃ samāso labbhatīti byabhicāradassanato abyabhicārenatthañāpakam pajāgahaṇanti āha ‘‘**pajāvacanena satta lokaggahaṇa**’’nti, na pana lokasaddena satta lokassa aggahitattā evam vuttaṃ. Tenāha ‘‘**tīhi padehi okāsalokena saddhim satta loko**’’ti. Sadevakādivacanena upapattidevānaṃ, sassamaṇabrāhmaṇīvacanena visuddhidevānañca gahitattā vuttaṃ ‘‘**sadeva...pe... manussaggahaṇa**’’nti. Tattha **sammutidevā** rājāno. **Avasesamanussaggahaṇanti** sammutidevehi, samaṇabrāhmaṇehi ca avasiṭṭhamanussānaṃ gahaṇam. **Etthāti** etesu padesu. **Tīhi padehīti** sadevakasamārakasabrahmakapadehi. **Dvīhīti** sassamaṇabrāhmaṇīsadevamanussapadehi. Samāsapadatthesu satta lokassapi vuttanayena gahitattā

“okāsalokena saddhiṃ sattaloko”ti vuttaṃ.

“**Aparo nayo**”tiādinā aparampi vacanīyatthamāha. Arūpinopi sattā attano āneñjavihārena viharanto “dibbantīti devā”ti idaṃ nibbacanaṃ laddhumarahantīti āha “**sadevakaggahaṇena arūpāvacaraloko gahito**”ti. Tenevāha bhagavā **brahmajālādīsu** “ākāsānañcāyatanūpagānaṃ devānaṃ saḥabyata”ntiādi, (a. ni. 3.197) arūpāvacarabhūto okāsaloko, sattaloko ca gahitoti attho. Evaṃ **chakāmāvacaradevaloko, rūpī brahmalokoti** etthāpi. Chakāmāvacaradevalokassa savisesaṃ māravase pavattanato vuttaṃ “**samārakaggahaṇena chakāmāvacaradevaloko**”ti. So hi tassa dāmarikassa viya vasapavattanokāso. **Rūpī brahmaloko gahito** pārisesañāyena arūpībrahmalokassa visuṃ gahitattā. **Catuparisavasena**ti khattiyabrāhmaṇagahapatisamaṇacātumahārājikatāvatiṃsamārabrahmasaṅkhātāsu aṭṭhasu parisāsu khattiyādicatuparisavaseneva tadaññāsaṃ sadevakādiggahaṇena gahitattā. Kathaṃ panettha catuparisavasena manussaloko gahitoti? “Sassamaṇabrāhmaṇi”nti iminā samaṇaparisā, brāhmaṇaparisā ca gahitā, “sadevamanussa”nti iminā khattiyaparisā, gahapatiparisā cāti. “Paja”nti iminā pana imāyeva catasso parisā vuttā. Catuparisasaṅkhātāṃ pajanti hi idha attho.

Aññāthā gahettabbamaḥa “**sammutidevehi vā saha manussaloko**”ti. Kathaṃ pana gahitoti? “Sassamaṇabrāhmaṇi”nti iminā samaṇabrāhmaṇā gahitā, “sadevamanussa”nti iminā sammutidevasaṅkhātā khattiyā, gahapatisuddasaṅkhātā ca avasesamanussāti. Ito pana aññesaṃ manussasattānamabhāvato “paja”nti iminā eteyeve catūhi pakārehi ṭhitā manussasattā vuttā. Catukulappabhedāṃ pajanti hi idha attho. Evaṃ vikappadvayepi pajāgahaṇena catuparisādivasena manussānaññeva gahitattā idāni avasesasattepi saṅgahetvā dassetuṃ “**avasesasabbasattaloko vā**”ti vuttaṃ. Etthāpi catuparisavasena gahitena manussalokena saha avasesasabbasattaloko gahito, sammutidevehi vā saha avasesasabbasattalokoti yojetabbāṃ. Nāgagaruḷādivasena ca avasesasabbasattaloko. Idaṃ vuttaṃ hoti – catuparisasahito avasesasuddanāgasupaṇṇanerayikādisattaloko, catukulappabhedamanussasahito vā avasesanāgasupaṇṇanerayikādisattaloko gahitoti.

Ettāvata bhāgaso lokāṃ gahetvā yojanaṃ dassetvā idāni tena tena visesena abhāgaso lokāṃ gahetvā yojanaṃ dassetuṃ “**apicetthā**”tiādi vuttaṃ. Tattha **ukkaṭṭhaparicchedatoti** ukkaṃsagatiparicchedato, tabbijānanenāti vuttaṃ hoti. Paṭhamanayena hi pañcasu gaṭṭisu devagatipariyāpannāva pañcakāmaguṇasamaṅgitāya, dīghāyukatāyāti evamādīhi visesehi seṭṭhā. Dutīyanayena pana arūpino dūrasamugghāṭitakilesadukkhatāya, santapaṇītaāneñjavihārasamaṅgitāya, ativiya dīghāyukatāyāti evamādīhi visesehi ativiya ukkaṭṭhā. Ācariyehi pana dutīyanayameva sandhāya vuttaṃ. Evaṃ paṭhamapadeneva padhānanayena sabbalokassa sacchikatabhāve siddhepi iminā kāraṇavisesena sesapadāni vuttānīti dasseti “**tato yesa**”ntiādinā. **Tatoti** paṭhamapadato paraṃ āhāti sambandho. “Chakāmāvacarissaro” tiyeve vutte sakkādīnampi tassa ādhipaccaṃ siyāti āsaṅkānivattanatthāṃ “**vasavattī**”ti vuttaṃ, tena sāhasikakaraṇena vasavattāpanameva tassādhipaccanti dasseti. So hi chaṭṭhadevalokepi anissaro tattha vasavattidevarājasseva issarattā. Tenāha bhagavā **aṅguttarāgamavare** aṭṭhanipāte **dānānisamsasutte** “tatra bhikkhave vasavattī devaputto dānamayaṃ puññakiriyaṃvattathuṃ atirekaṃ karitvā...pe... paranimmitavasavattī deve dasahi ṭhānehi adhigaṇhātī”ti (a. ni. 8.36) vitthāro. **Majjhimāgamaṭṭhakathāyampi** vuttaṃ “tatra hi vasavattirājā rajjaṃ kāreti, māro pana ekasmiṃ padese attano parisāya issariyaṃ pavattento rajjapaccante dāmarikarājaputto viya vasatī”ti (ma. ni. 1.60) “**brahmā mahānubhāvo**”tiādi dasasahassiyaṃ mahābrahmuno vasena vadati. “Ukkaṭṭhaparicchedato”ti hi heṭṭhā vuttameva. “**Ekaṅguliya**”tiādi ekadesena mahānubhāvātādassanaṃ. **Anuttaranti** seṭṭhaṃ navalokuttaraṃ. **Puthūti** bahukā, visuṃ bhūtā vā. **Ukkaṭṭhāṭṭhānānanti** ukkaṃsagatikānaṃ. **Bhāvānukkamo**ti bhāvavasena paresamajjhāsāyānurūpaṃ “sadevaka”ntiādi padānaṃ anukkamo, bhāvavasena anusandhikkamo vā **bhāvānukkamo**, atthānañceva padānañca anusandhānapaṭipāṭīti attho, ayameva vā pāṭho tathāyeva **samantapāsādikāyaṃ** (pārā. aṭṭha. verañjakaṇḍavaṇṇanā 1) diṭṭhattā, **ācariyasāriputtattherena** (sāratta. ṭī. 1.verañjakaṇḍavaṇṇanā) ca vaṇṇitattā. “Vibhāvanānukkamo”tipi pāṭho dissati, so pana tesu adiṭṭhattā na sundaro.

Idāni porāṇakānaṃ saṃvaṇṇanāyamaṃ dassetuṃ “**porāṇā panāhū**”tiādi vuttaṃ. Tattha aññapadena niravasesasattalokassa gahitattā sabbattha **avasesalokanti** anavasesapariyādānaṃ vuttaṃ. Tenāha “**tibhavūpage satte**”ti, tedhātukasaṅkhāte tayo bhava upagatasatteti attho. **Tihākārehīti** devanābrahmasahitatasaṅkhātehi tīhi ākārehi. **Tīsu padesu**ti “sadevaka”ntiādīsu tīsu padesu. **Pakkhipitvāti** atthavasena saṅgahetvā. Teyeva tibhavūpage satte “sassamaṇabrāhmaṇiṃ, sadevamanussa”nti padadvaye pakkhipatīti nāpetuṃ “**punā**”ti vuttaṃ. **Tena tenākārenāti** sadevakattādinā, sassamaṇabrāhmaṇībhāvādinā ca tena tena pakārena. “Tibhavūpage satte”ti vatvā “**tedhātukamevā**”ti vadantā okāsalokena saddhiṃ sattaloko gahitoti dassenti. Tedhātukameva pariyādinanti porāṇā panāhūti yojanā.

Sāmanti attanā. Aññatthāpohanena, antogadhāvadhāraṇena vā tappāṭisedhanamāha “**aparaneyyo hutvā**”ti, aparehi anabhijānāpetabbo hutvāti attho. **Abhiññāti** ya-kāralopaniddeso yathā “paṭisaṅkhā yoniso”ti (ma. ni. 1.23, 422; 2.24; 3.75; saṃ. ni. 4.120; a. ni. 6.58; mahāni. 206) vuttaṃ “**abhiññāyā**”ti. Abhisaddena na visesanamattaṃ jotitaṃ, atha kho visesanamukhena karaṇampīti dasseti “**adhikena nāṇenā**”ti iminā. **Anumānādipaṭikkhepoti** ettha **ādisaddena** upamānaatthāpattisaddantarasaṇṇidhānasampayogavippayogasahacaraṇādinā kāraṇalesamattena pavedanaṃ saṅgaṇhāti ekappamāṇattā. Sabbattha appaṭihatañānacāratāya hi sabbadhammapaccakkhā buddhā bhagavanto. **Bodheti viññāpetīti** saddato atthavacanaṃ. **Pakāsetīti** adhippāyato. Evaṃ sabbattha vivecitabbo.

Anuttaraṃ vivekasukhanti phalasaṃpattisukhaṃ. **Hitvāpīti pi-saddaggaṇaṃ** phalasaṃpattiyā antarā ṭhitikāpi kadāci bhagavato desanā hotīti katvā kataṃ. Bhagavā hi dhammaṃ desento yasmiṃ khaṇe parisā sādhuṅkāraṃ vā deti, yathāsutaṃ vā dhammaṃ paccavekkhati, taṃ khaṇampi pubbābhogena paricchinditvā phalasaṃpattim samāpajjati, yathāparicchedaṅca samāpattito vuttāyā pubbe ṭhitatthānato paṭṭhāya dhammaṃ desetīti aṭṭhakathāsu (ma. ni. aṭṭha. 2.387) vuttovāyamattho. **Appaṃ vā bahuṃ vā desentoti** ugghaṭitaññussa vasena appaṃ vā vipaṇcitaññussa, neyyassa ca vasena bahuṃ vā desento. Kathaṃ desetīti āha “**ādimhipī**”tiādi. Dhammassa kalyāṇatā niyyānikatāya, niyyānikatā ca sabbaso anavajjabhāvenevāti vuttaṃ “**anavajjameva katvā**”ti. **Desanāyāti** pariyattidhammassa desakāyattena hi ānādividhinā atisaṃjjanāṃ pabodhanaṃ desanāti pariyattidhammo vuccati. Kiñcāpi avayavavinimutto samudāyo nāma paramatthato koci natthi, yesu pana avayavesu samudāyarūpena avekkhitesu gāthādisamaññā, taṃ tato bhinnaṃ viya katvā saṃsānivohāramāropetvā dassento “**atthi desanāya ādimajjhapariyosāna**”nti āha. **Sāsanassāti** paṭipattidhammassa. Sāsitaṃbapuggalagatena hi yathāparādhādinā sāsitaṃbabbhāvena anusāsanāṃ, tadaṅgavinayādivasena vinayananti katvā paṭipattidhammo “sāsana”nti vuccati. Atthi sāsanassa ādimajjhapariyosānanti sambandho. **Catuppādikāyapīti** ettha **pi-saddo** sambhāvane, tena evaṃ appakatarāyapī ādimajjhapariyosānesu kalyāṇatā, pageva bahutarāyāti sambhāveti. Padañcetta gāthāya catutthaṃso, yaṃ “pādo”tipi vuccati, eteneva tipādikachapādikāsūpi yathāsambhavaṃ vibhāgaṃ dasseti. Evaṃ suttāyave kalyāṇattayaṃ dassetvā sakalepi sutte dassetuṃ “**ekānusandhikassā**”tiādi vuttaṃ. Tattha nātibahuvibhāgaṃ yathānusandhinā ekānusandhikaṃ sandhāya “ekānusandhikassā”ti āha. Itarasmim pana teneva dhammavibhāgena ādimajjhapariyosānā labbhantīti “**anekānusandhikassā**”tiādi vuttaṃ. **Nidānanti ānandattherena** ṭhapitaṃ kāladesadesakaparisādiapadisaṅkhaṇaṃ nidānaganthaṃ. **Idamavocāti** nigamaṇaṃ upalakkhaṇameva “iti yaṃ taṃ vuttaṃ, idametaṃ paṭicca vutta”nti nigamanassapī gahetabbato. Saṅgītikārahehi ṭhapitānīpi hi nidānanigamanāni satthu desanāya anuvīdhānato tadantogadhānevāti veditaṃ. **Ante anusandhīti** sabbapacchimo anusandhi.

“**Sīlasamādhivipassanā**”tiādinā sāsanassa idha paṭipattidhammataṃ vibhāveti. **Vinayaṭṭhakathāyaṃ** pana “sāsanadhammo”ti vuttattā –

“Sabbapāpassa akaraṇaṃ, kusalassa upasampadā;
Sacittapariyodapanāṃ, etaṃ buddhāna sāsana”nti. (dī. ni. 2.90; dha. pa. 183; netti. 30, 50,

116, 124);

Evam vuttassa satthusāsanassa pakāsako pariyattidhammo eva sīlādiatthavasena kalyāṇattayavibhāvane vutto. Idha pana paṭipattiyeva. Tena vakkhati “idha desanāya ādimajjhapariyosānaṃ adhippeta”nti. **Sīlasamādhivipassanā ādi nāma** sāsanasampattibhūtānaṃ uttarimanussadhammānaṃ mūlabhāvato. **Kusalānaṃ dhammānanti** anavajjadhammānaṃ. **Diṭṭhīti** vipassanā, avinābhāvato panettha samādhiggahaṇaṃ. Mahāvaggasaṃyutte **bāhiyasuttapadamidaṃ** (saṃ. ni. 5.381). Kāmaṃ sutte ariyamaggassa antadvayavīgamena tesam majjhimapaṭipadābhāvo vutto, majjhimabhāvasamāññato pana sammāpaṭipattiyā ārambhanipphattīnaṃ majjhimabhāvassāpi sādhakabhāve yuttanti āha “**atthi bhikkhave, majjhimā paṭipadā tathāgatena abhisambuddhāti evaṃ vutto ariyamaggo majjhaṃ nāmā**”ti, sīlasamādhivipassanāsankhātānaṃ ārambhānaṃ, phalanibbānasankhātānaṃ nippattīnaṃ vemajjhabhāvato ariyamaggo majjhaṃ nāmāti adhippāyo. Saupādisesanibbānadhātuvasena **phalaṃ pariyosānaṃ nāma**, anupādisesanibbānadhātuvasena pana **nibbānaṃ**. Sāsanapariyosānā hi nibbānadhātu. Maggassa nippatti phalavasena, nibbānasacchikiriyāya ca hoti tato paraṃ kattabbābhāvatoti vā evaṃ vuttaṃ. Idāni tesam dvinnampi sāsanaṃ pariyosānaṃ āgamena sādhetuṃ “**etadatthaṃ ida**”ntiādimāha. Etadeva phalaṃ attho yassāti **etadatthaṃ**. **Brāhmaṇāti** piṅgalakocchabrāhmaṇaṃ bhagavā ālapati. Idāñhi majjhimāgame mūlapaṇṇāsake **cūlasāropamasutta** (ma. ni. 1.312 ādayo) padaṃ. Etadeva phalaṃ saraṃ yassāti **etaṃsāraṃ** niggahitāgamena. Tathā **etaṃpariyosānaṃ**. **Nibbānogaḍhanti** nibbānantogaḍhaṃ. **Āvuso visākhāti** dhammadinnāya theriyā visākhagahapatimālapanaṃ. Idāñhi **cūlavedallasutte** (ma. ni. 1.460 ādayo) “**sātthaṃ sabyañjana**”ntiādisaddantarasaṃnidhānato “**idha desanāya ādimajjhapariyosānaṃ adhippeta**”nti vuttaṃ.

Evam saddapabandhavasena desanāya kalyāṇattayavibhāgaṃ dassetvā tadatthavasena dasseto “**bhagavā hī**”tiādimāha. Atthatopi hi tassādhippetabhāvaṃ **hi**-saddena samattheti. Tathā samatthanamukhena ca atthavasena kalyāṇattayavibhāgaṃ dassetīti. Atthato panetaṃ dasseto yo tasmim tasmim atthe katavidhī saddapabandho gāthāsuttavasena vavathito pariyattidhammoyeva idha desanāti vutto, tassa cattho visesato sīlādi evāti āha “**ādimhi sīla**”ntiādi. Visesakathanañhetam. Sāmaññato pana sīlaggahaṇena sasambhārasīlaṃ gahitaṃ, tathā maggagahaṇena sasambhāramaggoti atthattayavasena anavasesato pariyattiatthaṃ pariyādāya tiṭṭhati. Itarathā hi kalyāṇattayavibhāgo asabbasādhāraṇo siyā. Ettha ca sīlamūlakattā sāsanaṃ sīlena ādikalyāṇatā vuttā, sāsanasampattiyā vemajjhabhāvato maggena majjhekalyāṇatā. Nibbānādhigamato uttari karaṇīyābhāvato nibbānena pariyosānakalyāṇatā. **Tenāti** sīlādidassanaṃ. Atthavasena hi idha desanāya ādikalyāṇādibhāvo vutto. “**Tasmā**”tiādi yathāvuttānusārena sotūnamanusāsanaṃ dasseto.

Esāti yathāvuttākārena kathanā. **Kathikasaṅgīti**ti dhammakathikassa saṅgīhānaṃ kathanavasena samavaṭṭhānaṃ.

Vaṇṇanā atthavivaraṇā, pasamsanā vā. **Na so sātthaṃ deseti** niyyānatthavirahato tassā desanāya. **Tasmāti** catusatipaṭṭhānādiniyyānatthadesanato. **Ekabyañjanādiyuttāti** sithiladhaniṭṭhadesu dasasu byañjanesu ekappakāreṇeva, dvippakāreṇeva vā byañjanena yuttā **damīlabhāsā** viya. **Sabbaniroṭṭhabyañjanāti** vivaṭakaraṇatāya oṭṭhe aphaṣṣetvā uccāretabbato sabbathā oṭṭhaphusanarahitavimuttabyañjanā **kirātabhāsā** viya. **Sabbavissatṭhabyañjanāti** sabbasseva vissajjanīyayuttatāya sabbathā vissaggabyañjanā **savarabhāsā** viya. **Sabbaniggahitabyañjanāti** sabbasseva sānusāratāya sabbathā bindusahitabyañjanā pārasikādimilakkhubhāsā viya. Evam “**damīlakirātasavamilakkhūnaṃ bhāsā viyā**”ti idaṃ paccakaṃ yojetabbaṃ. **Milakkhūti** ca pārasikādayo. Sabbāpesā byañjanekadesavaseneva pavattiyā aparipuṇṇabyañjanāti vuttaṃ “**byañjanaparipūriyā abhāvato abyañjanā nāmā**”ti.

Ṭhānakaraṇāni sithilāni katvā uccāretabbamakkharaṃ pañcasu vaggesu paṭhamatatiyaṃ **sithilaṃ**. Tāni asithilāni katvā uccāretabbamakkharaṃ tesveva dutiyacattutthaṃ **dhanitaṃ**.

Dvimattakālamakkharam **dīgham**. Ekamattakālam **rassam**.

Pamāṇam ekamattassa, nimīsumīsato’ bravuṃ;
Aṅguliphoṭakālassa, pamāṇenāpi abravuṃ.

Saññogaparam, dīghañca **garukam**. Asaṃyogaparam rassam **lahukam**. Thānakaraṇāni niggahetvā avivaṭena mukhena uccāretabbam **niggahitam**. Parapadena sambajjhivā uccāretabbam **sambandham**. Tathā asambajjhittabbam **vavatthitam**. Thānakaraṇāni vissaṭṭhāni katvā vivaṭena mukhena uccāretabbam **vimuttam**. **Dasadhāti**ādīsu evaṃ sithilādivasena byañjanabuddhisañkhātassa akkharuppādakacittassa dasahi pakārehi byañjanānam pabhedoti attho. Sabbāni hi akkharāni cittasamuṭṭhānāni, yathāhippetatthassa ca byañjanato pakāsanato **byañjanānīti**, byañjanabuddhiyā vā karaṇabhūtāya byañjanānam dasadhā pabhedotipi yujjati.

Amakkhetvāti amilecchetvā avināsetvā, ahāpetvāti attho. Tadatthamāha “**paripuṇṇabyañjanameva katvā**”ti, yamattham bhagavā nāpetuṃ ekagātham, ekavākyampi deseti, tamattham parimaṇḍalapadabyañjanāya eva desanāya desetīti vuttaṃ hoti. **Tasmāti** paripuṇṇabyañjanadhammadesanato. **Kevalasaddo** idha anavasesavācako. Na avomissatādivācakoti āha “**sakalādhivacana**”nti. **Paripuṇṇanti** sabbaso puṇṇam. Tam panatthato ūnādhikanisedhananti vuttaṃ “**anūnādhikavacana**”nti. Tatha yadattham desito, tassa sādhakattā anūnatā vedittabbā, tabbidhurassa pana asādhakattā anadhikā. Upanetabbassa vā vodānatthassa avuttassa abhāvato anūnatā, aparetabbassa saṃkilesatthassa vuttassa abhāvato anadhikā. **Sakalanti** sabbabhāgavantam. **Paripuṇṇanti** sabbaso puṇṇameva. Tenāha “**ekadesenāpi aparipuṇṇā natthī**”ti. **Aparisuddhā desanā hoti** taṇhāya saṃkiliṭṭhattā. Lokehi taṇhāya āmasitabbato **lokāmisā**, cīvarādayo paccayā, tesu agadhitacittatāya **lokāmisanirapekkho**. **Hitapharaṇenāti** hitato pharaṇena hitūpasamhārena visesanabhūtena. **Mettābhāvanāya** karaṇabhūtāya **muduhadayo**. **Ullumpanasabhāvasaṅghitenāti** sakalasaṃkilesato, vaṭṭadukkhatto ca uddharaṇākārasaṅghitenā, kāruṇṇādhippāyenāti vuttaṃ hoti.

“Ito paṭṭhāya dassāmi, evañca dassāmi”ti samādātabbaṭṭhena dānam **vataṃ**. Paṇḍitapaññattatāya seṭṭhaṭṭhena brahmaṃ, brahmānam vā seṭṭhānam cariyanti dānameva **brahmacariyam**. Macchariyalobhādiniggahaṇena samāciṇṇattā dānameva **suciṇṇam**. **Iddhīti** deviddhi. **Jutīti** pabhā, ānubhāvo vā. **Balavīriyūpapattīti** mahatā balena, vīriyena ca samannāgamo. **Nāgāti** varuṇanāgarājānam vidhurapaṇḍitassa ālapanam.

Dānapatīti dānasāmino. **Opānabhūtanti** udakatitthamiva bhūtam.

Dhīrāti so vidhurapaṇḍitamālapati.

Madhussavoti madhurasasandanam. **Puññanti** puññaphalam, kāraṇavohārena vuttaṃ. Brahmaṃ, brahmānam vā cariyanti **brahmacariyam**, veyyāvaccam. Esa nayo sesesupi.

Tittiriyanti tittirasakuṇarājena bhāsitam.

Aññatra tāhīti paradārabhūtāhi vajjetvā. **Amhanti** amhākam.

Tapassī, lūkho, jegucchī, pavivittoti catubbidhassa dukkarassa katattā **caturaṅgasamannāgataṃ**. **Sudanti** nipātamattam. **Lomahaṃsanasuttaṃ majjhimāgame mūlapaṇṇāsake**, “**mahāsīhanādasutta**”ntipi (ma. ni. 1.146) tam vadanti.

Iddhanti samiddham. **Phītanti** phullitam. **Vitthārikanti** vitthārabhūtam. **Bāhujaññanti** bahūhi janehi niyyānikabhāvena ñātam. **Puthubhūtanti** bahubhūtam. **Yāva devamanussehīti** ettha devalokato

yāva manussalokā supakāsītanti adhippāyavasena **pāsādikasuttaṭṭhakathāyaṃ** (dī. ni. aṭṭha. 3.170) vuttaṃ, yāva devā ca manussā cāti attho. **Tasmāti** yasmā sikkhattayasāṅgahaṃ sakalasāsanam idha “brahmacariya”nti adhippetam, tasmā. “Brahmacariya”nti iminā samānādhikaraṇāni sabbapadāni yojetvā attham dassento “**so dhammam deseti**”tiādimāha. “**Evam desento cā**”ti hi iminā brahmacariyasaddena dhammasaddādīnam samānatthataṃ dasseti, “dhammam deseti”ti vatvāpi “brahmacariyam pakāseti”ti vacanam sarūpato atthappakāsanatthanti ca vibhāveti.

191. Vuttappakārasampadanti yathāvuttaādikalyāṇatādippabhedaguṇasampadam. Dūrasamussāritamānasseva sāsane sammāpaṭipatti sambhavati, na mānājātikassāti vuttaṃ “**nihatamānattā**”ti. **Ussannattāti** bahulabhāvato. Bhogarūpādivatthukā madā suppaheyyā honti nimittassa anavaṭṭhānato, na tathā kulavijjādīmadā nimittassa samavaṭṭhānato. Tasmā khattiyabrāhmaṇakulīnānam pabbajitānampi jātivijjam nissāya mānājappanam duppajahanti āha “**yebhuyyena...pe... mānam karontī**”ti. **Vijātītāyāti** viparītājātītāya, hīnājātītāyāti attho. Yebhuyyena upanissayasampannā sujātikā eva, na dujjātikāti evam vuttaṃ. **Paṭiṭṭhātum na sakkontīti** sīle paṭiṭṭhahitum na ussahanti, suvisuddham katvā sīlam rakkhitum na sakkontīti vuttaṃ hoti. Sīlameva hi sāsane paṭiṭṭhā, **paṭiṭṭhātunti** vā saccapaṭivedhena lokuttarāya paṭiṭṭhāya paṭiṭṭhātum. Sā hi nippariyāyato sāsane paṭiṭṭhā nāma.

Evam byatīrekato attham vatvā anvayatopi vadati “**gahapatidārakā panā**”tiādinā. **Kacchehi sedam muñcantehīti** itthambhūtalakkhaṇe karaṇavacanam. Tathā **piṭṭhiyā loṇam pupphamānāyāti**, sedam muñcantakacchā loṇam pupphamānapiṭṭhikā hutvā, tehi vā pakārehi lakkhitāti attho. **Bhūmim kasitvāti** bhūmiyā kassanato, khettūpajīvanatoti vuttaṃ hoti. **Tādisassāti** jātimantūpanissayassa. Dubbalaṃ **mānam**. Balavaṃ **dappam**. **Kammanti** parikkammaṃ. “**Itarehī**”tiādinā “ussannattā”ti hetupadam vivarati. “**Iti**”ti vatvā tadaparāmasitabbaṃ dasseti “**nihatamānattā**”tiādinā, **itisaddo** vā nidassane, evam yathāvuttanayenāti attho. Esa nayo īdisesu.

Paccājātoti ettha ākāro upasaggamattanti āha “**patijāto**”ti. **Parisuddhanti** rāgādīnam accantameva pahānadīpanato nirupakkilesatāya sabbathā suddham. Dhammassa sāmī taduppādakaṭṭhena, dhammena vā sadevakassa lokassa sāmīti **dhammassāmī**. **Saddhanti** pothujjanikasaddhavasena saddahanaṃ. Viññūjātikānañhi dhammasampattigahaṇapubbikā saddhāsiddhi catūsu puggalesu dhammappamānadhammappasannapuggalabhāvato. “Yo evam svākkhātadhammo, sammāsambuddho vata so bhagavā”ti saddham paṭilabhati. **Yojanasatantarepi vā** padese. **Jāyampatikāti** jānipatikā. Kāmaṃ “jāyampatikā”ti vutteyeva gharasāmikagharasāminīvasena dvinnameva gahaṇam viññāyati, yassa pana purisassa anekā pajāpatiyo, tassa vattabbameva natthi. Ekāyapi tāva saṃvāso sambādhoyevāti dassanattham “**dve**”ti vuttaṃ. Rāgādīnā **kiñcanam**, khettavatthādīnā **palibodhanam**, tadubhayena saha vattatīti **sakiñcanapalibodhano**, soyevattho tathā. Rāgo eva rajo, tadādīkā dosamoharajā. Vuttañhi “rāgo rajo na ca pana reṇu vuccatī”tiādi (mahāni. 209; cūlani. 74) āgamanapathatāpi uṭṭhānatthānatā evāti dvepi saṃvaṇṇanā ekatthā, byañjanameva nānam. **Alagganattāthenāti** asajjanattāthena appaṭibandhasabhāvena. Rūpakavasena, taddhitavasena vā abbhokāsoti dassetuṃ **viya**-saddaggahaṇam. Evam akusalakusalappavattīnam ṭhānāṭṭhānabhāvena gharāvāsapabbajjānam sambādhabbhokāsataṃ dassetvā idāni kusalappavattiyā eva aṭṭhānatthānabhāvena tesam tabbhāvam dassetuṃ “**apicā**”tiādi vuttaṃ. Rajānam sannipātāṭṭhānam viyāti sambandho.

Visuṃ visuṃ paduddhāramakatvā samāsato atthavaṇṇanā **sañkhepakathā**. **Ekampi divasanti** ekadivasamattampi. **Akhaṇḍam katvāti** dukkaṭamattassāpi anāpajjanena achiddam katvā. **Carimakacittanti** cuticittam. **Kilesamalenāti** tañhāsamkilesādimalena. **Amalīnanti** asaṃkiliṭṭham. Pariyodātāṭṭhena nimmalabhāvena sañkham viya likhitam dhotanti **sañkhalikhitam**. Atthamattam pana dassetuṃ “**likhitasañkhasadisa**”nti vuttaṃ. **Dhotasañkhasappaṭibhāganti** tadatthasseva vivaraṇam. Apica likhitam sañkham **sañkhalikhitam** yathā “agyāhito”ti, tassadisattā pana idaṃ sañkhalikhitantipi dasseti, bhāvanapumsakañcetam. **Ajjhāvasatāti** ettha **adhi**-saddena kammappavacanīyena yogato

“**agāra**”nti etaṃ bhummatthe upayogavacananti āha “**agāramajjhe**”ti. Yaṃ nūna yadi pana pabbajeyyaṃ, sādhu vatāti sambandho. Kasāyena rattāni **kāsāyānī**ti dasseti “**kasāyarasapītāyā**”ti iminā. Kasmā cetāni gahitānīti āha “**brahmacariyaṃ carantānaṃ anucchavikānī**”ti. **Acchādetvā**ti vohāravacanamatthaṃ, paridahitvāti attho, tañca kho nivāsanapārūpanavasena. Agāravāso **agāraṃ** uttarapadalopena, tassa **hitam** vuḍḍhiāvahaṃ **kasivāṇijjādikammaṃ**. **Taṃ anagāriyanti** tasmiṃ anagāriye.

192. Sahassatoti kahāpaṇasahassato. **Bhogakkhandho** bhogarāsi. **Ābandhanaṭṭhenā**ti “putto nattā panattā”tiādīnā pemavasena paricchedaṃ katvā bandhanaṭṭhena, etena ābandhanaṭṭho **parivaṭṭa-**saddoti dasseti. Atha vā pitāmahapituputtādivasena parivattanaṭṭhena **parivaṭṭoti**pi yujjati. “Amhākamete”ti nīyanti **nīṭayo**.

193. Pātīmokkhasaṃvarena pihitakāyavacīdvāro samāno tena saṃvarena upeto nāmāti katvā “**pātīmokkhasaṃvarena samannāgato**”ti vuttaṃ. Ācāragocarānaṃ vitthāro **vibhaṅgaṭṭhakathādīsu** (vibha. aṭṭha. 503) gahetabbo. “**Ācāragocarasaṃpanno**”tiādi ca tasseva pātīmokkhasaṃvarasaṃvutabhāvassa paccayadassanaṃ. Aṇusadisatāya appamattakaṃ “aṇū”ti vuttanti āha “**appamattakesū**”ti. Asañicca āpannaanukhuddakāpattivasena, sahasā uppannaakusalacittupādavasena ca appamattakatā. **Bhayadassī**ti bhayadassanasīlo. **Sammāti** aviparītaṃ, sundaraṃ vā, tabbhāvo ca sakkaccaṃ yāvajīvaṃ avītikamavasena. “Sikkhāpadesū”ti vuttēyeva tadavayavabhūtaṃ “sikkhāpadaṃ samādāya sikkhatī”ti atthassa gamyamanattā kammaṃpadaṃ na vuttanti āha “**taṃ taṃ sikkhāpada**”nti, taṃ taṃ sikkhākoṭṭhāsaṃ, sikkhāya vā adhigamupāyaṃ, tassā vā nissayanti attho.

Etthāti etasmiṃ “pātīmokkhasaṃvarasaṃvuto”tiādivacane. **Ācāragocaraggahaṇenevāti** “ācāragocarasaṃpanno”ti vacaneneva. Tenāha “**kusale kāyakammavacīkame gahitepi**”ti. Na hi ācāragocarasaṃvattamattena kusalakāyavacīkammaggahaṇaṃ sambhavati, iminā punaruttitāya codanālesam dasseti. **Tassāti** ājīvapārisuddhisīlassa. **Uppattidvāradassanattanti** uppattiyā kāyavacīviññattisaṅkhātassa dvārassa kammāpadesena dassanattam, etena yathāvuttacodanāya sodhanaṃ dasseti. Idaṃ vuttaṃ hoti – siddhepi sati punāraṃbho niyamāya vā hoti, atthantarabodhanāya vā, idha pana atthantaram bodheti, tasmā uppattidvāradassanattam vuttanti. **Kusalenāti** ca sabbaso anesanaṃpahānato anavajjena. Kathaṃ tena uppattidvāradassananti āha “**yasmā panā**”tiādi. Kāyavacīdvāresu uppanna anavajjena kāyakammavacīkammaṃ samannāgatattā **parisuddhājīvoti** adhippāyo. Tadubhayameva hi ājīvahetukaṃ ājīvapārisuddhisīlaṃ.

Idāni suttantarena saṃsanditum “**muṇḍikaputtasuttantavasena vā evaṃ vutta**”nti āha. **Vā-**saddo cettha suttantarasamānāsāṅkhātāatthantaravikappanatto. **Muṇḍikaputtasuttantaṃ** nāma majjhimāgamavare majjhimaṃpaṇṇāsake, yaṃ “samaṇamuṇḍikaputtasutta”ntipi vadanti. Tattha **thapatī**ti pañcakaṅgaṃ nāma vaḍḍhakiṃ bhagavā ālapati. **Thapati-**saddo hi vaḍḍhakiṃpariyāyo. Idaṃ vuttaṃ hoti – yasmā “katame ca thapati kusalā sīlā? Kusalaṃ kāyakammaṃ kusalaṃ vacīkamma”nti sīlassa kusalakāyakammavacīkammabhāvaṃ dassetvā “ājīvapārisuddhampi kho ahaṃ thapati sīlassmiṃ vadāmi”ti (ma. ni. 2.265) evaṃ pavattāya muṇḍikaputtasuttadesanāya “kāyakammavacīkammaṃ samannāgato kusalenā”ti sīlassa kusalakāyakammavacīkammabhāvaṃ dassetvā “parisuddhājīvo”ti evaṃ pavattā ayaṃ sāmāññaphalasuttadesanā ekasaṅgahā aññadatthu saṃsandati sameti yathā taṃ gaṅgodakena yamunodakaṃ, tasmā īdisīpi bhagavato desanāvibhūti atthevāti. **Sīlassmiṃ vadāmi**ti sīlanti vadāmi, sīlassmiṃ vā ādhārabhūte antogadhaṃ pariyāpannaṃ, niddhāraṇasamudāyabhūte vā ekaṃ sīlanti vadāmi.

Tividhenāti cūlasīlamajjhimasīlamahāsīlato tividhena. “**Manacchaṭṭhesū**”ti iminā kāyapañcamānameva gahaṇaṃ nivatteti. Upari niddese vakkhamānesu **sattasu ṭhānesu**. **Tividhenāti** catūsu paccakaṃ yathālābhayathābalayathāsārūppatāvasena tibbidhena.

Cūlamajjhimamahāsīlavaṇṇanā

194-211. Evanti “so evaṃ pabbajito samāno pātimokkhasaṃvarasaṃvuto viharatī” tiādinā nayena. “**Sīlasmi**”nti idaṃ niddhāraṇe bhumbaṃ tato ekassa niddhāraṇiyattāti āha “**ekaṃ sīla**”nti. Apica iminā ādhāre bhumbaṃ dasseti samudāyassa avayavādhiṭṭhānattā yathā “rukke sākā”ti. “**Ida**”nti padena katvatthavasena samānādhikaraṇaṃ bhummavacanassa katvatthe pavattanato yathā “vanappagumbe yatha phusitagge”ti (khu. pā. 6.13; su. ni. 236) dasseti “**paccattavacanatthe vā etaṃ bhumba**”nti iminā. **Ayamevatthoti** paccattavacanattho eva. **Brahmajāleti** brahmajālasuttavaṇṇanāyaṃ, (dī. ni. aṭṭha. 1.7) brahmajālasuttapade vā. Saṃvaṇṇanāvasena **vuttanāyena**ti attho. “Idamassa hoti sīlasmi”nti ettha mahāsīlapariyosānena niddhāriyamānassa abhāvato paccattavacanatthoyeva sambhavatīti āha “**idaṃ assa sīlaṃ hotīti attho**”ti, tatoyeva ca pāliyaṃ apiggahaṇamakatanāti daṭṭhabbaṃ.

212. Attānuvādaparānuvādadaṇḍabhayādīni **asaṃvaramūlakāni bhayāni**. “**Sīlassāsaṃvaratoti** sīlassa asaṃvaraṇato, sīlassaṃvarābhāvato ti attho”ti (dī. ni. ṭī. 1.280) ācariyena vuttaṃ, “yadidaṃ sīlassaṃvarato”ti pana padassa “yaṃ idaṃ bhayaṃ sīlassaṃvarato bhavyeyā”ti atthavacanato, “sīlassaṃvarahetu bhayaṃ na samanupassati”ti ca atthassa upapattito sīlassaṃvarato sīlassaṃvarahetūti atthoyeva sambhavati. “Yaṃ idaṃ bhayaṃ sīlassaṃvarato bhavyeyā”ti hi pāṭhopi dissati. “**Saṃvarato**”ti hetuṃ vatvā tadadhigamitaatthavasena “**asaṃvaramūlakassa bhayassa abhāvā**”tipi hetuṃ vadati. **Yathāvidhānavihitenāti** yathāvidhānaṃ sampādītena. **Khattiyābhisekenāti** khattiyābhāvāvahena abhisekena. **Muddhani avasitto**ti matthakeyeva abhisitto. Ettha ca “yathāvidhānavihitenā”ti iminā porāṇakāciṇṇavidhānasamaṅgitāsaṅkhātāṃ ekaṃ aṅgaṃ dasseti, “khattiyābhisekenā”ti iminā khattiyābhāvāvahatāsaṅkhātāṃ, “muddhani avasitto”ti iminā muddhaniyeva abhisīcītabhāvasaṅkhātāṃ. Iti tivaṅgasamannāgato khattiyābhiseko vutto hoti. Yena abhisittarājūnaṃ rājānubhāvo samijjhati. Kena paṇāyamattho viññāyatīti? Porāṇakasatthāgatanayena. Vuttañhi **aggaññasuttaṭṭhakathāyaṃ** mahāsammatabhisekavibhāvanāya “te panassa khettsāmīno tīhi saṅkhehi abhisekampi akāṃsū”ti (dī. ni. aṭṭha. 3.131) **majjhimāgamaṭṭhakathāya**ñca mahāsīhanādasuttavaṇṇanāyaṃ vuttaṃ “**muddhāvasittenāti** tīhi saṅkhehi khattiyābhisekena muddhani abhisittenā”ti (ma. ni. aṭṭha. 1.160) **sīhaṭṭhakathāyampi** cūlasīhanādasuttavaṇṇanāyaṃ “paṭhamaṃ tāva abhisekaṃ gaṇhantānaṃ rājūnaṃ suvaṇṇamayādīni tīhi saṅkhāni ca gaṅgodakañca khattiyakaññañca laddhuṃ vaṭṭatī”tiādi vuttaṃ.

Ayaṃ pana tatthāgatanayena **abhisekavidhānavinichchayo** – abhisekamaṅgalatthañhi alaṅkatapaṭiyattassa maṇḍapassa antokatassa udumbarasākhamāṇḍapassa majjhe suppatīṭṭhite udumbarabhaddapīṭṭhamhi abhisekārahaṃ abhijaccaṃ khattiyaṃ nisīdāpetvā paṭhamaṃ tāva maṅgalābharaṇabhūsitā jātisampannā khattiyakaññā gaṅgodakapuṇṇaṃ suvaṇṇamayāsāmuddikadakkhiṇāvattasaṅkhaṃ ubho hi hatthehi sakkaccaṃ gahetvā sīsopari ussāpetvā tena tassa muddhani abhisekodakaṃ abhisīcīti, evañca vadeti “deva taṃ sabbepi khattiyagaṇā attānamārakkhatthaṃ iminā abhisekena abhisekikaṃ mahārājaṃ karonti, tvaṃ rājadhamesu ṭhito dhammena samena rajjaṃ kārehi, etesu khattiyagaṇesu tvaṃ puttāsinehānukampāya sahitacitto, hitasamamettacitto ca bhava, rakkhāvaraṇaguttīyā tesāṃ rakkhito ca bhavāhī”ti. Tato puna purohitopi porohiccaṭṭhānānurūpālāṅkārehi alaṅkatapaṭiyatto gaṅgodakapuṇṇaṃ rajatamayāṃ saṅkhaṃ ubho hi hatthehi sakkaccaṃ gahetvā tassa sīsopari ussāpetvā tena tassa muddhani abhisekodakaṃ abhisīcīti, evañca vadeti “deva taṃ sabbepi brāhmaṇagaṇā attānamārakkhatthaṃ iminā abhisekena abhisekikaṃ mahārājaṃ karonti, tvaṃ rājadhamesu ṭhito dhammena samena rajjaṃ kārehi, etesu brāhmaṇagaṇesu tvaṃ puttāsinehānukampāya sahitacitto, hitasamamettacitto ca bhava, rakkhāvaraṇaguttīyā tesāṃ rakkhito ca bhavāhī”ti. Tato puna seṭṭhipi seṭṭhiṭṭhānabhūsanabhūsito gaṅgodakapuṇṇaṃ ratanamayaṃ saṅkhaṃ ubho hi hatthehi sakkaccaṃ gahetvā tassa sīsopari ussāpetvā tena tassa muddhani abhisekodakaṃ abhisīcīti, evañca vadeti “deva taṃ sabbepi gahapatigaṇā attānamārakkhatthaṃ iminā abhisekena abhisekikaṃ mahārājaṃ karonti, tvaṃ rājadhamesu ṭhito dhammena samena rajjaṃ kārehi, etesu gahapatigaṇesu tvaṃ puttāsinehānukampāya sahitacitto, hitasamamettacitto ca bhava,

rakkhāvaraṇaguttiyā tesam rakkhito ca bhavāhī”ti. Te pana tassa evaṃ vadantā “sace tvam amhākaṃ vacanānurūpaṃ rajjaṃ karissasi, iccetam kusalam. No ce karissasi, tava muddhā sattadhā phalatū”ti evaṃ rañño abhisapanti viyāti datṭhabbanti. **Vaḍḍhakīsūkarajātakādīhi** cāyamattho vibhāvetabbo, abhisekopakaraṇānipi **samantapāsādikādīsu** (pārā. aṭṭha. 1.tatīyasāṅgītikathā) gaḥetabbānti.

Yasmā nihatapacāmitto, tasmā na samanupassatīti sambandho. Anavajjatā kusalahāvenāti āha “**kusalam silapadaṭṭhānehi**”tiādi. Idam vuttaṃ hoti – kusalasīlapadaṭṭhānā avippaṭṭisārāpāmojjapītipassaddhidhammā, avippaṭṭisārādinimittaṅca uppannam cetasikasukham paṭisaṃvedeti, cetasikasukhasamuṭṭhānehi ca paṇītarūpehi phuṭṭhasarīrassa uppannam kāyikasukhanti.

Indriyasamvarakathāvaṇṇanā

213. Sāmaññassa visesāpekkhatāya idhādhippetopi viseso tena apariccatto eva hotīti āha “**cakkhusaddo katthaci buddhacakkhumhi vattatī**”tiādi. Vijjamānameva hi abhidheyabhāvena visesattham visentaranivattanena visesasaddo vibhāveti, na avijjamānam. Sesapadesupi eseva nayo. Aññehi asādhāraṇam buddhānameva cakkhu dassananti **buddhacakkhu**, āsayānusayaññaṃ, indriyaparopariyattaññaṅca. Samantato sabbaso dassanaṭṭhena cakkhūti **samantacakkhu**, sabbaññutaññānam. **Tathūpamanti** pabbatamuddhūpamam, dhammamayaṃ pāsādanti sambandho. Sumedha samantacakkhu tvam janatamavekkhassūti attho. **Ariyamaggattayapaññāti** heṭṭhimāriyamaggattayapaññā. “Dhammacakkhu nāma heṭṭhimā tayo maggā, tīṇi ca phalānī”ti **salāyatanavaggaṭṭhakathāyam** (saṃ. ni. aṭṭha. 3.4.418) vuttaṃ, idha pana maggeheva phalāni saṅgahetvā dasseti. Catusaccasāṅkhāte dhamme cakkhūti hi **dhammacakkhu**. Paññāyeva dassanaṭṭhena cakkhūti **paññācakkhu**, pubbenivāsāsavakkhayaññaṃ. **Dibbacakkhumhīti** dutiyavijjāya. **Idhāti** “cakkhunā rūpaṃ disvā”ti imasmim pāṭhe. **Ayanti** cakkhusaddo. “**Pasādacakkhuvohārenā**”ti iminā idha cakkhusaddo cakkhupasādeyeva nipariyāyato vattati, pariyāyato pana nissayavohārena nissitassa vattabato cakkhuvīññānēpi yathā “mañcā ukkuṭṭhim karontī”ti dasseti. Idhāpi sasambhārakathā avasiṭṭhāti katvā **sesapadesupīti pi**-saddaggahaṇam, “na nimittaggāhī”tiādipadesupīti attho. Vividham asanam khedanam **byāseko**, kilesa eva byāseko, tena virahito tathā, virahitatā ca asammissatā, asammissabhāvo ca sampayogābhāvato parisuddhatīti āha “**asammissam parisuddha**”nti, kilesadukkhena avomissam, tato ca suvisuddhanti attho. Sati ca suvisuddhe indriyasamvare nīvaraṇesu padhānabhūtapāpadhammagamena adhicittānuyogo hatthagato eva hoti, tasmā adhicittasukhameva “abyāsekasukha”nti vuccatīti dasseti “**adhicittasukha**”nti iminā.

Satisampajaññakathāvaṇṇanā

214. Samantato pakārehi, pakatṭham vā savisesam jānātīti **sampajāno**, tassa bhāvo **sampajaññam**, tathāpavattaññaṃ, tassa vibhājanam sampajaññabhājanīyam, tasmim **sampajaññabhājanīyamhi**. “**Gamana**”nti iminā abhikkamanam **abhikkantanti** bhāvasāadhanamāha. Tathā paṭikkamanam **paṭikkantanti** vuttaṃ “**nivattana**”nti. Gamanañcetha nivattetvā, anivattetvā ca gamanam, nivattanam pana nivattimattameva, aññamaññamupādānakiriyāmatṭācetaṃ dvayam. Katham labbhatīti āha “**gamane**”tiādi. **Abhiharantoti** gamanavasena kāyam upanento. **Paṭinivattentoti** tato puna nivattento. **Apanāmentoti** apakkamanavasena pariṇāmento. **Āsanassāti** pīṭhakādiāsanassa. **Purimaāṅgābhimukhoti** aṅānikādipurimāvayavābhimukho. **Samsarantoti** saṃsappanto. **Pacchimaāṅgapadesanti** aṅānikādipacchimāvayavappadesam. **Paccāsamsarantoti** paṭīāsappanto. “**Eseva nayo**”ti iminā nipannasseva abhimukham saṃsappanapaṭīāsappanāni dasseti. Tṭhānanisajjāsāyanesu hi yo gamanavidhuro kāyassa purato abhihāro, so **abhikkamo**. Pacchato apahāro **paṭikkamoti** lakkhaṇam.

Sampajānanam **sampajānam**, tena attanā kattabbakiccassa karaṇasīlo **sampajānakārīti** āha “**sampajaññena sabbakiccakārī**”ti. “**Sampajaññameva vā kārī**”ti iminā sampajānassa karaṇasīlo **sampajānakārīti** dasseti. “**So hi**”tiādi dutiyavikappassa samatthanam. “**Sampajañña**”nti ca iminā

sampajāna-saddassa sampajāññapariyāyatā vuttā. Tathā hi **ācariyānandattherena** vuttam “samantato, sammā, samam vā pajānaṃ sampajānaṃ, tadeva sampajāñña”nti (vibha. mūlaṭī. 2.523) ayam aṭṭhakathāto aparō nayo – yathā atikkantādīsu asammohaṃ uppādeti, tathā sampajānassa kāro karaṇaṃ sampajānakāro, so etassa atthīti **sampajānakārīti**.

Dhammato vaḍḍhisāṅkhātena atthena saha vattatīti **sāttakam**, abhikkantādi, sāttakassa sampajānaṃ **sāttakasampajāññaṃ**. Sappāyassa attano patirūpassa sampajānaṃ **sappāyasampajāññaṃ**. Abhikkamādīsu bhikkhācāragocare, aññattha ca pavattesu avijahitakammaṭṭhānaṃ gocarasampajāññaṃ. Sāmaññaniddesena, hi ekasesanayena vā gocarasaddo tadatthadvayepi pavattati. Atikkamādīsu asammuyhanasāṅkhātaṃ asammohameva sampajāññaṃ **asammohasampajāññaṃ**. **Cittavasenevāti** cittassa vaseneva, cittavasamanugatenevāti attho. **Pariggahetvāti** tulayitvā tīretvā, paṭisaṅkhāyāti attho. Saṅghadassaneneva uposathapavāraṇādiatthāya gamanaṃ saṅgahitaṃ. **Ādisaddena** kaṣiṇaparikkamādīnaṃ saṅgaho. Saṅkhepato vuttam tadatthameva vivaritaṃ “**cetiyaṃ vā**”tiādi vuttam. **Arahattaṃ pāpuṇāti**ti ukkaṭṭhaniddeso esa. Samathavipassanuppādanampi hi bhikkhuno vaḍḍhiyeva. **Tatthāti** asubhāraṇaṃ. **Kecīti** abhayagirivāsino. **Āmisatoti** cīvarādiāmisapaccayato. Kasmāti āha “**taṃ nissāyā**”tiādi.

Tasminti sāttakasampajāññavasena pariggahitaatthe. Yasmā pana dhammato vaḍḍhiyeva attho nāma, tasmā yaṃ “sāttaka”nti adhippetam gamanaṃ, taṃ sabbampi sappāyamevāti siyā avisesena kassaci āsaṅkāti tannivattanattham “**cetiyaḍḍassanaṃ tāvā**”tiādi āradḍham. **Mahāpūjāyāti** mahatiyā pūjāya, bahūnaṃ pūjādivaseti vuttam hoti. **Cittakammarūpakāni viyāti** cittakammakatapaṭimāyo viya, yantapayogena vā nānappakāraviccittakiriyaṃ paṭimāyo viya. **Tatrāti** tāsu parisāsu. **Assāti** bhikkhuno. **Asamapekkhanaṃ** nāma gehassitaññānupekkhāvasena ārammaṇassa ayoniso gahaṇaṃ. Yaṃ sandhāya vuttam “cakkhunā rūpaṃ disvā uppajjati upekkhā bālassa mūlhassa puthujjanassa”tiādi (ma. ni. 3.308) mātugāmasamphassavasena **kāyasamsaggāpatti**. Hatthiādisammaddena **jīvitantarāyo**. Visabhāgarūpadassanādīnaṃ **brahmacariyantarāyo**. “Dasadvādasayojanantare parisā sannipatanti”tiādinā **vuttappakāreneva**. **Mahāparisaparivārānanti** kadāci dhammassavanādiatthāya itthipurisassammissaparivāre sandhāya vuttam.

Tadatthadīpanatthanti asubhadassanassa sāttakabhāvasāṅkhātassa atthassa dīpanattham. **Pabbajitadivasato paṭṭhāya** paṭivacanadānavasena bhikkhūnaṃ anuvattanakathā ācinṇā, tasmā paṭivacanassa adānavasena anuvattanakathā tassa dutiyā nāma hotīti āha “**dve kathā nāma na kathitapubbā**”ti. **Dve kathāti** hi vacanakaraṇākaraṇakathā. Tattha vacanakaraṇakathāyeva kathitapubbā, dutiyā na kathitapubbā. Tasmā subbacattā paṭivacanamadāsīti attho.

Evanti iminā. “Sace pana cetiyassa mahāpūjāyā”tiādikam sabbampi vuttappakāraṃ paccāmasati, na “purisassa mātugāmāsubha”ntiādikameva. Pariggahitaṃ sāttakam, sappāyaṅca yena so **pariggahitasāttakasappāyo**, tassa, tena yathānupubbikaṃ sampajāññapariggahaṇaṃ dasseti. Vuccamānayogakammasa pavattiṭṭhānatāya bhāvanāya ārammaṇaṃ **kammaṭṭhānaṃ**, tadeva bhāvanāya visayabhāvato **gocaranti** āha “**kammaṭṭhānaṃ gocara**”nti. **Uggahetvāti** yathā uggahanimittaṃ uppajjati, evam uggahakosallassa sampādanavasena uggahaṇaṃ katvā. **Bhikkhācāragocareti** bhikkhācārasāṅkhāte gocarē, anena kammaṭṭhāne, bhikkhācāre ca gocarasaddoti dasseti.

Idhāti sāsane. **Haratīti** kammaṭṭhānaṃ pavattanavasena neti, yāva piṇḍapātaṭṭhikamā anuyuñjati attho. **Na paccāharatīti** āhārūpayogato yāva divāṭṭhānupasaṅkamanā kammaṭṭhānaṃ na paṭineti. **Tatthāti** tesu catūsu bhikkhūsu. **Āvaraṇiyehīti** nīvaraṇehi. **Pagevāti** pātoyeva. **Sarīraparikkamanti** mukhadhovanādisarīrapaṭijagganaṃ. **Dve tayo pallaṅketi** dve tayo nisajjāvāre. Ūrubaddhāsanañhettha pallaṅko. **Usumanti** dve tīṇi uñhāpanāni sandhāya vuttam. **Kammaṭṭhānaṃ anuyuñjitvāti** tadahe mūlabhūtaṃ kammaṭṭhānaṃ anuyuñjitvā. **Kammaṭṭhānasīenevāti** kammaṭṭhānamukheneva,

kammaṭṭhānamavijahanto evāti vuttam hoti, tena “patopi acetano”tiādinā (dī. ni. aṭṭha. 1.214; ma. ni. aṭṭha. 1.209; sam. ni. aṭṭha. 3.5.168; vibha. aṭṭha. 523) vakkhamānaṃ kammaṭṭhānaṃ, yathāparihariyamānaṃ vā avijahitvāti dasseti.

Gantvāti pāpuṇitvā. Buddhānussatikammaṭṭhānaṃ ce, tadeva nipaccakārasādhanam. Aññañce, anipaccakāraṇamiva hotīti dassetuṃ “**sace**”tiādi vuttam. Atabbisayena **taṃ ṭhapetvā**. “**Mahantaṃ cetiyaṃ ce**”tiādinā kammaṭṭhānikassa mūlakammaṭṭhānāmanasikāraṣṣa papañcābhāvadassanaṃ. Aññaena pana tathāpi aññathāpi vanditabbameva. **Tathevāti** tikkhattumeva. Paribhogacetiyo sārīkacetiyaṃ garutaranti katvā “**cetiyaṃ vanditvā**”ti pubbakālakiriyāvasena vuttam. Yathāha aṭṭhakathāyaṃ “cetiyaṃ bādhayamānā bodhisākhā haritabbā”ti, (ma. ni. aṭṭha. 4.128; a. ni. aṭṭha. 1.1.275; vibha. aṭṭha. 809) ayaṃ ācariyassa mati, “**bodhiyaṅgaṇaṃ pattenāpi**”ti pana vacanato yadi cetiyaṅgaṇato gate bhikkhācāramagge bodhiyaṅgaṇaṃ bhavēyya, sāpi vanditabbāti maggānukkameneva “cetiyaṃ vanditvā”ti pubbakālakiriyāvacaṇam, na tu garukāttabbatānukkamena. Evañhi sati bodhiyaṅgaṇaṃ paṭhamam pattenāpi bodhiṃ vanditvā cetiyaṃ vanditabbam, ekameva pattenāpi tadeva vanditabbam, tadubhayampi appattena na vanditabbanti ayamatto suviññāto hoti. Bhikkhācāragatamaggena hi pattaṭṭhāne kattabbaantarāvattadassanametam, na pana dhuvavattadassanaṃ. Pubbe hesa katavattoyeva. Tenāha “pageva cetiyaṅgaṇabodhiyaṅgaṇavattam katvā”tiādi. Buddhaguṇānussaraṇavaseneva bodhiādi paribhogacetiye pi nipaccakaraṇam upapannanti dasseti “**buddhassa bhagavato sammukhā viya nipaccakāraṃ dassetvā**”ti iminā. **Paṭisāmitaṭṭhānanti** sopānamūlabhāvasāmaññaena vuttam, buddhārammaṇapītivisaya bhūtacetiyaṅgaṇabodhiyaṅgaṇato bāhiraṭṭhānaṃ patvāti vuttam hoti.

Gāmasamīpeti gāmūpacāre. Tāva pañhaṃ vā pucchanti, dhammaṃ vā sotukāmā hontīti sambandho. **Janasaṅgahatthanti** “mayi akathente etesaṃ ko kathessatī”ti dhammānuggahena mahājanassa saṅgahaṇattham. Aṭṭhakathācariyānaṃ vacanaṃ samatthetuṃ “**dhammakathā hi kammaṭṭhānavinimuttā nāma natthi**”ti vuttam. **Tasmāti** yasmā “dhammakathā nāma kātabbāyevā”ti aṭṭhakathācariyā vadanti, yasmā vā dhammakathā kammaṭṭhānavinimuttā nāma natthi, tasmā dhammakatham kathetvāti sambandho. **Ācariyānandattherena** (vibha. mūlaṭī. 523) pana “tasmā”ti etassa “kathetabbāyevāti vadanti”ti etena sambandho vutto. **Kammaṭṭhānasīsenevāti** attanā parihariyamānaṃ kammaṭṭhānaṃ avijahanavasena, tadanugūṇaṃyeva dhammakatham kathetvāti attho, dutiyapade pi ese va nayo. **Anumodanaṃ katvāti** etthāpi “kammaṭṭhānasīsenevā”ti adhikāro. **Tatthāti** gāmato nikkhamaṇaṭṭhāneyeva.

“**Porāṇakabhikkhū**”tiādinā porāṇakāciṇṇadassanena yathāvuttamattham daḷham karoti. **Sampattaparicchedenevāti** “paricito aparicito”tiādivibhāgaṃ akatvā sampattakoṭiyā eva, samāgamamattenevāti attho. **Ānubhāvenāti** anuggahabaleṇa. **Bhayeti** paracakkādibhaye. **Chātaketī** dubbhikkhe.

“Pacchimayāme pi nisajjācaṅkamehi vītināmetvā”tiādinā **vuttappakāraṃ**. **Karontassāti** karamānasēva, anādare cetam sāmivacaṇam. **Kammajatejoti** gahaṇiṃ sandhāyāha. **Pajjalatīti** uṇhabhāvaṃ janeti. Tatoyeva upādinnakaṃ gaṇhāti, sedā muccanti. **Kammaṭṭhānaṃ vīthiṃ nārohati** khudāparissamena kilantakāyassa samādhānābhāvato. **Anupādinnaṃ** odanādivatthu. **Upādinnaṃ** udarapaṭalaṃ. Antokucchiyañhi odanādivatthusmiṃ asati kammajatejo uṭṭhahitvā udarapaṭalaṃ gaṇhāti, “chātosmi, āhāraṃ me dethā”ti vadāpeti, bhuttakāle udarapaṭalaṃ muñcitvā vatthuṃ gaṇhāti, aha satto ekaggo hoti, yato “chāyārakkhaso viya kammajatejo”ti aṭṭhakathāsu vutto. **So pagevāti** ettha “tasmā”ti seso. **Gorūpānanti** gunnaṃ, gosamūhānaṃ vā, vajato gocaratthāya nikkhamaṇavelāyamevāti attho. Vuttaviparītanayena **upādinnakaṃ muñcitvā anupādinnakaṃ gaṇhāti**. **Antarābhatteti** bhattassa antare, yāva bhattam na bhuñjati, tāvāti attho. Tenāha “**kammaṭṭhānasīsena āhāraṇca paribhuñjitvā**”ti. **Avasesaṭṭhāneti** yāguyā aggahitaṭṭhāne. **Tatoti** bhuñjanato. **Ponkhānuponkhanti** kammaṭṭhānānupaṭṭhānaṃ anavacchedadassanametam, uttaruttarinti attho, yathā ponkhānuponkhamaṃ pavattāya sarapaṭipāṭiyā anavacchedo, evametassāpi kammaṭṭhānupaṭṭhānassāti vuttam hoti. “**Edisā**

cā”tiadinā tathā kammaṭṭhānāmanasikārassāpi sātthakabhāvaṃ dasseti. **Āsananti** nisajjāsanam.

Nikkhattadhuroti bhāvanānuyoge anukkhittadhuro anāraddhavīriyo. Vattapaṭipattiyā aparipūraṇena sabbavattāni bhinditvā. **Pañcavidhacetokhīlavinibandhacittoti** pañcavidhena cetokhīlena, vinibandhena ca sampayuttacitto. Vuttañhi **majjhimāgame cetokhīlasutte** –

“Katamassa pañca cetokhīlā appahīnā honti? Idha bhikkhave bhikkhu satthari kaṅkhati, dhamme kaṅkhati, saṅghe kaṅkhati, sikkhāya kaṅkhati, sabrahmacārīsu kupito hotī”ti, (ma. ni. 1.185)

“Katamassa pañca cetaso vinibandhā asamucchinnā honti? Idha bhikkhave bhikkhu kāme avītarāgo hoti, kāye avītarāgo hoti, rūpe avītarāgo hoti, yāvadatthaṃ udarāvadehakaṃ bhuñjitvā seyyasukhaṃ passasukhaṃ middhasukhaṃ anuyutto viharati, aññataraṃ devanikāyaṃ paṇidhāya brahmacariyaṃ caratī”ti (ma. ni. 1.186). Ca –

Vitthāro. Ācariyena (dī. ni. 1.215) pana pañcavidhacetovinibandhacittabhāvoyeva padekadesamullingetvā dassito. Cittassa kacavarakhāṇukabhāvo hi cetokhīlo, cittaṃ bandhitvā muṭṭhiyaṃ viya katvā gaṇhanabhāvo cetaso vinibandho. Paṭhamo cettha vicikicchādosavasena, dutiyo lobhavasenāti ayametesam viseso. **Caritvāti** vicarivā. Kammaṭṭhānavirahavasena **tuccho**.

Bhāvanāsahitameva bhikkhāya gataṃ, paccāgatañca yassāti **gatapaccāgatikaṃ**, tadeva vattaṃ, tassa vasena. **Attakāmāti** attano hitasukhamicchantā, dhammacchandavantoti attho. Dhammo hi hitaṃ, sukhañca tannimittakanti. Atha vā viññūnaṃ attato nibbisesattā, attabhāvapariyāpannattā ca dhammo attā nāma, taṃ kāmenti icchantīti **attakāmā**. Adhunā pana **atthakāmāti** hitavācakena atthasaddena pāṭho dissati, dhammasaññuttaṃ hitamicchantā, hitabhūtaṃ vā dhammamicchantāti tassattho. **Iṇaṭṭāti** iṇena pīlitā. Tathā sesapadadvayepi. **Etthāti** sāsane.

Usabhaṃ nāma vīsati yaṭṭhiyo, **gāvutaṃ** nāma asīti usabhā. **Tāya saññāyāti** tādīsāya pāsānasaññāya, kammaṭṭhānāmanasikārena “ettakaṃ ṭhānamāgatā”ti jānantā gacchantīti adhippāyo. **Nanti** kilesaṃ. Kammaṭṭhānavippayuttacittena pādudhāraṇamakatthukāmato tiṭṭhati, pacchāgato pana ṭhitimanatikkamitukāmato. **Soti** uppannakilesa bhikkhu. **Ayanti** pacchāgato. **Etanti** parassa jānaṇaṃ. **Tatthevāti** patiṭṭhitatṭhāneyeva. **Soyeva nayoti** “ayaṃ bhikkhū”tiādikā yo patiṭṭhāne vutto, so eva nisajjāyapi nayo. Pacchato āgacchantānaṃ chinnabhattabhāvabhayenāpi yonisomanasikāraṃ paribrūhetīti idampi parassa jānaneneva saṅgahitanti daṭṭhabbaṃ. **Purimapādeyevāti** paṭhamaṃ kammaṭṭhānavippayuttacittena uddharitapādavaḷaṅṅeyeva. **Etīti** gacchati. “**Ālindakavāsī mahāphussadevatthero viyā**”tiadinā aṭṭhāneyevetaṃ kathitaṃ. “Kvāyaṃ evaṃ paṭipannapubbo”ti āsaṅkaṃ nivatteti.

Maddantāti dhaññakaraṇaṭṭhāne sālīsīsādīni maddantā. **Assāti** therassa, ubhayāpekkhavaacanametam. Assa arahattappattadvise caṅkamanakoṭiyanti ca. Adhigamappicchātāya vikkhepaṃ katvā, nibandhitvā ca paṭijānitvāyeva **ārocesi**.

Paṭhamaṃ tāvāti padasobhanatthaṃ pariyāyavacanaṃ. **Mahāpadhānanti** bhagavato dukkaracariyaṃ, amhākaṃ atthāya lokanāthena chabbassāni kataṃ dukkaracariyaṃ “evāhaṃ yathābalaṃ pūjessāmī”ti attho. Paṭipattipūjāyeva hi pasatthatarā satthupūjā, na tathā āmisapūjā. **Ṭhānacaṅkamamevāti** adhiṭṭhātābbairiyāpathavasena vuttaṃ, na bhojanakālādīsu avassaṃ kattabbanisajjāya paṭikkhepavasena. **Evasaddena** hi itarāya nisajjāya, sayanassa ca nivattanaṃ karoti. **Vippayuttena uddhaṭe paṭinivattentoti** sampayuttena uddharitapādeyeva puna ṭhapanam sandhāyāha. “**Gāmasamīpaṃ gantvā**”ti vatvā tadatthaṃ vivarati “**gāvī nū**”tiadinā. **Kacchakantaratoti** upakacchantarato, upakacche laggitakamaṅḍalutoti vuttaṃ hoti. **Udakagaṇḍūsanti** udakāvagaṇḍakāraṃ. Katinaṃ tithīnaṃ pūraṇī **katimī**, “pañcamī nu kho pakkhassa, aṭṭhamī”tiadinā

divasaṃ vā pucchitoti attho. Anārocanassa akattabbattā **āroceti**. Tathā hi vuttaṃ “anujānāmi bhikkhave sabbeheva pakkhagaṇaṃ uggaḥetu”ntiādi (mahāva. 156).

“Udakaṃ gilitvā āroceti”ti **vuttanayena. Tatthāti** gāmadvāre. **Niṭṭhubhananti** udakaniṭṭhubhanatṭhānaṃ. **Tesūti** manussesu. **Ñāṇacakkhusampannattā cakkhumā. Īdisoti** susammaṭṭhacetiyaṅgaṇādiko. **Visuddhipavāraṇanti** khīṇāsavabhāvena pavāraṇaṃ.

Vīthiṃ otarivā ito cito ca anoloketvā paṭhamameva vīthiyo sallakkhetabbāti āha “**vīthiyo sallakkhetvā**”ti. Yaṃ sandhāya vuttaṃ “pāsādikena abhikkantena paṭikkantenā”tiādi (pārā. 432). Taṃ gamanaṃ dassetuṃ “**tattha cā**”tiādimāha. “**Na hi javena piṇḍapāṭiyadhutaṅgaṃ nāma kiñci atthi**”ti iminā javena gamane loluppacāritā viya asāruppataṃ dasseti. **Udakasakaṭanti** udakasārasakaṭaṃ. Tañhi visamabhūmibhāgappattaṃ niccalameva kātuṃ vaṭṭati. **Tadanurūpanti** bhikkhādānānurūpaṃ. “**Āhāre paṭikūlasaṅṅaṃ upaṭṭhapetvā**”tiādīsu yaṃ vattabbaṃ, taṃ parato āgamissati. Rathassa akkhānaṃ telena abbhañjanaṃ, vaṇassa lepanaṃ, puttamaṃsassa khādanaṃca tidhā upamā yassa āharaṇassāti tathā. **Aṭṭhaṅgasamannāgatanti** “yāvadeva imassa kāyassa ṭhitiyā, yāpanāyā”tiādinā (ma. ni. 1.23; 2.24, 387; saṃ. ni. 4.120; a. ni. 6.58; 5.9; vibha. 518; mahāni. 206) vuttehi aṭṭhahi aṅgehi samannāgataṃ katvā. “**Neva davāyā**”tiādi pana paṭikkhepamattadassanaṃ. **Bhattakilamathanti** bhattavasena uppannakilamathaṃ. **Purebhattādi** divāvasena vuttaṃ. **Purimayāmādi** rattivasena.

Gatapaccāgatesu kammatṭhānassa haraṇaṃ vattanti atthaṃ dassento “**haraṇapaccāharaṇasaṅkhāta**”nti āha. “**Yadi upanissayasampanno hoti**”ti idaṃ “devaputto hutvā”tiādīsupi sabbattha sambajjhitaṃ. Tattha paccekabodhiyā upanissayasampadā kappānaṃ dve asaṅkhyeyyāni, satasahassaṅca tajjā puññañāṇasambhārasambharaṇaṃ, sāvakaḥ bodhiyā aggasāvakaṇaṃ ekamaṅkhyeyyaṃ, kappasatasahassaṅca, mahāsāvakaṇaṃ (theragā. aṭṭha. 2.vaṅḡisattheragāthavaṇṇanā vitthāro) kappasatasahassameva, itaresaṃ pana atītāsu jātīsu vivaṭṭupanissayasavasena kālaniyamamantarena nibbattitaṃ nibbedhabhāgiyakusalaṃ. “**Seyyathāpi**”tiādinā tasmim tasmim ṭhānantare etadaggaṭṭhapitānaṃ therānaṃ sakkhidassanaṃ. Tattha **thero bāhiyo dārucīriyoti** bāhiyavisaye sañjātasamvaḍḍhatāya bāhiyo, dārucīrapariharaṇato dārucīriyoti ca samaññito thero. So hāyasmā –

“Tasmā tiha te bāhiya evaṃ sikkhitabbaṃ ‘diṭṭhe diṭṭhamattaṃ bhavissati, sute, mute, viññāte viññātamattaṃ bhavissati’ti, evañhi te bāhiya sikkhitabbaṃ. Yato kho te bāhiya diṭṭhe diṭṭhamattaṃ bhavissati, sute, mute, viññāte viññātamattaṃ bhavissati, tato tvaṃ bāhiya na tena. Yato tvaṃ bāhiya na tena, tato bāhiya na tattha. Yato tvaṃ bāhiya na tattha, tato tvaṃ bāhiya nevidha na hurāṃ na ubhayamantarena, esevanto dukkhassā’ti” (udā. 10).

Ettakāya desanāya arahattaṃ sacchākāsi. Evaṃ sārīputtattherādīnampi mahāpaññatādīdīpanāni suttapadāni vitthārato vattabbāni. Visesato pana aṅguttarāgame etadaggasuttapadāni (a. ni. 1.188) **sikhāpattanti** koṭippattaṃ niṭṭhānappattaṃ sabbathā paripuṇṇato.

Tanti asammyhanaṃ. **Evanti** idāni vuccamānākārena veditabbaṃ. “Attā abhikkamati”ti iminā diṭṭhigāhavasena, “**ahaṃ abhikkamāmi**”ti iminā mānagāhavasena, tadubhayassa pana vinā taṇhāya appavattanato taṇhāgāhavasenāti tīhipi maññanāhi andhabālaputhujjanassa abhikkame sammuyhanaṃ dasseti. “**Tathā asammyuhanto**”ti vatvā tadeva asammyhanaṃ yena ghanavinibbhogena hoti, taṃ dassento “**abhikkamāmi**”tiādimāha. **Cittasamuṭṭhānavāyodhātūti** teneva abhikkamanacittena samuṭṭhānā, taṃcittasamuṭṭhānikā vā vāyodhātu. **Viññāntinti** kāyaviññāntiṃ. **Janayamānā uppajjati** tassā vikārabhāvato. **Itīti** tasmā uppajjanato. **Cittakiriyavāyodhātuvipphārasenāti** kiriyamayacittasamuṭṭhānavāyodhātuyā vicalanākārasaṅkhātākāyaviññāntivasena. **Tassāti** aṭṭhisāṅghāṭassa. **Abhikkamatoti** abhikkamantassa. **Omattāti** avamattā lāmakappamāṇā. **Vāyodhātutejodhātuvāsena itarā dve** dhātuyo.

Idaṃ vuttaṃ hoti – yasmā cettha vāyodhātuyā anugatā tejjodhātu uddharaṇassa paccayo. Uddharaṇagatikā hi tejjodhātu, tena tassā uddharaṇe vāyodhātuyā anugatabhāvo hoti, tasmā imāsaṃ dvinnamettha sāmattihiyato adhimattatā, tathā abhāvato pana itarāsaṃ omattatāti. Yasmā pana tejjodhātuyā anugatā vāyodhātu atiharaṇavītiaraṇaṇaṃ paccayo. Kiriyaṅatikāya hi vāyodhātuyā atiharaṇavītiaraṇeṣu sātisayo byāpāro, tena tassā tatha tejjodhātuyā anugatabhāvo hoti, tasmā imāsaṃ dvinnamettha sāmattihiyato adhimattatā, itarāsaṅca tadabhāvato omattatāti dasseti “**tathā atiharaṇavītiaraṇeṣū**”ti iminā. Satipi cettha anugamakānugantabbatāvisese tejjodhātuvāyodhātubhāvamattaṃ sandhāya tathāsaddaggahaṇaṃ kataṃ. Paṭhame hi naye tejjodhātuyā anugamakatā, vāyodhātuyā anugantabbatā, dutiye pana vāyodhātuyā anugamakatā, tejjodhātuyā anugantabbatāti. Tatha akkantaṭṭhānato pādassa ukkhipanaṃ **uddharaṇaṃ**, ṭhitaṭṭhānaṃ atikkamivā purato haraṇaṃ **atiharaṇaṃ**. Khāṇuādipariharaṇatthaṃ, patiṭṭhitapādaghaṭṭanāpariharaṇatthaṃ vā passena haraṇaṃ **vītiaraṇaṃ**, yāva patiṭṭhitapādo, tāva haraṇaṃ **atiharaṇaṃ**, tato paraṃ haraṇaṃ **vītiaraṇanti** vā ayametesam vireso.

Yasmā pathavīdhātuyā anugatā āpodhātu vossajjane paccayo. Garutarasabhāvā hi āpodhātu, tena tassā vossajjane pathavīdhātuyā anugatabhāvo hoti, tasmā tāsam dvinnamettha sāmattihiyato adhimattatā, itarāsaṅca tadabhāvato omattatāti dassento āha “**vossajjane...pe... balavatiyo**”ti. Yasmā pana āpodhātuyā anugatā pathavīdhātu sannikkhepanassa paccayo. Patiṭṭhābhāve viya patiṭṭhāpanepi tassā sātisayakiccattā āpodhātuyā tassā anugatabhāvo hoti, tathā ghaṭṭanakiriyāya pathavīdhātuyā vasena sannirujjhanassa sijjhanato tassā sannirujjhanepi āpodhātuyā anugatabhāvo hoti, tasmā vuttaṃ “**tathā sannikkhepanasannirujjhanesū**”ti.

Anugamakānugantabbatāvisesepi sati pathavīdhātuāpodhātubhāvamattaṃ sandhāya tathāsaddaggahaṇaṃ kataṃ. Paṭhame hi naye pathavīdhātuyā anugamakatā, āpodhātuyā anugantabbatā, dutiye pana āpodhātuyā anugamakatā, pathavīdhātuyā anugantabbatāti. **Vossajjana**ñcettha pādassa onāmanavasena vossaggo, tato paraṃ bhūmiādīsu patiṭṭhāpanaṃ **sannikkhepanaṃ**, patiṭṭhāpetvā nimmaddanavasena gamanassa sannirodho **sannirujjhanam**.

Tatthāti tasmim atikkamane, tesu vā yathāvuttesu uddharaṇātiharaṇavītiaraṇavossajjanasannikkhepanasannirujjhanasaṅkhātesu chasu koṭṭhāsesu. **Uddharaṇeti** uddharaṇakkhaṇe. **Rūpārūpadhammāti** uddharaṇākārena pavattā rūpadhammā, taṃsamuṭṭhāpakā ca arūpadhammā. **Atiharaṇaṃ na pāpuṇanti** khaṇamattāvaṭṭhānato. Sabbattha esa nayo. **Tatha tatthevāti** yattha yattha uddharaṇādike uppannā, tatha tattheva. Na hi dhammānaṃ desantarasāṅkamaṇaṃ atthi lahuparivattanato. **Pabbaṃ pabbanti** paricchedaṃ paricchedaṃ. **Sandhi sandhīti** gaṅṭhi gaṅṭhi. **Odhi odhīti** bhāgaṃ bhāgaṃ. Sabbañcetam uddharaṇādikoṭṭhāse sandhāya sabhāgasantativasena vuttanti veditabbaṃ. Itaro eva hi rūpadhammānampi pavattikkhaṇo gamanayogagamanassādānaṃ devaputtānaṃ heṭṭhupariyena paṭimukhaṃ dhāvantaṇaṃ sirasi, pāde ca bandhakhuradhārāsamāgamatopi sīghataro, yathā tilānaṃ bhijjayamānānaṃ paṭapaṭāyanena bhedo lakkhīyati, evaṃ saṅkhatadhammānaṃ uppādenāti dassanatthaṃ “**paṭapaṭāyantā**”ti vuttaṃ, uppādasena paṭapaṭa-saddaṃ akarontāpi karontā viyāti attho. Tilabhedalakkhaṇaṃ paṭapaṭāyanaṃ viya hi saṅkhatabhedalakkhaṇaṃ uppādo uppannānamekantato bhinnattā. **Tatthāti** abhikkamane. **Ko eko abhikkamati** nābhikkamatiyeva. **Kassa vā ekassa abhikkamaṇaṃ** siyā, na siyā eva. Kasmā? **Paramatthato hi...pe... dhātūnaṃ sayanaṃ**, tasmāti attho. Andhabālaputhujjanasammūlhasa attano abhikkamananivattanañhetam vacanaṃ. Atha vā “**ko eko...pe... abhikkamana**”nti codanāya “paramatthato hi”tiadinā sodhanā vuttā.

Tasmim tasmim koṭṭhāseti yathāvutte chabbidhepi koṭṭhāse gamanādikassa apaccāmaṭṭhattā. “Saddhim rūpena uppajjate, nirujjhati”ti ca silokapadena saha sambandho. Tatha paṭhamapadasambandhe **rūpenāti** yena kenaci sahuppajjanakena rūpena. Dutiyapadasambandhe pana “**rūpenā**”ti idaṃ yaṃ tato nirujjhamānacittato upari sattarasamacittassa uppādakkhaṇe uppannaṃ, tadeva tassa nirujjhamānacittassa nirodhena saddhim nirujjhanakaṃ sattarasacittakkhaṇāyukaṃ rūpaṃ

sandhāya vuttam, aññathā rūpārūpadhammā samānāyukā siyūṃ. Yadi ca siyūṃ, atha “rūpaṃ garupariṇāmaṃ dandhanirodha”ntiādi (vibha. aṭṭha. pakīṇṇakakathā) aṭṭhakathāvacanehi, “nāhaṃ bhikkhave aññaṃ ekadhammampi samanupassāmi, yaṃ evaṃ lahuparivattaṃ, yathayidaṃ citta”nti (a. ni. 1.38) evamādiṇāvacanehi ca virodho siyā. Cittacetāsikā hi sārammaṇasabhāvā yathābalaṃ attano ārammaṇapaccayabhūtamattaṃ vibhāvento eva uppajjanti, tasmā tesam taṃsabhāvanipphattianantaram nirodho, rūpadhammā pana anārammaṇā pakāsetabbā, evaṃ tesam pakāsetabbabhāvanipphatti soḷasahi cittehi hoti, tasmā ekacittakkhaṇātītena saha sattarasacittakkhaṇāyukatā rūpadhammānamicchitāti. Lahuparivattanaviññāṇavisesassa saṅgatiṃmattapaccayatāya tiṇṇaṃ khandhānaṃ, visayasāṅgatiṃmattatāya ca viññāṇassa lahuparivattitā, dandhamahābhūtapaccayatāya rūpassa garuparivattitā. Yathābhūtaṃ nānādhātuñānaṃ kho pana tathāgatasseva, tena ca purejātapaccayo rūpadhammova vutto, pacchājātapaccayo ca tathēvāti rūpārūpadhammānaṃ samānakkhaṇatā na yujjateva, tasmā vuttanayenevettha attho veditabboti **ācariyena** (dī. ni. 1.214) vuttam, tadetaṃ cittānuparivattiyā viññattiyā ekanirodhabhāvassa suviññeyyattā evaṃ vuttam. Tato saviññattikena puretaram sattarasamacittassa uppādakkhaṇe uppānena **rūpena** saddhiṃ **aññaṃ cittaṃ nirujjhatīti** attho veditabbo. Aññaṃ cittaṃ nirujjhati, aññaṃ uppajjate cittanti yojetabbaṃ. Añño hi saddakkamo, añño atthakkamoti. Yañhi purimuppannaṃ cittaṃ, taṃ nirujjhantaṃ aññaṃ pacchā uppajjamānassa anantarādiṇāvacayabhāveneva nirujjhati, tathā laddhapaccayameva aññaṃ uppajjate cittaṃ, avatthāvisesato cettha aññathā. Yadi evaṃ tesamubhinnaṃ antaro labbheyyāti codanaṃ “no”ti apānetumāha **“avīci manusambandho”**ti, yathā vīci antaro na labbhati, tadevedanti avisesaṃ vidū maññanti, evaṃ anu anu sambandho cittasāntāno, rūpasāntāno ca **nadisotova** nadiyaṃ udakappavāho viya **vattatīti** attho. **Avīcīti** hi niranaratāvasena bhāvanapūmsakavacanaṃ.

Abhimukhaṃ lokitaṃ **ālokitanti** āha **“puratopekkhana”**nti. Yaṃdisābhimukho gacchati, tiṭṭhati, nisīdati, sayati vā, tadabhimukhaṃ pekkhananti vuttaṃ hoti. Yasmā ca tādisamālokitaṃ nāma hoti, tasmā tadanugatadisālokanam vilokitanti āha **“anudisāpekkhana”**nti, abhimukhadisānurūpagatesu vāmadakkhiṇapassesu vividhā pekkhananti vuttaṃ hoti. Heṭṭhāuparipacchāpekkhanañhi **“olokitaulokitāpalokitāni”**ti gahitāni. **Sāruppavasena**ti samaṇapatirūpavasena, imināva asāruppavasena itaresamaggahaṇanti sijjhati. Sammajjanaparibhaṇḍādikaraṇe olokitaṃ, ullokaḥaraṇādīsū ullokitassa, pacchato āgacchantaparissayaparivajjanādīsū apalokitaṃ ca siyā sambhavoti āha **“iminā vā”**tiādi, etena upalakkhaṇamattañcetanti dasseti.

Kāyasakkhinti kāyena sacchikataṃ paccakkhākarinaṃ, sādhaṃkanti attho. So hi āyasmā vipassanākāle “yamevāhaṃ indriyesu aguttadvārataṃ nissāya sāsane anabhiratiādivippakāraṃ patto, tameva suṭṭhu niggahessāmi”ti ussāhajāto balavahirottappo, tattha ca katādhikāratā indriyasamvare ukkaṃsapāramippatto, teneva naṃ satthā “etadaggaṃ bhikkhave mama sāvakānaṃ bhikkhūnaṃ indriyesu guttadvārānaṃ, yadidaṃ nando”ti (a. ni. 1.230) etadagge ṭhapesi. **Nandassāti** kattutthe sāmivacanaṃ. **Itīti** iminā ālokanena.

Sātthakatā ca sappāyatā ca veditabbā ālokitavilokitassāti ajjhāharitvā sambandho. **Tasmāti** kammatṭhānāvijahanasseva ālokitavilokite. Gocarasampajaññabhāvato **etthāti** ālokitavilokite. **Attano kammaṭṭhānavasenevāti** khandhādikammaṭṭhānavaseneva ālokanavilokanaṃ kātabbaṃ, na añño upāyo gavesitabboti adhippāyo. **Kammaṭṭhānasisenevāti** vakkhamānakammaṭṭhānamukheneva. Yasmā pana ālokitādi nāma dhammamattasseva pavattiviseso, tasmā tassa yāthāvato jānanaṃ asammohasampajaññanti dassetuṃ **“abbhantare”**tiādi vuttaṃ. **Āloketāti** ālokeno. Tathā **viloketā**. **Viññattinti** kāyaviññattim. **Itīti** tasmā uppajjanato. **Cittakiriyavāyodhātuvipphāravasenevāti** kiriyamayacittasamuṭṭhānāya vāyodhātuyā vicalanākārasaṅkhātākāyaviññattivasena. **Akkhidanti** akkhipaṭalaṃ. **Adho sīdatīti** osīdantaṃ viya heṭṭhā gacchati. **Uddhaṃ laṅghetīti** laṅghentaṃ viya upari gacchati. **Yantakenāti** akkhidalesu yojitarajjuyo gahetvā paribbhamanakacakkena. **Tatoti** tathā akkhidālānaṃosīdanullaṅghanato. Manodvārikajavanassa mūlakāraṇaparijānanaṃ **mūlapariññā**. Āgantukassa abbhāgatassa, tāvakālikassa ca taṅkhaṇamattapavattakassa bhāvo **āgantukatāvakālikabhāvo**, tesam vasena.

Tatthāti tesu gāthāya dassitesu sattasu cittesu. **Aṅgakkiccam sādhamānanti** padhānabhūtaṅgakkiccam nipphādentam, sarīram hutvāti vuttam hoti. Bhavaṅgañhi paṭisandhisadisattā padhānamaṅgam, padhānañca “sarīra”nti vuccati, avicchedappavattihetubhāvena vā kāraṅgikkiccam sādhamānanti attho. **Tam āvaṭṭetvāti** bhavaṅgasāmaññavasena vuttam, pavattākāravisesavasena pana atītādīnā tibbidham, tattha ca bhavaṅgupacchedasseva āvaṭṭanam. **Tannirodhāti** tassa nirujjhanato, anantarapaccayavasena hetuvacanam. **“Paṭhamajavanepi...pe... sattamajavanepi”**ti idaṃ pañcadvārikavīthiyam “ayaṃ itthī, ayaṃ puriso”ti rajjanadussanamuyhanānamabhāvam sandhāya vuttam. Tattha hi āvajjanavoṭṭhabbanānam puretaram pavattāyonisomanasikāravasena ayoniso āvajjanavoṭṭhabbanākārena pavattanato iṭṭhe itthirūpādīmhi lobhasahagatamattam javanam uppajjati, aniṭṭhe ca dosasahagatamattam, na panekantarajjanadussanādi, manodvāre eva ekantarajjanadussanādi hoti, tassa pana manodvārikassa rajjanadussanādino pañcadvārikajavanam mūlam, yathāvuttam vā sabbampi bhavaṅgādi, evam manodvārikajavanassa mūlakāraṅgavasena mūlapariññā vuttā, āgantukatāvākālikatā pana pañcadvārika javanasseva apubbabhāvavasena, ittaratāvāsena ca. **Yuddhamaṇḍaleti** saṅgāmappadese. **Heṭṭhupariyavasena**ti heṭṭhā ca upari ca parivattamānavasena, aparāparam bhavaṅguppattivāsena attho. Tathā bhavaṅguppādavasena hi tesam bhijjivā patanam, iminā pana heṭṭhimassa, uparimassa ca bhavaṅgassa aparāparuppattivāsena pañcadvārikajavanato visadisassa manodvārikajavanassa uppādam dasseti tassa vaseneva rajjanādīpavattanato. Tenevāha **“rajjanādivasena ālokitavilokitam hoti”**ti.

Āpāthanti gocarabhāvam. **Sakakkiccanipphādanavasena**ti āvajjanādīkkanipphādanavasena. **Tanti** javanam. Cakkhudvāre rūpassa āpāthagamanena āvajjanādīnam pavattanato pavattikāraṅgavaseneva **“gehabhūte”**ti vuttam, na nissayavasena. **Āgantukapuriso viyāti** abbhāgatapuriso viya. Duvidhā hi āgantukā atithiabbhāgatavasena. Tattha kataparicayo **“atithi”**ti vuccati, akataparicayo **“abbhāgato”**ti, ayamevidhādhippeto. Tenāha **“yathā paragehe”**tiādi. **Tassāti** javanassa rajjanadussanamuyhanam ayuttanti sambandho. **Āsinesūti** nisinnesu. **Āṇākaraṅanti** attano vasakaraṅam.

Saddhim sampayuttadhammehi phassādīhi. **Tattha tattheva** sakakkiccanipphādanatṭhāne **bhijjanti**. **Itī** tasmā āvajjanādivoṭṭhabbanapariyosānānam bhijjanato. **Ittarānīti** aciraṭṭhitikāni. **Tatthāti** tasmim vacane ayaṃ upamāti attho. Udayabbayaparicchinno tāva tattako kālo etesanti **tāvākālikāni**, tassa bhāvo, tamvasena.

Etanti asammohasampajaññam. **Etthāti** etasmim yathāvuttadhammasamudāye. **Dassanam** cakkhuvīññānam, tassa vaseneva ālokanavilokanapaññāyanato āvajjanādīnamaggahaṅam.

Samavāyeti sāmaggiam. **Tatthāti** pañcakkhandhavasena ālokanavilokana paññāyamāne. Nimittatthe cetam bhummam, tabbinimuttako **ko eko āloketi** na tveva āloketi. **Ko** ca eko **viloketi** natveva viloketi attho.

“Tathā”tiādi āyatanavasena, dhātuvasena ca dassanam. Cakkhurūpāni yathāraham dassanassa nissayārammaṇapaccayo, tathā āvajjanā anantarādīpaccayo, āloko upanissayapaccayoti dassanassa suttantanayena pariyaṃyato paccayatā vuttā. **Sahajātapaccayopi** dassanasseva, nidassanamattañcetam aññamaññasampayuttaatthiavigatādīpaccayānampi labbhanato, “sahajātādīpaccayā”tipi adhunā pāṭho dissati. **“Eva”**ntiādi nigamanam.

Idāni yathāpāṭham samiñjanapasāraṅesu sampajānam vibhāvento **“samiñjite pasārite”**tiādimāha. Tattha **pabbānanti** pabbabhūtānam. Tamśamiñjanapasāraṅeneva hi sabbesam hatthapādānam samiñjanapasāraṅam hoti, pabbametesanti vā **pabbā** yathā “saddho”ti, pabbavantānanti attho. **Cittavasenevāti** cittaruciya eva, cittasāmatthiyā vā. Yam yam cittam uppajjati sātthepi anattthepi samiñjitum, pasāritum vā, tamtamcittānugateneva samiñjanapasāraṅamakativāti vuttam hoti. **Tatthāti** samiñjanapasāraṅesu atthānatthapariggaṅhanam veditabbanti sambandho. **Khaṇe khaṇeti** tathā

ṭhitakkhaṇassa byāpanicchāvacaṇaṃ. **Vedanā**ti santhambhanādīhi rujjanā. “**Vedanā uppajjati**”tiādīnā paramparapayojanaṃ dasseti. Tathā “**tā vedanā nuppajjanti**”tiādīnāpi. Purimaṃ purimañhi pacchimassa pacchimassa kāraṇavacaṇaṃ. **Kāleti** samīñjitum, pasāritum vā yuttakāle. **Phātinti** vuddhiṃ. Jhānādi pana **viseso**.

Tatrāyaṃ nayoti sappāyāsappāyaapariggaṇhane vatthusandassanaṃkhāto nayo. Tadapariggahaṇe ādīnavadassaneneva pariggahaṇepi ānisaṃso vibhāvitoti tesamidha udāharaṇaṃ veditaḅbaṃ. **Mahācetiyaṅgaṇeti** duṭṭhagāmaṇiraññā katassa hemamālīnāmakassa mahācetiyaṃsa aṅgaṇe. Vuttañhi –

“Dīpappasādako thero, rājino ayyakassa me;
Evaṃ kirāha nattā te, duṭṭhagāmaṇi bhūpati.

Mahāpuñño mahāthūpaṃ, soṇṇamāliṃ manoramam;
Vīsaṃ hatthasataṃ uccaṃ, kāressati anāgate”ti.

Bhūmippadeso cettha **aṅgaṇaṃ** “udaṅgaṇe tattha papaṃ avindu”ntiādisu (jā. 1.1.2) viya, tasmā upacārabhūte susaṅkhate bhūmippadeseti attho. **Teneva kāraṇena gihī jātoti** kāyasamaggasamāpajjanahetunā ukkaṇṭhito hutvā hīnāyāvatto. **Jhāyīti** jhāyanaṃ ḍayhanamāpajji. Mahācetiyaṅgaṇepi cīvarakuṭiṃ katvā tattha sajjhāyaṃ gaṇhantīti vuttaṃ “**cīvarakuṭidaṇḍake**”ti, cīvarakuṭiyā cīvarachadanatthāya katadaṇḍaketi attho. “**Maṇisappo** nāma sihaḷadīpe vijjamānā ekā sappajātīti vadantī”ti ācariyaṇandattherena, (vibha. mūlaṭī. 242) **ācariyadhammapālatterena** (dī. ni. ṭī. 1.214) ca vuttaṃ. “Keci, apare, aññe”ti vā avatvā “vadantī”ceva vacanañca sārato gahetabbatāvīññāpanatthaṃ aññathā gahetabbassa avacanato, tasmā na nīlasappādi idha “maṇisappo”ti veditaḅbo.

Mahātheravattunāti evaṃnāmakassa therassa vattunā. **Antevāsikehī**ti tattha nisīnesu bahūsu antevāsikesu ekena antevāsikena. Tenāha “**taṃ antevāsikā pucchisū**”ti. **Kammaṭṭhānanti** “abbhantare attā nāmā”tiādīnā (dī. ni. aṭṭha. 1.214) vakkhamānappakāraṃ dhātukammaṭṭhānaṃ. Pakaraṇatopi hi attho viññāyatīti. Tattha ṭhitānaṃ pucchantānaṃ saṅgahaṇavasena “tumhehī”ti puna puthuvacanakaraṇaṃ. Evaṃ rūpaṃ sabhāvo yassāti **evarūpo** niggahitalopavasena tena, kammaṭṭhānamanasikārasabhāvenāti attho. **Evaṃmetthāpīti api**-saddena heṭṭhā vuttaṃ ālokitavilokitapakkhamaḅekkhanaṃ karoti. Ayaṃ nayo upariḅi.

Suttākaḍḍhanavasenāti yante yojitasuttānaṃ āviñchanavasena. **Dāruyantassāti** dārunā katayantarūpassa. Taṃ taṃ kiriyam yāti pāpuṇāti, hatthapādādīhi vā taṃ taṃ ākāraṃ kurumānaṃ yāti gacchatīti **yantaṃ**, naṭakādīpañcālikārūpaṃ, dārunā kataṃ yantaṃ tathā, nidassanamattañcetam. Tathā hi naṃ potthena vatthena alaṅkariyattā **potthalikā**, pañca aṅgāni yassā sajjīvassevāti **pañcālikā**ti ca voharanti. **Hatthapādalaṅananti** hatthapādānaṃ kampanaṃ, hatthapādehi vā liḷākaraṇaṃ.

Saṅghāṭipattacīvaradhāraṇeti ettha saṅghāṭicīvarānaṃ samānadhāraṇatāya ekatodassanaṃ ganthagaruṭāpanayanatthaṃ, antaravāsakassa **nivāsanavasena**, sesānaṃ **pārūpanavasenā**ti yathārahamattho. **Tatthāti** saṅghāṭicīvaradhāraṇapattadhāraṇesu. **Vuttappakāro**ti paccavekkhaṇavidhinā sutte vuttappabhedo.

Uṇhapakatikassāti uṇhālukassa pariḷāhabahulakāyassa. **Sītālukassāti** sītābahulakāyassa. **Ghananti** appitaṃ. **Dupaṭṭanti** nidassanamattaṃ. “Utuddhaṭānaṃ dussānaṃ catugguṇaṃ saṅghāṭiṃ, diguṇaṃ uttarāsaṅgaṃ, diguṇaṃ antaravāsakaṃ, paṃsukūle yāvadattha”nti (mahāva. 348) hi vuttaṃ. **Viparīṭanti** tadubhayato viparīṭam, tesam tiṇṇampi **asappāyam**. Kasmāti āha “**aggaḷādīdānenā**”tiādi. Uddharitvā allīyāpanakhaṇḍam **aggaḷam**. **Ādisaddena** tunnakammādīni saṅgaṇhāti. **Tathā**-saddo anukaḍḍhanattho, asappāyamevāti. Paṭṭuṇṇadesa pāṇakehi saṅjātavatthaṃ **paṭṭuṇṇam**.

Vākavisesamayam setavaṇṇam **dukūlam**. Ādisaddena koseyyakambalādikaṃ sānulomam kappiyacīvaram saṅgaṇhāti. Kasmāti vuttam “**tādisaṅhi**”tiādi. **Araññe ekakassa nivāsantarāyakaranti** brahmacariyantarāyekadesamāha. Corādisādhāraṇato ca tathā vuttam. Nippariyāyena tam asappāyanti sambandho. Aneneva yathāvuttamasappāyam anekantam tathārūpapaccayena kassaci kadāci sappāyasambhavato. Idam pana dvayam ekantameva asappāyam kassaci kadācipi sappāyābhāvatoti dasseti. Micchā ajīvanti etenāti **micchājīvo**, anesanasena paccayapariyesanapayogo. Nimittakammādīhi pavatto micchājīvo tathā, etena ekavīsatividham anesanapayogamāha. Vuttañhi **suttanipātaṭṭhakathāyam khuddakapāṭṭhakathāyañca mettasuttavaṇṇanāyam** –

“Yo imasmim sāsane pabbajitvā attānam na sammā payojeti, khaṇḍasīlo hoti, ekavīsatividham anesanam nissāya jīvikam kappeti. Seyyathidaṃ? Veḷudānam, pattadānam, puppha, phala, dantakaṭṭha, mukhodaka, sināna, cuṇṇa, mattikādānam, cāṭukamyatam, muggasūpyatam, pāribhaṭṭam, jaṅghapesanikam, vejjakammaṃ, dūtakammaṃ, pahiṇagamanam, piṇḍapaṭipinḍam, dānānuppadānam, vatthuvijjam, nakkhattavijjam, āṅgavijja’nti.

Abhidhammaṭīkākārena pana **ācariyānandattherena** evaṃ vuttam –

“Ekavīsati anesanā nāma vejjakammaṃ karoti, dūtakammaṃ karoti, pahiṇakammaṃ karoti, gaṇḍam phāleti, arumakkhanam deti, uddhamvirecanam deti, adhovirecanam deti, natthutelaṃ pacati, vaṇatelaṃ pacati, veḷudānam deti, patta, puppha, phala, sināna, dantakaṭṭha, mukhodaka, cuṇṇa, mattikādānam deti, cāṭukammaṃ karoti, muggasūpiyam, pāribhaṭṭam, jaṅghapesanikam dvāvīsatividham dūtakammena sadisaṃ, tasmā ekavīsati’nti (dha. sa. mūlaṭī. 150-51).

Aṭṭhakathāvacanañcetta **brahmajālādisuttanta**na yena vuttam, ṭīkāvacanam pana **khuddakavatthuvibhaṅgā**diabhidhammanayena, ato cetta kesañci visamatāti vadanti, vīmaṃsitvā gahetabbam. Apica “**nimittakammādī**”ti iminā nimittobhāsaparikathāyo vuttā. “**Micchājīvo**”ti pana yathāvuttapayogo, tasmā nimittakammañca micchājīvo ca, tabbasena **uppannam asappāyam** sīlavināsanena anattāhāhattāti attho. Samāharadvandepi hi katthaci pulliṅgapayogo dissati yathā “cittuppādo”ti. Atiruciye rāgādayo, atiaruciye ca dosādayoti āha “**akusalā dhammā bhivaḍḍhanti**”ti. Tanti tadubhayaṃ. **Kammaṭṭhānāvijahanavasena**ti vakkhamānakammaṭṭhānassa avijahanavasena.

“**Abbhantare attā nāmā**”tiādinā saṅkhepato asammohasampajaññam dassetvā “**tattha cīvarampi acetana**”ntiādinā cīvarassa viya “**kāyopi acetano**”ti kāyassa attasuññatāvibhāvanena tamattham paridīpento “**tasmā neva sundaram cīvaram labhivā**”tiādinā vuttassa itarītarasantosassa kāraṇam vibhāvetīti daṭṭhabbam. Evañhi sambandho vattabbo – asammohasampajaññam dassento “**abbhantare**”tiādimāha. Attasuññatāvibhāvanena pana tadattham paridīpitum vuttam “**tattha cīvara**”ntiādi. Idāni attasuññatāvibhāvanassa payoṇabhūtam itarītarasantosasaṅkhātam laddhaguṇam pakāsento āha “**tasmā neva sundara**”ntiādīti.

Tattha **abbhantare**ti attano santāne. **Tatthā**ti tasmim cīvarapārūpane. Tesu vā pārūpakattapārūpitabbacīvaresu. **Kāyopi**ti attapaññattimatto kāyopi. “Tasmā”ti ajjhāharitabbam, acetanattāti attho. **Ahanti** kammabhūto kāyo. **Dhātuyoti** cīvarasaṅkhāto bāhirā dhātuyo. **Dhātusamūhanti** kāyasaṅkhātam ajjhattikam dhātusamūham. Potthakarūpaṭicchādane dhātuyo dhātusamūham paṭicchādenti viyāti sambandho. Pusanam snehasenanam, pūraṇam vā **pottham**, lepanakhananakiriyā, tena katanti **potthakam**, tameva rūpaṃ tathā, khananakammaṇibbattam dārumattikādirūpamidhāhippetam. **Tasmāti** acetanattā, attasuññabhāvato vā.

Nāgānam nivāso vammiko **nāgavammiko**. Cittikaraṇaṭṭhānabhūto rukkho **cetiya**rukkho. Kehici

sakkatassāpi kehici asakkatassa kāyassa upamānabhāvena yogyattā tesamidha kathanam. **Tehīti** mālāgandhagūthamuttādīhi. Attasuññatāya nāgavammikacetiyaṛukkhādīhi viya kāyasaṅkhātena attanā somanassaṃ vā domanassaṃ vā na kātabbanti vuttaṃ hoti.

“Labhissāmi vā, no vā”ti paccavekkhaṇapubbakena “labhissāmī”ti atthasampassaneneva gahetabbam. Evañhi sātthakasampajaññaṃ bhavatīti āha “**sahasāva aggahetvā**”tiādi.

Garupattoti atibhārabhūto patto. Cattāro vā pañca vā gaṇṭhikā **catupañcagaṇṭhikā** yathā “dvattipattā (pāci. 232), chappañcavācā”ti (pāci. 61) aññapadabhūtaṃ hi vā-saddasseva attho idha padhāno catugaṇṭhikāhato vā pañcagaṇṭhikāhato vā patto dubbisodhanīyoti vikappanavasena atthassa gayhamānattā. Āhatā catupañcagaṇṭhikā yassāti **catupañcagaṇṭhikāhato** yathā “agyāhito”ti, catupañcagaṇṭhikāhi vā āhato tathā, dubbisodhanīyabhāvassa hetugabbhavacanañcetam. Kāmañcaūnapañcabandhanasikkhāpade (pārā. 612) pañcagaṇṭhikāhatopi patto paribhuñjitabbabhāvena vutto, dubbisodhanīyatāmattena pana palibodhakaraṇato idha asappāyoti daṭṭhabbam. **Duddhotapattoti** agaṇṭhikāhatampi pakatiyāva dubbisodhanīyapattam sandhāyāha. “**Tam dhovantassevā**”tiādi tadubhayassāpi asappāyabhāve kāraṇam. “**Mañivaṇṇapatto pana lobhanīyo**”ti iminā kiñcāpi so vinayapariyāyena kappiyo, suttantapariyāyena pana antarāyakaraṇato asappāyoti dasseti. “Pattam bhamam āropetvā majjitvā pacanti ‘mañivaṇṇam karissāmā’ti, na vaṭṭati”ti (pārā. atṭha. 1.pālimuttakavinicchayo) hi **vinayaṭṭhakathāsu** pacanakiriyāmattameva paṭikkhittam. Tathā hi vadanti “mañivaṇṇam pana pattam aññena katam labhitvā paribhuñjituṃ vaṭṭati”ti (sārattha. tī. 2.85) “tādisañhi araññe ekakassa nivāsantarāyakara”ntiādinā cīvare vuttanayena “nimittakammādivasena laddho pana ekantaakappiyo sīlavināsanena anattāhāvahattā”tiādinā amhehi vuttanayopi yathārahaṃ netabbo. **Sevamānassāti** hetvanto gadhavacanam abhivaḍḍhanaparihāyanassa.

“**Abbhantare**”tiādi saṅkhepo. “**Tatthā**”tiādi attasuññatāvibhāvanena vitthāro. **Sañḍāsenāti** kammārānam ayogaṇavisesena. **Aggivaṇṇapattaggahaṇeti** agginā jhāpitattā aggivaṇṇabhūtapattassa gahaṇe. Rāgādipariḷāhajanakapattassa tīdisameva upamānam yuttanti evam vuttaṃ.

“**Apicā**”tiādinā saṅghāticīvarapattadhāraṇesu ekato asammohasampajaññaṃ dasseti. Chinnahatthapāde anāthamanusseti sambandho. **Nīlamakkhikā** nāma āsāṭhikakārikā. Gavādīnañhi vaṇesu nīlamakkhikāhi katā anayabyasanahetubhūtaṃ aṇḍakā **āsāṭhikā** nāma vuccati. **Anāthasālāyanti** anāthānam nivāsasālāyam. **Dayālukāti** karuṇābahulā. **Vaṇamattacoḷakānīti** vaṇappamāṇena paṭicchādanatthāya chinnacoḷakhaṇḍakāni. **Kesañcīti** bahūsu kesañci anāthamanussānam. **Thūlānīti** thaddhāni. **Tatthāti** tasmim paṇuṇe, bhāvalakkhaṇe, nimitte vā etaṃ bhummaṃ. Kasmāti vuttaṃ “**vaṇapaṭicchādanamattenevā**”tiādi. **Coḷakena, kapālenāti** ca atthayoge kammatthe tatiyā, karaṇatthe vā. Vaṇapaṭicchādanamatteneva bhesajjakaraṇamattenevāti pana visesanam, na pana maṇḍanānubhavanādippakārena atthoti. Saṅkhāradukkhatādīhi niccāturassa kāyassa paribhogabhūtanam pattacīvarānam edisameva upamānamupapannanti tathā vacanam daṭṭhabbam. Sukhumattasallakkhaṇena uttamassa sampajānassa karaṇasīlattā, purimehi ca sampajānakārīhi uttamattā **uttamasampajānakārī**.

Asanādikiriyaṃ kammavisesayogato asitādipadeheva kammavisesasahito kiriyāviseso viññāyatīti vuttaṃ “**asiteti piṇḍapātabhojane**”tiādi. **Aṭṭhavidhopi atthoti** aṭṭhappakāropi payojanaviseso.

Tattha piṇḍapātabhojanādīsu attho nāma iminā **mahāsivattheravā**davasena “imassa kāyassa ṭhitiyā”tiādinā (saṃ. ni. 4.120; a. ni. 6.58; 8.9; dha. sa. 1355; mahāni. 206) sutte vuttaṃ aṭṭhavidhampi payojanam dasseti. **Mahāsivatthero** (dha. sa. 1.1355) hi “hetṭhā cattāri aṅgāni paṭikkhepo nāma, upari pana aṭṭhaṅgāni payojanavasena samodhānetabbāni”ti vadati. Tattha “yāvadeva imassa kāyassa ṭhitiyā”ti ekamaṅgam, “yāpanāyā”ti ekam, “vihimsūparatiyā”ti ekam, “brahmacariyānuggahāyā”ti ekam, “iti purāṇaṅca vedanam paṭihaṅkhāmī”ti ekam, “navañca vedanam na uppādessāmī”ti ekam, “yātrā ca me bhavissatī”ti ekam, “anavajjatā cā”ti ekam, phāsuvihāro pana bhojanānisamsamattanti evam aṭṭha aṅgāni payojanavasena samodhānetabbāni. Aññathā pana “neva davāyā”ti ekamaṅgam, “na

madāyā”ti ekaṃ, “na maṇḍanāyā”ti ekaṃ, “na vibhūsanāyā”ti ekaṃ, “yāvadeva imassa kāyassa ṭhitiyā yāpanāyā”ti ekaṃ, “vihimsūparatiyā brahmacariyānuggahāyā”ti ekaṃ, “iti purāṇaṇca vedanaṃ paṭihaṅkhāmi, navaṇca vedanaṃ na uppādessāmi”ti ekaṃ, “yātrā ca me bhavissati”ti ekaṃ, “anavajjatā ca phāsuvihāro cā”ti pana bhojanānisamsamattanti vuttāni aṭṭhaṅgāni idhānadhīppetāni. Kasmāti ce? Payojanānameva abhāvato, tesameva ca idha atthasaddena vuttatā. Nanu ca “**nevadavāyātiadinā nayaena vutto**”ti mariyādavacanena dutiyanayasseva idhādhīppetabhāvo viññāyatīti? Na, “neva davāyā”tiadinā paṭikkhepaṅgadassanamukhena paccavekkhaṇapāḷiyā desitattā, yathādesitatantikkamasseva mariyādabhāvena dassanato. Pāṭhakkameneva hi “neva davāyātiadinā nayaenā”ti vuttaṃ, na atthakkamena, tena pana “imassa kāyassa ṭhitiyātiadinā nayaenā”ti vattabbanti.

Tidhā dente dvidhā gāhaṃ sandhāya “**paṭiggahaṇaṃ nāmā**”ti vuttaṃ, bhojanādīgahaṇatthāya hatthaotāraṇaṃ bhuñjanādiatthāya ālopakaraṇantiadinā anukkamena bhuñjanādipayogo vāyodhātuvaseveva vibhāvito. **Vāyodhātuvipphārenevāti** ettha **eva**-saddena nivattetabbam dasseti “**na koci**”tiadinā. **Kuñcika** nāma avāpuraṇaṃ, yaṃ “tālo”tipi vadanti. **Yantakenāti** cakkayantakena. Yatati ugghāṇanigghāṇanaukkhipanānikkhipanādīsu vāyamati etenāti hi **yantakaṃ**. Sañcuṇṇakaraṇaṃ **musalakkiccam**. Antokatvā patiṭṭhāpanaṃ **udukkhalakkiccam**. Āloṭitaviloṭitavasena parivattanaṃ **hatthakiccam**. **Itīti** evaṃ. **Tatthāti** hatthakiccasādhane, bhāvalakkaṇe, nimitte vā bhumbaṃ. **Tanukakheḷoti** pasannakheḷo. **Bahalakheḷoti** āvilakheḷo. Jivhāsāṅkhātena hatthena āloṭitaviloṭitavasena ito cito ca parivattakaṃ **jivhāhatthaparivattakaṃ**. **Kaṭacchu, dabbīti** katthaci pariyaavacanaṃ. “Pume kaṭacchu dabbithī”ti hi vuttaṃ. Idha pana yena bhojanādīni antokatvā gaṇhāti, so **kaṭacchu**, yāya pana tesamuddharaṇādīni karoti, sā **dabbīti** veditabbam. **Palālasanthāraṇti** patiṭṭhānabhūtaṃ palālādisanthāraṃ. Nidassanamattañhetam. **Dhārentoti** patiṭṭhānabhāvena sampaṭicchanto. Pathavīsandhāraḥakajalassa taṃsandhāraḥakavāyuna viya paribhuttāhārassa vāyodhātunāva āmāsaye avaṭṭhānanti dasseti “**vāyodhātuvaseveva tiṭṭhāti**”ti iminā. Tathā paribhuttañhi āhāraṃ vāyodhātu heṭṭhā ca tiriyaṇca ghaṇaṃ parivaṭṭumaṃ katvā yāva pakkā sannirujjhanavasena āmāsaye patiṭṭhitam karotīti. **Uddhanaṃ** nāma yattha ukkhaliyādīni patiṭṭhāpetvā pacanti, yā “cullī”tipi vuccati. Rassadaṇḍo **daṇḍako**. Patodo **yaṭṭhi**. **Itīti** vuttappakāramatidisati. Vuttappakārasseva hi dhātuvaseva vibhāvanā. Tattha **atiharatīti** yāva mukhā abhiharati. **Vītiharatīti** tato kucchiyam vimissaṃ karonto haratī”ti (dī. ni. ṭī. 1.214) **ācariyadhammapālatthero, ācariyanandatthero** pana “tato yāva kucchi, tāva haratī”ti (vibha. mūlaṭī. 523) āha. Tadubhayampi atthato ekameva ubhayatthāpi kucchisambandhamattaṃ haraṇasseva adhippetattā.

Apica **atiharatīti** mukhadvāraṃ atikkāmento harati. **Vītiharatīti** kucchigataṃ passato harati. **Dhāretīti** āmāsaye patiṭṭhitam karoti. **Parivattetīti** aparāparaṃ parivattanaṃ karoti. **Sañcuṇṇetīti** musalena viya sañcuṇṇanaṃ karoti. **Visosetīti** visosanaṃ nātisukkhaṃ karoti. **Nīharatīti** kucchito bahi niddhāretīti. Pathavīdhātukiccesupi yathāvuttotoyeva attho. Tāni pana āhārassa dhāraṇaparivattanasañcuṇṇanavisosanaṇi pathavīsahitā eva vāyodhātu kātuṃ sakkoti, na kevalā, tasmā tāni pathavīdhātuyāpi kiccabhāvena vuttāni. **Sinehetīti** temetīti. **Allattaṇca anupāletīti** yathā vāyodhātuādīhi ativiya sosanaṃ na hoti, tathā allabhāvaṇca nātiatākarāṇavasena anupāletīti. **Añjasoti** āhārassa pavisanaparivattanaṇikkhamaṇādīnaṃ maggo. **Viññāṇadhātūti** manoviññāṇadhātu pariyesanajjhoharaṇādīvijānaṇassa adhippetattā. **Tattha tatthāti** tasmim tasmim pariyesanajjhoharaṇādīkicce. Taṃtaṃvijānaṇassa paccayabhūto taṃnipphādakoyeva payogo **sammāpayogo** nāma. Yena hi payogena pariyesanādi nipphajjati. So tabbisayavijānaṇampi nipphādeti nāma tadavinābhāvato. **Tamanvāya** āgammāti attho. **Ābhujatīti** pariyesanavasena, ajjhāharaṇajjīṇṇajjīṇṇatādīpaṭisaṃvedanavasena ca tāni pariyesanajjhoharaṇajjīṇṇajjīṇṇatādīni āvajjeti vijānāti. Āvajjanapubbakattā vijānaṇassa vijānaṇampettha gahitanti veditabbam. Atha vā **sammāpayogo** nāma sammāpaṭipatti. **Tamanvāya** āgamma. “Abbhantare attā nāma koci bhuñjanako natthī”tiadinā **ābhujati** samannāharati, vijānātīti attho. Ābhogapubbako hi sabbo viññāṇabyāpāroti “ābhujati”ceva vuttaṃ.

Gamanatoti bhikkhācārasena gocaragāmaṃ uddissa gamanato. Paccāgamanampi

gamanasabhāvattā imināva saṅgahitaṃ. **Pariyesanatoti** gocaragāme bhikkhāya āhiṇḍanato. Pariyesanasabhāvattā imināva paṭikkamanasālādiupasankamanampi saṅgahitaṃ. **Paribhogatoti** dantamusalehi sañcuṇṇetvā jivhāya samparivattanakkhaṇeyeva antarahitavaṇṇagandhasaṅkhāravisesaṃ suvānadoṇiyaṃ suvānavamathu viya paramajegucchaṃ āhāraṃ paribhuñjanato. **Āsayatoti** evaṃ paribhuttassa āhārassa pittasemhapubbalohitāsayaabhāvūpagamanena paramajigucchanahetubhūtato āmāsayaṃ upari patiṭṭhānakapittādicatubbidhāsayaṃ. Āsayati ekajjhaṃ pavattamānopi kammabalavavattitho hutvā mariyādavasena aññamaññaṃ asaṅkarato tiṭṭhati pavattati etthāti hi **āsayo**, āmāsayaṃ upari patiṭṭhānako pittādi catubbidhāsayo. Mariyādattho hi ayamākāro. **Nidhānatoti** āmāsayaṃ. Nidheti yathābhutto āhāro nicito hutvā tiṭṭhati etthāti hi āmāsayo “**nidhāna**”nti vuccati. **Aparipakkatoti** bhuttāhāraparipācanena gahaṇīsāṅkhātena kammajatejasā aparipākato. **Paripakkatoti** yathāvuttakammajatejasāva paripākato. **Phalatoti** nipphattito, sammāparipaccamānassa, asammaparipaccamānassa ca bhuttāhārassa yathākkamaṃ kesādikuṇapadadduādirogābhinipphattisaṅkhātapayojanatoti vā attho. “Idamassa phala”nti hi vuttaṃ. **Nissandanatoti** akkhikaṇṇādīsu anekadvāresu ito cito ca vissandanato. Vuttañhi –

“Annaṃ pānaṃ khādanīyaṃ, bhojanañca mahārahaṃ;
Ekadvārena pavisitvā, navadvārehi sandatī”ti. (visuddhi. 1.303);

Sammakkhanatoti hatthaoṭṭhādianṅesu navasu dvāresu paribhogakāle, paribhuttakāle ca yathārahaṃ sabbaso makkhanato. Sabbattha āhāre paṭikkūlatā paccavekkhitabbāti saha pāṭhasesena yojanā. Taṃtaṃkiriyānipphattipaṭipātivaseṇa cāyaṃ “gamanato”tiādikā anupubbī ṭhapitā. Sammakkhanaṃ pana paribhogādīsu labbhamānampi nissandavasena visesato paṭikkūlanti sabbapacchā ṭhapitanti daṭṭhabbaṃ.

Pattakāleti yuttakāle, yathāvuttana vā tejena paripaccanato uccārapassāvabhāvaṃ pattakāle. Vegasandhāraṇena uppannapariḷhāttā **sakalasarīrato sedā muccanti**. Tatoyeva **akkhīni** paribbhamanti, **cittañca ekaggaṃ na hoti**. **Aññe ca** sūlabhagandarādayo **rogā uppajjanti**. **Sabbaṃ tanti** sedamuccanādikaṃ.

Aṭṭhāneti manussāmanussapariggahite khattadevāyatanādike ayuttaṭṭhāne. Tādise hi karontaṃ kuddhā manussā, amanussā vā jīvitakkhayaṃ pāpenti. **Āpattīti** pana bhikkhubhikkhunīnaṃ yathārahaṃ dukkaṭapācittiyā. **Patirūpe ṭhāneti** vuttaviparīte ṭhāne. **Sabbaṃ tanti** āpattiādikaṃ.

Nikkhamāpetā attā nāma atthi, tassa kāmāyā nikkhamananti bālamaññaṃ nivattetaṃ “**akāmāyā**”ti vuttaṃ, attano anicchāya apayogena vāyodhātuvipphāreṇeva nikkhamatīti vuttaṃ hoti. **Sannicitāti** samuccayena ṭhitā. **Vāyuvegasamuppīṭitāti** vāyodhātuyā vegena samantato avapīṭitā, nikkhamanassa cetaṃ hetuvacanaṃ. “**Sannicitā uccārapassāvā**”ti vatvā “**so panāyaṃ uccārapassāvo**”ti puna vacanaṃ samāhāradvandepi pulliṅgapayogassa sambhavatādassanattamaṃ. Ekattameva hi tassa niyatalakkhaṇanti. Attanā nirapekkhaṃ nissaṭṭhattā neva attano atthāya santakaṃ vā hoti, kassacipi dīyanavasena anissajjitattā, jigucchanīyattā ca na parassapīti attho. **Sarīranissandovāti** sarīrato vissandanameva nikkhamanattamaṃ. Sarīre sati so hoti, nāsati sarīrassa ānisaṃsamattantipi vadanti. Tadayuttameva nidassanena visamabhāvato. Tattha hi “**paṭijagganamattamevā**”ti vuttaṃ, paṭisodhanattamaṃ evāti cassa attho. Veḷunāḷiādiudakabhājanaṃ **udakatumbo**. **Tanti** chaḍḍitaudakaṃ.

“**Gateti gamane**”ti pubbe abhikkamapaṭikkamagahaṇena gamanepi purato, pacchato ca kāyassa atiharaṇaṃ vuttanti idha gamanameva gahita”nti (vibha. mūlaṭī. 525) **ācariyānandattherena** vuttaṃ, taṃ kecivādo nāma **ācariyadhamaṃpālatterena** kataṃ. Kasmāti ce? Gamane pavattassa purato, pacchato ca kāyātiharaṇassa tadavinābhāvato padavītiḥāranīyamīyāya gamanakiriyāya eva saṅgahitattā, vibhaṅgaṭṭhakathādīhi (abhi. aṭṭha. 2.523) ca virodhanato. Vuttañhi tattha gamanassa ubhayattha samavarodhattamaṃ, bhedattañca –

“Ettha ca eko iriyāpatho dvīsu ṭhānesu āgato. So heṭṭhā ‘abhikkante paṭikkante’ ti ettha bhikkhācāragāmaṃ gacchato ca āgacchato ca addhānagamanavasena kathito. ‘Gate ṭhite nisinne’ ti ettha vihāre cuṇṇikapāduddhāriyāpathavasena kathitoti vedītabbo” ti.

“Gate” tiādīsu avatthābhedenā kiriyābhedoyeva, na pana atthabhedoti dassetuṃ **“gacchanto vā”** tiādi vuttaṃ. Tenāha **“tasmā”** tiādi. Tattha **sutteti** dīghanikāye, majjhimanikāye ca saṅgīte satipaṭṭhānasutte (dī. ni. 2.372; ma. ni. 1.105) **addhānairiyāpathā**ti cirapavattakā dīghakālikā iriyāpathā addhānasaddassa cirakālavacanato “addhaniyaṃ assa ciratṭhitika” ntiādīsu (dī. ni. 2.184; 3.177; pārā. 21) viya, addhānagamanapavattakā vā dīghamaggikā iriyāpathā. Addhānasaddo hi dīghamaggapariyāyo “addhānagamanasamayo” tiādīsu (pāci. 213, 217) viya. **Majjhimā**ti bhikkhācārādivasena pavattā nāticirakālikā, nātidīghamaggikā vā iriyāpathā. **Cuṇṇiyairiyāpathā**ti vihāre, aññattha vā ito cito ca parivattanādivasena pavattā appamattakabhāvena cuṇṇavicuṇṇiyabhūtā iriyāpathā. Appamattakampi hi “cuṇṇavicuṇṇa” nti loke vadanti. **“Khuddakacuṇṇikairiyāpathā”**tipi pāṭho, khuddakā hutvā vuttanayena cuṇṇikā iriyāpathāti attho. **Tasmā**ti evaṃ avatthābhedenā iriyāpathabhedamattassa kathanato. **Tesupī**ti “gate ṭhite” tiādīsūpi. **Vuttanayenā**ti “abhikkante” tiādīsū vuttanayena.

Aparabhāgeti gamanairiyāpathato aparabhāge. **Ṭhitoti** ṭhitairiyāpathasampanno. **Etthevā**ti caṅkamaneyeva. Evaṃ sabbattha yathārahaṃ.

Gamaṇāṭhānanisajjānaṃ viya nisīdanasayanassa kamavacanamayuttaṃ yebhuyyena tathā kamābhāvatoti **“uṭṭhāya”** micceva vuttaṃ.

Jāgaritasaddasannidhānato cettha bhavaṅgotaraṇavasena niddokkamanameva sayanaṃ, na pana piṭṭhipasāraṇamattanti dasseti **“kiriyāmayapavattāna”** ntiādīnā. Divāseyyasikkhāpade (pārā. 77) viya piṭṭhipasāraṇassāpi sayanairiyāpathabhāvena ekalakkaṇattā etthāvarodhanaṃ daṭṭhabbaṃ. Karaṇaṃ **kiriyā**, kāyādikiccaṃ, taṃ nibbattenti **kiriyāmayāni** taddhitasaddānamanekatthavuttito. Atha vā āvajjanadvayakiccaṃ **kiriyā**, tāya pakatāni, nibbattāni vā **kiriyāmayāni**. Āvajjanavasena hi bhavaṅgupacchede sati vīthicittāni uppajjantīti. Aparāparuppattiyā nānappakārato vattanti parivattantīti **pavattāni**. Katthaci pana “cittāna” nti pāṭho, so abhidhammaṭṭhakathādīhi, (vibha. aṭṭha. 523) taṭṭikāhi ca viruddhattā na porāṇapāṭhoti vedītabbo. Kiriyāmayāni eva pavattāni tathā, javanaṃ, sabbampi vā chadvārikavīthicittaṃ. Tenāha **abhidhammaṭṭikāyaṃ** (vibha. mūlaṭī. 525) “kāyādikiriyāmayattā, āvajjanakiriyāsamuṭṭhitattā ca javanaṃ, sabbampi vā chadvārappavattaṃ kiriyāmayapavattaṃ nāmā” ti. **Appavattanti** niddokkamanakāle anuppajjanaṃ **suttaṃ nāmā**ti attho gahetabbo. Neyyatthavacanañhi idaṃ, itarathā chadvārikacittānaṃ purecarānucaravasena uppajjantānaṃ sabbesampi dvāravimuttacittānaṃ pavattaṃ suttaṃ nāma siyā, evañca katvā niddokkamanakālate aññasmiṃ kāle uppajjantānaṃ dvāravimuttacittānampi pavattaṃ jāgarite saṅgayhatīti vedītabbaṃ.

Cittassa payogakāraṇabhūte oṭṭhādike paṭicca yathāsakaṃ ṭhāne saddo jāyatīti āha **“oṭṭhe ca paṭiccā”** tiādi. Kiñcāpi saddo yathāṭhānaṃ jāyati, oṭṭhālanādīnā pana payogeneva jāyati, na vinā tena payogenāti adhippāyo. Keci pana vadanti “oṭṭhe cātiādi sadduppattiṭṭhānanidassana” nti, tadayuttameva tathā avacanato. Na hi “oṭṭhe ca paṭiccā” tiādīnā sasamuccayena kammavacanena ṭhānavacanāṃ sambhavatīti. **Tadanurūpanti** tassa saddassa anurūpaṃ. Bhāsanassa paṭisañcikkhanavirodhato tuṅhībhāvapakke “aparabhāge bhāsito iti paṭisañcikkhatī” ti na vuttaṃ, tena ca viññāyati “tuṅhībhūtova paṭisañcikkhatīti attho” ti.

Bhāsanatuṅhībhāvānaṃ sabhāvato bhede sati ayaṃ vibhāgo yutto siyā, nāsati anuyogenāha **“upādārūpapavattiyāñhi”** tiādi. Upādārūpassa saddāyatanassa pavatti tathā, saddāyatanassa pavattanaṃ bhāsanāṃ, appavattanaṃ tuṅhīti vuttaṃ hoti.

Yasmā pana mahāsivattheravāde anantare anantare iriyāpathe pavattarūpārūpadhammānaṃ tattha tattheva nirodhadassanavasena sampajānakāritā gahitā, tasmā taṃ mahāsatiipaṭṭhānasutte (dī. ni. 2.376;

ma. ni. 1.109) āgataasammohasampajaññavipassanāvāravasena veditabbaṃ, na catubbidhasampajaññavibhāgavasena, ato tattheva tamadhippettaṃ, na idhāti dassento “**tayida**”ntiādīmāha. Asammohasaṅkhāttaṃ dhuraṃ jeṭṭhakaṃ yassa vacanassāti **asammohadhuraṃ**, mahāsatipaññānasuttēva tassa vacanassa adhippetabhāvassa hetugabbhamaṃ vacanaṃ. Yasmā panettha sabbampi catubbidhaṃ sampajaññaṃ labbhati yāvadeva sāmāññaphalavisesadassanapadhānattā imissā desanāya, tasmā taṃ idha adhippetanti dassetuṃ “**imasmim panā**”tiādi vuttaṃ. **Vuttanayenevā**ti abhikkantādīsu vuttanayeneva. Nanu “satisampajaññaṃ samannāgato”ti etassa uddeśassāyaṃ niddeso, atha kasmā sampajaññavaseneva vitthāro katoti codanaṃ sodhento “**sampajānakārīti cā**”tiādīmāha, satisampayuttasseva sampajānassa vasena atthassa viditabbattā evaṃ vitthāro katoti vuttaṃ hoti. “**Satisampayuttassevā**”ti ca iminā yathā sampajaññaṃ kiccatō padhānatā gahitā, evaṃ satiyāpīti atthaṃ dasseti, na panetaṃ satiyā sampajaññaṃ saha bhāvamattadassanaṃ. Na hi kadāci satirahitā ñāṇapavatti atthīti.

Nanu ca sampajaññavasenevāyaṃ vitthāro, atha kasmā satisampayuttassa sampajaññaṃ vasena attho veditabboti codanampi sodheti “**satisampajaññaṃ samannāgatoti etassa hi padassa ayaṃ vitthāro**”ti iminā. Idaṃ vuttaṃ hoti – “satisampajaññaṃ samannāgato”ti evaṃ ekato uddiṭṭhassa atthassa vitthārattā uddeśe viya niddeseṇi tadubhayaṃ samadhurabhāveṇeva gahitanti. Imināpi hi satiyā sampajaññaṃ samadhurataṃyeva vibhāveti ekato uddiṭṭhassa atthassa vitthārabhāvadassanena tadatthassa siddhattā. Idāni **vibhaṅganayenā**pi tadatthaṃ samatthetuṃ “**vibhaṅgappakarāṇe panā**”tiādi vuttaṃ. Imināpi hi sampajaññaṃ viya satiyāpettha padhānataṃyeva vibhāveti. Tattha **etāni padānī**ti “abhikkante paṭikkante sampajānakārī hoti”tiādīni uddeśapadāni. **Vibhattānevā**ti satiyā sampajaññaṃ sampayogamakattvā sabbatṭhānesu viṣuṃ viṣuṃ vibhattāniyeva.

Majjhimabhāṇakā, pana ābhidhammikā (vibha. aṭṭha. 523) ca evaṃ vadanti – eko bhikkhu gacchanto aññaṃ cintento aññaṃ vitakkento gacchati, eko kammaṭṭhānaṃ avissajjētvāva gacchati. Tathā eko tiṭṭhanto aññaṃ cintento aññaṃ vitakkento tiṭṭhati, eko kammaṭṭhānaṃ avissajjētvāva tiṭṭhati. Eko nisīdanto aññaṃ cintento aññaṃ vitakkento nisīdati, eko kammaṭṭhānaṃ avissajjētvāva nisīdati. Eko sayanto aññaṃ cintento aññaṃ vitakkento sayati, eko kammaṭṭhānaṃ avissajjētvāva sayati. Ettakena pana gocarasampajaññaṃ na pākaṭṭhaṃ hotīti caṅkamanena dīpenti. Yo hi bhikkhu caṅkamaṃ otarivā caṅkamanakoṭiyaṃ ṭhito pariggaṇhāti “pācīnacaṅkamanakoṭiyaṃ pavattā rūpārūpadhammā pacchimacaṅkamanakoṭiṃ appatvā ettheva niruddhā, pacchimacaṅkamanakoṭiyaṃ pavattāpi pācīnacaṅkamanakoṭiṃ appatvā ettheva niruddhā, caṅkamanavemajjhe pavattā ubho koṭiyo appatvā ettheva niruddhā, caṅkamaṇe pavattā rūpārūpadhammā ṭhānaṃ appatvā ettheva niruddhā, ṭhāne pavattā nisajjaṃ, nisajjāya pavattā sayanaṃ appatvā ettheva niruddhā”ti evaṃ pariggaṇhanto pariggaṇhantoyeva bhavaṅgaṃ otāreti, uṭṭhahanto kammaṭṭhānaṃ gahētvāva uṭṭhahati. Ayaṃ bhikkhu **gatādīsu sampajānakārī** nāma hoti.

Evaṃ pana sutte kammaṭṭhānaṃ avibhūtaṃ hoti, kammaṭṭhānaṃ avibhūtaṃ na kātabbaṃ, tasmā yo bhikkhu yāva sakkoti, tāva caṅkamitvā ṭhatvā nisīditvā sayamāno evaṃ pariggahētvā sayati “kāyo acetano, mañco acetano, kāyo na jānāti ‘ahaṃ mañce sayito’ti, mañcopi na jānāti ‘mayi kāyo sayito’ti. Acetano kāyo acetane mañce sayito”ti. Evaṃ pariggaṇhanto pariggaṇhantoyeva cittaṃ bhavaṅgaṃ otāreti, pabujjhanto kammaṭṭhānaṃ gahētvāva pabujjhati, ayaṃ **sutte sampajānakārī** nāma hoti.

“Kāyādikiriyānipphattanena tammayattā, āvajjanakiriyāsamuṭṭhitattā ca javanaṃ, sabbampi vā chadvārapavattaṃ kiriyāmayapavattaṃ nāma, tasmim sati jāgaritaṃ nāma hoti”ti pariggaṇhanto bhikkhu **jāgarite sampajānakārī** nāma. Apica rattindivaṃ cha koṭṭhāse katvā pañca koṭṭhāse jaggantopi **jāgarite sampajānakārī** nāma hoti.

Vimuttāyatanaśīsenā dhammaṃ desentopi, bāttimsa tiracchānakathā pahāya dasakathāvattunissitaṃ sappāyakathaṃ kathentopi **bhāsīte sampajānakārī** nāma.

Atthatisāya ārammaṇesu cittaruciyaṃ manasikāraṃ pavattentopi dutiyajjhānaṃ samāpannopi **tuṅhībhave sampajānakārī** nāma. Dutiyāhi jhānaṃ vacīsankhāravirahato visesato tuṅhībhave nāmāti. Ayampi nayo purimanayato visesanayattā idhāpi āharitvā vattabbo. Tathā hesa abhidhammaṭṭhakathādisu (vibha. aṭṭha. 523) “ayaṃ panettha aparopi nayo”ti ārabhitvā yathāvuttanayo vibhāvitoti. “Evaṃ kho mahārājā”tiādi yathānididdiṭṭhassa atthassa nigamaṇaṃ, tasmā tattha niddesānurūpaṃ atthaṃ dassento “**eva**”ntiādimāha. **Satisampayuttassa sampajāññassāti** hi niddesānurūpaṃ atthavacanāṃ. Tattha vinicchayo vuttoyeva. **Evanti** iminā vuttappakārena abhikkantapaṭikkantādīsu sattuṃ ṭhānesu paccekaṃ catubbidhena pakārenāti attho.

Santosakathavaṇṇanā

215. Atthadassanena padassapi viññāyamānattā padamanapekkhitvā santosassa attani atthitāya bhikkhu santuṭṭhoti pavuccatīti atthamattaṃ dassetuṃ “**itarītarapaccayasantoseṇa samannāgato**”ti vuttaṃ. Santussati na luddho bhavatīti hi padanibbacaṇaṃ. Apica padanibbacaṇavasena atthe vutte yassa santosassa attani atthibhāvato santuṭṭho nāma, so apākaṭoti taṃ pākātakaraṇatthaṃ “**itarītarapaccayasantoseṇa samannāgato**”ti atthamattamāha, cīvarādike yattha katthaci kappiyapaccaye santoseṇa samaṅgībhūtoti attho. Itara-saddo hi aniyamavacano dvikkhattuṃ vuccamāno yaṃ kiñci-saddena samānattho hoti. Tena vuttaṃ “yattha katthaci kappiyapaccaye”ti. Atha vā itaraṃ vuccati hīnaṃ paṇītato aññattā, tathā paṇītampi hīnato aññattā. Aññamaññāpekkhāsiddhā hi itaratā, tasmā hīnena vā paṇītena vā cīvarādikappiyapaccayena santoseṇa samaṅgībhūtoti attho daṭṭhabbo. Santussati tena, santussanamattanti vā **santoso**, tathā pavatto alobho, alobhapadhānā vā cattāro khandhā. Labhanaṃ **lābho**, attano lābhassa anurūpaṃ santoso **yathālābhasantoso**. **Balanti** kāyabalaṃ, attano balassa anurūpaṃ santoso **yathābalasantoso**. **Sāruppanti** sappāyaṃ patirūpaṃ bhikkhuno anucchavikatā, attano sāruppassa anurūpaṃ santoso **yathāsāruppasantoso**.

Aparo nayo – labbhateti **lābho**, yo yo lābho **yathālābham**, itarītarapaccayo, yathālābhena santoso **yathālābhasantoso**. Balassa anurūpaṃ pavattatīti **yathābalaṃ**, attano balānucchavikapaccayo, yathā-saddo cettha sasādhanāṃ anurūpakiriyaṃ vadati, yathā taṃ “adhicitta”nti ettha adhi-saddo sasādhanāṃ adhikaraṇakiriyaṃ. Yathābalena santoso **yathābalasantoso**. Sāruppanti patirūpaṃ bhavati, sobhanaṃ vā āropetīti **sāruppaṃ**, yaṃ yaṃ sāruppaṃ **yathāsāruppaṃ**, bhikkhuno sappāyapaccayo, yathāsāruppena santoso **yathāsāruppasantoso**. Yathāvuttaṃ pabhedamanugatā vaṇṇanā **pabhedavaṇṇanā**.

Idhāti sāsane. **Aññaṃ na patthetīti** appattapatthanabhāvamāha, **labhantopi na gaṇhātīti** pattapatthanābhāvaṃ. Paṭhamena appattapatthanābhāveyeva vutte yathāladdhato aññassa apatthanā nāma appicchatāyapī siyā pavattiākāroti appicchatāpasaṅgabhāvato tatopi nivattameva santosassa sarūpaṃ dassetuṃ dutiyena pattapatthanābhāvo vuttoti daṭṭhabbaṃ. Evamuparipi. **Pakatidubbalo**ti ābādhādivirahepi sabhāvadubbalo. Samāno sīlādibhāgo yassāti **sabhāgo**, saha vā sīlādīhi guṇabhāgehi vattatīti **sabhāgo**, lajjīpesalo bhikkhu, tena. **Taṃ parivattetvāti** pakatidubbalādīnaṃ garucīvaraṃ na phāsubhāvāvahaṃ, sarīrakhedāvahaṇa hotīti payojanavasena parivattanaṃ vuttaṃ, na atricchatādivasena. Atricchatādippakārena hi parivattetvā lahukacīvaraparibhogo santosavirodhī hoti, tassa pana tadabhāvato yathāvuttappayojanavasena parivattetvā lahukacīvaraparibhogopi na santosavirodhīti āha “**lahukena yāpentopi santuṭṭhova hoti**”ti. Payojanavasena parivattetvā lahukacīvaraparibhogopi na tāva santosavirodhī, pageva tathā aparivattetvā paribhogeti sambhāvitassa atthassa dassanattañhettha api-saddaggaṇaṃ. Cīvaraniddesepe “**pattacīvarādīnaṃ aññatara**”nti vacanaṃ yathārutaṃ gahitāvasapaccayasantosassa cīvarasantose samavaroḍhitā dassanattaṃ. “Therako ayamāyasmā mallako”tiādisu theravohārassa paññattimattepi pavattito dasavassato pabhuti ciravassapabbajitesveva idha pavattiñāpanatthaṃ “**therānaṃ cirapabbajitāna**”nti vuttaṃ, **therānanti** vā saṅghattheraṃ vadati. **Cirapabbajitānanti** pana tadavasese vuḍḍhabhikkhū. **Saṅkarakūṭāditoti** kacavararāsiādito. **Anantakānīti** nantakāni pilotikāni. “A-kāro cettha nipātamatta”nti (vi. va. aṭṭha. 1165) **vimānaṭṭhakathāyaṃ** vuttaṃ. Tathā cāhu “nantakaṃ kappāto jīṇavasanaṃ tu paṭaccara”nti natthi dasāsaṅkhāto anto koṭi yesanti hi **nantakāni**, na-saddassa tu anādesa **anantakānīti**pi yujjati.

Saṅketakovidānaṃ pana ācariyānaṃ tathā avuttattā vīmaṃsitvā gahetabbaṃ. “**Sanantakānī**”tipi pāṭho, nantakena saha saṃsibbitāni paṃsukūlāni cīvarānīti attho. **Saṅghāṭī**nti tiṇṇaṃ cīvarānaṃ aññatarānaṃ cīvaraṃ. Tīṇipi hi cīvarāni saṅghaṭitattā “saṅghāṭī”ti vuccanti. Mahagghaṃ cīvaraṃ, bahūni vā cīvarāni labhitvā tāni vissajjetvā tadaññassa gahaṇampi mahicchatādinaye aṭṭhatvā yathāsāruppanaye eva ṭhitattā na santosavirodhīti āha “**tesaṃ...pe... dhārentopi santuṭṭhova hotī**”ti. Yathāsāruppanayena yathāladdhaṃ vissajjetvā tadaññagahaṇampi na tāva santosavirodhī, pageva anaññagahaṇena yathāladdhasseva yathāsāruppaṃ paribhogeti sambhāvitassa atthassa dassanattañhettha **api**-saddagahaṇaṃ, evaṃ sesapaccayesupi yathābalayathāsāruppaniddesesu api-saddagahaṇe adhippāyo veditabbo.

Pakativiruddhanti sabhāveneva asappāyaṃ. Samaṇadhammakaraṇasīsenā sappāyapaccayapariyesanaṃ, paribhuñjanañca visesato yuttataranti atthantaraṃ viññāpetuṃ “yāpentopi”ti avatvā “**samaṇadhammaṃ karontopi**”ti vuttaṃ. **Missakāhāranti** taṇḍulamuggādīhi nānāvīdhapubbaṇṇāparaṇṇehi missetvā kataṃ āhāraṃ.

Aññampi senāsane yathāsāruppasantosaṃ dassento āha “**yo hī**”tiādi. Paṭhame hi naye yathāladdhassa vissajjanena, dutiye pana yathāpattassa asampaṭicchanaena yathāsāruppasantoso vuttoti ayametesam viseso. **Hi**-saddo cettha pakkhantarajotako. **Majjhimāgamaṭṭhakathāyaṃ** pana pi-saddo dissati. “**Uttamasenāsanaṃ nāma pamādaṭṭhāna**”nti vatvā tabbhāvameva dassetuṃ “**tattha nisinnassā**”tiādi vuttaṃ. **Niddābhībhūtassāti** thinamiddokkamaṇena cittacetasi kagelaññabhāvato bhavaṅgasantatisaṅkhātāya niddāya abhibhūtassa, niddāyantassāti attho. **Paṭibujjhatoti** tathārūpena ārammaṇantarena paṭibujjantassa paṭibujjhanahetu kāmavitakkā pātubhavantīti vuttaṃ hoti. “**Paṭibujjhanato**”tipi hi katthaci pāṭho dissati. **Ayampīti** paṭhamanayaṃ upādāya vuttaṃ.

Tesaṃ ābhatenāti tehi therādīhi ābhatena, tesaṃ vā yena kenaci santakenāti ajjhāharitvā sambandho. **Muttaharītakanti** gomuttaparibhāvitam, pūtibhāvena vā mocitaṃ chaḍḍitaṃ harītakaṃ, idāni pana potthakesu “gomuttaharītaka”nti pāṭho, so na porāṇapāṭho tabbaṇṇāyā (dī. ni. tī. 1.215) viruddhattā. **Catumadhuranti majjhimāgamavare mahādharmasamādānasutte** (ma. ni. 1.484 ādayo) vuttaṃ dadhimadhusappiphāṇitasāṅkhātāṃ catumadhuraṃ, ekasmiñca bhājane catumadhuraṃ ṭhapetvā tesu yadicchasi, taṃ gaṇhāhi bhanteti attho. “**Sacassā**”tiādinā tadubhayassa rogavūpasamanabhāvaṃ dasseti. **Buddhādīhi vaṇṇitanti** “pūtimuttabhesajjaṃ nissāya pabbajjā”tiādinā (mahāva. 73, 128) sammāsambuddhādīhi pasatthaṃ. Appicchatāvisiṭṭhāya santuṭṭhiyā niyojanato paramena ukkaṃsagatena santosena santussatīti **paramasantuṭṭho**.

Kāmañca santosappabhedā yathāvuttatopi adhikatarā cīvare vīsati santosā, piṇḍapāte pannarasa, senāsane ca pannarasa, gilānapaccaye vīsati, idha pana saṅkhepena dvādasavidhoyeva santoso vutto. Tadadhikatarappabhedo pana caturaṅguttare **mahāriyavaṃsasuttaṭṭhakathāya** (a. ni. aṭṭha. 2.4.28) gahetabbo. Tenāha “**iminā panā**”tiādi. Evaṃ “idha mahārāja bhikkhu santuṭṭho hotī”ti ettha puggalādhiṭṭhānaniddiṭṭhena santuṭṭhapadeneva santosappabhedam dassetvā idāni “kāyaparihārikena cīvarena kucchiparihārikena piṇḍapātenā”tiādi desanānurūpaṃ tena santosena santuṭṭhassa anucchavikaṃ paccayappabhedam, tassa ca kāyakucchiparihāriyabhāvaṃ vibhāvento evamāhāti ayamettha sambandho. Kāmañcassa cīvarapiṇḍapāteheva yathākkamaṃ kāyakucchiparihāriyehi santuṭṭhatā pāliyaṃ vuttā, tathāpi sesaparikkhāracatukkena ca vinā vicaraṇamayuttaṃ, sabbattha ca kāyakucchiparihāriyatā laddhabbāti aṭṭhakathāyaṃ ayaṃ vinicchayo vuttoti daṭṭhabbaṃ. **Dantakaṭṭhacchedanavāsīti** lakkhaṇamattaṃ tadaññakiccassāpi tāya sādhetabbattā, tena vakkhati “mañcapīṭhānaṃ aṅgapādacīvarakuṭīdaṇḍakasajjanakāle cā”tiādi. Vuttampi cetam porāṇaṭṭhakathāsu “na hetam katthacipi pāliyamāgata”nti.

Bandhananti kāyabandhanaṃ. **Parissāvanena** parissāvanañca, tena sahāti vā attho. Yutto kammaṭṭhānabhāvanāsāṅkhāto yogo yassa, tasmim vā yogo yuttoti **yuttayogo**, tassa.

Kāyaṃ pariharanti posenti, kāyassa vā parihāro posanamattaṃ payoĵanameteḥīti **kāyaparihāriyā** ka-kārassa ya-kāraṃ katvā. Posanañcetta vaḍḍhanaṃ, bharaṇaṃ vā, tathā **kucchiparihāriyāpi** veditabbā. Bahiddhāva kāyassa upakārahābhāvena kāyaparihāriyatā, ajjhoharaṇavasena sarīraṭṭhitiyā upakārahābhāvena kucchiparihāriyatāti ayametesam viseso. Tenāha “**ticivaraṃ tāvā**”tiādi. “**Pariharati**”ti etassa **poseti**ti atthavacanaṃ. **Iti**ti nidassane nipāto, evaṃ vuttanayena kāyaparihāriyaṃ hotīti kāraṇajotane vā, tasmā posanato kāyaparihāriyaṃ hotīti. Evamupari. **Cīvarakaṇṇenāti** cīvarapariyantena.

Kuṭiparibhaṇḍakaraṇakāleti kuṭiyā samantato vilimpanena sammaṭṭhakaraṇakāle.

Āṅgaṃ nāma mañcapīṭhānaṃ pādūpari ṭhapito padhānasambhāraviseso. Yattha padarasañcinanapiṭṭhiapassayanādīni karonti, yo “**aṭanī**”tipi vuccati.

Madhuddumapupphaṃ **madhukaṃ** nāma, makkhikāmadhūhi katapūvaṃ vā. **Parikkhāramattā** parikkhārapamāṇaṃ. **Seyyaṃ pavisantassāti** paccattharaṇakuñcikaṇaṃ tādise kāle paribhuttabhāvaṃ sandhāya vuttaṃ. Tenāha “**tatraṭṭhakaṃ paccattharaṇa**”nti. Attano santakabhāvena paccattharaṇādhiṭṭhānena adhiṭṭhahitvā tattheva senāsane ṭiṭṭhanakañhi “**tatraṭṭhaka**”nti vuccati. Vikappanavacanato pana tesamaññatarassa navamatā, yathāvuttapaṭipāṭiyā cettha navamabhāvo, na tu tesam tathāpatiniyatabhāvena. Kasmāti ce? Tathāyeva tesamadhāraṇato. Esa nayo dasamādīsūpi. Telam paṭisāmetvā haritā veḷuṇāḷiādikā **telanāḷi**. Nanu santuṭṭhapuggaladassane santuṭṭhova aṭṭhaparikkhāriko dassetabboti anuyoge yathārahaṃ tesampi santuṭṭhabhāvaṃ dassento “**etesu cā**”tiādimāha. Mahanto parikkhārasaṅkhāto bhāro etesanti **mahābhārā**, ayaṃ adhunā pāṭho, **ācariyadhammapālattherena** pana “**mahāgajā**”ti pāṭhassa diṭṭhattā “**dupposabhāvena mahāgajā viyāti mahāgajā**”ti (dī. ni. ṭī. 1.215) vuttaṃ, na te ettakehi parikkhārehi “**mahicchā, asantuṭṭhā, dubbharā, bāhullavuttino**”ti ca vattabbāti adhippāyo. Yadi itarepi santuṭṭhā appicchatādisabhāvā, kimetesampi vasena ayaṃ desanā icchitāti codanaṃ sodhetuṃ “**bhagavā panā**”tiādi vuttaṃ. Aṭṭhaparikkhārikassa vasena imissā desanāya icchitabhāvo kathaṃ viññāyatīti anuyogampi apaneti “**so hī**”tiādinā, tasseva tathā pakkantabhāvena “**kāyaparihārikena cīvarenā**”tiādi pāḷiyā yogyato tassa vasena icchitabhāvo viññāyatīti vuttaṃ hoti. Vacanīyassa hetubhāvadassanena hi vācakassāpi hetubhāvo dassitoti. Evañca katvā “**iti imassā**”tiādi laddhaguṇavacanampi upapannaṃ hoti. Sallahukā vutti jīvika yassāti **sallahukavutti**, tassa bhāvo **sallahukavuttitā**, taṃ. **Kāyaparihāriyenāti** bhāvappadhānaniddeso, bhāvalopaniddeso vāti dasseti “**kāyaṃ pariharaṇamattakenā**”ti iminā, kāyaposanappamañenāti attho. Tathā **kucchiparihāriyenāti** etthāpi. Vuttanayena cettha dvidhā vacanatto, **ṭīkāyaṃ** (dī. ni. ṭī. 1.215) pana paṭhamassa vacanathassa heṭṭhā vuttattā dutiyova idha vuttoti daṭṭhabbaṃ. Mamāyanatanḥāya **āsaṅgo**. Pariggahatanḥāya **bandho**. **Jiyāmuttoti** dhanujiyāya mutto. **Yūthāti** hatthigaṇato. Tidhā pabhinnamado **madahatthī**. **Vanapabbhāranti** vane pabbhāraṃ.

Catūsu disāsu sukhavihāritāya sukhavihāraṭṭhānabhūtā, “**ekaṃ disaṃ pharivā**”tiādinā (dī. ni. 3.308; ma. ni. 1.77, 459, 509; 2.309) vā nayena brahmavihārabhāvanāpharaṇaṭṭhānabhūtā catasso disā etassāti **catuddiso**, so eva **cātuddiso**, catasso vā disā **catuddisaṃ**, vuttanayena tamassāti **cātuddiso** yathā “**saddho**”ti. Tāsveva disāsu katthacipi satte vā saṅkhāre vā bhayena na paṭihanati, sayam vā tehi na paṭihaññateti **appaṭigho**. **Santussamānoti** sakena, santena vā, samameva vā tussanako. **Itarītareṇāti** yena kenaci paccayena, uccāvacena vā. Paricca sayanti pavattanti kāyacittāni, tāni vā parisayanti abhibhavanti **parissayā**, sīhabyagghādayo bāhirā, kāmacchandādayo ca ajjhattikā kāyacittupaddavā, upayogatthe cetam sāmivacanaṃ. **Sahitāti** adhivāsanaḥantiyā, vīriyādidhammehi ca yathārahaṃ khantā, gahantā cāti attho. Thaddhabhāvakarabhāyābhāvena **achambhī**. **Eko caretī** asahāyo ekākī hutvā carituṃ viharituṃ sakkuṇeyya. Samatthane hi **eyya**-saddo yathā “**ko imaṃ vijaṭṭhaye jaṭṭa**”nti (saṃ. ni. 1.23) khaggavisāṇakappatāya ekavīhārīti dasseti “**khaggavisāṇakappo**”ti iminā. Saṅṭhānena khaggasadisam ekameva matthake uṭṭhitam visāṇam yassāti **khaggo**; khaggasaddena taṃsadisavisāṇassa gahitattā, mahimsappamāṇo migaviseso, yo loke “**palāsādo, gaṇṭhako**”ti ca vuccati, tassa visāṇena ekībhāvena sadisoti attho. Apica ekavīhārīyā khaggavisāṇakappoti dassetumpi evaṃ vuttaṃ. Vitthāro

panassā attho **khaggavisāṇasuttavaṇṇanāyaṃ**, (su. ni. aṭṭha. 1.42) **cūlaniddese** (cūlani. 128) ca vuttanayena veditabbo.

Evam vaṇṇitanti khaggavisāṇasutte bhagavatā tathā desanāya vivaritaṃ, thomitaṃ vā. Khaggassa nāma migassa visāṇena kappo sadiso tathā. Kappa-saddo hettha “satthukappena vata bho kira sāvakena saddhiṃ mantayamānā” tiādīsu (ma. ni. 1.260) viya paṭibhāge vattati, tassa bhāvo **khaggavisāṇakappatā**, taṃ so āpajjatīti sambandho.

Vātābhigātādīhi siyā sakuṇo chinnapakkho, asaṅjātapakkho vā, idha pana ḍetuṃ samattho sapakkhikova adhippetoti visesadassanattamaṃ pāliyaṃ “**pakkhī sakuṇo**” ti vuttaṃ, na tu “ākāse antalikkhe caṅkamaṭī” tiādīsu (paṭi. ma. 3.11) viya pariyāyamattadassanattanti āha “**pakkhayutto sakuṇo**” ti. **Uppatātīti** uddham patati gacchati, pakkhandatīti attho. **Vidhunantāti** vibhindantā, vicālentā vā. **Ajjatanāyāti** ajjabhāvattāya. Tathā **svātanāyāti** etthāpi. Attano pattaṃ eva bhāro yassāti **sapattabhāro**. Mamāyanatanābhābhāvena **nissaṅgo**. Pariggahatanābhābhāvena **nirapekkho**. **Yena kāmanti** yattha attano ruci, tattha. Bhāvanapūṃsakaṃ vā etaṃ. Yena yathā pavatto kāmoti hi **yenakāmo**, taṃ, yathākāmanti attho.

Nīvaraṇappahānakathāvaṇṇanā

216. Pubbe vuttasseva atthacatuḅkassa puna sampiṇḍetvā kathanāṃ kimatthanti adhippāyena anuyogaṃ uddharitvā sodheti “**so...pe... kiṃ dasseti**” tiādīnā. **Paccayasampattinti** sambhārapāripūriṃ. **Ime cattāro**ti sīlasaṃvaro indriyasamvaro sampajaññaṃ santosoti pubbe vuttā cattāro āraññikassa sambhārā. **Na ijjhatīti** na sampajjati na saphalo bhavati. Na kevalaṃ anijjhanamattaṃ, atha kho ayampi dosoti dasseti “**tiracchānagatehi vā**” tiādīnā. **Vattabbataṃ āpajjatīti** “asukassa bhikkhuno araññe tiracchānagatānaṃ viya, vanacarakānaṃ viya ca nivāsanamattameva, na pana araññavāsānucchavikā kāci sammāpaṭipatti atthī” ti apavādasena vacanīyabhāvamāpajjati, imassatthassa pana dassanena virujjhanato saddhiṃ-saddo na porāṇoti daṭṭhabbaṃ. Atha vā āraññakehi tiracchānagatehi, vanacaravisabhāgajanehi vā saddhiṃ vipaṭipattivasena vasanīyabhāvaṃ āpajjati. “Na bhikkhave paṇidhāya araññe vatthabbaṃ, yo vaseyya, āpatti dukkaṭassa” tiādīsu (pārā. 223) viya hi **vatthabba**-saddo vasitabbapariyāyo. Tathā hi **vibhaṅgaṭṭhakathāyampi** vuttaṃ “evarūpassa hi araññavāso kālamakkaṭaaccataracchadīpimigānaṃ aṭavivāsasadiṣo hotī” ti (vibha. aṭṭha. 526) **adhivatthāti** adhivasantā. Paṭhamaṃ **bheravasaddaṃ sāventi**. Tāvataṃ apalāyantassa **hatthehipi** sīsaṃ paharivā palāpanākāraṃ karontīti ācariyasāriputtattherena kathitaṃ. Evaṃ byatirekato paccayasampattiyā dassitabhāvaṃ pakāsetvā idāni anvayatopi pakāsetuṃ “**yassa panete**” tiādī vuttaṃ. Kathaṃ ijjhatīti āha “**so hī**” tiādī. **Kāḷako tilakoti** vaṇṇavikārapanarogavasena aññattha pariyāyavacanaṃ. Vuttañhi –

“Dunnāmakañca arisaṃ, chaddiko vamaṭhūrito;
Davathu paritāpotha, tilako tilakāḷako” ti.

Tilasaṅghānaṃ viya jāyatīti hi **tilako**, kāḷo hutvā jāyatīti **kāḷako**. Idha pana paṇṇattivītikamasāṅkhātāṃ thullavajjaṃ kāḷakasadiṣattā **kāḷakaṃ**, micchāvītikamasāṅkhātāṃ aṇumattavajjaṃ tilakasadiṣattā **tilakanti** ayaṃ viseso. **Tanti** tathā uppāditaṃ pītiṃ. Vigatabhāvena upaṭṭhānato khayavayavasena sammāsaṇaṃ. Khīyanatṭhena hi **khayova** vigato, viparīto vā hutvā ayanatṭhena **vayotipi** vuccati. **Ariyabhūmi** nāma lokuttarabhūmi. **Itīti** ariyabhūmiokkamanato, devatānaṃ vaṇṇabhaṇanato vā, tattha tattha devatānaṃ vacanaṃ sutvā tassa yaso patthaṭoti vuttaṃ hoti, evaṅca katvā heṭṭhā vuttaṃ ayasapattaraṇampi devatānaṃārocanavasenaṅti gahetabbaṃ.

Vivitta-saddo janaviveketi āha “**suñña**” nti. Taṃ pana janasaddanigghosābhāvena veditabbaṃ saddakaṇṭakattā jhānassāti dassetuṃ “**appasaddaṃ appanigghosanti attho**” ti vuttaṃ. Janakaggahaṇeneva hi idha jaññaṃ gahitaṃ. Tathā hi vuttaṃ **vibhaṅge** “yadeva taṃ appanigghosaṃ,

tadeva taṃ vijanavāta”nti (vibha. 533). **Appasaddanti** ca pakatisaddābhāvamāha. **Appanigghosanti** nagaranigghosādisaddābhāvam. Idisesu hi byañjanaṃ sāvasesaṃ viya, attho pana niravasesoti aṭṭhakathāsu vuttaṃ. **Majjhimāgamaṭṭhakathāvaṇṇanāyaṃ** (ma. ni. aṭṭha. 3.364) pana **ācariyadhammapālathero** evamāha “appasaddassa parittapariyāyaṃ manasi katvā vuttaṃ ‘byañjanaṃ sāvasesaṃ siyā’ti. Tenāha ‘na hi tassā’tiādi. **Appasaddo** panettha abhāvatthotipi sakkā viññātum ‘appābādhatāñca sañjānāmī’tiādīsu (ma. ni. 1.225) viyā’ti. Tamatthaṃ **vibhaṅgapāḷiyā** (vibha. 528) saṃsandanto “**etadevā**”tiādimāha. **Etadevāti** ca mayā saṃvaṇṇiyamānaṃ nissaddataṃ evāti attho. **Santikepīti** gāmādīnaṃ samīpepi edisaṃ vivittaṃ nāma, pageva dūreti attho. **Anākiṇṇanti** asaṅkiṇṇaṃ asambādhaṃ. Yassa senāsanassa samantā gāvutampi aḍḍhayojanampi pabbatagahaṇaṃ vanagahaṇaṃ nadīgahaṇaṃ hoti, na koci avelāya upasaṅkamitum sakkoti, idaṃ santikepi anākiṇṇaṃ nāma. **Setīti** sayati. **Āsatīti** nisīdati. “**Etthā**”ti iminā **senā**-saddassa, **āsana**-saddassa ca adhikaraṇatthabhāvaṃ dasseti, **ca**-saddena ca tadubhayapadassa catthasamāsabhāvaṃ. “**Tenāhā**”tiādinā **vibhaṅgapāḷimeva** āharati.

Idāni tassāyevatthaṃ senāsanappabhedadassanavasena vibhāvetum “**apicā**”tiādi vuttaṃ. Vibhaṅgapāḷiyaṃ nidassananayena sarūpato dassitasenāsanasseva hi ayaṃ vibhāgo. Tattha **vihāro** pākāraparicchinnō sakalo āvāso. **Aḍḍhayogo** dīghapāsādo, “garuḷasaṅghānapāsādo”tipi vadanti. **Pāsādo** caturassapāsādo. **Hammiyaṃ** muṇḍacchadanapāsādo. **Aṭṭo** paṭirājūnaṃ paṭibāhanayoggo catupañcabhūmako patissayaviseso. **Māḷo** ekakūṭasaṅgahito anekakoṇavanto patissayaviseso. Aparō nayo – **vihāro** dīghamukhapāsādo. **Aḍḍhayogo** ekapassachadanakagehaṃ. Tassa kira ekapasse bhitti uccatārā hoti, itarapasse nīcā, tena taṃ ekachadanakaṃ hoti. **Pāsādo** āyatacaturassapāsādo. **Hammiyaṃ** muṇḍacchadanakaṃ candikaṅgaṇayuttaṃ. **Guhā** kevalā pabbataguhā. **Leṇaṃ** dvārabandhaṃ pabbhāraṃ. Sesāṃ vuttanayameva. “Maṇḍapoti sākhamāṇḍapo”ti (dī. ni. ṭī. 1.216) evaṃ **ācariyadhammapālatharena**, aṅguttaraṭṭikākārena ca **ācariyasāriputtattherena** vuttaṃ.

Vibhaṅgaṭṭhakathāyaṃ (vibha. aṭṭha. 527) pana **vihāroti** samantā parihārapathaṃ, antoyeva ca rattitṭhānadivāṭṭhānāni dassetvā katasenāsaṇaṃ. **Aḍḍhayogoti** supaṇṇavaṅkagehaṃ. **Pāsādoti** dve kaṇṇikāni gahetvā kato dīghapāsādo. **Aṭṭoti** paṭirājādipaṭibāhanatthaṃ itṭhakāhi kato bahalabhittiko catupañcabhūmako patissayaviseso. **Māloti** bhojanasālāsadiso maṇḍalamāḷo. **Vinayaṭṭhakathāyaṃ** pana “ekakūṭasaṅgahito caturassapāsādo”ti (pārā. aṭṭha. 2.482-487) vuttaṃ. **Leṇanti** pabbataṃ khaṇitvā vā pabbhārassa appahonakaṭṭhāne kuṭṭhaṃ utṭhāpetvā vā katasenāsaṇaṃ. **Guhāti** bhūmidari vā yattha rattindivaṃ dīpaṃ laddhum vaṭṭati, pabbataguhā vā bhūmiguhā vāti vuttaṃ.

Taṃ āvasathabhūtaṃ patissayasenāsaṇaṃ viharitabbaṭṭhena, vihāraṭṭhānaṭṭhena ca **vihārasenāsaṇaṃ nāma**. Masārakādicatubbidho **mañco**. Tathā **pīṭhaṃ**. Uṇṇabhisiādipañcavidhā **bhisi**. Sīsappamāṇaṃ **bimbohanaṃ**. Vitthārato vidatthicituraṅgulatā, dīghato mañcavitthārappamāṇatā cetha sīsappamāṇaṃ. Masārakādīni mañcapīṭhabhāvato, bhisiupadhānañca mañcapīṭhasambandhato **mañcapīṭhasenāsaṇaṃ**. Mañcapīṭhabhūtañhi senāsaṇaṃ, mañcapīṭhasambandhañca sāmāññaniddesena, ekasesena vā “mañcapīṭhasenāsaṇa”nti vuccati. **Ācariyasāriputtattheropi** evameva vadati. **Ācariyadhammapālatharena** pana “**mañcapīṭhasenāsaṇanti** mañcapīṭhañceva mañcapīṭhasambandhasenāsaṇaṇcā”ti (dī. ni. ṭī. 1.216) vuttaṃ. **Cimilikā** nāma sudhāparikkammakatāya bhūmiyā vaṇṇānurakkhaṇatthaṃ paṭakhaṇḍādīhi sibbetvā katā. **Cammakhaṇḍo** nāma sīhabyagghadīpitaracchacammādīsipi yaṃ kiñci cammaṃ. **Aṭṭhakathāsu** (pāci. aṭṭha. 112; vi. saṅga. aṭṭha. 82) hi senāsanaparibhoge paṭikkhattacammaṃ na dissati. **Tiṇasanthāroti** yesaṃ kesañci tiṇānaṃ santhāro. Eseva nayo **paṇṇasanthārepi**. Cimilikādi bhūmiyaṃ santharitatāya **santhasenaṇaṃ**. **Yattha vā pana bhikkhū paṭikkamantīti** ṭhapetvā vā etāni mañcādīni yattha bhikkhū sannipatanti, **sabbametaṃ senāsaṇaṃ** nāmāti evaṃ vuttaṃ avasesaṃ rukkhamūlādipaṭikkamitabbaṭṭhānaṃ abhisāṅkharāṇabhāvato kevalaṃ sayanassa, nissajjāya ca okāsabhūtattā **okāsenaṇaṃ**. **Senāsanaggahaṇenāti** “vivittaṃ senāsaṇa”nti iminā senāsanāsaddena vivittasenāsaṇassa vā ādānena, vacanena vā gahitameva sāmāññajotanāya visese avatṭhānato, visesatthinā ca visesassa payujjitabbato.

Yadevaṃ kasmā “arañña”ntiādi puna vuttanti anuyogena “**idha panassā**”tiādimāha. Evaṃ gahitesupi senāsanesu yathāvuttassa bhikkhuno anucchavikameva senāsanam dassetukāmettā puna evaṃ vuttanti adhippāyo. “**Bhikkhunīnam vasena āgata**”nti idaṃ vinaye āgatameva sandhāya vuttaṃ, na abhidhamme. Vinaye hi **gaṇamhāohīyanasikkhāpade** (pāci. 691) bhikkhunīnam āraññakadhutaṅgassa paṭikkhittattā idampi ca tāsam araññaṃ nāma, na pana pañcadhanusatikaṃ pacchimaṃ araññaṃveva senāsanam, idampi ca tāsam gaṇamhāohīyanāpattikaram, na tu pañcadhanusatikādimeva araññaṃ. Vuttañhi tattha –

“Ekā vā gaṇamhā ohīyeyyāti agāmake araññe dutiyikāya bhikkhuniyā dassanūpacāram vā savanūpacāram vā vijahantiyā āpatti thullaccayassa, vijahite āpatti saṅghādisesassā”ti.

Vinayaṭṭhakathāsūpi (pāci. aṭṭha. 692) hi tathāva attho vuttoti. Abhidhamme pana “araññanti nikkhamitvā bahi indakhilā sabbametaṃ arañña”nti (vibha. 529) āgataṃ. Vinayasuttantā hi ubhopi pariyāyadesanā nāma, abhidhammo pana nipariyāyadesanā, tasmā yaṃ na gāmapadesantogadham, taṃ araññanti nipariyāyena dassetuṃ tathā vuttaṃ. Indakhilā bahi nikkhamitvā yaṃ ṭhānaṃ pavattaṃ, sabbametaṃ araññaṃ nāmāti cettha attho. **Āraññakaṃ nāma...pe... pacchimanti idaṃ pana** suttantanayena **āraññakasikkhāpade** (pārā. 652) āraññikaṃ bhikkhuṃ sandhāya vuttaṃ **imassa bhikkhuno anurūpaṃ**, tasmā **visuddhimagge dhutaṅganiddese** (visuddhi. 1.19) yaṃ **tassa lakkhaṇaṃ vuttaṃ**, taṃ yuttameva, ato tattha vuttanayena gahetabbanti adhippāyo.

Sandacchāyanti sītacchāyaṃ. Tenāha “**tattha hī**”tiādi. **Rukkhamūlanti** rukkhasamīpaṃ. Vuttañhetam “yāvataṃ majjhanhike kāle samantā chāyā pharati, nivāte paṇṇāni nipatanti, ettāvataṃ rukkhamūla”nti. **Pabbatanti** suddhapāsānasuddhapamsuubhayamissakavasena tividhopi pabbato adhippeto, na silāmayo eva. **Sela-saddo** pana avisesato pabbatapariyāyoti katvā evaṃ vuttaṃ. “**Tattha hī**”tiādinā tadubhayassa anurūpaṃ dasseti. **Disāsu khāyamānāsūti** dasasu disāsu abhimukhībhāvena dissamānāsu. Tathārūpenapi kāraṇena siyā cittassa ekaggaṭṭāti etaṃ vuttaṃ, sabbadisāhi āgatena vātena bījyamānabhāva hetudassanattanti kecī. **Kaṃ vuccati udakaṃ** pipāsavinodanassa kārakattā. “**Yaṃ nadītumbantipi nadīkuñjantipi vadanti**, taṃ kandaranti apabbatapadesepi vidugganadīnivattanapadesaṃ kandaranti dasseti”ti (vibha. mūlaṭṭi. 530) **ācariyānandatthero**, teneva viññāyati “nadītumbanadīkuñjasaddā nadīnivattanapadesavācaka”ti. Nadīnivattanapadeso ca nāma nadiyā nikkhamanaudakena puna nivattitvā gato viduggapadeso. “Apabbatapadesepi”ti vadanto pana aṭṭhakathāyaṃ nidassanamattena paṭhamam pabbatapadesanti vuttaṃ, yathāvutto pana nadīpadesopi kandaro evāti dasseti.

“**Tattha hī**”tiādināpi nidassanamatteneva tassānurūpabhāvamāha. **Ussāpetvāti** puñjaṃ katvā. “Dvīnaṃ pabbatānampi āsannatare ṭhitānaṃ ovarakādisadisaṃ vivaraṃ hoti, ekasmimyeva pana pabbate umaṅgasadisa”nti vadanti ācariyā. Ekasmimyeva hi umaṅgasadisaṃ antoleṇaṃ hoti upari paṭicchannattā, na dvīsu tathā appaṭicchannattā, tasmā “umaṅgasadisa”nti idaṃ “ekasmim yevā”ti iminā sambandhanīyaṃ. “Mahāvivara”nti idaṃ pana ubhayehipi. **Umaṅgasadisanti** ca “suduṅgāsadisa”nti (dī. ni. ṭi. 1.216) **ācariyena** vuttaṃ. **Suduṅgāti** hi bhūmigharassetam adhivacanaṃ, “taṃ gahetvā suduṅgāya ravantaṃ yakkhinī khipī”tiādisu viya. **Manussānaṃ anupacāraṭṭhānanti** pakatisaṅcāravasena manussehi na sañcaritabbaṭṭhānaṃ. Kassanavappanādivasena hi pakatisaṅcārapaṭikkhepo idhādhippeto. Tenāha “**yattha na kasanti na vapanti**”ti. **Ādisaddena** pana “vanapatthanti vanasaṅṭhānametaṃ senāsanānaṃ adhivacanaṃ, vanapatthanti bhīsanakānametaṃ, vanapatthanti salomahaṃsānametaṃ, vanapatthanti pariyaṅtānametaṃ, vanapatthanti na manussūpacārānametaṃ senāsanānaṃ adhivacana”nti (vibha. 531) imaṃ **vibhaṅgapāḷisesaṃ** saṅgaṇhāti. **Patthoti** hi pabbatassa samānabhūmi, yo “sānū”tipi vuccati, tassadisattā pana manussānamasañcaraṇabhūtaṃ vanaṃ, tasmā patthasadisaṃ vanaṃ **vanapatthoti** visesanaparanipāto daṭṭhabbo. Sabbesaṃ sabbāsu disāsu abhimukho okāso **abbhokāsoti** āha “**acchanna**”nti, kenaci chadanena antamaso rukkhasākhāyapi na chādītanti attho. Daṇḍakānaṃ upari cīvaraṃ chādētva katā **cīvarakuṭi**. **Nikkaḍḍhitvāti** nīharitvā. Antopabbhāraṇasadiṣo palālarāsiyeva adhippeto, itarathā

tiṇapaṇṇasanthārasaṅgopi siyāti vuttaṃ “**pabbhāraṇasadiṣe ālaye**”ti, pabbhārasadiṣe, ṇasadiṣe vāti attho. **Gacchagumbādīnampīti pi-saddena** purimanayaṃ sampiṇḍeti.

Piṇḍapātassa pariyesanaṃ **piṇḍapāto** uttarapadalopena, tato paṭikkanto **piṇḍapātaṭikkantoti** āha “**piṇḍapātapariyesanato paṭikkanto**”ti. **Pallaṅkanti** ettha **pari-saddo** “samantato”ti etasmiṃ atthe, tasmā parisamantato aṅkanaṃ āsanaṃ **pallaṅko** ra-kārassa la-kāraṃ, dvibhāvaṅca katvā yathā “palibuddho”ti, (mi. pa. 6.3.6) samantabhāvo ca vāmoruṃ, dakkhiṇoruṅca samaṃ ṭhapetvā ubhinnaṃ pādānaṃ aññamaññasambandhanakaraṇaṃ. Tenāha “**samantato ūrubaddhāsana**”nti. Ūrūnaṃ bandhanavasena nisajjāva idha pallaṅko, na āharimehi vālehi katoti vuttaṃ hoti. **Ābhujitvā**ti ca yathā pallaṅkavasena nisajjā hoti, tathā ubho pāde ābhugge samiṅjite katvā, taṃ pana ubhinnaṃ pādānaṃ tathābandhatākaraṇamevāti āha “**bandhitvā**”ti. **Ujūṃ kāyanti** ettha **kāya-saddo** uparimakāyavisayo heṭṭhimakāyassa anujukāṃ ṭhapanassa nisajjāvacaṇeneva viññāpitattāti vuttaṃ “**uparimaṃ sarīraṃ ujūṃ ṭhapetvā**”ti. Taṃ pana uparimakāyassa ujukāṃ ṭhapanāṃ sarūpato dasseti “**aṭṭhārasā**”tiādīna, aṭṭhārasannaṃ piṭṭhikaṅṭakāṭṭhikānaṃ koṭiyā koṭiṃ paṭipādanameva tathā ṭhapananti adhippāyo.

Idāni tathā ṭhapanassa payojanaṃ dassento “**evañhī**”tiādīmāha. Tattha **evanti** tathā ṭhapanē sati, iminā vā tathāṭhapanahetunā. **Na paṇamantīti** na onamanti. “**Athassā**”tiādi pana paramparapayojanadassanaṃ. **Athāti** evaṃ anonamane. **Vedanāti** piṭṭhigilānādivedanā. **Na paripatatīti** na vigacchati vīthiṃ na vilāṅgheti. Tato eva pubbenāparaṃ viśesappattiyā kammaṭṭhānaṃ **vuddhiṃ phātiṃ vepullaṃ upagacchati**. Parisaddo cettha abhisaddapariyāyo abhimukhatthoti vuttaṃ “**kammaṭṭhānābhimukha**”nti, bahiddhā puthuttārammaṇato nivāretvā kammaṭṭhānaṃyeva purakkhatvāti attho. Parisaddassa samīpatthataṃ dasseti “**mukhasamīpe vā katvā**”ti iminā, mukhassa samīpe viya citte nibaddhaṃ upaṭṭhāpanavasena katvāti vuttaṃ hoti. Parisaddassa samīpatthataṃ **vibhaṅgapāliyā** (vibha. 537) sādhetuṃ “**tenevā**”tiādi vuttaṃ. **Nāsikaggeti** nāsapuṭagge. **Mukhanimittaṃ** nāma uttarotṭhassa vemajjhappadeso, yathā nāsikavāto paṭihaññati.

Ettha ca yathā “vivittaṃ senāsanāṃ bhajātī”tiādīna (vibha. 508) bhāvanānurūpaṃ senāsanāṃ dassitaṃ, evaṃ “nisīdatī”ti iminā alīnānuddhaccapakkhiko santo iriyāpatho dassito, “pallaṅkaṃ ābhujitvā”ti iminā nisajjāya daḷhabhāvo, “parimukhaṃ satim upaṭṭhapetvā”ti iminā ārammaṇapariggahaṇūpāyoti. **Pari-saddo** pariggahaṭṭho “pariṇāyikā”tiādīsu (dha. sa. 16) viya. **Mukha-saddo** niyyānaṭṭho “suññatavimokkhamukha”ntiādīsu viya. Paṭipakkhato nikkhamaṇameva hi niyyānaṃ. Asammosanabhāvo **upaṭṭhānaṭṭho**. **Tatrāti** paṭisambhidānaye. **Pariggahitaniyyānanti** sabbathā gahitāsammaṣāyā pariggahitaṃ, pariccattasammaṣāpāṭipakkhatāya ca niyyānaṃ **satim katvā**, paramaṃ satinepakkāṃ upaṭṭhapetvāti vuttaṃ hoti. Ayaṃ **ācariyadhammapālattherassa**, **ācariyasāriputtattherassa** ca matī. Atha vā “kāyādīsu suṭṭhupavattiyā pariggahitaṃ, tato eva ca niyyānabhāvayuttaṃ, kāyādīpariggahaṇāññasampayuttatāya vā pariggahitaṃ, tatoyeva ca niyyānabhūtaṃ upaṭṭhānaṃ katvāti attho”ti ayaṃ **ācariyānandattherassa** (vibha. mūlaṭī. 537) matī.

217. Abhijjhāyati giṅghati abhikaṅkhati etāyāti **abhijjhā**, kāmacchandanīvaraṇaṃ. **Luccanaṭṭhenāti** bhijjanaṭṭhena, khaṇe khaṇe bhijjanaṭṭhenāti atthoti **ācariyadhammapālattherena**, (dī. ni. ṭī. 1.217) **aṅguttaraṭṭhikākārena** ca **ācariyasāriputtattherena** vuttaṃ. Suttasu ca dissati “luccatīti kho bhikkhu lokoti vuccati. Kiṅca luccati? Cakkhu kho bhikkhu luccati, rūpā luccanti, cakkhuviññāṇaṃ luccati”tiādi. (Saṃ. ni. 4.82) **abhidhammaṭṭhakathāyaṃ**, (dha. sa. aṭṭha. 7-13) pana idha ca adhunā potthake “luccanapaluccanaṭṭhenā”ti likhitaṃ. Tattha luccanameva paluccanapariyāyena viśesetvā vuttaṃ. Lucasaddo hi apekkhanādiatthopi bhavati “oloketī”tiādīsu, bhijjanapabhijjanaṭṭhenāti attho. **Vamsatthapakāsiniyaṃ** pana vuttaṃ “khaṇabhaṅgavasena luccanasabhāvato, cutibhaṅgavasena ca paluccanasabhāvato loko nāmā”ti (vamsatthapakāsiniyaṃ nāma mahāvamsaṭṭhikāyaṃ paṭhamaparicchede pañcamagāthā vaṇṇanāyaṃ) keci pana “bhijjanauppajjanaṭṭhenā”ti atthaṃ vadanti. Āhaccabhāsītavacanātthena virujjhanato, lucasaddassa ca anuppādavācakattā ayuttamevetāṃ. Apica ācariyehipi “luccanapaluccanaṭṭhenā”ti pāṭhameva ulliṅgetvā tathā attho vutto siyā, pacchā pana paramparābhatavasena pamādalekhattā tattha tattha na diṭṭhoti daṭṭhabbaṃ, na luccati na paluccatīti yo

gahitopi tathā na hoti, sveva loko, aniccānupassanāya vā luccati bhijjati vinassatīti gahetabbova lokoti taṃgahaṇarahitānaṃ lokuttarānaṃ natthi lokatā, dukkhasaccaṃ vā lokoti vuttaṃ “**pañcupādānakkhandhā loko**”ti. Evaṃ tattha tattha vacanatopi yathāvutto kesañci attho na yuttoti.

Tasmāti pañcupādānakkhandhānameva lokabhāvato. **Vikkhambhanavasena**ti ettha **vikkhambhanaṃ** tadaṅgappahānavaseneva anuppādanaṃ appavattanaṃ, na pana vikkhambhanaṃ appahānavasena paṭipakkhānaṃ suṭṭhupahīnaṃ. “**Pahīnattā**”ti hi tathāpahīnasadisataṃ eva sandhāya vuttaṃ. Kasmāti ce? Jhānassa anadhigatattā. Evaṃ pana pubbabhāgabhāvanāya tathā pahānatoyevetaṃ cittaṃ **vigatābhijjhaṃ** nāma, na tu cakkhuviññānamiva sabhāvato abhijjhāviraḥitattāti dassetaṃ “**na cakkhuviññānasadisena**”ti vuttaṃ. **Yathā tanti** ettha **tanti** nipātamattaṃ, **taṃ** cittaṃ vā. Adhunā muñcanassa, anāgate ca puna anādānassa karaṇaṃ parisodhanaṃ nāmāti vuttaṃ hoti. Yathā ca imassa cittassa pubbabhāgabhāvanāya parisodhitattā vigatābhijjhatā, evaṃ abyāpannatā, vigatathinamiddhatā, anuddhatatā, nibbicikicchata ca veditabbāti nidassento “**byāpādapadosaṃ pahāyātiādīsupi eseva nayo**”ti āha. **Pūtikummāsādayoti** ābhidosikayavakummāsādayo. **Purimapakatinti** parisuddhapaṇḍarasabhāvaṃ, iminā vikāramāpajjātīti atthaṃ dasseti. **Vikārāpattiyāti** purimapakatīvijahanasāṅkhātena vikāramāpajjanena. “**Ubhaya**”ntiādīnā tulyatthasamāsabhāvamāha. “Yā tasmim samaye cittassa akallatā”tiādīnā (dha. sa. 1162; vibha. 546) thinassa, “yā tasmim samaye kāyassa akallatā”tiādīnā ca middhassa **abhidhamme** niddiṭṭhattā “**thinam cittagelaññaṃ, middham cetasikagelañña**”nti vuttaṃ. Satipi hi thinamiddhassa aññamaññaṃ avippayoge cittakāyalahutādīnaṃ viya cittacetāsikānaṃ yathākkamaṃ taṃtaṃvisesassa yā tesam akallatādīnaṃ visesapaccayatā, ayametesam sabhāvoti daṭṭhabbaṃ. **Diṭṭhāloko** nāma passito rattim candālokadīpālokaukkālokādī, divā ca sūriyālokādī. Rattimpi divāpi tassa sañjānanasamatthā saññā **ālokasaññā**, tassā ca vigatanīvaraṇāya parisuddhāya atthitā idha adhippetā. Atisayatthavisitṭhassa hi atthiatthassa avabodhako ayamikāroti dassento “**rattimpī**”tiādīmāha, vigatathinamiddhabhāvassa kāraṇatā cetam vuttaṃ. Suttetu pākaṭovāyamatto.

Saratīti **sato**, sampajānātīti **sampajānoti** evaṃ puggalaniddesoti dasseti “**satīyā ca nāṇena ca samannāgato**”ti iminā. Santesupi aññesu vīriyasamādhiādīsū kasmā idameva ubhayaṃ vuttaṃ, vigatābhijjhādīsū vā idaṃ ubhayaṃ avatvā kasmā idheva vuttanti anuyogamapanetaṃ “**idaṃ ubhaya**”ntiādi vuttaṃ, puggalādhiṭṭhānena niddiṭṭhasatisampajāññasāṅkhātaṃ idaṃ ubhayanti attho. **Atikkamivā ṭhitoti** ta-saddassa atītatthataṃ āha, pubbabhāgabhāvanāya pajahanaṃ eva ca atikkamaṃ. “Kathaṃ idaṃ kathaṃ ida”nti pavattatīti **kathaṃkathā**, vicikicchā, sā etassa atthīti **kathaṃkathī**, na kathaṃkathī **akathaṃkathī**, nibbicikicchoti vacanattho, atthamattaṃ pana dassetaṃ “**kathaṃ idaṃ kathaṃ ida**”nti evaṃ nappavattatīti **akathaṃkathī**”ti vuttaṃ. “Kusalesu dhammesū”ti idaṃ “akathaṃkathī”ti iminā sambajjhitabbanti āha “**na vicikicchati, na kaṅkhatīti attho**”ti. **Vacanatthalakkhaṇādibhedatoti** ettha **ādisaddena** paccayapahānapahāyakādīnampi saṅgaho daṭṭhabbo. Tepi hi pabhedato vattabbāti.

218. Vaḍḍhiyā gahitaṃ dhanam iṇam nāmāti vuttaṃ “**vaḍḍhiyā dhanam gahetvā**”ti. Vigato anto **byanto**, so yassāti **byantī**. Tenāha “**vigatanta**”nti, virahitadātabbaināpariyantaṃ kareyyāti cetassa attho. **Tesanti** vaḍḍhiyā gahitānaṃ iṇadhanānaṃ. **Pariyanto nāma** taduttari dātabbaināseso. Natthi iṇamassāti **aṇaṇo**. Tassa bhāvo **āṇaṇyam**. Tameva nidānaṃ **āṇaṇyanidānaṃ**, āṇaṇyahu tu āṇaṇyakāraṇāti attho. Āṇaṇyameva hi nidānaṃ kāraṇamassāti vā **āṇaṇyanidānaṃ**, “pāmojjam somanassa”nti imehi sambandho. “Iṇapalibodhato muttomhī”ti **balavapāmojjam labhati**. “Jīvikānimittampi me avasiṭṭhaṃ atthī”ti **somanassaṃ adhigacchati**.

219. **Visabhāgavedanā** nāma dukkhavedanā. Sā hi kusalavipākasantānassa virodhibhāvato sukhavedanāya visabhāgā, tassā **uppattiyā** karaṇabhūtāya. **Kakacenevāti** kakacena iva. **Catuiriyāpathanti** catubbidhampi iriyāpathaṃ. Byādhitō hi yathā ṭhānagamanesu asamatto, evaṃ nisajjādīsūpi. **Ābādhetīti** piḷeti. Vātādīnaṃ vikārabhūtā visamāvatthāyeva “**ābādho**”ti vuccati. Tenāha “**taṃsamutṭhānena dukkhena dukkhito**”ti, ābādhasamutṭhānena dukkhavedanāsāṅkhātena dukkhena

dukkhito dukkhasamannāgatoti attho. Dukkavedanāya pana ābādhabhāvena ādimhi bādhatīti **ābādhoti** katvā ābādhasaṅkhātena mūlabyādhinā **ābādhiko**, aparāparaṃ sañjātadukkhasaṅkhātena anubandhabyādhinā **dukkhitoti** attho gahetabbo. Evañhi sati dukkavedanāvasena vuttassa dukkhitapadassa ābādhikapadena viśeṣitabbatā pākaṭā hotīti ayamettha **ācariyadhammapālattherena** (dī. ni. 1.219) vuttanayo. Adhikaṃ mattaṃ pamāṇaṃ **adhimattaṃ**, bālhaṃ, adhimattaṃ gilāno dhātusaṅkhayena parikkhīṇasarīroti **adhimattagilāno**. **Adhimattabyādhiparetatāyāti** adhimattabyādhipīlitatāya. **Na ruceyyāti** na rucceṭha, kammaṭṭhapadañcetam “bhatañcassā”ti ettha “assā”ti kattudassanato. Mattāsaddo anantthakoti vuttaṃ “**balamattāti balamevā**”ti, appamattakaṃ vā balaṃ **balamattā**. **Tadubhayanti** pāmojjaṃ, somanassañca. **Labhetha pāmojjaṃ** “rogato muttomhī”ti. **Adhigaccheyya somanassaṃ** “atthi me kāyabala”nti pāḷiyā attho.

220. Kākaṇikamattaṃ nāma “ekaguñjamatta”nti vadanti. “Diyadḍhavihimatta”nti **vinayaṭīkāyaṃ** vuttaṃ. Apica **kaṇa**-saddo kuṇḍake –

“Akaṇaṃ aṭṭhaṃ suddhaṃ, sugandhaṃ taṇḍulapphalaṃ;
Tuṇḍikīre pacitvāna, tato bhūñjanti bhojana”nti. (dī. ni. 3.281) ādīsu viya;

“Kaṇo tu kuṇḍako bhava”ti (abhidhāne bhakaṇḍe catubbaṇṇavagge 454 gāthā) hi vuttaṃ. Appako pana kaṇo **kākaṇoti** vuccati yathā “kālavaṇa”nti, tasmā kākaṇova pamāṇamassāti **kākaṇikaṃ**, kākaṇikameva **kākaṇikamattaṃ**, khuddakuṇḍakappamaṇamevāti attho daṭṭhabbo. Evañhi sati “rājadāyo nāma kākaṇikamattaṃ na vaṭṭati, adḍhamāsagghanikaṃ maṃsaṃ deti”ti (jā. aṭṭha. 6.umaṅgajātakavaṇṇanāya) vuttena **umaṅgajātakavacanena** ca aviruddhaṃ hoti. **Vayoti** khayō bhaṅgo, tassa “bandhanā muttomhī”ti āvajjayato tadubhayaṃ hoti. Tena vuttaṃ “labhetha pāmojjaṃ, adhigaccheyya somanassa”nti. Vacanāvasesaṃ sandhāya “**sesaṃ vuttanayenevā**”tiādi vuttaṃ. **Vuttanayenevāti** ca paṭhamadutiyapadesu vuttanayeneva. **Sabbapadesūti** tatiyādīsu tīsu koṭṭhāsesu. Ekeko hi upamāpakko “pada”nti vutto.

221-222. Adhīnoti āyatto, na seribhāvayutto. Tenāha “**attano ruciyā kiñci kātuṃ na labhati**”ti. Evamitarasmimpi. Yena gantukāmo, tena kāmaṃ gamo na hotīti sapāṭhasesayojanaṃ dassetuṃ “**yenā**”tiādi vuttaṃ. **Kāmaṃ** cetam bhāvanapumaṃsakavacanaṃ, kāmena vā icchāya gamo **kāmaṃgamo** niggaḥitāgamena. **Dāsabyāti** ettha **bya**-saddassa bhāvatthataṃ dasseti “**dāsabhāvā**”ti iminā. Aparādhīnatāya attano bhujō viya sakicce esitabbo pesitabboti **bhujisso**, sayamvasīti nibbacanaṃ. “Bhujō nāma attano yathāsukhaṃ viniyogo, so isso icchitabbo etthāti **bhujisso**, assāmiko”ti **mūlapaṇṇāsakaṭīkāyaṃ** vuttaṃ. Atthamattaṃ pana dassento “**attano santako**”ti āha, attāva attano santako, na parassāti vuttaṃ hoti. Anudakatāya kaṃ pāṇiyaṃ tārenti etthāti **kantāro**, addhānasaddo ca dīghapariyāyoti vuttaṃ “**nirudakaṃ dīghamagga**”nti.

223. Sesānīti byāpādādīni. **Tatrāti** dassane. **Ayanti** idāni vuccamānā **sadisatā**, yena iṇādīnaṃ upamābhāvo, kāmacchandādīnañca upameyyabhāvo hoti, so nesaṃ upamopameyyasambandho sadisatāti daṭṭhabbaṃ. **Tehīti** parehi iṇasāmikehi. **Kiñci paṭibāhitunti** pharusavacanādikaṃ kiñcipi paṭisedhetuṃ na sakkoti iṇaṃ dātumasakkuṇṭtā. Kasmāti vuttaṃ “**titikkhākāraṇa**”ntiādi, iṇassa titikkhākāraṇattāti attho. **Yo yamhi kāmacchandena rajjatīti** yo puggalo yamhi kāmacchandassa vatthubhūte puggale kāmacchandena rajjati. **Taṇhāsahagatena taṃ vatthum gaṇhātīti** taṇhābhūtena kāmacchandena taṃ kāmacchandassa vatthubhūtaṃ puggalaṃ “mameta”nti gaṇhāti. Sahagatasaddo hettha tabbhāvamatto “yāyaṃ taṇhā ponobhavikā nandīrāgasahagatā”tiādīsu (dī. ni. 2.400; ma. ni. 1.133, 480; 3.373; saṃ. ni. 5.1081; mahāva. 15; paṭi. ma. 2.30) viya. **Tenāti** kāmacchandassa vatthubhūtena puggalena. Kasmāti āha “**titikkhākāraṇa**”ntiādi, kāmacchandassa titikkhākāraṇattāti attho. Titikkhāsaddo cettha rāgapadhāno akusalacittuppādo “titikkhā”ti vutto, na tu “**khantī** paramaṃ tapo titikkhā”tiādīsu (dī. ni. 2.91; dha. pa. 184) viya tapabhūto adosapadhāno cittuppādo. **Gharasāmikehīti** gharassa sāmikabhūtehi sassusasurasāmikehi. Itthīnaṃ kāmacchando titikkhākāraṇaṃ hoti viyāti sambandho.

“**Yathā panā**”tiādīnā sesānaṃ rogādisadisatā vuttā. Tattha pittadosakopanavasena **pittarogāturo**. Tassa pittakopano sabbampi madhusakkarādikaṃ amadhurabhāvena sampajjatīti vuttaṃ “**tittakaṃ tittakanti uggiratiyevā**”ti. **Tumhe upaddavethā**ti ṭikāyaṃ (dī. ni. ṭi. 1.223) uddhaṭapāṭho, “upaddavaṃ karoṭhā”ti nāmadhātuvasena attho, idāni pana “tumhehi upaddutā”ti pāṭho dissati. **Vibbhamatī**ti ito cito ca āhiṇḍati, hīnāya vā āvattati. Madhusakkarādīnaṃ rasaṃ **na vindati** nānubhavati na jānāti na labhati ca viyāti sambandho. **Sāsanarasanti** sāsanassa rasaṃ, sāsanameva vā rasaṃ.

Nakkhattaṇṇaṃ **nakkhattaṃ**. Tenāha “**aho naccaṃ, aho gīta**”nti. **Muttoti** bandhanaṃ pamutto. **Dhammassavanassā**ti sotabbadhammassa.

Sīghaṃ pavattetabbakiccaṃ **accāyikaṃ**. Sīghattho hi **atisaddo** “pāṇātipāto”tiādīsu (ma. ni. 2.193; vibha. 968) viya. **Vinaye apakataññunā**ti vinayakkame akusalena. Pakataṃ niṭṭhānaṃ vinicchayaṃ jānātīti **pakataññū**, na pakataññū tathā. So hi kappiyākappiyaṃ yāthāvato na jānāti. Tenāha “**kismiñcīdevā**”tiādī. **Kappiyamaṃsepī**ti sūkaramaṃsādikepi. **Akappiyamaṃsasaññāyā**ti acchamaṃsādīsaññāya.

Daṇḍakasaddenāpīti sākhaḍaṇḍakasaddenapi. **Ussaṅkitaparisaṅkitoti** avasaṅkito ceva samantato saṅkito ca, ativiya saṅkitoti vuttaṃ hoti. Tadaḅkaradassanaṃ “**gacchatipi**”tiādī. So hi thokaṃ gacchatipi. Gacchanta pana tāya ussaṅkitaparisaṅkitatāya tattha tattha **tiṭṭhatipi**. Īdise kantāre gate “ko jānāti, kiṃ bhavissatī”ti **nivattatipi**, tasmā ca **gataṭṭhānato agataṭṭhānameva bahutaraṃ hoti**, tato eva ca **so kicchena kasirena khemantabhūmiṃ pāpuṇāti vā, na vā pāpuṇāti**. **Kicchena kasirenā**ti pariyaṇavacanaṃ, kāyikadukkheṇa khedanaṃ vā **kiiccaṃ**, cetasikadukkheṇa piḷanaṃ **kasiraṃ**. **Khemantabhūmī**ti khemabhūtaṃ bhūmiṃ antasaddassa tabbhāvattā, bhayassa khīyanaṃ vā **khemo**, sova anto paricchedo yassā tathā, sā eva bhūmīti **khemantabhūmi**, taṃ nibbhayappadesanti attho. **Aṭṭhasu ṭhānesū**ti “tattha katamā vicikicchā? Sathari kaṅkhati vicikicchati. Dhamme. Saṅghe. Sikkhāya. Pubbante. Aparante. Pubbantāparante. Idappaccayatāpaṭiccasamuppannesu dhammesu kaṅkhati vicikicchati”ti (vibha. 915) **vibhaṅge** vuttesu aṭṭhasu ṭhānesu. **Adhimuccitvā**ti vinicchinitvā, saddahitvā vā. **Saddhāya gaṇhitunti** saddheyyavattumaṃ “idameva”nti saddahanavasena gaṇhitumaṃ, saddahitumaṃ na sakkotīti attho. **Itī**ti tasmā vuttanayena asakkuṇanaṃ antarāyaṃ karotīti sambandho. “Atthi nu kho, natthi nu kho”ti araṇṇaṃ pavatṭhassa ādimhi eva sappanaṃ saṃsayo **āsappanaṃ**. Tato paraṃ samantato, uparūpari vā sappanaṃ **parisappanaṃ**. Ubhayenapi tattheva saṃsayavasena paribbhamanaṃ dasseti. Tenāha “**apariyogāhana**”nti, “evamida”nti samantato anogāhananti attho. **Chambhitattanti** araṇṇasaññāya uppannaṃ chambhitabhāvaṃ hadayaṃsacalanaṃ, utrāsanti vuttaṃ hoti. Upameyyapakkepi yathārahamesamattho.

224. Tatrāyaṃ sadisatāti ettha pana appahīnapakkhe vuttanayānusāreṇa sadisatā veditabbā. Yadaggena hi kāmacchandādayo iṇādisadisā, tadaggena ca tesamaṃ pahānaṃ āṇaṇyādisadisatāti. Idamaṃ pana anuttānapadattamaṃ – **samiddhatanti** aḍḍhataṃ. Pubbe paṇṇamāropitāya vaḍḍhiyā saha vattatīti **savaḍḍhikaṃ**. **Paṇṇanti** iṇadānaggahaṇe sallakkhaṇavasena likhitapaṇṇaṃ. Puna **paṇṇanti** iṇayācānavasena sāsanalikhitapaṇṇaṃ. **Nillepatāyā**ti dhanasambandhābhāvena avilimpanatāya. Tathā **alaggaṭāya**. Pariyaṇavacanañhetamaṃ dvayaṃ. Atha vā **nillepatāyā**ti vuttanayena avilimpanabhāvena visesanabhūteṇa **alaggaṭāyā**ti attho. **Cha dhammeti** asubhanimittassa uggaho, asubhabhāvanānuyogo, indriyesu guttadvāratā, bhojane mattaññūtā, kalyāṇamittatā, sappāyakathāti ime cha dhamme. **Bhāvetvā**ti brūhetvā, attani vā uppādetvā. Anuppannaanuppādanauppannapahānādivibhāvanavasena mahāsatiṭṭhānasutte savisesamaṃ pāḷiyā āgatattā “**mahāsatiṭṭhāne vaṇṇayissāmā**”ti vuttaṃ. “**Mahāsatiṭṭhāne**”ti ca imasmiṃ dīghāgame (dī. ni. 2.372 ādayo) saṅgītamāha, na majjhimāgame nikāyantarattā. Nikāyantarāgatopi hi attho ācariyehi aññattha yebhuyyena vuttoti vadanti. Esa nayo byāpādāḍḍipahānabhāgepi. **Paravatthumhī**ti ārammaṇabhūte parasmim vattusmim. Mamāyanābhāvena **neva saṅgo**. Pariggahābhāvena **na baddho**. **Dibbānīpi rūpāni passato kilesa na samudācarati**, pageva mānusiyaññīti sambhāvane **api**-saddo.

Anatthakaroti attano, parassa ca ahitakaro. **Cha dhammeti** mettānimittassa uggaho, mettābhāvanānuyogo, kammassakatā, paṭisaṅkhānabahulatā, kalyāṇamittatā, sappāyakathāti ime cha dhamme. **Tatthevāti** mahāsatipaññāneyeva. Cārittasīlameva uddissa paññattasikkhāpadaṃ “**ācārapaññatti**”ti vuttaṃ. **Ādi**-saddena vārittapaññattisikkhāpadaṃ saṅgaṇhāti.

Pavesitoti pavesāpito. Bandhanāgāraṃ pavesāpitattā aladdhanakkhattānubhavano puriso hi “**nakkhattadivase bandhanāgāraṃ pavesito puriso**”ti vutto, nakkhattadivase eva vā tadanānubhavanatthaṃ tathā kato puriso evaṃ vuttoti vāṭṭati. **Aparasminti** tato pacchime, aññasmiṃ vā nakkhattadivase. **Okāsanti** kammakāraṇākāraṇaṃ, kammakāraṇakkhaṇaṃ vā. **Mahānatthakaranti** diṭṭhadhammikādiatthahāpanamukhena mahato anattassa kāraṇaṃ. **Cha dhammeti** atibhojane nimittaggāho, iriyāpathasamparivattanatā, ālokasaññāmanasikāro, abbhokāsavāso, kalyāṇamittatā, sappāyakathāti ime cha dhamme, **dhammanakkhattassāti** yathāvuttasotabbadhammasaṅkhātassa mahassa. Sādhūnaṃ ratijananato hi dhammopi chaṇasadiṣaṭṭhena “nakkhatta”nti vutto.

Uddhaccakukkuce **mahānatthakaranti** parāyattatāpādanena vuttanayena mahato anattassa kāraṇaṃ. **Cha dhammeti** bahussutatā, paripucchakatā, vinaye pakataññūtā, vuḍḍhasevitā, kalyāṇamittatā, sappāyakathāti ime cha dhamme. Balassa, balena vā attanā icchitassa kāraṇaṃ **balakkāro**, tena. **Nekkhammaṭṭipadanti** nīvaraṇato nikkhamanaṭṭipadaṃ upacārabhāvanameva, na paṭhamāṃ jhānaṃ. Ayañhi upacārabhāvanādhikāro.

Balavāti paccatthikavidhamanasamatthena balena balavā vantu-saddassa abhisayatthavisiṭṭhassa atthiyatthassa bodhanato. **Hatthasāranti** hatthagatadhanasāraṃ. **Sajjāvudhoti** sajjitadhanvādiāvudho, sannaddhapañcāvudhoti attho. Sūrāvīrasevakajanavasena **saparivāro**. **Tanti** yathāvuttaṃ purisaṃ. Balavantatāya, sajjāvudhatāya, saparivāratāya ca **corā dūratova disvā palāyeyyūṃ**. **Anatthakārikāti** sammāṭṭipattiyā vibandhakarāṇato vuttanayena ahitakārikā. **Cha dhammeti** bahussutatā, paripucchakatā, vinaye pakataññūtā, adhimokkhabahulatā, kalyāṇamittatā, sappāyakathāti ime cha dhamme. Yathā bāhusaccādīni uddhaccakukkucassa pahānāya saṃvattanti, evaṃ vicikicchāyapīti idhāpi bahussutatādayo tayopi dhammā gahitā, kalyāṇamittatā, pana sappāyakathā ca pañcannampi pahānāya saṃvattanti, tasmā tāsū tassa tassa nīvaraṇassa anucchavikasevanatā datṭhabbā. **Tiṇaṃ viyāti** tiṇaṃ bhayavasena na gaṇeti viya. **Duccaritakantāraṃ nittharivāti** duccaritacāraṇūpāyabhūtāya vicikicchāya nittharaṇavasena duccaritasāṅkhātāṃ kantāraṃ nittharivā. Vicikicchā hi sammāṭṭipattiyā appaṭṭipajjananimittatāmukhena micchāṭṭipattimeva paribrūhetīti tassā appahānaṃ duccaritacāraṇūpāyo, pahānañca duccaritavidhūnanūpāyoti.

225. “Tuṭṭhākāro”ti iminā pāmojjaṃ nāma taruṇapītiṃ dasseti. Sā hi taruṇatāya kathaṅcīpi tuṭṭhāvattā tuṭṭhākāramattaṃ. “**Tuṭṭhassā**”ti idaṃ “pamuditassā”ti etassa atthavacanaṃ, tassattho “okkantikabhāvappattāya pītiyā vasena tuṭṭhassā”ti **ṭikāyaṃ** vutto, evaṃ sati pāmojjapadena okkantikā pītiyeva gahitā siyā. “**Sakalasarīraṃ khobhayamānā pīti jāyati**”ti etassā cattho “attano savipphārikatāya, attasamuṭṭhānapanātarūpuppattiyā ca sakalasarīraṃ khobhayamānā pharaṇalakkhaṇā pīti jāyati”ti vutto, evaṅca sati pītipadena pharaṇā pītiyeva gahitā siyā, kāraṇaṃ panettha gavesitabbaṃ. Idha, pana aññattha ca taruṇabalavatāmattasāmaññena padadvayassa atthadīpanato yā kāci taruṇā pīti **pāmojjaṃ**, balavatī **pīti**, pañcavidhāya vā pītiyā yathākkamaṃ taruṇabalavatāsambhavato purimā purimā **pāmojjaṃ**, pacchimā pacchimā **pīti**tipi vadanti, ayamettha tadanucchaviko attho. **Tuṭṭhassāti** pāmojjasaṅkhātāya taruṇapītiyā vasena tuṭṭhassa. Ta-saddo hi atītattho, itarathā hetuphalasambandhābhāvāpattito, hetuphalasambandhabhāvassa ca vuttattā. “**Sakalasarīraṃ khobhayamānā**”ti iminā pīti nāma ettha balavapītiṃ dasseti. Sā hi attano savipphārikatāya, attasamuṭṭhānapanātarūpuppattiyā ca sakalasarīraṃ saṅkhobhayamānā jāyati. Sakalasarīre pītivegassa pītipphārassa uppādanañcetta saṅkhobhanaṃ.

Pītisahitaṃ **pīti** uttarapadalopena. Kiṃ pana taṃ? Mano, pīti mano etassāti samāso. Pītiyā sampayuttaṃ mano yassātipi vāṭṭati, tassa. Atthamattaṃ pana dassetuṃ “**pītisampayuttacittassa**

puggalassā’ti vuttaṃ. **Kāyoti** idha sabbopi arūpakalāpo adhippeto, na pana kāyalahutādīsu viya vedanādikkhandhattayameva, na ca kāyāyatanādīsu viya rūpakāyampīti dasseti **“nāmakāyo”**ti iminā. Passaddhidvayavaseneva hettha passambhanamadhippetam, passambhanam pana vigatakilesadarathatāti āha **“vigatadaratho hotī”**ti, pahīnauddhaccādikilesadarathoti attho. Vuttappakārāya pubbhāgabhāvanāya vasena cetasikasukham paṭisaṃvedentoyeva taṃsamuttāhānapañītarūpaphuṭasarīratāya kāyikampi sukham paṭisaṃvedetīti vuttaṃ **“kāyikampi cetasikampi sukham vedayati”**ti. **Iminā nekkhammasukhenāti** **“sukham vedetī”**ti evaṃ vuttena saṃkilesanīvaraṇapakkhato nikkhantattā, paṭhamajjhānapakkkhattā ca yathārahaṃ nekkhammasaṅkhātena upacārasukhena appanāsukhena ca. Samādhānampettha tadubhayenevāti vuttaṃ **“upacāravasenāpi appanāvasenāpi”**ti.

Ettha panāyamadhippāyo – kāmacchandappahānato paṭṭhāya yāva passaddhakāyassa sukhaṭisaṃvedanā, tāva yathā pubbe, tathā idhāpi pubbhāgabhāvanāyeva vuttā, na appanā. Tathā hi kāmacchandappahāne **ācariyadhammapālattherena** vuttaṃ **“vikkhambhanavasenevāti ettha vikkhambhanam anuppādanam appavattanam, na paṭipakkhānam supphānatā, pahīnatatī ca pahīnasadisatam sandhāya vuttaṃ jhānassa anadhigatattā”**ti (dī. ni. ṭī. 1.261). Passaddhakāyassa sukhaṭisaṃvedanāya ca vuttappakārāya pubbhāgabhāvanāya vasena cetasikasukham paṭisaṃvedentoyeva taṃsamuttāhānapañītarūpaphuṭasarīratāya kāyikampi sukham paṭisaṃvedetīti. Apica kā nāma kathā aññehi vattabbā aṭṭhakathāyameva **“cha dhamme bhāvetvā”**ti tattha tattha pubbhāgabhāvanāya vuttattā. Sukhino cittasamādhāne pana sukhasa upacārabhāvanāya viya appanāyapi kāraṇattā, **“so vivicceva kāmehi”**tiādinā ca vakkhamānāya appanāya hetuphalavasena sambajjhanato pubbhāgasamādhī, appanāsamādhī ca vutto, pubbhāgasukhamiva vā appanāsukhampi appanāsamādhissa kāraṇamevāti tampi appanāsukham appanāsamādhino kāraṇabhāvena **ācariyadhammapālattherena** gahitanti imamatthamasallakkhentā nekkhammapadattam yathātatham aggahetvā pāḷiyam, aṭṭhakathāyampi saṃkiṇṇakulam keci karontīti.

Paṭhamajjhānakathāvaṇṇanā

226. Yadevaṃ **“sukhino cittaṃ samādhīyati”**ti eteneva upacāravasenapi appanāvasenapi cittassa samādhānam kathitam siyā, evaṃ sante **“so vivicceva kāmehi”**tiādikā desanā kimatthiyāti codanāya **“so vivicceva...pe... vuttanti veditabba”**nti vuttaṃ. Tattha **“samāhite”**ti padadvayaṃ **“dassanattam vutta”**nti imehi sambandhitvā samāhitattā tathā dassanattam vuttanti adhippāyo veditabbo. **Uparivisesadassanattanti** upacārasamādhito, paṭhamajjhānādisamādhito ca upari pattabbassa paṭhamadutiyaajjhānādivisesassa dassanattam. Upacārasamādhisamadhigameneva hi paṭhamajjhānādiviseso samadhigantum sakkā, na pana tena vinā, dutiyaajjhānādisamadhigamepi pāmojjuppādādikāraṇaparamparā icchitabbā, dutiyamaggādisamadhigame paṭipadāññadassanavisuddhi viyāti datṭhabbam. **Appanāsamādhināti** paṭhamajjhānādiappanāsamādhinā. **Tassa samādhinoti** yo appanālakkhaṇo samādhī **“sukhino cittaṃ samādhīyati”**ti sabbasādhāraṇavasena vutto, tassa samādhino. **Pabhedadassanattanti** dutiyaajjhānādivibhāgassa ceva paṭhamābhiññādivibhāgassa ca pabhedadassanattam. **Karajakāyanti** catusantatirūpasamudāyabhūtam cātumahābhūtikakāyam. So hi gabbhāsaye karīyatīti katvā karasaṅkhātato pupphasambhavato jātattā **karajoti** vuccati. **Karoti** hi mātu soṇitasāṅkhātapupphassa, pītu sukkasaṅkhātasambhavassa ca nāmam, tato jāto pana aṇḍajalābujavasena gabbhaseyyakāyova. Kāmam opapātikādīnampi hetusampannānam yathāvuttasamādhisamadhigamo sambhavati, tathāpi yebhuyattā, pākaṭattā ca sveva kāyo vuttoti. Karoti putte nibbattetīti **karo**, sukkasoṇitam, karena jāto **karajoti**pi vadanti.

Nanu ca nāmakāyopi vivekajena pītisukhena tathā laddhūpakārova siyā, atha kasmā yathāvutto rūpakāyova idha gahitoti? Saddantarābhisambandhena adhigatattā. **“Abhisandeti”**tiādisaddantarābhisambandhato hi rūpakāyo eva idha bhagavatā vuttoti adhigamīyati tasseva abhisandanādikiriyaogyattāti. **Abhisandeti**ti abhisandanam karoti, so imeva kāyam vivekajena pītisukhenāti hi bhedavasena, samudāyāvayavavasena ca parikkappanāmatasiddhā hetukiriya

ettha labbhati, abhisandanam panetam jhānamayena pītisukhena karajakāyassa tintabhāvāpādanam, sabbatthakameva ca lūkhabhāvassāpanayananti āha “**temeti sneheti**”ti, avassutabhāvam, allabhāvañca karotīti attho. Atthato pana abhisandanam nāma yathāvuttapītisukhasamuṭṭhānehi paṇītarūpehi kāyassa parippharaṇam daṭṭhabbam. Tenevāha “**sabbattha pavattapīti sukham karotī**”ti.

Tamsamuṭṭhānarūpapharaṇavaseneva hi sabbattha pavattapītisukhatā. **Parisandeti**tiādīsipi eseva nayo. **Bhastam** nāma cammapasibbakaṃ. **Parippharatī** suddhakiriyāpadam. Tena vuttam “**samantato phusati**”ti, so imameva kāyam vivekajena pītisukhena samantato phuṭṭho bhavatīti attho.

Phusanakiriyāyevettha upapannā, na byāpanakiriyā bhikkhusseva suddhakattubhāvato. Sabbam etassa atthīti **sabbavā** yathā “guṇavā”ti, tassa **sabbavato**, “avayavāvayavīsambandhe avayavini sāmivacana”nti saddalakkhaṇena panetassa “kiñcī”ti avayavena sambajjhanato avayavīvisayoyevesa sabbasaddoti mantvā chavimaṃsādikoṭṭhāsasañkhātena avayavena avayavībhāvam dassento āha “**sabbakoṭṭhāsavato kāyassā**”ti. “**Kiñcī**”ti etassa “**upā...pe... ṭhāna**”nti atthavacanam.

Upādinnakasantatipavattiṭṭhāneti kammajarūpasantatiyā pavattiṭṭhāne aphuṭam nāma na hotīti sambandho. **Chavimaṃsalohitānugatanti** chavimaṃsalohitādikammajarūpamanugatam. Yattha yattha kammajarūpam, tattha tattha cittajarūpassāpi byāpanato tena tassa kāyassa phuṭabhāvam sandhāya “**aphuṭam nāma na hotī**”ti vuttam.

227. Chetoti kusalo, tam pana kosallam “kaṃsathāle nhāniyacunṇāni ākirivā”tiādīsaddantarassannidhānato, pakaraṇato ca nhāniyacunṇānam karaṇe, payojane, piṇḍane ca samatthātasena veditabbanti dasseti “**paṭibalo**”tiādīnā. **Kaṃsasaddo** pana “mahatiyā kaṃsapātiyā”tiādīsū (ma. ni. 1.61) suvaṇṇe āgato, “kaṃso upahato yathā”tiādīsū (dha. pa. 134) kittimalohe, “upakaṃso nāma rājā mahākaṃsassa atrajo”tiādīsū [jā. aṭṭha. 4.10.164 (atthato samānam)] paṇṇattimatte. Idha pana yattha katthaci loheti āha “**yena kenaci lohena katabhājane**”ti. Nanu upamākarānamattamevidam, atha kasmā kaṃsathālakassa savisesassa gahaṇam katanti anuyogam pariharati “**mattikābhājana**”ntiādīnā. “**Sandentassā**”ti parimaddetvā piṇḍam karontasseva bhijjati, na pana sandanakkhamam hoti, anādaralakkhaṇe cetam sāmivacanam. Kiriyantarassa pavattanakkhaṇeyeva kiriyantarassa pavattanañhi anādaralakkhaṇam. “Paripphosakam paripphosaka”nti idam bhāvanapuṃsakanti dasseti “**siñcivā siñcivā**”ti iminā. Phusasaddo cettha parisiñcane yathā tam vātavuṭṭhisamaye “devo ca thokam thokam phusāyatī”ti, (pāci. 362) tasmā tato tato nhāniyacunṇato upari udakena byāpanakaraṇavasena parisiñcivā parisiñcivāti attho. Anupasaggopi hi saddo saupasaggo viya pakaraṇādhiगतassa atthassa dīpako, “siñcivā siñcivā”ti pana vacanam “paripphosakam paripphosaka”nti etassa “sandeyyā”ti ettha visesanabhāvaviññāpanattham. Evamīdisesu. “Sandeyyā”ti ettha sanda-saddo piṇḍakaraṇeti vuttam “**piṇḍam kareyyā**”ti. **Anugatāti** anupavisanavasena gatā upagatā. **Pariggahitāti** parito gahitā samantato phuṭṭhā.

Antaro ca bāhiro ca padeso, tehi saha pavattatīti **santarabāhirā**, nhāniyapiṇḍi, “**samantarabāhirā**”tipi pāṭho, ma-kāro padasandhivasena āgamo. Yathāvuttena pariggahitatākāraṇeneva santarabāhiro nhāniyapiṇḍi phuṭā udakasnehenāti āha “**sabbatthakameva udakasinehena phuṭā**”ti. Sabbattha pavattanam **sabbatthakam**, bhāvanapuṃsakañcetam, sabbapadese hutvā eva phuṭāti attho. “Santarabāhirā phuṭā”ti ca iminā nhāniyapiṇḍiyā sabbaso udakena temitabhāvamāha, “na ca paggharaṇī”ti pana iminā tintāyapi tāya ghanathaddhabhāvam. Tenāha “**na ca bindum bindu**”ntiādī. Udakassa phusitam phusitam, na ca paggharaṇī sūdanīti attho, “bindum udakam”tipi katthaci pāṭho, udakasāñkhātam binduntī tassattho. Bindusaddo hi “byālabambudharabindū”tiādīsū viya dhārāvayave. Evam pana apaggharaṇato hatthenapi dvīhipi tīhipi āngulehi gahetum, ovaṭṭikāya vā kātum sakkā. Yadi hi sā paggharaṇī assa, evam sati snehavigamanena sukkhātā thaddhā hutvā tathā gahetum, kātum vā na sakkāti vuttam hoti. **Ovaṭṭikāyāti** parivaṭṭulavasena, guḷikāvasena sā piṇḍi kātum sakkāti attho.

Dutiyajjhānakathāvaṇṇanā

229. Tāhi tāhi udakasirāhi ubbhijjati uddham nikkhamatīti **ubbidam**, tādisam udakam yassāti

ubhidodako, da-kārassa pana ta-kāre kate **ubhitodako**, imamatham dassetum “**ubhinnaudako**”ti vuttam, naditire khatakūpako viya ubhijjanakaudakoti attho. Ubbhijjanakampi udakam katthaci heṭṭhā ubhijjitvā dhārāvasena uṭṭhahitvā bahi gacchati, na tam koci antoyeva patiṭṭhitam katum sakkoti dhārāvasena uṭṭhahanato, idha pana vālikātaṭe viya udakarahadassa antoyeva ubhijjitvā tattheva tiṭṭhati, na dhārāvasena uṭṭhahitvā bahi gacchatīti viññāyati akhobhakassa sannisinnasseva udakassa adhippetattāti imamatham sandhāyāha “**na heṭṭhā**”tiādi. **Heṭṭhāti** udakarahadassa heṭṭhā mahāudakasirā, lohitānugatā lohitasirā viya udakānugato pathavipadeso “**udakasirā**”ti vuccati. **Uggacchanakaudakoti** dhārāvasena uṭṭhahanakaudako. **Antoyevāti** udakarahadassa anto samatalapadese eva. **Ubbhijjanakaudakoti** ubhijjitvā tattheva tiṭṭhanakaudako. **Āgamanamaggoti** bāhirato udakarahadābhimukham āgamanamaggo. **Kālena kālanti** ruḥīpadam “**eko ekāyā**”tiādi (pārā. 443, 444, 452) viyāti vuttam “**kāle kāle**”ti. **Anvaddhamāsanti** ettha **anusaddo** byāpane. Vassānassa addhamāsam addhamāsanti attho. Evaṃ **anudasāhanti** etthāpi. **Vuṭṭhinti** vassanam. **Anuppavaccheyyāti** na upavaccheyya. Vassasaddato cassa siddhīti dasseti “**na vasseyyā**”ti iminā.

“**Sītā vāridhārā**”ti itthilingapadassa “**sītam dhāra**”nti napuṃsakalingena atthavacanam dhārasaddassa dvilingikabhāvaviññāpanattham. **Sītanti** khobhanābhāvena sītaṃ, purāṇapaṇṇatīnakatṭhādīsamkiṇṇābhāvena vā **setam** parisuddham. **Setam** sītanti hi pariyāyo. Kasmā panettha ubhidodakoyeva rahado gahito, na itareti anuyogamapaneti “**heṭṭhā uggacchanaudakañhi**”tiādinā. **Uggantvā uggantvā bhijjantanti** uṭṭhahitvā uṭṭhahitvā dhārākiraṇavasena ubhijjantam, vinassantam vā. **Khobhetīti** āloḷeti. **Vuṭṭhīti** vassanam. **Dhārānipātapubbūlakehīti** udakadhārānipātehi ca tatoyeva uṭṭhitaudakapubbūlakasañkhātehi pheṇapaṭalehi ca. Evaṃ yathākkamam tiṇṇampi rahadānamagahetabbatam vatvā ubhidodakasseva gahetabbatam vadati “**sannisinnamevā**”tiādinā. Tattha **sannisinnamevāti** sammā, samam vā nisinameva, aparikkhobhatāya niccalameva, suppasannamevāti adhippāyo. **Iddhinimmitamivāti** iddhitatā iddhiyā tathā nimmitam iva. **Tatthāti** tasmim upamopameyyavacane. **Sesanti** “**abhisandeti**”tiādikam.

Tatijajjhānakathāvaṇṇanā

231. “**Uppalinī**”tiādi gacchassapi vanassapi adhivacanam. Idha pana “**yāva aggā, yāva ca mūlā**”ti vacanayogena “**appekaccānī**”tiādinā uppalagacchādīnameva gahetabbatāya vanamevādhippetaṃ, tasmā “**uppalānīti** uppalagacchāni. **Etthāti** uppalavane”tiādinā attho veditabbo. Avayavena hi samudāyassa nibbacanam katam. Ekañhi uppalagacchādi uppalādiyeva, catupañcamattampi pana uppalādivananti voharīyati, **sāratthadīpaniyam** pana jalāsayopi uppalinīādibhāvena vutto. **Ettha cāti** etasmim padattaye, etesu vā tīsu uppalapadumapuṇḍarīkasañkhātesu atthesu. “**Setarattanīlesū**”ti uppalameva vuttam, setuppalarattuppalānīluppalesūti attho. **Yam kiñci uppalam uppalameva** uppalasaddassa sāmāññānāmasena tesu sabbesupi pavattanato. **Satapattanti** ettha **satasaddo** bahupariyāyo “**satagghī sataramsi sūriyo**”tiādisu viya anekasañkhyābhāvato. Evañca katvā anekapattassāpi padumabhāve saṅgaho siddho hoti. **Pattanti** ca pupphadalamadhippetam. Vaṇṇaniyama **setam padumam, rattam puṇḍarīkanti** sāsanaṇvohāro, loke pana “**rattam padumam, setam puṇḍarīka**”nti vadanti. Vuttañhi “**puṇḍarīkam sītam rattam, kokanadam kokāsako**”ti. Rattavaṇṇatāya hi kokanāmakānam sunakhānam nādayato saddāpayato, tehi ca asitabbato “**kokanadam, kokāsako**”ti ca padumam vuccati. Yathāha “**padmam yathā kokanadam sugandha**”nti. Ayam panettha vacanatto udakam pāti, udake vā plavatīti **uppalam**. Pañke davati gacchati, pakārena vā davati viruhatīti **padumam**. Paṇḍaram vaṇṇamassa, mahantatāya vā muḍitabbamkhaṇḍetabbanti **puṇḍarīkam** ma-kārassa pa-kārādivasena. Muḍisaddaṇhi muḍarisaddam vā khaṇḍanattamicchanti saddavidū, saddasatthato cettha padasiddhi. Yāva aggā, yāva ca mūlā udakena abhisandanādibhāvavadassanattam pāliyam “**udakānuggatānī**”ti vacanam, tasmā udakato na uggaṭānicceva attho, na tu udake anurūpagatānīti āha “**udakā...pe... gatānī**”ti. Idha pana uppalādinī viya karajakāyo, udakam viya tatijajjhānasukham daṭṭhabbam.

Catutthajjhānakathāvaṇṇanā

233. Yasmā pana catutthajjhānacittameva “cetasā”ti vuttaṃ, tañca rāgādiupakkilesamalāpagamato nirupakkilesaṃ nimmalaṃ, tasmā upakkilesavigamanameva parisuddhabhāvoti āha “**nirupakkilesaṭṭhena parisuddha**”nti. Yasmā ca parisuddhasseva paccayavisesena pavattiviseso pariyoḍātataṃ suddhantasuvaṇṇassa nighaṃsanena pabhassaratā viya, tasmā pabhassaratāyeva pariyoḍātataṃ āha “**pabhassaratṭhena pariyoḍāta**”nti. Vijju viya pabhāya ito cito ca niccharaṇaṃ **pabhassaraṃ** yathā “ābhassarā”ti. **Odātena vatthenā**ti ettha “odātenā”ti guṇavacanāṃ sandhāya “**odātena...pe... ida**”nti vuttaṃ. **Utupharaṇatthanti** uṇhassa utuno pharaṇadassanattamaṃ. Kasmāti āha “**kiliṭṭhavatthenā**”tiādi. **Utupharaṇaṃ na hotīti** odātavatthena viya savisesaṃ utupharaṇaṃ na hoti, appakamattameva hotīti adhippāyo. Tenāha “**tañkhaṇa...pe... balavaṃ hoti**”ti. “**Tañkhaṇadhotaparisisuddhenā**”ti ca etena odātasaddo ettha parisuddhavacano eva “gihī odātavatthavasano”tiādīsu viya, na setavacano yena kenaci tañkhaṇadhotaparisisuddheneva utupharaṇasambhavatoti dasseti.

Nanu ca pāḷiyaṃ “nāssa kiñci sabbāvato kāyassa odātena vatthena aphuṭaṃ assā”ti kāyassa odātavatthapharaṇaṃ vuttaṃ, na pana vatthassa utupharaṇaṃ, atha kasmā utupharaṇaṃ idha vuttanti anuyogenāha “**imissāya hī**”tiādi. Yasmā vatthaṃ viya karajakāyo, utupharaṇaṃ viya catutthajjhānasukhaṃ, tasmā evamattho veditabboti vuttaṃ hoti, etena ca odātena vatthena sabbāvato kāyassa pharaṇāsambhavato, upameyyena ca ayuttattā kāyaggahaṇena tannissitavatthamaṃ gahetabbaṃ, vatthaggaṇaṇena ca tappaccayaṃ utupharaṇanti dasseti. Neyyatthato hi ayaṃ upamā vuttā. Vicitradesanā hi buddhā bhagavantoti. Yogino hi karajakāyo vatthaṃ viya daṭṭhabbo utupharaṇasadisena catutthajjhānasukhena pharitabbatā, utupharaṇaṃ viya catutthajjhānasukhaṃ vatthassa viya tena karajakāyassa pharaṇato, purisassa sarīraṃ viya catutthajjhānaṃ utupharaṇatṭhāniyassa sukhasa nissayabhāvato. Tenāha “**tasmā**”tiādi. Idañhi yathāvuttavacanassa guṇadassanaṃ. Ettha ca pāḷiyaṃ “parisisuddhena cetasā”ti cetogahaṇena catutthajjhānasukhaṃ bhagavatā vuttanti nīpetuṃ “catutthajjhānasukhaṃ, catutthajjhānasukhenā”ti ca vuttanti daṭṭhabbaṃ. Nanu ca catutthajjhānasukhaṃ nāma sātālakkhaṇaṃ natthīti? Saccamaṃ, santasabhāvattā panettha upekkhāyeva “sukha”nti adhippetā. Tena vuttaṃ **sammohavinodaniyaṃ** “upekkhā pana santattā, sukhamiceva bhāsītā”ti (vibha. aṭṭha. 232; visuddhi. 2.644; mahāni. aṭṭha. 27; paṭi. ma. aṭṭha. 1.105).

Ettāvatati paṭhamajjhānādhigamaparidīpanato paṭṭhāya yāva catutthajjhānādhigamaparidīpanā, tāvatā vacanakkamena. Labhanaṃ **lābho**, so etassāti **lābhī**, rūpajjhānānaṃ lābhī **rūpajjhānalābhī** yathā “lābhī cīvarapiṇḍapātasenāsanagilānapaccayabhesajjaparikkhārāna”nti, (saṃ. ni. 2.70; udā. 38) labhanasīlo vā **lābhī**. Kiṃ labhanasīlo? Rūpajjhānānītipi yujjati. Evamitarasmimpi. Na arūpajjhānalābhīti na veditabboti yojetabbaṃ. Kasmāti vuttaṃ “**na hī**”tiādi, aṭṭhannampi samāpattīnaṃ upari abhiññādhigame avinābhāvato vuttaṃ hoti. **Cuddasahākārehī** “kasiṇānulomato, kasiṇapaṭilomato kasiṇānulomapaṭilomato, jhānānulomato, jhānapaṭilomato, jhānānulomapaṭilomato, jhānukkantikato, kasiṇukkantikato, jhānakasiṇukkantikato, aṅgasaṅkantito, ārammaṇasaṅkantito, aṅgārammaṇasaṅkantito aṅgavavattānato, ārammaṇavavattānato”ti (visuddhi. 2.365) **visuddhimagge** vuttehi imehi cuddasahākārehi. Satipi jhānesu āvajjanādipaṇcavidhavasībhāve ayameva cuddasavidho vasībhāvo abhiññā nibbattane ekantena icchitabboti dassentena “**cuddasahākārehi ciṇṇavasībhāva**”nti vuttaṃ, iminā ca arūpasamāpattīsu ciṇṇavasībhāvaṃ vinā rūpasamāpattīsu eva ciṇṇavasībhāvena samāpatti na ijjhatīti tāsamaṃ abhiññādhigame avinābhāvaṃ dassetīti veditabbaṃ.

Nanu yathāpāṭhameva vinicchayo vattabboti codanaṃ sodheti “**pāḷiyaṃ panā**”tiadinā, sāvasesapāṭhabhāvato nīharitvā esa vinicchayo vattabboti vuttaṃ hoti. Yajjevaṃ arūpajjhānānīpi pāḷiyaṃ gahetabbāni, atha kasmā tāni aggahetvā sāvasesapāṭho bhagavatā katoti? Sabbābhiññānaṃ visesato rūpāvacaracatutthajjhānapādakattā. Satipi hi tāsamaṃ tathā avinābhāve visesato panetā rūpāvacaracatutthajjhānapādakā, tasmā tāsamaṃ tappādakabhāvaviññāpanattamaṃ tattheva ṭhatvā desanā katā, na pana arūpāvacarajjhānānaṃ idha ananupayogato. Tenāha “**arūpajjhānāni āharitvā**

kathetabbānī”ti.

Vipassanāñānakathāvaṇṇanā

234. “Puna caparaṃ mahārāja (pāliyaṃ natthi) bhikkhū”ti vatvāpi kimatthaṃ dassetuṃ “so”ti padaṃ puna vuttanti codanāyāha “so...pe... dasseti”ti, yathārutavasena, neyyatthavasena ca vuttāsu aṭṭhasu samāpattīsu ciṅṅavasitāvisiṭṭhaṃ bhikkhuṃ dassetuṃ evaṃ vuttanti adhippāyo. **Sesanti** “so”ti padatthato sesaṃ “evaṃ samāhite”tiādīsu vattabbaṃ sādhippāyamatthajātaṃ. Neyyaṃ jānātīti **ñāṇaṃ**, tadeva paccakkhaṃ katvā passatīti **dassanaṃ**, ñāṇameva dassanaṃ na cakkhādikanti **ñāṇadassanaṃ**, pañcavidhampi ñāṇaṃ, tayidaṃ pana ñāṇadassanapadaṃ sāsane yesu ñāṇavisesesu niruḷhaṃ, taṃ sabbaṃ atthuddhāravasena dassento “**ñāṇadassananti maggañāṇampi vuccatī**”tiādīmāha. **Ñāṇadassanavisuddhatthanti** ñāṇadassanassa visuddhipayojanāya. **Phāsuvihāroti** ariyavīhārabhūto sukhavīhāro. **Bhagavatopīti** na kevalaṃ devatārocanameva, atha kho tadā bhagavatopī ñāṇadassanaṃ udapādīti attho. Sattāhaṃ kālaṅkatassa assāti **sattāhakālaṅkato**. “**Kālāmo**”ti gottavasena vuttaṃ. **Cetovimutti** [vimutti (aṭṭhakathāyaṃ)] nāma arahattaphalasaṃpatti. Yasmā vipassanāñāṇaṃ ñeyyasaṅkhāte tebhūmakasaṅkhāre aniccādito jānāti, bhaṅgānupassanato ca paṭṭhāya paccakkhato te passati, tasmā yathāvuttatṭhena ñāṇadassanaṃ nāma jātanti dasseti “**idha panā**”tiādīnā.

Abhinīharatīti vipassanābhimukhaṃ cittaṃ tadaññakaraṇīyato nīharitvā haratīti ayaṃ saddato attho, adhippāyato pana taṃ dassetuṃ “**vipassanāñāṇassā**”tiādī vuttaṃ. Tadabhimukhabhāvoyeva hissa tanninnatādīkaraṇaṃ, taṃ pana vuttanayena aṭṭhaṅgasamannāgate tasmim citta vipassanākkamena jāte vipassanābhimukhaṃ cittapesanamevāti datṭhabbaṃ. **Tanninnanti** tassaṃ vipassanāyaṃ ninnamaṃ. Itaradvayaṃ tasseva vevacanaṃ. Tassaṃ **poṇaṃ** vaṅkaṃ **pabbhāraṃ** nīcanti attho. Brahmajāle **vuttoyeva**. Odanakummāsehi upacīyati vaḍḍhāpīyati, upacayati vā vaḍḍhatīti atthaṃ sandhāya “**odanena**”tiādī vuttaṃ. **Aniccucchādanaparimaddanabhedanavidhamsanadhammoti** ettha “aniccadhammo”tiādīnā **dhammasaddo** paccemaṃ yojetabbo. Tattha **aniccadhammoti** pabhaṅgutāya addhuvasabhāvo. **Duggandhavighātathāyāti** sarīre duggandhassa viḅamāya. **Ucchādanadhammoti** ucchādetabbatāsabhāvo, imassa pūtikāyassa duggandhabhāvato gandhodakādīhi ubbaṭṭanavilimpanajātikoti attho. Ucchādanena hi pūtikāye sedavātapittasemhādīhi garubhāvaduggandhānamapagamo hoti. Mahāsambāhanaṃ mallādīnaṃ bāhuvaḍḍhanādiatthaṃva hoti, aṅgapaccāṅgābādhavinodanattaṃ pana khuddakasambāhanameva yuttanti āha “**khuddakasambāhanena**”ti, mandasambāhanenāti attho. **Parimaddanadhammoti** parimadditabbatāsabhāvo.

Evaṃ aniyamitakālavasena atthaṃ vatvā idāni niyamitakālavasena atthaṃ vadati “**daharakāle**”tiādīnā. **Vā**-saddo cettha atthadassanavaseneva atthantaravikappanassa viññāyamānattā na payutto, luttaniddiṭṭho vā. **Daharakāleti** aciravijātakāle. Sayāpetvā añchanapīlanādivasena parimaddanadhammoti sambandho. **Mitanti** bhāvanapūmsakaniddeso, tena yathāpamāṇaṃ, maṇḍaṃ vā añchanapīlanādīni dasseti. **Añchanañcetta** ākaḍḍhanaṃ. **Pīlanaṃ** sambāhanaṃ. **Ādisaddena** samīñjanauggamanādīni saṅgaṇhāti. **Evaṃ pariharitopīti** ucchādanādīnā sukhedhitopi. **Bhijjati cevāti** aniccātādivasena nassati ca. **Vikirati cāti** evaṃ bhindanto ca kiñci payojanaṃ asādhento vippakiṇṇova hoti. Evaṃ navahi padehi yathārahaṃ kāye samudayavayadhammānupassitā dassitāti imamattaṃ vibhāvento “**tatthā**”tiādīmāha. Tattha **chahi padehīti** “rūpī, cātumahābhūtiko, mātāpettikasambhavo, odanakummāsūpacayo, ucchādanadhammo, parimaddanadhammo”ti imehi chahi padehi. Yuttaṃ tāva hotu majjhe tīhipi padehi kāyassa samudayakathanaṃ tesam tadatthadīpanato, “rūpī, ucchādanadhammo, parimaddanadhammo”ti pana tīhi padehi kathaṃ tassa tathākathanaṃ yuttaṃ siyā tesam tadatthassa adīpanatoti? Yuttameva tesampi tadatthassa dīpitattā. “**Rūpī**”ti hi idaṃ attano paccayabhūtena utuāhāralakkhaṇena rūpena rūpavāti atthassa dīpakamaṃ. Paccayasāṅgamavisitṭhe hi tadassatthiatthe ayamīkāro. “Ucchādanadhammo, parimaddanadhammo”ti ca idaṃ padadvayaṃ tathāvidharūpuppādanena saṅghānasampādanatthassa dīpakanti. **Dvīhīti** “bhedanadhammo, vidhamsanadhammo”ti dvīhi padehi. **Nissitañca** kāyapariyāpanne hadayavatthumhi nissitattā

vipassanācittassa. Tadā pavattañhi vipassanācittameva “idañca me viññāṇa”nti āsanapaccakkhavasena vuttaṃ. **Paṭibaddhañca** kāyena vinā appavattanato, kāyasaññitānañca rūpadhammānaṃ ārammaṇakaraṇato.

235. Suṭṭhu obhāsati **subho**, pabhāsampanno maṇi, tāya eva pabhāsampattiyā maṇino bhadratāti atthamattaṃ dassetaṃ “**subhoti sundaro**”ti vuttaṃ. Parisuddhākarasamuṭṭhānameva maṇino suvisuddhajātītāti āha “**jātimāti parisuddhākarasamuṭṭhito**”ti. Suvisuddharatanākarato samuṭṭhitoti attho. Ākaraparivissuddhimūlako eva hi maṇino kuruvindajātīadijātivisesoti. Idhāhippetassa pana veḷuriyamaṇino viḷūra (vi. va. aṭṭha. 34 ādayo vākyakkhkhndhesu passitabbaṃ) pabbatassa, viḷūra gāmassa ca avidūre parisuddhākaro. Yebhuyyena hi so tato samuṭṭhito. Tathā hesa viḷūranāmakassa pabbatassa, gāmassa ca avidūre samuṭṭhitattā veḷuriyoti paññāyittha, devaloke pavattassapi ca taṃsadisavaṇṇanibhatāya tadeva nāmaṃ jātaṃ yathā taṃ manussaloke laddhanāmasena devaloke devatānaṃ, so pana mayūragīvāvaṇṇo vā hoti vāyasapattavaṇṇo vā siniddhaveṇupattavaṇṇo vāti **ācariyadhammapālatherena paramatthadīpaniyaṃ** (vi. va. aṭṭha. 34) vuttaṃ. **Vinayasamvaṇṇanāsu** (vi. vi. ṭī. 1.281) pana “allaveḷuvaṇṇo”ti vadanti. Tathā hissa “vaṃsavaṇṇo”tipi nāmaṃ jātaṃ. “Mañjārakkhimaṇḍalavaṇṇo”ti ca vutto, tatoyeva so idha padese mañjāramaṇīti pākaṭo hoti. Cakkavattiparibhogārahapaṇītaramaṇibhāvato pana tasseva pāḷiyaṃ vacanaṃ daṭṭhabbaṃ. Yathāha “puna caparaṃ ānanda rañño mahāsudassanassa maṇiratanam pāturahosi, so ahosi maṇi veḷuriyo subho jātimā aṭṭhaṃso”tiādi (dī. ni. 2.248). Pāsānasakkharādidosañiharaṇavaseneva parikammaṇipphattīti dasseti “**apanītapāsānasakkharo**”ti iminā.

Chaviyā eva saṅghabhāvena acchatā, na saṅghātassāti āha “**acchoti tanucchavī**”ti. Tato ceva visesena pasannoti dassetaṃ “**suṭṭhu pasanno**”ti vuttaṃ. Paribhogamaṇiratanākārasampatti sabbākārasampannatā. Tenāha “**dhovanavedhanādīhi**”tiādi. Pāsānādīsu dhotatā **dhovanaṃ**, kāḷakādiapaharaṇatthāya ceva suttana āvunatthāya ca vijjhitaḥḥatā **vedhanaṃ**. Ādisaddena tāpasāṇhakarāṇādīnaṃ saṅgaho. **Vaṇṇasampattinti** āvunitasuttassa vaṇṇasampattiṃ. Kasmāti vuttaṃ “**tādisa**”ntiādi, tādissasseva āvutassa pākaṭabhāvatoṭi vuttaṃ hoti.

Maṇi viya karajakāyo paccavekkhitabbato. **Āvutasuttaṃ viya viññāṇaṃ** anupavisitvā ṭhitattā. **Cakkhumā puriso viya vipassanālābhī bhikkhu** sammadeva tassa dassanato, tassa purisassa maṇino āvibhūtakālo viya tassa bhikkhuno kāyassa āvibhūtakālo tannissayassa pākaṭabhāvato. Suttasāvibhūtakālo viya tesam dhammānamāvibhūtakālo tannissitassa pākaṭabhāvatoṭi ayamettha upamāsampādane kāraṇavibhāvanā, “**āvutasuttaṃ viya vipassanāññāṇa**”nti katthaci pāṭho, “idañca viññāṇa”nti vacanato pana “viññāṇa”nti pāṭhova sundarataro, “vipassanāviññāṇa”nti vā bhavitabbaṃ. **Vipassanāññāṇaṃ abhinīharitvāti** vipassanāññāṇābhimukhaṃ cittaṃ nīharitvā.

Tatrāti veḷuriyamaṇimhi. **Tadārammaṇānanti** kāyasaññitarūpadhammārammaṇānaṃ. “Phassapañcamakāna”ntiādi padattayassetam visesanaṃ atthavasā līngavibhattivacanavipariṇāmoti katvā pacchimapaḍassāpi visesanabhāvato. Phassapañcamakaggahaṇena, sabbacittacetasiaggahaṇena ca gahitadhammā vipassanācittuppādapariyāpannā evāti daṭṭhabbaṃ. Evañhi tesam vipassanāviññāṇagatikattā āvutasuttaṃ viya “vipassanāviññāṇa”nti heṭṭhā vuttavacanaṃ avirodhitam hoti. Kasmā pana vipassanāviññāṇasseva gahaṇanti? “Idañca me viññāṇaṃ ettha sitam ettha paṭibaddha”nti iminā tasseva vacanato. “Ayaṃ kho me kāyo”tiādinā hi vipassanāññāṇena vipassitvā “tadeva vipassanāññāṇasampayuttaṃ viññāṇaṃ ettha sitam ettha paṭibaddha”nti nissayavisayādivasena manasī karoti, tasmā tasseva idha gahaṇam sambhavati, nāññassāti daṭṭhabbaṃ. Tenāha “**vipassanāviññāṇasseva vā āvibhūtakālo**”ti. Dhammasaṅgahādīsu (dha. sa. 2 ādayo) desitanayena pākaṭabhāvato cettha phassapañcamakānaṃ gahaṇam, niravasesapariggahaṇato sabbacittacetasiḥkānaṃ, yathārutaṃ desitavasena padhānabhāvato vipassanāviññāṇassāti veditabbaṃ. Kiṃ panete paccavekkhaṇaṇāṇassa āvibhavanti, udāhu puggalassāti? Paccavekkhaṇaṇāṇasseva, tassa pana āvibhūtattā puggalassāpi āvibhūtā nāma honti, tasmā “**bhikkhuno āvibhūtakālo**”ti vuttanti.

Yasmā panidaṃ vipassanāñāṇaṃ maggañāṇānantaraṃ hoti, tasmā lokiyābhiññānaṃ parato, chaṭṭhabhiññāya ca purato vattabbaṃ, atha kasmā sabbābhiññānaṃ puratova vuttanti codanālesam dassetvā pariharanto “**idañca vipassanāñāṇa**”ntiādimāha. “‘Idañca maggañāṇānantara’nti hi iminā yathāvuttaṃ codanālesam dasseti. Tattha “**maggañāṇānantara**”nti sikhāppattavipassanābhūtaṃ gotrabhuññānaṃ sandhāya vuttaṃ. Tadeva hi arahattamaggassa, sabbesaṃ vā maggaphalānāmanantaraṃ hoti, padhānato pana tabbacaneneva sabbassapi vipassanāñāṇassa gahaṇaṃ daṭṭhabbaṃ avisesato tassa idha vuttattā. Maggasaddena ca arahattamaggasseva gahaṇaṃ tassevābhiññāpariyāpannattā, abhiññāsambandhena ca codanāsambhavato. Lokiyābhiññānaṃ purato vuttaṃ vipassanāñāṇaṃ tāsam nānantaratāya anupakāraṃ, āsavakkhayañāṇasaṅkhātāya pana lokuttarābhiññāya purato vuttaṃ tassā anantaratāya upakāraṃ, tasmā idaṃ lokiyābhiññānaṃ parato, chaṭṭhābhiññāya ca purato vattabbaṃ. Kasmā pana upakāraṭṭhāne tathā avatvā anupakāraṭṭhāneva bhagavatā vuttanti hi codanā sambhavati. “**Evam santepī**”tiādi parihāradassanaṃ. Tattha **evam santepī**ti yadipi ñāṇānupubbīyā maggañāṇassa anantaratāya upakāraṃ hoti, evaṃ satipīti attho.

Abhiññāvāreti chaḷabhiññāvasena vutte desanāvāre. **Etassa antarā vāro natthīti** pañcasu lokiyābhiññāsu kathitāsu ākaṅkheyyasuttādīsu (ma. ni. 1.65) viya chaṭṭhābhiññāpi avassaṃ kathetabbā abhiññālakkaṇabhāvena tappariyāpannato, na ca vipassanāñāṇaṃ lokiyābhiññānaṃ, chaṭṭhābhiññāya ca antarā pavesetvā kathetabbā anabhiññālakkaṇabhāvena tadapariyāpannato. Iti etassa vipassanāñāṇassa tāsamabhiññānaṃ antarā vāro natthi, tasmā tattha avasarābhāvato idheva rūpāvacaracatutthajjhānānantaraṃ vipassanāñāṇaṃ kathitanti adhippāyo. “**Yasmā cā**”tiādinā atthantaramāha. Tattha **ca**-saddo samuccayattho, tena na kevalaṃ vipassanāñāṇassa idha dassane tadeva kāraṇaṃ, atha kho idampīti imamatthaṃ samuccinātīti **ācariyena** (dī. ni. 1.235) vuttaṃ. Saddavidū pana īdise ṭhāne ca-saddo vā-saddattho, so ca vikappatthoti vadanti, tampi yuttameva atthantaradassane payuttattā. Attanā payujjitabbaṃ hi vijjānāntatthasseva jotakā upasagganipātā yathā magganidassane sākhaḃhaṅgā, yathā ca adissamānā jotane padīpāti evamīdisesu. Hoti cettha –

“‘Atthantaradassanaṃhi, ca saddo yadi dissati;
Samuccaye vikappe so, gahetabbo vibhāvinā’”ti.

Akatasammasanassāti hetugabbhapaḍaṃ. Tathā **katasammasanassāti** ca. “**Dibbena cakkhunā bheravampi rūpaṃ passatoti** ettha iddhividhañāṇena bheravaṃ rūpaṃ nimminivā maṃsacakkhunā passatotipi vattabbaṃ. Evampi hi abhiññālabhino apariññātavatthukassa bhayaṃ santāso uppajjati uccavālikavāsīmahānāgattherassa viyā”ti ācariyena (dī. ni. 1.235) vuttaṃ. Yathā cettha, evaṃ **dibbāya sotadhātuyā bheravaṃ saddaṃ suṇatoti** etthāpi iddhividhañāṇena bheravaṃ saddaṃ nimminivā maṃsasotena suṇatopīti vattabameva. Evampi hi abhiññālabhino apariññātavatthukassa bhayaṃ santāso uppajjati uccavālikavāsīmahānāgattherassa viya. Thero hi koñcanādasahitaṃ sabbasetam hatthināgaṃ māpetvā disvā, sutvā ca sañjātabhayasantāsoti **aṭṭhakathāsu** (vibha. aṭṭha. 2.882; ma. ni. aṭṭha. 1.81; visuddhi. 2.733) vutto. Aniccādivasena katasammasanassa dibbāya...pe... bhayaṃ santāso na uppajjatīti sambandho. **Bhayaṇodanahetu** nāma vipassanāñāṇena katasammasanātā, tassa, tena vā sampādanatthanti attho. **Idhevāti** catutthajjhānānantarameva. “**Apicā**”tiādinā yathāpāṭhaṃ yuttataranayaṃ dasseti. Vipassanāya pavattaṃ pāmojjapītipassaddhiparamparāgatasukhaṃ **vipassanāsukhaṃ**. **Pāṭiyekanti** jhānābhiññādīhi asammissaṃ viṣuṃ bhūtaṃ **sandiṭṭhikaṃ sāmāññaphalaṃ**. Tenāha bhagavā **dhammapade** –

“‘Yato yato sammasati, khandhānaṃ udayabbayaṃ;
Labhatī pītipāmojjaṃ, amataṃ taṃ vijānata’”ntiādi. (dha. pa. 374);

Idhāpi vuttaṃ “‘idampi kho mahārāja sandiṭṭhikaṃ sāmāññaphalaṃ...pe... pañītataṛaṅcā’”ti, tasmā pālīyā saṃsandanato imameva nayaṃ yuttataranti vadanti. **Āditovāti** abhiññānamādimhiyeva.

Manomayiddhiñāṇakathāvaṇṇanā

236-7. Manomayanti ettha pana **mayasaddo** aparapaññattivikārapadapūraṇanibbattiādīsu anekesvatthesu āgato. Idha pana nibbattiattheti dassetuṃ “**manena nibbattita**”nti vuttaṃ. “Abhiññāmanena nibbattita”nti atthoti ācariyenāti (dī. ni. 1.236, 237) vuttaṃ. Visuddhimagge (visuddhi. 2.397) pana “adhiṭṭhānāmanena nimmitattā manomaya”nti āgataṃ, abhiññāmanena, adhiṭṭhānāmanena cāti ubhayathāpi nibbattattā ubhayampetaṃ yuttameva. **Aṅgaṃ** nāma hatthapādāditaṃsaṃsamudāyaṃ, **paccāṅgaṃ** nāma kapparaṇṇuādi tasmim tasmim samudāye avayavaṃ. “Ahīnindriya”nti ettha paripuṇṇatāyeva ahīnatā, na tu appaṇṇatā, paripuṇṇabhāvo ca cakkhusotādīnaṃ saṅghānavaseneva. Nimmitarūpe hi pasādo nāma natthīti dassetuṃ “**saṅghānavasena avikalindriya**”nti vuttaṃ, imināva tassa jīvitindriyādīnampi abhāvo vuttoti daṭṭhabbaṃ. **Saṅghānavasenāti** ca kamaladalādisadisasaṅghānamattavasena, na rūpābhigghātārahabhūtappasādādiindriyavasena. “Sabbaṅgapaccāṅgiṃ ahīnindriya”nti vuttamevattham samatthento “**iddhimatā**”tiādīmāha. **Aviddhakaṇṇoti** kulacārittavasena kaṇṇālaṅkārapīḷandhanattham avijjhitaṅgaṇṇo, nidassanamattametam. Tenāha “**sabbākārehī**”ti, vaṇṇasaṅghānāvayavavisesādisabbākārehīti attho. **Tenāti** iddhimatā.

Ayamevattho pāḷiyampi vibhāvitoti āha “**muñjamhā īsikantiādiupamāttayampi hi...pe... vutta**”nti. Katthaci pana “**muñjamhā īsikantiādi upamāmatam. Yampi hi sadisabhāvadassanatthameva vutta**”nti pāḥo dissati. Tattha “**upamāmatā**”nti iminā atthantaradassanaṃ nivatteti, “**yampi hī**”tiādīnā pana tassa upamābhāvaṃ samattheti. Niyatānapekkhena ca yaṃ-saddena “muñjamhā īsika”ntiādivacanameva paccāmasati. **Sadisabhāvadassanatthamevāti** saṅghānatopi vaṇṇatopi avayavavisesatopi sadisabhāvadassanatthameveva. Kathaṃ sadisabhāvoti vuttaṃ “**muñjasadisā eva hī**”tiādi. **Muñjaṃ** nāma tiṇaviseso, yena kocchādīni karonti. “Pavāheyyā”ti vacanato anto ṭhitā eva īsikā adhippetāti dasseti “**anto īsikā hotī**”ti iminā. **Īsikāti** ca kaḷīro. **Visuddhimaggaṭṭikāyaṃ** pana “kaṇḍa”nti (visuddhi. 1.2399) vuttaṃ. **Vaṭṭāya kosiyāti** parivaṭṭulāya asikosiyā. **Patthaṭṭāyāti** paṭṭikāya. Karaḍitabbo bhājetabboti **karaṇḍo**, peḷā. Karaḍitabbo jigucchitabboti **karaṇḍo**, nimmokaṃ. Idhāpi nimmokamevāti āha “**karaṇḍāti idampī**”tiādi. **Vilīvakaraṇḍo** nāma peḷā. Kasmā ahikaṅcukasseva nāmaṃ, na vilīvakaraṇḍakassāti codanaṃ sodheti “**ahikaṅcuko hī**”tiādīnā, sveva ahinā sadiso, tasmā tasseva nāmanti vuttaṃ hoti. **Visuddhimaggaṭṭikāyaṃ** pana “**karaṇḍāyāti** peḷāya, nimmokatoti ca vadantī”ti (visuddhi. 1.2399) vuttaṃ. Tattha peḷāgahaṇaṃ ahinā asadisatāya vicāretabbaṃ.

Yajjevaṃ “seyyathāpi pana mahārāja puriso ahiṃ karaṇḍā uddhareyyā”ti purisassa karaṇḍato ahiuddharaṇūpamāya ayamattho virujjheyya. Na hi so hatthena tato uddharituṃ sakkāti anuyogenāha “**tatthā**”tiādi. “Uddhareyyā”ti hi aniyamavacanepi hatthena uddharaṇasseva pākaṭattā taṃdassanamiva jātaṃ. Tenāha “**hatthena uddharamāno viya dassito**”ti. “**Ayañhī**”tiādi cittena uddharaṇassa hetudassanaṃ. Ahino nāma pañcasu ṭhānesu saṅgātiṃ nātivattanti upapattiyam, cutiyam, vissatṭhaniddokkamane, samānāṭiyā methunapaṭisevane, jīṇṇatacāpanayaneti vuttaṃ “**sajātiyaṃ ṭhito**”ti. Uragajātiyameva ṭhito pajahati, na nāgiddhiyā aññajātīrūpoti attho. Idañhi mahiddhike nāge sandhāya vuttaṃ. **Sarīraṃ khādayamānaṃ viyāti** attanoyeva tacaṃ attano sarīraṃ khādayamānaṃ viya. **Purāṇatacaṃ jigucchantoti** jīṇṇatāya katthaci muttam katthaci olambitam jīṇṇatacaṃ jigucchanto. **Catūhīti** “sajātiyaṃ ṭhito, nissāya, thāmena, jigucchanto”ti yathāvuttehi catūhi kāraṇehi. **Tatoti** kaṅcukato. **Aññenāti** attato aññena. **Cittenāti** purisassa citteneva, na hatthena. Seyyathāpi nāma puriso ahiṃ passivā “aho vatāhaṃ imaṃ ahiṃ kaṅcukato uddhareyya”nti ahiṃ karaṇḍā cittena uddhareyya, tassa evamassa “ayaṃ ahi, ayaṃ karaṇḍo, añño ahi, añño karaṇḍo, karaṇḍā tveva ahi ubbhato”ti, evameva...pe... so imamahā kāyā aññaṃ kāyaṃ abhinimmināti...pe... ahīnindriyanti ayamettha adhippāyo.

Iddhividhaññādikathāvaṇṇanā

239. Bhājanādivikatikiriyaṇissayabhūtā **suparikammakatamattikādayo viya** vikubbanakiriyaṇissayabhāvato **iddhividhaññaṃ daṭṭhabbaṃ.**

241. Pubbe nīvaraṇappahānavāre viya kantāraggahaṇaṃ akatvā kevalaṃ addhānamaggaggahaṇaṃ khemamaggadassanattaṃ. Kasmā pana khemamaggasseva dassanaṃ, na kantāramaggassa, nanu upamādassanamattametanti codanaṃ pariharanto “**yasmā**”tiādimāha. “**Appaṭibhayañhi**”tiādi pana khemamaggasseva gahaṇakāraṇadassanaṃ. Vātātapādinivāraṇattaṃ **sīse sātakaṃ katvā**. Tathā tathā pana paripuṇṇavacanaṃ upamāsampattiyā upameyyasampādanattaṃ, adhippetassa ca upameyyatthassa suviññāpanattaṃ, hetudāharaṇabhedyabhedakādisampannavacanena ca viññūjātikānaṃ cittārādhanaṃ veditabbaṃ. Evaṃ sabbattha. **Sukhaṃ vavatthapetīti** akicchaṃ akasirena sallakkheti, paricchindati ca.

243. Mando uttānaseyyakādārakopi “daharo”ti vuccatīti tato visesanattaṃ “yuvā”ti vuttanti mantvā yuvasaddena visesitabbameva daharasaddassa atthaṃ dassetuṃ “**taruṇo**”ti vuttaṃ. Tathā yuvāpi koci anicchanako, anicchanato ca amaṇḍana-jātikoti tato visesanattaṃ “maṇḍana-jātikoti”tiādi vuttanti mantvā maṇḍana-jātikādisaddena visesitabbameva yuvasaddassa atthaṃ dassetuṃ “**yobbannena samannāgato**”ti vuttaṃ. Pāliyañhi yathākkamaṃ padattayassa visesitabbavisesakabhāvena vacanato tathā saṃvaṇṇanā katā, itarathā ekakenāpi padena adhippetatthādhigamikā saparivārā saṃvaṇṇanāva kātabbā siyāti. “Maṇḍanapakatiko”ti vuttameva vivarituṃ “**divasassā**”tiādimāha. **Kaṇikasaddo** dosapariyāyo, doso ca nāma kāḷatilakādīti dasseti “**kāḷatilakā**”tiādinā. Kāḷatilappamāṇā bindavo **kāḷatilakāni, kāḷā** vā kammāsā, ye “sāsapabījīkā”tipi vuccanti. Tilappamāṇā bindavo **tilakāni. Vaṅgaṃ** nāma viyaṅgaṃ vipariṇāmitamaṅgaṃ. Yobbanna-pīlakādayo **mukhadūsipīlakā**, ye “kharapīlakā”tipi vuccanti. **Mukhanimittanti** mukhacchāyaṃ. Mukhe gato doso **mukhadoso**. Lakkhaṇavacanaṃ attametam mukhe adosassapi pākātabhāvassa adhippetatā, yathā vā mukhe doso, evaṃ mukhe adosopi **mukhadosoti** saralopena vutto sāmāññaniddesatopi anekatthassa viññātabbattā, pisaddalopena vā ayamattho veditabbo. Avuttopi hi attho sampiṇḍanavasena vutto viya viññāyati, mukhadoso ca mukhaadoso ca **mukhadosoti** ekadesasarūpekasesanayenapettha attho daṭṭhabbo. Evañhi atthassa paripuṇṇatāya “paresaṃ soḷasavidhaṃ cittaṃ pākātaṃ hoti”ti vacanaṃ samatthitaṃ hoti. Tenetaṃ vuccati –

“Vattabbassāvasiṭṭhassa, gāho nidassanādinā;
Apisaddādilopena, ekasesanayena vā.

Asamāne sadde tidhā, catudhā ca samānake;
Sāmāññaniddesatopi, veditabbo vibhāvinā”ti.

“Sarāgaṃ vā citta”ntiādinā pāliyaṃ vuttaṃ **soḷasavidhaṃ cittaṃ**.

245. Pubbenivāsaññāpamāyanti pubbenivāsaññānaṃ, pubbenivāsaññāne vā dassitāya upamāya. Kasmā pana pāliyaṃ gāmattayameva upamāne gahitanti codanaṃ sodhetuṃ “**taṃ divasa**”ntiādi vuttaṃ. Taṃ divasaṃ katakiriyā nāma pākātikasattasāpi yebhuyyena pākātaṃ hoti. Tasmā taṃ divasaṃ gantuṃ sakkuṇeyyaṃ gāmattayameva bhagavatā gahitaṃ, na taduttarīti adhippāyo. Kiñcāpi pāliyaṃ taṃdivasaggahaṇaṃ natthi, gāmattayaggahaṇena pana tadaheva katakiriyā adhippetatīti mantvā atthakathāyaṃ taṃdivasaggahaṇaṃ katanti daṭṭhabbaṃ. Taṃdivasagatagāmattayaggahaṇeneva ca mahābhinihārehi aññesampi pubbenivāsaññānalābhīnaṃ tīsupi bhavesu katakiriyā yebhuyyena pākātaṃ hotīti dīpitanti daṭṭhabbaṃ. Etadatthampi hi gāmattayaggahaṇanti. **Tīsu bhavesu katakiriyāyāti** abhisamparāyesu pubbe dīṭṭhadhamme pana idāni, pubbe ca katakicassa.

247. Pāliyaṃ **rathikāya vīthiṃ sañcaranteti** aññāya rathikāya aññaṃ rathim sañcaranteti attho, tena aparāparaṃ sañcaraṇaṃ dassitanti āha “**aparāparaṃ sañcarante**”ti, taṃtaṃkiccavasena ito cito ca sañcaranteti vuttaṃ hoti, ayamevattho rathivīthisaddānamekatthattā. **Siṅghāṭakamhīti** vīthicatukke. **Pāsādo viya bhikkhussa karajakāyo daṭṭhabbo** tattha patiṭṭhitassa daṭṭhabbadassanasiddhito. Maṃsacakkhumato hi dibbacakkhusamadhigamo. Yathāha “maṃsacakkhussa uppādo, maggo dibbassa cakkhuno”ti (itivu. 61). **Cakkhumā puriso viya ayameva dibbacakkhum patvā thito bhikkhu**

daṭṭhabbassa dassanato. Gehaṃ pavisanto, tato nikkhamanto viya ca mātukucchim paṭisandhivasena pavisanto, tato ca vijātivāsena nikkhamanto mātukucchiyā gehasadisattā. Tathā hi vuttam “mātarāṃ kuṭikaṃ brūsi, bhariyaṃ brūsi kulāvaka”nti (saṃ. ni. 1.19). Ayaṃ aṭṭhakathāmuttako nayo – gehaṃ pavisanto viya attabhāvaṃ upapajjanavasena okkamanto, gehā nikkhamanto viya ca attabhāvato cavanavasena apakkamanto attabhāvassa gehasadisattā. Vuttañhi “gahakāraka diṭṭhosi, puna gehaṃ na kāhasi”ti (dha. pa. 154).

Aparāparam sañcaraṇakasattāti punappunaṃ saṃsāre paribbhamanakasattā.

Abbhokāsattāneti ajjhokāsadesabhūte. **Majjhete** nagarassa majjhabhūte **siṅghāṭake**. **Tattha tatthāti** tasmim tasmim bhavakadesa. **Nibbattasattāti** uppajjamānakasattā. Iminā hi tasmim tasmim bhava jātasaṃvaddhe satte vadati, “aparāparam sañcaraṇakasattā”ti pana etena tathā aniyamitakālike sādharmaṇasatte. Evañhi tesam yathākkamaṃ sañcaraṇakasanninnakajanopamatā upapannā hotīti. **Tīsu bhavesu nibbattasattānaṃ āvibhūtakāloti** ettha pana vuttappakārānaṃ sabbesampi sattānaṃ aniyamato gahaṇaṃ veditabbaṃ.

Nanu cāyaṃ dibbacakkhukathā, atha kasmā “tīsu bhavesū”ti catuvokārabhavassāpi saṅgaho kato. Na hi so arūpadhammārammaṇoti anuyogaṃ pariharanto “**idañcā**”tiādimāha. Tattha “**idanti** tīsu bhavesu nibbattasattānanti idaṃ vacana”nti (dī. ni. 1.247) ayamettha ācariyassa matī, evaṃ sati aṭṭhakathācariyehi aṭṭhakathāyameva yathāvutto anuyogo pariharitoti. Ayaṃ panettha amhākaṃ khanti – nanu cāyaṃ dibbacakkhukathā, atha kasmā “dibbena cakkhunā visuddhena atikkantamānusakena satte passati cavamāne upapajjamāne”tiādinā avisesato catuvokārabhavūpagassāpi saṅgaho kato. Na hi so arūpadhammārammaṇoti anuyogaṃ pariharanto “**idañcā**”tiādimāha. Tattha **idanti** “satte passati cavamāne upapajjamāne”tiādivacanāṃ. Evañhi sati aṭṭhakathācariyehi pāḷiyameva yathāvutto anuyogo pariharitoti. Yadaggena so pāḷiyaṃ pariharito, tadaggena aṭṭhakathāyampi tassā atthavaṇṇanābhāvato. **Desanāsukhatthamevāti** kevalaṃ desanāsukhatthaṃ eva avisesena vuttam, na pana catuvokārabhavūpagānaṃ dibbacakkhussa āvibhāvasabbhāvato. “Ṭhapetvā arūpabhava”nti vā “dvīsu bhavesū”ti vā satte passati kāmāvacarabhavato, rūpāvacarabhavato ca cavamāneti vā kāmāvacarabhava, rūpāvacarabhava ca upapajjamāneti vā vuccamānā hi desanā yathārahaṃ bhedyabhedakādivibhāvanena sukhāsukhāvabodhā ca na hoti, avisesena pana evameva vuccamānā sukhāsukhāvabodhā ca. Desetum, avabodhetuñca sukaratāpayojanañhi “desanāsukhattha”nti vuttam. Kasmāti āha “**āruppe...pe... natthi**”ti, dibbacakkhugocarabhūtānaṃ rūpadhammānamabhāvato vuttam hoti.

Āsavakkhayaññakathāvaṇṇanā

248. Idha vipassanāpādakaṃ catutthajjhānacittaṃ veditabbaṃ, na lokiyābhiññāsu viya abhiññāpādakaṃ. **Vipassanāpādakanti** ca vipassanāya padaṭṭhānabhūtaṃ, vipassanā ca nāmesā tividhā vipassakapuggalabhedena mahābodhisattānaṃ vipassanā, paccekabodhisattānaṃ vipassanā, sāvakānaṃ vipassanā cāti. Tattha mahābodhisattānaṃ, paccekabodhisattānañca vipassanā cintāmayaññānasambandhikā sayambhuññānabhūtā, sāvakānaṃ pana sutamayaññānasambandhikā paropadesasambhūtā. Sā “ṭhapetvā nevaññānāsaññāyatanaṃ avasesarūpārūpajjhānānaṃ aññatarato vuṭṭhāyā”tiādinā anekadhā, arūpamukhavasena catudhātuvavatthāne vuttānaṃ tesam tesam dhātupariggahamukhānañca aññataramukhavasena anekadhā ca **visuddhimagge** (visuddhi. 2.664) nānāyato vibhāvītā, mahābodhisattānaṃ pana catuvīsatiakoṭisatasahassamukhena pabhedagamanato nānāyamaṃ sabbaññūtaññānasannissayassa ariyamaggaññānassa adhiṭṭhānabhūtaṃ pubbabhāgaññāgabbhaṃ gaṇhāpentaṃ paripākaṃ gacchantaṃ paramagambhīraṃ saṅhasukhumataram anaññāsādhāraṇaṃ vipassanāññānaṃ hoti, yaṃ aṭṭhakathāsu “mahāvajirañña”nti vuccati, yassa ca pavattivibhāgena catuvīsatiakoṭisatasahassappabhedassa pādakabhāvena samāpajjiyamānā catuvīsatiakoṭisatasahassasaṅkhyā devasikaṃ satthu vaḷaṅjanasamāpattiyo vuccanti. Svāyaṃ buddhānaṃ vipassanācāro **paramatthamaññusāyaṃ visuddhimaggavaṇṇanāyaṃ** (visuddhi. 1.144) uddesato ācariyena dassito, tato so atthikehi gahetabbo. Idha pana sāvakānaṃ vipassanāva adhippetā.

“**Āsavānaṃ khayaññāyā**”ti idaṃ kiriyāpayoḥjanabhūte tadatthe sampadānavacanaṃ, tasmā asatipi payoḥjanavācāke payoḥjanavaseneva attho veditabboti āha “**khayaññānanibbattanatthāyā**”ti. Evamīdisesu. Nibbānaṃ, arahattamaggo ca ukkaṭṭhaniddesena idha **khayo** nāma, tattha ñānaṃ **khayaññānaṃ**, tassa nibbattanasaṅkhāto attho payoḥjanaṃ, tadatthāyāti attho. Khepeti pāpadhamme samucchindatīti **khayo**, maggo. So pana pāpakkhayo āsavakkhayena vinā natthi, tasmā “khaye ñāna”nti (dha. sa. suttantadukamātikā 148) ettha khayaggahaṇena āsavakkhayova vuttoti dasseti “**āsavānaṃ khayō**”ti iminā. **Anuppāde ñānanti** āsavānāmanuppādabhūte ariyaphale ñānaṃ. Khīyimsu āsavā etthāti **khayo**, phalaṃ. Samitapāpatāya **samaṇo**, samitapāpatā ca nippariyāyato arahattaphalenevāti āha “**āsavānaṃ khayā samaṇo hotīti ettha phala**”nti. **Khayāti** ca khīnattāti attho. Khīyanti āsavā etthāti **khayo**, nibbānaṃ. “Āsavakkhayā”ti pana samāsavasena dvibhāvaṃ katvā vuttattā “āsavānaṃ khayō”ti padassa atthuddhāre āsavakkhayapadaggahaṇaṃ.

“**Paravajjānupassissā**”tiādigāthā dhammapade (dha. pa. 253). Tattha **ujjhānasaññinoti** garahasaññino. **Arāti** dūrā. “Arā siṅghāmi vārija”ntiādisu (saṃ. ni. 1.234; jā. 1.6.116) viya hi dūratthoḥyaṃ nipāto. “Ārā”tipi pāṭho. Arāsaddo viya ārāsaddopi dūratthe eko nipātoti veditabbo. Tadeva hi padaṃ saddasatthe udāhaṭaṃ. Kāmañca **dhammapadaṭṭhakathāyaṃ** “arahattamaggasaṅkhātā ārā dūraṃ gatova hotī”ti (dha. pa. aṭṭha. 2.253) vuttaṃ, tathāpi āsavavaḍḍhiyā saṅkhāre vaḍḍhento viśaṅkhārato suvidūradūro, tasmā “ārā so āsavakkhayā”ti ettha āsavakkhayapadaṃ viśaṅkhārādhivacanaṃpi sambhavatīti āha “**nibbāna**”nti. Khayanaṃ **khayo**, āsavānaṃ khaṇanirodho. Sesam tassa pariyāyavacanaṃ. Bhaṅgo āsavānaṃ khayoti vuttoti yojana. Idha pana nibbānampi maggopi avinābhāvato. Na hi nibbānāmanārabbha maggeneva āsavānaṃ khayō hotīti.

Tanninnanti tasmim āsavānaṃ khayaññāne ninnam. Sesam tasseva vevacanaṃ. Pāliyaṃ **idam dukkhanti** dukkhassa ariyasaccassa paricchinditvā, anavasesetvā ca tadā tassa bhikkhuno paccakkhato gahitabhāvadassananti dassetuṃ “**ettaka**”ntiādi vuttaṃ. Tattha hi **ettakaṃ dukkhanti** tassa paricchijja gahitabhāvadassanaṃ. **Na ito bhiyyoti** anavasesetvā gahitabhāvadassanaṃ. Tenāha “**sabbampi dukkhasacca**”ntiādi. Sarasalakkhaṇapaṭivedhavasena pajānanaṃ yathābhūtaṃ pajānanaṃ nāmāti dasseti “**sarasalakkhaṇapaṭivedhenā**”ti iminā. **Rasoti** sabhāvo rasiṭabbo jānītabboti katvā, attano raso **saraso**, so eva lakkhaṇaṃ, tassa asammoḥato paṭivijjhanenāti attho. Asammohato paṭivijjhanañca nāma yathā tasmim ñāne pavatte pacchā dukkhasaccassa sarūpādiparicchede sammoho na hoti, tathā tassa pavattiyeva. Tena vuttaṃ “**yathābhūtaṃ pajānāti**”ti. “**Nibbattika**”nti iminā “dukkhaṃ samudeti etasmāti **dukkhasamudayo**”ti nibbānaṃ dasseti. **Tadubhayanti** dukkhaṃ, dukkhasamudayo ca. **Yaṃ thānaṃ patvāti** yaṃ nibbānaṃ maggassa ārammaṇapaccayaṭṭhena kāraṇabhūtaṃ āgama. **Thānanti** hi kāraṇaṃ vuccati tiṭṭhati ettha phalaṃ tadāyattatāyāti katvā. **Tadubhayaṃ patvāti** ca tadubhayavato puggalassa tadubhayassa patti viya vuttā. Puggalasseva hi ārammaṇakaraṇavasena nibbānappatti, na tadubhayassa. Apica **patvāti** pāpuṇanahetu, puggalassa ārammaṇakaraṇavasena samāpajjanatoti attho. Asamānakattuke viya hi samānakattukepi tvāpaccayassa hetvatthe pavatti saddasatthesu pākaṭā. **Appavattīti** appavattinimittaṃ “na pavattati tadubhayametenā”ti katvā, appavattiṭṭhānaṃ vā “na pavattati tadubhayamethā”ti katvā, anena ca “dukkhaṃ nirujjhati ettha, etenāti vā **dukkhanirodho**”ti nibbānaṃ dasseti, dukkhasamudayassa pana gahaṇaṃ taṃnibbattakassa nirujjhanato tassāpi nirujjhanadassanattanti daṭṭhabbaṃ. Nibbānapadeyeva ta-saddo nivattatīti ayaṃ-saddo puna vutto. Sabbanāmikañhi padaṃ vuttassa vā liṅgassa gāhakaṃ, vuccamānassa vā. **Tassāti** dukkhanirodhassa. **Sampāpakanti** sacchikaraṇavasena sammadeva pāpakaṃ, etena ca “dukkhanirodhaṃ gamayati, gacchati vā etāyāti **dukkhanirodhagāminī**, sāyeva paṭipadā **dukkhanirodhagāminipaṭipadā**”ti nibbānaṃ dasseti.

Kilesavasenāti āsavasaṅkhātakilesavasena. Tadeva āsavapariyāyena dassento puna āha, tasmā na ettha punaruttidosoti adhippāyo. Pariyāyadesanābhāvo nāma hi āveṇiko buddhadhammoti heṭṭhā vuttovāyamattho. Nanu ca āsavānaṃ dukkhasaccapariyāyova atthi, na sesasaccapariyāyo, atha kasmā sarūpato dassitasaccāniyeva kilesavasena pariyāyato puna dassento evamāhāti vuttanti? Saccam, taṃsambandhattā pana sesasaccānaṃ taṃsamudayādipariyāyopi labbhatīti katvā evaṃ vuttanti

veditabbaṃ. Dukkhasaccapariyāyabhūtaāsavasambandhāni hi āsavasamudayādīnīti, saccāni dassentotipi yojetabbaṃ. “Āsavānaṃ khayaññāyā”ti āradhattā cettha āsavānameva gahaṇaṃ, na sesakilesānaṃ tathā anāradhattāti daṭṭhabbaṃ. Tathā hi “kāmasavāpi cittaṃ vimuccatī”tiādīnā (dī. ni. 1.248; ma. ni. 1.433; 3.19) āsavavimuttasīseneva sabbakilesavimutti vuttā. “Idaṃ dukkhanti yathābhūtaṃ pajānātī”tiādīnā missakamaggova idha kathito lokiyavipassanāya lokuttaramaggassa missakattāti vuttaṃ “**saha vipassanāya koṭippattaṃ maggaṃ kathesī**”ti. “Jānato passato”ti iminā tayopi pariññāsacchikiriyābhāvanābhissamayā vuttā catusaccapajānanāya eva catukiccasiddhito, pahānābhissamayo pana pārisesato “vimuccatī”ti iminā vuttoti āha “**maggakkhaṇaṃ dasseti**”ti. Cattāri hi kiccāni catusaccapajānanāya eva siddhāni. Yathāha “taṃ kho panidaṃ dukkhaṃ ariyasaccaṃ pariññātanti me bhikkhave pubbe ananussutesu dhammesu cakkhuṃ udapādī”tiādi (saṃ. ni. 5.1081; mahāva. 15; paṭi. ma. 2.29). Ayaṃ **aṭṭhakathā**muttako nayo – **jānato passatoti** ca hetuniddeso, “jānanahetu passanahetu kāmasavāpi cittaṃ vimuccatī”tiādīnā yojanā. Kāmañcetta jānanapassanakiriyānaṃ, vimuccanakiriyāya ca samānakālatā, tathāpi dhammānaṃ samānakālikānampi paccayapaccayuppannatā saha jātādikoṭiyā labbhatīti, hetugabbhavisesanatādassanametantipi vadanti.

Bhavāsavaggahaṇena cettha bhavarāgassa viya bhavadiṭṭhiyāpi samavarodhoti diṭṭhāsavassāpi saṅgaho daṭṭhabbo, adhunā pana “diṭṭhāsavāpi cittaṃ vimuccatī”ti katthaci pāṭho dissati, so na porāṇo, pacchā pamādalikhitoti vedītabbo. **Bhayabheravasuttasamvaṇṇanā**dīsu (ma. ni. aṭṭha. 1.54) anekāsūpi tatheva samvaṇṇitattā. Ettha ca kiñcāpi pāliyaṃ saccapaṭivedho aniyamitapuggalassa aniyamitakālavasena vutto, tathāpi abhisamayakāle tassa paccuppannatam upādāya “evaṃ jānato evaṃ passato”ti vattamānakālaniddeso kato, so ca kāmaṃ kassaci maggakkhaṇato paraṃ yāvajjatanā atītakāliko eva, sabbapaṭhamam panassa atītakālikattam phalakkhaṇena vedītabbanti āha “**vimuttasminti iminā phalakkhaṇa**”nti. **Paccavekkhaṇaññānti** phalapaccavekkhaṇaññānaṃ tathā ceva vuttattā. Taggahaṇena pana tadavinābhāvato sesāni niravasesāni gahetabbāni, ekadesāni vā aparipunṇāyapi paccavekkhaṇāya sambhavato. “**Khīṇā jāti**”tiādīhi padehi “nāparaṃ itthattāyā”ti padapariyosānehi. **Tassāti** paccavekkhaṇaññānaṃ. **Bhūminti** pavattiṭṭhānaṃ. Nanu ca “vimuttasmim vimutta”nti vuttaṃ phalameva tassa ārammaṇasaṅkhātā bhūmi, atha kathaṃ “khīṇā jāti”tiādīhi tassa bhūmidassananti codanaṃ sodhetuṃ “**tena hī**”tiādi vuttaṃ. Yasmā pana pahīnakilesapaccavekkhaṇena vijjāmānassāpi kamma āyatim appaṭisandhikabhāvato “khīṇā jāti”ti pajānāti, yasmā ca maggapaccavekkhaṇādīhi “vusitaṃ brahmacariya”ntiādīni pajānāti, tasmā “khīṇā jāti”tiādīhi tassa bhūmidassananti vuttaṃ hoti. “Tena ṇāṇena”ti hi yathārutato, avinābhāvato ca gahitena pañcavidhena paccavekkhaṇaññānāti attho.

“Khīṇā jāti”ti ettha sotujanānaṃ suviññāpanattham parammukhā viya codanaṃ samuṭṭhāpeti “**katamā panā**”tiādīnā. Yena panādhippāyena codanā katā, tadadhippāyaṃ pakāsetvā parihāraṃ vattukāmo “**na tāvassā**”tiādīmāha. “Na tāva...pe... vijjāmānattā”ti vakkhamānameva hi atthaṃ manasi katvā ayaṃ codanā samuṭṭhāpitā, tattha **na tāvassa atītā jāti khīṇāti** assa bhikkhuno atītā jāti, na tāva maggabhāvanāya khīṇā. Tattha kāraṇamāha “**pubbeva khīṇattā**”ti, maggabhāvanāya purimatarameva nirujjhanavasena khīṇattāti adhippāyo. Na anāgatā assa jāti khīṇā maggabhāvanāyāti yojanā. Tattha kāraṇamāha “**anāgate vāyāmābhāvato**”ti, idaṅca anāgatabhāvasamāññameva gahetvā lesena codanādhippāyavibhāvanattham vadati, na anāgatavisesam anāgate maggabhāvanāya khepanapayogābhāvato attho. Vijjāmāneyeva hi payogo sambhavati, na avijjāmāneti vuttaṃ hoti. Anāgataviseso panettha adhippeto, tassa ca khepane vāyāmopi labbhateva. Tenāha “**yā pana maggassā**”tiādi. **Anāgatavisesoti** ca abhāvite magge uppajjanāraho anantarajātibhedo vuccati. Na paccuppannā assa jāti khīṇā maggabhāvanāyāti yojanā. Tattha kāraṇamāha “**vijjāmānattā**”ti, ekabhavapariyāpannatāya vijjāmānattāti attho. Tattha tattha bhava paṭhamābhiniabbatilakkhaṇā hi jāti. “Yā panā”tiādīnā pana maggabhāvanāya kilesahetuvināsanamukhena anāgatajātiyā eva khīṇābhāvo pakāsitoti daṭṭhabbaṃ. **Ekacatupañcavokārabhavesūti** bhavattayaggahaṇaṃ vuttanayena anavasesato jātiyā khīṇābhāvadassanattham, pubbapadadvayepettha uttarapadalopo. **Ekacatupañcakkhandhappabhedāti** etthāpi eseva nayo. “**Taṃ so**”tiādi “kathāṅca naṃ pajānātī”ti codanāya sodhanāvacaṇaṃ. Tattha **tanti** yathāvuttaṃ jātim. **Soti** khīṇāsavo bhikkhu. **Paccavekkhitvāti**

pajānanāya pubbabhāge pahīnakilesapaccavekkhaṇadassanaṃ. Evañca katvā paccavekkhaṇaparamparāya tathā pajānanā siddhāti daṭṭhabbaṃ. Paccavekkhaṇantaravibhāvanatthameva hi “**jānanto pajānāti**”ti vattamānavacanadvayaṃ vuttaṃ, jānanto hutvā, jānanahetu vā pajānāti nāmāti attho.

Brahmacariyavāso nāma ukkaṭṭhaniddesato maggabrahmacariyassa nibbattanamevāti āha “**parivuttha**”nti, samantato niravasesena vasitaṃ paricīṇanti attho. Kasmā panidaṃ so atītakālavasena pajānātīti anuyogenāha “**puthujjanakalyāṇakena hi saddhi**”ntiādi. Puthujjanakalyāṇakopi hi heṭṭhā vuttalakkhaṇo sotāpattiphalasacchikiriyāya paṭipanno nāma **dakkhiṇavibhaṅgasuttā**dīsu (ma. ni. 3.379) tathā eva vuttattā. **Vasanti nāmāti** vasantā eva nāma honti, na vutthavāsā. **Tasmāti** vutthavāsattā. Nanu ca “so ‘idaṃ dukkha’”nti yathābhūtaṃ pajānāti”tiādinā pāliyaṃ sammādiṭṭhiyeva vuttā, na sammāsaṅkappādayo, atha kasmā “**catūsu saccesu catūhi maggehi pariññāpahānasacchikiriyābhāvanāvasena soḷasavidhaṃ kiccaṃ niṭṭhāpita**”nti aṭṭhaṅgikassa maggassa sādharmaṇato vuttanti? Sammāsaṅkappādīnampi catukiccasādhanavasena pavattito. Sammādiṭṭhiyā hi catūsu saccesu pariññādikiccasādhanavasena pavattamānāya sammāsaṅkappādīnampi sesānaṃ dukkhasacce pariññābhisamayānugūṇāva pavatti, itarasaccesu ca nesam pahānābhisamayādivasena pavatti pākāṭā evāti. Dukkhanirodhamaggesu yathākkamaṃ pariññāsaṅkappādivasena pavatti yāvadeva samudayapahānatthāti katvā tadattheyeva tāsamaṃ pakkhipanena “kataṃ karaṇīya”nti padassa adhippāyaṃ vibhāvetuṃ “**tenā**”tiādi vuttaṃ. “**Dukkhamūlaṃ samucchinna**”nti imināpi tadeva pakārantarena vibhāveti.

Kasmā panettha “kataṃ karaṇīya”nti atītaniddeso katoti āha “**puthujjanakalyāṇakādayo**”tiādi. Ime pakārā **itthaṃ**, tabbhāvo **itthattanti** dasseti “**itthabhāvāyā**”ti iminā, **āya**-saddo ca sampadānatthe, tadatthāyāti attho. Te pana pakārā ariyamaggabyāpārahūtā pariññādayo idhādhippetāti vuttaṃ “**evaṃ soḷasakiccabhāvāyā**”ti. Te hi maggaṃ paccavekkhato maggānubhāvena pākāṭā hutvā upaṭṭhahanti magge paccavekkhite taṃkiccapaccavekkhaṇāyapi sukhena siddhito. Evaṃ sādharmaṇato catūsu maggesu paccēkaṃ catukiccasena soḷasakiccabhāvaṃ pakāsetvā tesupi kiccesu pahānameva padhānaṃ tadatthattā itaresaṃ pariññādīnanti tadeva visesato pakāsetuṃ “**kilesakkhayabhāvāya vā**”ti āha.

Apica purimanayena paccavekkhaṇaparamparāya paccavekkhaṇavidhiṃ dassetvā idāni padhānattā pahīnakilesapaccavekkhaṇavidhimeva dassetuṃ evaṃ vuttanti paṭṭhabbaṃ. Dutiyavikappe ayaṃ pakāro **itthaṃ**, tabbhāvo **itthattaṃ**, **āya**saddo cettha sampadānavacanassa kāriyabhūto nissakkattheti dasseti “**itthabhāvato**”ti iminā. “Imasmā evaṃ pakārā”ti pana vadanto pakāro nāma pakāravantato atthato bhedo natthi. Yadi hi so bhedo assa, tasseva so pakāro na siyā, tasmā itthaṃ-saddo pakāravantavācako, atthato pana abhedepi sati avayavāvayavitādinā bhedaparikkappānāvasena siyā kiñci bhedamatthaṃ, tasmā itthattasaddo pakāravācakoti dasseti. Ayamidha **ṭīkāyaṃ**, (dī. ni. ṭī. 1.248) **majjhimāgamaṭīkāvinayaṭīkā**dīsu (sārattha. ṭī. 1.14) ca āgatanayo.

Saddavidū pana pavattinimittānusārena evamicchanti – ayaṃ pakāro assāti **itthaṃ**, pakāravanto. Vicitrā hi taddhitavutti. Tassa bhāvo **itthattaṃ**, pakāro, imamatthaṃ dassenti “**itthabhāvato imasmā evaṃ pakārā**”ti āhāti. Paṭhamavikappepi yathārahaṃ esa nayo. **Idāni vattamānakhandhasantānāti** sarūpakathanam. **Aparanti** anāgataṃ. “**Ime pana pañcakkhandhā pariññātā tiṭṭhantī**”ti idāni pāṭho, “ime pana carimakattabhāvasaṅkhātā pañcakkhandhā pariññātā tiṭṭhantī”ti pana **majjhimāgamavinayaṭīkā**dīsu, (sārattha. ṭī. 1.14) idha ca **ṭīkāyaṃ** (dī. ni. ṭī. 1.248) ulliṅgitapāṭho. Tattha **carimakattabhāvasaṅkhātā**ti ekasantatipariyāpanabhāvena pacchimakkattabhāvakathitā. **Pariññātā**ti maggena paricchijja ṇātā. **Tiṭṭhantī**ti appatiṭṭhā anokāsā tiṭṭhantī. Etena hi tesam khandhānaṃ apariññāmūlābhāvena apatiṭṭhābhāvaṃ dasseti. Apariññāmūlikā hi patiṭṭhā, tadabhāvato pana appatiṭṭhābhāvo. Yathāha “kabaḷikāre ce bhikkhave āhāre atthi rāgo, atthi nandī, atthi taṇhā, patiṭṭhitam tattha viññānaṃ viruḷha”ntiādi (saṃ. ni. 2.64; kathā. 296; mahāni. 7). Tadupamaṃ vibhāveti “**chinnamūlakā rukkhā viyā**”ti iminā, yathā chinnamūlakā rukkhā mūlābhāvato appatiṭṭhā anokāsā tiṭṭhantī, evametepi apariññāmūlābhāvototi. Ayamettha opammaṃsandana.

Carimakacittanirodhenāti parinibbānacittanirodhena. **Anupādā**noti anindhano.

Apaṇṇattikabhāvanti yesu khandhesu vijjamānesu tathā tathā parikkappanāsiddhā paññatti, tadabhāvato tassāpi dharamānakapaññattiyā abhāvena apaññattikabhāvaṃ gamissanti. Paṇṇatti paññattīti hi atthato ekaṃ yathā “paññāsa paṇṇāsā”ti. Paññāsa paṇṇādesoti hi akkharacintakā vadanti.

249. Yebhuyyena saṃkhipati saṅkucito bhavatīti **saṅkhepo**, pabbatamatthakaṃ. Tañhi pabbatapādato anukkamena bahulaṃ saṃkhittaṃ saṅkucitaṃ hoti. Tenāha “**pabbatamatthake**”ti, pabbatasikhareti attho. Ayaṃ **aṭṭhakathā**muttako nayo – saṅkhipiyati pabbatabhāvena gaṇiyatīti saṅkhepo, pabbatariyāpanno padeso, tasmim pabbatariyāpanne padeseti atthoti. **Anāviloti** akālusiyō, sā cassa anāvilatā kaddamābhāvena hotīti āha “**nikkaddamo**”ti. Sapati apadāpi samānā gacchatīti **sippi**, khuddakā sippi **sippiyo** kā-kāraṣa ya-kāraṃ katvā, yo “muttiko”tipi vuccati. Savati pasavatīti **sambuko**, yaṃ “jalasutti, saṅkhalikā”ti ca voharanti. Samāhāre yebhuyyato napuṃsakapayogoti vuttaṃ “**sippiyasambuka**”nti. Evamīdisesu. **Sakkharā**ti mutṭhippamāṇā pāsāṇā. **Kathalānī**ti kapālakaṇḍāni. Samūhavācakassa ghaṭṭāsaddassa itthi līngassāpi dissanato “gumba”nti padassatthaṃ dasseti “**ghaṭṭā**”ti iminā.

Kāmañca “sippiyasambukampi sakkharakathalampi macchagumbampi tiṭṭhantampi carantampī”ti ettha sakkharakathalaṃ tiṭṭhatiyeva, sippiyasambukamacchagumbāni carantipi tiṭṭhantipi, tathāpi sahacaraṇanayena sabbāneva caranti viya evaṃ vuttanti atthaṃ dassento “**tiṭṭhantampi carantampīti etthā**”tiādīmāha. Tattha hi “**sakkharakathalaṃ tiṭṭhatiyevā**”tiādīnā yathāsambhavamatthaṃ dasseti, “**yathā panā**”tiādīnā pana sahacaraṇanayaṃ. **Pana**-saddo arucisaṃsūcane, tathāpīti attho. **Antarantarā**ti bahūnaṃ gāvīnamantarantarā ṭhitāsu gāvīsū vijjamānāsūpi. **Gāvoti** gāvīyo. **Itarāpīti** ṭhitāpi nisinnāpi. **Carantīti vuccanti** sahacaraṇanayena. **Tiṭṭhantamevā**tiādīsū ayamadhippāyo – sippiyasambukamacchagumbānaṃ caraṇakiriyāyapi yogato ṭhānakiriyāya anekantattā ekantato tiṭṭhantameva na kadācīpi carantaṃ sakkharakathalaṃ upādāya sippiyasambukampi macchagumbampi tiṭṭhantanti vuttaṃ, na tu tesam ṭhānakiriyamupādāya. Tesam pana caraṇakiriyamupādāya “carantampī”ti pi-saddalopo hettha daṭṭhabbo. **Itarampi dvayanti** sippiyasambukamacchagumbaṃ padavasena evaṃ vuttaṃ. **Itarāñca dvayanti** sippiyasambukamacchagumbameva. **Carantanti vuttanti** etthāpi tesam ṭhānakiriyamupādāya “tiṭṭhantampī”ti pi-saddalopo, evamettha aṭṭhakathācariyehi sahacaraṇanayo dassito, ācariyadhammapālatterena pana yathālābhanayopi. Tathā hi vuttaṃ “kim vā imāya sahacariyāya, yathālābhaggahaṇaṃ panettha daṭṭhabbaṃ. Sakkharakathalassa hi vasena tiṭṭhantanti, sippisambukassa macchagumbassa ca vasena tiṭṭhantampi carantampīti evaṃ yojanā kātabbā”ti (dī. ni. ṭī. 1.249). Alabbhamānassāpi atthassa sahayogīvasena desanāmattaṃ pati sahacaraṇanayo, sādharmaṇato desitassāpi atthassa sambhavavasena vivecanaṃ pati yathālābhanayoti ubhayathāpi yujjati.

Evampettha vadanti – **aṭṭhakathāyaṃ** “sakkharakathalaṃ tiṭṭhatiyeva, itarāni carantipi tiṭṭhantipī”ti iminā yathālābhanayo dassito yathāsambhavaṃ atthassa vivecitattā, “yathā panā”tiādīnā pana sahacaraṇanayo alabbhamānassāpi atthassa sahayogīvasena desanāmattassa vibhāvitattāti, tadetampi anupavajjameva atthassa yuttattā, **aṭṭhakathāyañca** tathā dassanassāpi sambhavatoti daṭṭhabbaṃ. “**Tatthā**”tiādī upamāsaṃsandanaṃ. **Tireti** udakarahadassa tīre. **Udakarahado** ca nāma katthaci samuddopi vuccati “rahadopi tattha gambhīro, samuddo saritodako”tiādīsū (dī. ni. 3.278). Katthaci jalāsayopi “rahadopi tattha dharaṇī nāma, yato meghā pavassanti, vassā yato patāyantī”tiādīsū, (dī. ni. 3.281) idhāpi jalāsayoyeva. So hi udakavasena raho cakkhuraḥādikam dadātīti **udakarahado** o-kāraṣa a-kāraṃ katvā. Saddavidū pana “udakaṃ haratīti **udakarahado** niruttinayenā”ti vadanti.

“**Ettāvatā**”tiādīnā catutthajjhānāntaraṃ dassitavipassanāñāṇato paṭṭhāya yathāvuttatthassa sampiṇḍanaṃ. Tattha **ettāvatā**ti “puna caparaṃ mahārāja bhikkhu evaṃ samāhite citte...pe...ñāṇadassanāya cittaṃ abhinīharatī”tiādīnā ettakena, etaparimāṇavanta vā vacanakkamena. **Vipassanāñāṇanti** ñāṇadassananāmena dassitaṃ vipassanāñāṇaṃ, tassa ca viṣuṃ gaṇanadassanena heṭṭhā catutthajjhānāntaraṃ vattabbatākāraṇesu tīsu navesu tatiyanayasseva yuttatarabhāvopi dīpitoti

daṭṭhabbaṃ. Manomayañāṇassa iddhividhasamavarodhitabhāve **visuddhimagge** (visuddhi. 2.379 ādayo) vuttepi idha pāliyaṃ visuṃ desitattā visuṃ eva gahaṇaṃ, tathā desanā ca pāṭiyekkasandiṭṭhikasāmaññaphalattḥāti daṭṭhabbaṃ. Anāgataṃsaññāyathākammūpagaññadvayassa pāliyaṃ anāgatattā “**dibbacakkhuvasena nipphanna**”nti vuttaṃ, tabbasena nipphannattā taggahaṇeneva gahitaṃ taṃ ñāṇadvayanti vuttaṃ hoti. Dibbacakkhussa hi anāgataṃsaññāṇaṃ, yathākammūpagaññāñcāti dvepi ñāṇāni paribhaṇḍāni hontīti. **Dibbacakkhuññanti** cutūpapātaññānāmena dassitaṃ dibbacakkhuññāṇaṃ.

Sabbesaṃ pana dasannaṃ ñāṇāṇaṃ ārammaṇavibhāgassa **visuddhimagge** anāgatattā tatthānāgataññāṇaṃ ārammaṇavibhāgaṃ dassetuṃ “**tesa**”ntiādi vuttaṃ. **Tesanti** dasannaṃ ñāṇāṇaṃ. **Tatthāti** tasmaṃ ārammaṇavibhāge, tesu vā dasasu ñāṇesu. Bhūmibhedato parittamahaggataṃ, kālabhedato atītānāgataṃpaccuppannaṃ, santānabhedato ajjhattabahiddhā cāti **vipassanāññāṇaṃ sattavidhārammaṇaṃ**. Parittārammaṇādītikattayeneva hi tassa ārammaṇavibhāgo, na maggārammaṇatikena. **Nimmitarūpāyatanamattamevāti** attanā nimmitaṃ rūpārammaṇameva, attanā vā nimmite manomaye kāye vijjamānaṃ rūpāyatanamevātiṃ yujjati. Idañhi tassa ñāṇassa abhinimmiyamāne manomaye kāye rūpāyatanamevārabha pavattanato vuttaṃ, na pana tattha gandhāyatanādīnamabhāvato. Na hi rūpakalāpo gandhāyatanādīvirahito atthīti sabbathā parinipphannaṃ nimmitarūpaṃ. Tenāha “**parittapaccuppannahiddhārammaṇa**”nti, yathākkamaṃ bhūmikālasantānabhedato tibbidhārammaṇanti attho. Nibbānavasena ekadhammārammaṇampi samānaṃ āsavakkhayaññāṇaṃ parittārammaṇādītikavasena tividdhārammaṇaṃ dassetuṃ “**appamāṇabahiddhānavattabbārammaṇa**”nti vuttaṃ. Tañhi parittatikavasena appamāṇārammaṇaṃ, ajjhattikavasena bahiddhārammaṇaṃ, atītatikavasena navattabbārammaṇaṃca hoti.

Uttaritarasaddo, pañītatarasaddo ca pariyāyoti dasseti “**setṭhatara**”nti iminā. Ratanakūṭaṃ viya kūṭāgārassa arahattaṃ kūṭaṃ uttamaṅgabhūtaṃ bhagavato desanāya arahattapariyosānattāti āha “**arahattanikūṭenā**”ti. **Desanaṃ niṭṭhāpesīti** tiṭṭhakaramataharavibhāvinimṃ nānāvidhakuhanalapanādīmicchājīvaṃviddhamṣiniṃ tividdhasīlālaṅkataparamasallekhapaṭipattiparidīpiniṃ jhānābhīññādiuttarimanussadhammavibhūsinimṃ cuddasavidhamahāsāmaññaphalapaṭimaṇḍitaṃ anaññasādhāraṇaṃ sāmāññaphaladesanaṃ ratanāgāraṃ viya ratanakūṭena arahattakūṭena niṭṭhāpesi “**vimuttasmi**”nti iminā, arahattaphalassa desitattāti attho.

Ajātasattuupāsakattapaṭivedanākathāvaṇṇanā

250. Ettāvātā bhagavatā desitassa sāmāññaphalasuttassa atthavaṇṇanaṃ katvā idāni dhammasaṅgāhakehi saṅgītassa “**evaṃ vutte**”tiādiṃpāṭhassapi atthavaṇṇanaṃ karonto paṭhamaṃ sambandhaṃ dassetuṃ “**rājā**”tiādimāha. **Tattha tatthāti** tasmaṃ tasmaṃ sāmāññaphale, suttapadese vā. Karaṇaṃ **kāro**, sādhu iti kāro tathā, “**sādhu bhagavā, sādhu sugatā**”tiādinā taṃ pavattento. **Ādimajjhapariyosānanti** desanāya ādiñca majjhañca pariyosānañca. **Sakkaccaṃ** sādaraṃ gāraṃ **sutvā**, “**cintetvā**”ti ettha idaṃ pubbakālakiriyaṃvacanaṃ. Ime pañhe puthū samaṇabrāhmaṇe pucchanto ahaṃ ciraṃ vata amhi, evaṃ pucchantopi ahaṃ thuse koṭṭento viya kañci sāraṃ nālatthanti yojanā. Tathā yo...pe... vissajjesi, tassa bhagavato guṇasampadā aho vata. Dasabalassa guṇānubhāvaṃ ajānanto ahaṃ vañcīto suciraṃ vata amhīti. **Vañcītoti** ca aññāṇena vañcīto āvaṭṭito, mohena paṭicchādito amhīti vuttaṃ hoti. Tenāha “**dasabalassa guṇānubhāvaṃ ajānanto**”ti. Sāmāññajotānā hi visese avatiṭṭhati. Cintetvā āvikarontoti sambandho. Ullaṅghanasamatthāyapi ubbegapītiyā anullaṅghanampi siyāti āha “**pañcavidhāya pītiyā phuṭasarīro**”ti. **Phuṭasarīroti** ca phusitasarīroti attho, na byāpitasarīroti sabbāya pītiyā abyāpitattā. **Tanti** attano pasādassa āvikaraṇaṃ, upāsakattapavedanañca. **Āraddhaṃ** dhammasaṅgāhakehi.

Abhikkantāti atikkantā vigatā, vigatabhāvo ca khayō evāti āha “**khaye dissatī**”ti. Tathā hi vuttaṃ “**nikkhanto paṭhamo yāmo**”ti. **Abhikkantataroti** ativiya kantataro manorama, tādiso ca sundaro

bhaddako nāmāti vuttam “**sundare**”ti.

“**Ko me**”tiādi gāthā **vimānavatthumhi** (vi. va. 857). Tattha **koti** devanāgayakkhagandhabādīsu katamo. **Meti** mama. **Pādānīti** pāde, liṅgavipariyāyoyam. **Iddhiyāti** īdisāya deviddhiyā. **Yasasāti** īdisena parivārena, parijanena ca. **Jalanti** jalanto vijjotamāno. **Abhikkantenāti** ativiya kantena kamanīyena, abhirūpenāti vuttam hoti. **Vañṇenāti** chavivañṇena sarīravañṇanibhāya. **Sabbā obhāsayaṃ disāti** sabbā dasapi disā obhāsayaṃ. Cando viya, sūriyo viya ca ekobhāsaṃ ekālokaṃ karonto ko vandatīti sambandho.

Abhirūpeti atirekarūpe uḷāravañṇena sampannarūpe. **Abbhānumodaneti** abhianumodane abhippamoditabhāve. Kimatthiyaṃ “**abbhānumodane**”ti vacananti āha “**tasmā**”tiādi. Yuttam tāva hotu abbhānumodane, kasmā paṇāyaṃ dvikkhattuṃ vuttoti codanāya sodhanāmukhena āmeḍitavisayaṃ niddhāreti “**bhaye kodhe**”tiādinā, iminā saddalakkhaṇena hetubhūtena evaṃ vutto, iminā ca iminā ca visayenāti vuttam hoti. “Sādhu sādhu bhante”ti āmeḍitavasena attham dassetvā tassa visayaṃ niddhārento evamāhātipi sambandham vadanti. Tattha “**coro coro, sappo sappo**”tiādīsu **bhaye āmeḍitam**, “vijjha vijjha, pahara paharā”tiādīsu **kodhe**, “sādhu sādhu”tiādīsu (saṃ. ni. 2.127; 3.35; 5.1085) **pasamsāyaṃ**, “gaccha gaccha, lunāhi lunāhi”tiādīsu **turite**, “āgaccha āgacchā”tiādīsu **kotūhale**, “buddho buddhoti cintento”tiādīsu (bu. vaṃ. 2.44) **acchare**, “abhikkamathāyasmanto abhikkamathāyasmanto”tiādīsu (dī. ni. 3.20; a. ni. 9.11) **hāse**, “kahaṃ ekaputtaka, kahaṃ ekaputtakā”tiādīsu (saṃ. ni. 2.63) **soke**, “aho sukham, aho sukha”ntiādīsu (udā. 20; dī. ni. 3.305) **pasāde**. Casaddo avuttasamuccayattho, tena garahā asammanādīnaṃ saṅgaho daṭṭhabbo. “Pāpo pāpo”tiādīsu hi **garahāyaṃ**, “abhirūpaka abhirūpakā”tiādīsu **asammāne**. Evametesu navasu, aññesu ca visayesu āmeḍitavacanaṃ budho kareyya, yojeyyāti attho. Āmeḍanaṃ punappunamuccāraṇaṃ, āmeḍiyati vā punappunamuccārīyatīti **āmeḍitam**, ekassevatthassa dvattikkhattuṃ vacanaṃ. **Meḍisaddo** hi ummādane, āpubbo tu dvattikkhattumuccāraṇe vattati yathā “**etadeva yadā vākya-māmeḍayati vāsavo**”ti.

Evaṃ āmeḍitavasena dvikkhattuṃ vuttabhāvaṃ dassetvā idāni nayidaṃ āmeḍitavaseneva dvikkhattuṃ vuttam, atha kho paccekamatthadvayavasena pīti dassento “**atha vā**”tiādimāha. Āmeḍitavasena attham dassetvā vicchāvasenāpi dassento evamāhātipi vadanti, tadayuttameva byāpetabbassa dvikkhattumavuttattā. Byāpetabbassa hi byāpakena guṇakiriyādabbena byāpanicchāya dvattikkhattuṃ vacanaṃ vicchā yathā “**gāmo gāmo ramaṇīyo**”ti. Tattha **abhikkantanti** abhikkamanīyaṃ, tabbhāvo ca atīṭṭhatāyāti vuttam “**atīṭṭha**”ntiādi, padattayañcetaṃ pariyaṇāyavacanaṃ. **Etthāti** dvīsu abhikkantasaddesu. “Abhikkanta”nti vacanaṃ apekkhitvā napuṃsakaliṅgena vuttam, tam pana bhagavato vacanaṃ dhammadesanāyevāti katvā “**yadidaṃ bhagavato dhammadesanā**”ti āha, yāyaṃ bhagavato dhammadesanā mayā sutā, tadidaṃ bhagavato dhammadesanāsaṅkhātaṃ vacanaṃ abhikkantanti attho. Evaṃ paṭiniddesopi hi atthato abhedatā yutto eva “**yattha ca dinnam mahapphalaṃ**”tiādīsu (vi. va. 888) viya. “Abhikkanta”nti vuttassa vā atthamattadassanaṃ etaṃ, tasmā atthavasena liṅgavibhattivipariṇāmo veditabbo, kāriyavipariṇāmasena cettha vibhattivipariṇāmatā. Vacananti hettha seso, abhikkantaṃ bhagavato vacanaṃ, yāyaṃ bhagavato dhammadesanā mayā sutā, sā abhikkantaṃ abhikkantāti attho. Dutiyapadepi “**abhikkantanti pasādanaṃ apekkhitvā napuṃsakaliṅgena vutta**”ntiādinā yathārahamesa nayo netabbo.

“**Bhagavato vacana**”ntiādinā atthadvayasārūpaṃ dasseti. Tattha **dosanāsanatoti** rāgādikilesadosaviddhaṃsanato. **Guṇādhigamanatoti** silādiguṇānaṃ sampādanavasena adhigamāpanato. Ye guṇe desanā adhigameti, tesu “**guṇādhigamanato**”ti vuttasuyeva guṇesu padhānabhūtā guṇā dassetabbāti te padhānabhūte guṇe tāva dassetuṃ “**saddhājananato paññājananato**”ti vuttam. Saddhāpadhānā hi lokiyā guṇā, paññāpadhānā lokuttarāti, padhānaniddeso cesa desanāya adhigametaḃbehi silāsamādhidukādīhipi yojanāsambhavato. Aññampi atthadvayaṃ dasseti “**sāttthato**”tiādinā. Silādiatthasampattiyā **sāttthato**. Sabhāvaniruttisampattiyā **sabyañjanato**. Suviññeyyasaddapayogatāya **uttānapadato**. Saṅhasukhumabhāvena dubbhiññeyyatthāya

gambhīratthato. Siniddhamudumadhurasaddapayogatāya **kaṇṇasukhato.**

Vipulavisuddhapemanīyatthātāya **hadayaṅgamato.** Mānātimānavidhmanena **anattukkaṃsanato.**

Thambhasārambhanimmaddanena **aparavambhanato.** Hitādhippāyappavattiyā paresaṃ rāgapariḷhādivūpasamanena **karuṇāsīlalato.** Kilesandhakāraavidhmanena **paññāvadātato.** Avadātaṃ, odātanti ca atthato ekaṃ. Karavīkarutamañjutāya **āpātharamaṇīyato.**

Pubbāparāvīruddhasuvisuddhatāya **vimaddakkhamato.** Āpātharamaṇīyatāya eva **suyyamānasukhato.** Vimaddakkhamatāya, hitajjhāsāyappavattitāya ca **vīmaṃsiyamānahitatoti** evamettha attho veditabbo. **Ādisaddena** pana saṃsāracakkaniṅvattanato, saddhammacakkappavattanato, micchāvādaiddhamṣanato, sammāvādapatiṭṭhāpanato, akusalamūlasamuddharaṇato, kusalamūlasaṃropanato, apāyadvāraavidhānato, saggamaggadvāravivaraṇato, pariyaṭṭhānavūpasamanato, anusayasamuggāṇatoti evamādīnaṃ saṅgaho daṭṭhabbo.

Na kevalaṃ padadvayeneva, **tato parampi catūhi upamāhīti pi-**saddo sampiṇḍanattho.

“Cakkhumanto rūpāni dakkhanti”ti idaṃ “telapajjotaṃ dhāreyyā”ti catutthaupamāya ākāramattadassanaṃ, na pana upamantaradassananti āha “**catūhi upamāhī**”ti. **Adhomukhaṭṭhapitanti** kenaci adhomukhaṃ ṭhapitaṃ. **Heṭṭhāmukhajātanti** sabhāveneva heṭṭhāmukhaṃ jātamaṃ. **Ugghāṭeyyāti** vivaṭaṃ kareyya. “**Hatthe gahetvā**”ti samācikkhaṇadassanatthaṃ vuttaṃ, “puratthābhimukho, uttarābhimukho vā gacchā”tiādīnā vacanamattaṃ avatvā “esa maggo, evaṃ gacchā”ti hatthe gahetvā nissandehaṃ dasseyyāti vuttaṃ hoti. Kālapakkhe cātuddasī **kālapakkhacātuddasī.**

Nirantararukkhaḡahanena ekagghano vanasaṇḍo **ghanavanasaṇḍo.** Meghassa paṭalaṃ **meghapaṭalaṃ,** meghacchannatāti vuttaṃ hoti. **Nikkujjitaṃ ukkujjeyyāti** kassacipi ādheyyassa anādhārabhūtaṃ kiñci bhājanamaṃ ādhārabhāvāpādanavasena ukkujjeyya upari mukhaṃ ṭhapeyya. Heṭṭhāmukhajātātāya **vimukhaṃ,** adhomukhaṭṭhapitātāya asaddhamme **patitanti** evaṃ padadvayaṃ nikkujjitapadassa yathādassitena atthadvayena yathārahaṃ yojetabbaṃ, na yathāsankhyaṃ. Attano sabhāveneva hi esa rājā saddhammavimukho, pāpamittena pana devadattena pitughātādīsu uyyojitattā asaddhamme patitoti. Vuṭṭhāpentena bhagavatāti sambandho.

“**Kassapassa bhagavato**”tiādīnā tadā raññā avuttassāpi atthāpattimattadassanaṃ. Kāmañca kāmaccchandādayopi paṭicchādakā nīvaraṇabhāvato, micchādiṭṭhi pana savisesaṃ paṭicchādikā satte micchābhinivesavasenāti āha “**micchādiṭṭhigahanapaṭicchanna**”nti. Tenāha bhagavā “micchādiṭṭhiparamāhaṃ bhikkhave vajjaṃ vadāmi”ti, [a. ni. 1.310 (atthato samānaṃ)] micchādiṭṭhisankhātāgumbapaṭicchannanti attho. “Micchādiṭṭhigahanapaṭicchannaṃ sāsanaṃ vivarantenā”ti vadanto sabbabuddhānaṃ ekāva anusandhi, ekaṃva sāsanaṃ katvā kassapassa bhagavato sāsanaṃ iminā saddhiṃ ekasāsanaṃ karotīti daṭṭhabbaṃ. **Ānguttaraṭṭhakathādīsūpi** hi tathā ceva vuttaṃ, evañca katvā micchādiṭṭhigahanapaṭicchannassa sāsanaṃ vivaraṇavacanaṃ upapannaṃ hotīti.

Sabbo akusaladhammasankhāto apāyagāmimaggo **kummaggo** kucchito maggoti katvā. Sammādiṭṭhiādīnaṃ ujuṇaṭṭhapaṭṭhātāya micchādiṭṭhiādīdayo aṭṭha micchattadhammā **micchāmaggo** makkhamaggato micchā vitatho maggoti katvā. Teneva hi tadubhayassa paṭipakkhataṃ sandhāya “**saggamokkhamaggaṃ āvikarontenā**”ti vuttaṃ. Sabbo hi kusaladhammo **saggamaggo.** Sammādiṭṭhiādīdayo aṭṭha sammattadhammā **mokkhamaggo.** Sappiādisannissayo paḍīpo na tathā ujjalo, yathā telasannissayoti **telapajjotaggahaṇaṃ.** **Dhāreyyāti** dhāreyya, samāhareyya samādaheyyāti attho. **Buddhādiratanarūpānīti** buddhādinamaṃ tiṇṇamaṃ ratanānaṃ vaṇṇāyatanāni. Tesamaṃ buddhādiratanarūpānaṃ paṭicchādakassa mohandhakāraṃssa viddhamṣakaṃ tathā. Desanāsankhātaṃ pajjotaṃ tathā. Tadubhayaṃ tulyādhikaraṇavasena viyūhitvā tassa dhārako samādahakoti atthena “**tappaṭicchādakamohandhakāraviddhamṣakadesanāpajjotadhāraṇenā**”ti vuttaṃ. **Etehi pariyaēyehīti** yathāvuttehi nikkujjitukkujanapaṭicchannavivaraṇamaggācikkhaṇatelaṇaṭṭhāraṇa sankhāta catubbidhopamopamitabbappakārehi, yathāvuttehi vā nānāvidhakuhanalapanādīmicchājīvaividhamaṇādivibhāvanapariyaēyehi. Tenāha “**anekapariyaēyena dhammo pakāsīto**”ti.

“Eva”ntiādinā “esāha”ntiā dipāṭhassa sambandhaṃ dasseti. Pasannacittatāyapasannākāraṃ karoti. Pasannacittatā ca imaṃ desanaṃ sutvā evāti atthaṃ nāpetuṃ “**imāya desanāyā**”tiādi vuttaṃ. **Imāya desanāyā** hetubhūṭāya. **Pasannākāraṃ**ti pasannehi sādhujaṇehi kattabbasakkāraṃ. **Saraṇanti** paṭisaraṇaṃ. Tenāha “**parāyaṇa**”nti. Parāyaṇatā pana anathanisedhanena, atthasampādanena cāti vuttaṃ “**aghassa tātā, hitassa ca vidhātā**”ti. **Aghassāti** nissakke sāmivacanaṃ, pāpatoti attho. Dukkhatotipi vadanti keci. Tāyati avassayaṃ karotīti **tātā**. **Hitassāti** upayogathe sāmivacanaṃ. Vidahati saṃvidhānaṃ karotīti **vidhātā**. “**Iti iminā adhippāyena**”ti vadanto “itisaddo cettha luttaniddiṭṭho, so ca ākāratho”ti dasseti. **Saraṇanti** gamaṇaṃ. Hitādhippāyena bhajanaṃ, jānanaṃ vā, evaṅca katvā **vinayaṭṭhakathādīsu** “saraṇanti gacchāmī”ti saheva itisaddena attho vuttoti. Ettha hi nāyaṃ gami-saddo nī-saddādayo viya dvikammiko, tasmā yathā “ajaṃ gāmaṃ netī”ti vuccati, evaṃ “bhagavantaṃ saraṇaṃ gacchāmī”ti vattuṃ na sakkā, “saraṇanti gacchāmī”ti pana vattabbaṃ, tasmā ettha itisaddo luttaniddiṭṭhoti veditabbaṃ, evaṅca katvā “yo buddhaṃ saraṇaṃ gacchati, so buddhaṃ vā gaccheyya saraṇaṃ vā”ti (khu. pā. aṭṭha. 1.gamatīyadīpanā) **khuddakanikāyaṭṭhakathāya** uddhaṭā codanā anavakāsā. Na hi gami-saddaṃ duhādinyādigaṇikaṃ karonti akkharacintakāti. Hotu tāva gami-saddassa ekakammabhāvo, tathāpi “gacchateva pubbaṃ disaṃ, gacchati pacchimaṃ disa”ntiādisu (saṃ. ni. 1.159; 3.87) viya “bhagavantaṃ, saraṇa”nti padadvayassa samānādhikaraṇatā yuttāti? Na, tassa padadvayassa samānādhikaraṇabhāvānupapattito. Tassa hi samānādhikaraṇabhāve adhippete paṭihatacittopi bhagavantaṃ upasaṅkamanto buddhaṃ saraṇaṃ gato nāma siyā. Yaṅhi taṃ “buddho”ti viśeṣitaṃ saraṇaṃ, tamevesa gatoti, na cettha anupapattikena atthena attho, tasmā “bhagavanta”nti gamaṇīyatthassa dīpanaṃ, “saraṇa”nti pana gamaṇākārassāti vuttanayena itilopavaseneva attho gahetabboti. **Dhammaṅca saṅghaṅcāti** etthāpi eseva nayo. Honti cettha –

“Gamissa ekakammattā, itilopaṃ vijāniyā;
Paṭighātaṃ pasāṅgattā, na ca tulyatthatā siyā.

Tasmā gamaṇīyatthassa, pubbapadaṃva jotakaṃ;
Gamaṇākārassa paraṃ, ityuttaṃ saraṇattaye”ti.

“Iti iminā adhippāyena bhagavantaṃ gacchāmī”ti pana vadanto aneneva adhippāyena bhajanaṃ, jānanaṃ vā saraṇagamaṇaṃ nāmāti niyameṭi. Tattha “**gacchāmī**”tiādisu purimassa purimassa pacchimaṃ pacchimaṃ atthavacanaṃ, “**gacchāmī**”ti etassa vā anaṅṅasādhāraṇatādassanavasena pāṭiyekameva atthavacanaṃ “**bhajāmi**”tiā dipadattayaṃ. **Bhajanaṅhi** saraṇādhippāyena upasaṅkamaṇaṃ, **sevanaṃ** santikāvacaṇabhāvo, **payirupāsanaṃ** vattapaṭivattakaraṇena upaṭṭhānanti evaṃ sabbathāpi anaṅṅasādhāraṇatāmyeva dasseti. Evaṃ “gacchāmī”ti padassa gatiatthaṃ dassetvā buddhiatthampi dassetuṃ “**evaṃ vā**”tiādimāha, tattha **evanti** “bhagavā me saraṇa”ntiādinā adhippāyena. Kasmā pana “gacchāmī”ti padassa “bujjhāmī”ti ayamattho labbhatīti codanaṃ sodheti “**yesaṅhi**”tiādinā, anena ca niruttinayamantarena sabhāvatova gamudhātussa buddhiatthoti dīpeti. **Dhātūnanti** mūlasaddasaṅkhātānaṃ i, yā, kamu, gamuiccādīnaṃ.

“**Adhigatamagge, sacchikatanirodhe**”ti padadvayenāpi phalaṭṭhā eva dassitā, na maggaṭṭhāti te dassento “**yathānusiṭṭhaṃ paṭipajjamāne cā**”ti āha. Nanu ca kalyāṇaputhujjanopi “yathānusiṭṭhaṃ paṭipajjati”ti vuccatīti? Kiṅcāpi vuccati, nipariyāyena pana maggaṭṭhā eva tathā vattabbā, na itaro niyāmokkamanābhāvato. Tathā hi te eva “**apāyesu apatamāne dhāretī**”ti vuttā. Sammattaniyāmokkamanena hi apāyavinimuttisambhavoti. Evaṃ anekehipi vinaya- (sārattha. ṭī. 1.veraṅjakaṇḍavaṇṇanā) suttantaṭṭikākārehī (dī. ni. ṭī. 1.250) vuttaṃ, tadetaṃ sammattaniyāmokkamanavasena nipariyāyato apāyavinimuttake sandhāya vuttaṃ, tadanupapattivasena pana pariyaṇato apāyavinimuttakaṃ kalyāṇaputhujjanampi “yathānusiṭṭhaṃ paṭipajjamāne”ti padena dassetīti datṭhabbaṃ. Tathā hesa **dakkhiṇavibhaṅgasuttā**dīsu (ma. ni. 3.379) sotāpattiphalaśchikiriyāya paṭipannabhāvena vuttoti, **chattavimāne** (vi. va. 886 ādayo) chattamāṇavako cettha nidassanaṃ. Adhigatamagge, sacchikatanirodhe ca yathānusiṭṭhaṃ paṭipajjamāne ca puggale apāyesu apatamāne katvā dhāretīti sapāṭhasesayojanā. Atītakālikena hi purimapadvayena

phalaṭṭhānameva gahaṇaṃ, vattamānakālikena ca pacchimena padena saha kalyāṇaputhujjanena maggaṭṭhānameva. “**Apatamāne**”ti pana padena dhāraṇākāradassanaṃ apatanakaraṇavaseneva dhāretīti, dhāraṇasarūpadassanaṃ vā. Dhāraṇaṃ nāma apatanakaraṇamevāti, apatanakaraṇaṅca apāyādinibbattakakilesaviddhaṃsanavasena vaṭṭato niyyānameva. “Apāyesū”ti hi dukkhabahulaṭṭhānatāya padhānavasena vuttaṃ, vaṭṭadukkhesu pana sabbesupi apatamāne katvā dhāretīti attho veditabbo. Tathā hi **abhidhammaṭṭhakathāyaṃ** vuttaṃ “sotāpattimaggo cettha apāyabhavato vuṭṭhāti, sakadāgāmimaggo sugatikāmbhavekadesato, anāgāmimaggo kāmbhavato, arahattamaggo rūpārūpabhavato, sabbabhavehipi vuṭṭhāti evāti vadanti”ti (dha. sa. aṭṭha. 350) evaṅca katvā ariyamaggo niyyānikatāya, nibbānaṅca tassa tadatthasiddhihetutāyāti ubhayameva nippariyāyena dhammo nāmāti sarūpato dassetuṃ “**so atthato ariyamaggo ceva nibbānaṅca**”ti vuttaṃ. Nibbānaṅhi ārammaṇaṃ labhitvā ariyamaggassa tadatthasiddhi, svāyamattho ca pāḷiyā eva siddhoti āha “**vuttaṅceta**”ntiādi. **Yāvātīti** yattakā. **Tesanti** tattakānaṃ dhammānaṃ. “Aggo akkhāyati”ti vattabbe o-kārassa a-kāraṃ, ma-kārāgamaṅca katvā “**aggamakkhāyati**”ti vuttaṃ. “**Akkhāyati**”ti cettha itisaddo ādiattho, pakārattho vā, tena “yāvata bhikkhave dhammā saṅkhatā vā asaṅkhatā vā, virāgo tesam aggamakkhāyati”tiādi (itivu. 90; a. ni. 4.34) suttapadaṃ saṅgaṇhāti, “**vitthāro**”ti iminā vā tadavasesasaṅgaho.

Yasmā pana ariyaphalānaṃ “tāya saddhāya avūpasantāyā”tiādi vacanato maggena samucchinnānaṃ kilesānaṃ paṭippassaddhippahānakiccatāya niyyānānugūṇatā, niyyānapariyosānatā ca, pariyattiyā pana niyyānadhammasamadhiagamahetutāya niyyānānugūṇatāti iminā pariyāyena vuttanayena dhammabhāvo labbhati, tasmā tadubhayampi saṅgaṇhanto “**na kevalaṅca**”tiādimāha. Svāyamattho ca pāṭhārūlo evāti dasseti “**vuttaṅheta**”ntiādinā. Tatha **chattamāṇavakavimāneti** chatto kira nāma setabyāyaṃ brāhmaṇamaṇavako, so ukkaṭṭhāyaṃ pokkharasātibrāhmaṇassa santike sippaṃ uggahetvā “garudakkhiṇaṃ dassamī”ti ukkaṭṭhābhimukho gacchati, athassa bhagavā antarāmagge corantarāyaṃ, tāvatimsabhavane nibbattamānaṅca disvā gāthābandhavasena saraṇagamanavidhiṃ desesi, tassa tāvatimsabhavanupagassa tiṃsayojanikaṃ vimānaṃ chattamāṇavakavimānaṃ. Devalokepi hi tassa manussakāle samaññā yathā “maṇḍūko devaputto, (vi. va. 858 ādayo) kuvero devarājā”ti, idha pana chattamāṇavakavimānaṃ vatthu kāraṇaṃ etassāti katvā uttarapadalopena “na tathā tapati nabhe sūriyo, cando ca na bhāsati na phusso, yathā”tiādikā (vi. va. 889) desanā “**chattamāṇavakavimāna**”nti vuccati, tatrāyaṃ gāthā pariyāpannā, tasmā chattamāṇavakavimānavatthudesanāyanti attho veditabbo.

Kāmarāgo bhavarāgoti evamādibhedo anādikālavibhāvito sabbopi rāgo virajjati pahīyati etenāti **rāgavirāgo**, maggo. Ejāsaṅkhatāya taṅhāya, antonijjhānalakkhaṇassa ca sokassa taduppattiyaṃ sabbaso parikkhīṇattā natthi ejā, soko ca etasminti **anejaṃ, asokaṅca, phalaṃ. Tadaṭṭhakathāyaṃ** (vi. va. aṭṭha. 887) pana “taṅhāvasiṭṭhānaṃ sokanimittānaṃ kilesānaṃ paṭippassambhanato asoka”nti vuttaṃ. **Dhammasaṅkhatanti** sampajja sambhūya paccayehi appaṭisaṅkhatattā asaṅkhatam attano sabhāvadhāraṇato paramatthadhammabhūtaṃ nibbānaṃ. **Tadaṭṭhakathāyaṃ** pana “dhammanti sabhāvadhammaṃ. Sabhāvato gahetabbadhammo hesa, yadidaṃ maggaphalanibbānāni, na pariyattidhammo viya paññattidhammavasenā”ti (vi. va. aṭṭha. 887) vuttaṃ, evaṃ sati dhammasaddo tīsupi thānesu yojetabbo. **Appaṭikūlasaddena** ca tattha nibbānameva gahitaṃ “natthi ettha kiṅcipi paṭikūla”nti katvā, **appaṭikūlanti** ca avirodhadīpanato kiṅci aviruddhaṃ, iṭṭhaṃ paṇṭanti vā attho. Pagaṇarūpena pavattitattā, pakatṭhagaṇavibhāvanato vā **paguṇaṃ**. Yathāha “vihimsasaññi paguṇaṃ na bhāsiṃ, dhammaṃ paṇṭitaṃ manujesu brahme”ti (ma. ni. 1.283; 2.339; mahāva. 9).

Dhammakhandhā kathitāti yojanā. Evaṃ idha catūhipi padehi pariyattidhammoyeva gahito, **tadaṭṭhakathāyaṃ** pana “savanavelāyaṃ, upaparikkhaṇavelāyaṃ, paṭipajjanavelāyanti sabbadāpi iṭṭhamevāti **madhuraṃ**, sabbaññutaññānasannissayāya paṭibhānasampadāya pavattitattā suppavattibhāvato, nipuṇabhāvato ca **paguṇaṃ**, vibhajitabbassa atthassa khandhādivasena, kusālādivasena, uddeśādivasena ca suṭṭhu vibhajanato **suviḥattanti** tīhipi padehi pariyattidhammameva vadati”ti (vi. va. aṭṭha. 887) vuttaṃ. Āpāthakāle viya majjanakālepi, kathentassa viya suṇantassāpi

sammukhībhāvato ubhatopaccakkhatādassanattama idheva “ima”nti āsanapaccakkhavacanama. Puna “**dhamma**”nti idam yathāvuttassa catubbidhassāpi dhammassa sādharānavacanama. Pariyattidhammopi hi saraṇesu ca sīlesu ca paṭiṭṭhānamattāyapi yāthāvapaṭipattiyā apāyapatanato dhāreti, imassa ca atthassa idameva chattamaṇavakavimānaṃ sādhakanti daṭṭhabbama. Sādharānabhāvena yathāvuttama dhammaṃ paccakkhama katvā dassento puna “**ima**”nti āha. Yasmā cesā bha-kārattayena ca paṭimaṇḍitā dodhakagāthā, tasmā tatiyapāde madhurasadde ma-kāro adhikopi ariyacariyādipadehi viya anekakkharapadena yuttattā anupavajjoti daṭṭhabbama.

Diṭṭhisīlasaṅghātenāti “yāyama diṭṭhi ariyā niyyānikā niyyāti takkarassa sammā dukkhakkhayāya, tathārūpāya diṭṭhiyā diṭṭhisāmaññagato viharatī”ti (dī. ni. 3.324, 356; a. ni. 6.11; pari. 274) evama vuttāya diṭṭhiyā ceva “yāni tāni sīlāni akhaṇḍāni acchiddāni asabalāni akammāsāni bhujjissāni viññupasatthāni aparāmatthāni samādhisaṃvattanikāni, tathārūpehi sīlehi sīlasāmaññagato viharatī”ti (dī. ni. 3.324, 356; ma. ni. 1.492; 3.54; a. ni. 6.92; pari. 274) evama vuttānaṃ sīlānaṃ saṃhatabhāvena, diṭṭhisīlasāmaññenāti attho. **Samhatoti** saṅghaṭito, sametoti vuttama hoti. Ariyapuggalā hi yattha katthaci dūre ṭhitāpi attano guṇasāmaggiyā saṃhatā eva. “**Vuttañheta**”ntiādinā āhaccapāṭhena samattheti.

Yatthāti yasmaṃ saṅge. **Dinnanti** pariccattama annādeyyadhammaṃ, gāthābandhattā cettha anuāsikalopo. Dodhakagāthā hesā. **Mahapphalamāhūti** “mahapphala”nti buddhādayo āhu. **Catūsūti** cettha ca-kāro adhikopi vuttanayena anupavajjo. Accantameva kilesāsucito visuddhattā **sucīsu**. “Sotāpanno sotāpattiphalasacchikiriyāya paṭipanno”tiādinā (saṃ. ni. 5.488) vuttetu catūsu **purisayugesu**. Catusaccadhammassa, nibbānadhammassa ca paccakkhato dassanena, ariyadhammassa paccakkhadassāvitāya vā **dhammadasā**. **Te puggalā** maggaṭṭhaphalaṭṭhe yugale akatvā visuma visuma puggalagaṇanena **aṭṭha ca** honti. **Imama saṅghama saraṇattama** saraṇāya parāyaṇāya apāyadukkhavaṭṭadukkhaparitāṇāya **upehi** upagaccha bhaja seva, evama vā jānāhi bujjhassūti saha yojanāya attho. Yattha yesu sucīsu catūsu purisayugesu dinnama mahapphalamāhu, dhammadasā te puggalā aṭṭha ca, imama saṅghama saraṇattamupehīti vā sambandho. Evampi hi paṭiniddeso yutto eva atthato abhinnattāti daṭṭhabbama. Gāthāsukhatthañcettha purisapade ikāraṃ, puggalāpade ca rassaṃ katvā niddeho.

Ettāvatāti “esāha”ntiādivacanakkamena. Tīṇi vatthūni “saraṇa”nti gamanāni, tikkhattuma vā “saraṇa”nti gamanānti **saraṇagamanāni**. **Paṭivedesīti** attano hadayagataṃ vācāya pavedesī.

Saraṇagamanakathāvaṇṇanā

Saraṇagamanassa visayappahedaphalasaṃkilesabhedānaṃ viya, kattu ca vibhāvanā tattha kosallāya hoti yevāti saha kattunā taṃ vidhiṃ dassetuṃ “**idāni tesu saraṇagamanesu kosallattama... pe... veditabbo**”ti vuttama. “**Yo ca saraṇama gacchati**”ti iminā hi kattāraṃ vibhāveti tena vinā saraṇagamanasseva asambhavato, “**saraṇagamanā**”nti iminā ca saraṇagamanameva, “**saraṇa**”ntiādhī pana yathākkamaṃ visayādayo. Kasmā panettha vodānaṃ na gahitaṃ, nanu vodānavibhāvanāpi tattha kosallāya hotīti? Saccametama, taṃ pana saṃkilesaggahaṇeneva atthato vibhāvitama hotīti na gahitaṃ. Yāni hi nesama saṃkilesakāraṇāni aññāṇādīni, tesama sabbena sabbama anuppannānaṃ anuppādanena, uppannānaṃ pahānena vodānaṃ hotīti. **Atthatotī** saraṇasaddatthato, “saraṇatthato”tipi pāṭho, ayamevattho. Hiṃsatthassa sarasaddassa vasenetama siddhanti dassento dhātvatthavasena “**hiṃsatīti saraṇa**”nti vatvā taṃ pana hiṃsanama kesama, kathaṃ, kassa vāti codanaṃ sodheti “**saraṇagatāna**”ntiādinā. **Kesanti** hi saraṇagatānaṃ. **Kathanti** teneva saraṇagamanena. **Kassāti** bhayādinanti yathākkamaṃ sodhanā. Tattha **saraṇagatānanti** “saraṇa”nti gatānaṃ. **Saraṇagamanenāti** “saraṇa”nti gamanena kusaladhammena. **Bhayanti** vaṭṭabhayaṃ. **Santāsanti** cittutrāsaṃ teneva cetasikadukkhassa saṅgahitattā. **Dukkhanti** kāyikadukkhaggaṇama. **Duggatiparikilesanti** duggatipariyāpannaṃ sabbampi dukkhama “duggatiyama parikilissanaṃ saṃvibādhanama, samupatāpanama vā”ti katvā, tayidama sabbama parato phalakathāyama āvi bhavissati. Hiṃsanañcettha vināsanameva, na pana sattahiṃsanamivāti dasseti “**hanati vināsetī**”ti iminā. **Etanti**

saraṇapadaṃ. **Adhivacananti** nāmaṃ, pasiddhavacanaṃ vā, yathābhuccaṃ vā guṇaṃ adhikicca pavattavacanaṃ. Tenāha “**ratanattayassevā**”ti.

Evam hiṃsanatthavasena avisesato saraṇasaddatthaṃ dassetvā idāni tadatthavaseneva visesato dassetuṃ “**atha vā**”tiādi vuttaṃ. Ratanattayassa paccekaṃ hiṃsanakāraṇadassanameva hi purimanayato imassa visesoti. Tattha **hite pavattanena**ti “sampannasīlā bhikkhave viharathā”tiādinā (ma. ni. 1.64, 69) atthe sattānaṃ niyojana. **Ahitā ca nivattanena**ti “pāṇātipātassa kho pāpako vipāko, pāpakaṃ abhisamparāya”ntiādinā ādinavadassanādikumhena anatthato ca sattānaṃ nivattanena. **Bhayaṃ hiṃsatīti** hitāhitesu appavattipavattihetukaṃ byasanaṃ appavattikaraṇena vināseti. Bhavakantārā uttāraṇena maggasaṅkhāto dhammo, phalanibbānasaṅkhāto pana assāsādānena sattānaṃ bhayaṃ hiṃsatīti yojanā. **Kārānanti** dānavasena, pūjāvasena ca upanītānaṃ sakkārānaṃ. Anupasaggopi hi saddo saupasaggo viya atthavisesavācako “appakampi kataṃ kāraṃ, puññaṃ hoti mahapphala”ntiādisu viya. Anuttaradakkhiṇeyyabhāvato vipulaphalapaṭilābhakaraṇena sattānaṃ bhayaṃ hiṃ satīti yojetabbaṃ. **Imināpi pariyāyena**ti ratanattayassa paccekaṃ hiṃsakabhāvakāraṇadassanavasena vibhajivā vuttena imināpi kāraṇena. Yasmā panidaṃ saraṇapadaṃ nāthapadaṃ viya suddhanāmapadattā dhātvatthaṃ antonītaṃ katvā saṅketatthampi vadati, tasmā heṭṭhā saraṇaṃ parāyaṇanti attho vuttoti daṭṭhabbaṃ.

Evam saraṇatthaṃ dassetvā idāni saraṇagamanatthaṃ dassento “**tappasādā**”tiādimāha. Tattha “sammāsambuddho bhagavā, svākkhāto dhammo, suppaṭipanno saṅgho”ti evamādinā tasmim ratanattaye pasādo **tappasādo**, tadeva ratanattayaṃ garu etassāti **taggaru**, tassa bhāvo **taggarutā**, tappasādo ca taggarutā ca **tappasādataggarutā**, tāhi. **Vihatakilesa** vidhutavicikicchāsammohāsaddhiyādipāpadhammattā, tadeva ratanattayaṃ parāyaṇaṃ parāgati tānaṃ leṇaṃ etassāti **tapparāyaṇo**, tassa bhāvo **tapparāyaṇatā**, sāyeva ākāro **tapparāyaṇatākāro**, tena pavatto **tapparāyaṇatākārappavatto**. Ettha ca **pasādaggahaṇena** lokiyaṃ saraṇagamanamāha. Tañhi saddhāpadhānaṃ, na ñāṇapadhānaṃ, **garutā**gahaṇena pana lokuttaraṃ. Ariyā hi ratanattayaṃ guṇābhīñātāya pāsānacchattaṃ viya garuṃ katvā passanti, tasmā tappasādena tadaṅgappahānavasena vihatakilesa, taggarutāya ca agāravakaraṇahetūnaṃ samucchadavasenāti yojetabbaṃ. Tapparāyaṇatā panettha taggatikatāti tāya catubbidhampi vakkhamānaṃ saraṇagamaṇaṃ gahitanti daṭṭhabbaṃ. Avisesena vā pasādagarutā jotitāti pasādaggahaṇena anaveccappasādassa lokiyassa, aveccappasādassa ca lokuttarassa gahaṇaṃ, tathā **garutā**gahaṇena lokiyassa garukaraṇassa, lokuttarassa cāti ubhayenapi padena ubhayampi lokiyalokuttarasaraṇagamaṇaṃ yojetabbaṃ. Uppajjati cittametenāti **uppādo**, sampayuttadhammasamūho, cittaṅca taṃ uppādo cāti **cittuppādo**. Samāhāradvandepe hi katthaci pulliṅgamicchanti saddavidū, tadākārappavattaṃ saddhāpaññādisampayuttadhammasahitaṃ cittaṃ **saraṇagamaṇaṃ** nāma “saraṇanti gacchati etenāti katvā”ti vuttaṃ hoti. “**Taṃsamaṅgi**”tiādi kattuvibhāvanā. Tena yathāvuttacittuppādena samaṅgīti **taṃsamaṅgi**. Tenāha “**vuttappakārena cittuppādenā**”ti. **Upeṭīti** bhajati sevati payirupāsati, jānāti vā, bujjhatīti attho.

Lokuttaraṃ saraṇagamaṇaṃ kesanti āha “**diṭṭhasaccāna**”nti, aṭṭhannaṃ ariyapuggalānanti attho. Kadā taṃ ijhatīti āha “**maggakkhaṇe**”ti, “ijhatī”ti padena cetassa sambandho. Maggakkhaṇe ijhamāneneva hi catusaccādhigamaṇa phalaṭṭhānampi saraṇagamakatā sijnhati lokuttarasaraṇagamaṇassa bhedābhāvato, tesaṅca ekasantānattā. Kathaṃ taṃ ijhatīti āha “**saraṇagamanupakkilesasamucchedenā**”tiādi, upapakkilesasamucchedito, ārammaṇato, kiccato ca sakalepe ratanattaye ijhatīti vuttaṃ hoti. **Saraṇagamanupakkilesasamucchedenāti** cettha pahānābhisamayaṃ sandhāya vuttaṃ, **ārammaṇatoti** sacchikiriyābhisamayaṃ. Nibbānārammaṇaṃ hutvā ārammaṇato ijhatīti hi yojetabbaṃ, tvā-saddo ca hetutthavācako yathā “sakko hutvā nibbattī”ti (dha. pa. aṭṭha. 1.2.29). Apica “ārammaṇato”ti vuttamevatthaṃ sarūpato niyameti “**nibbānārammaṇaṃ hutvā**”ti iminā. “**Kiccato**”ti tadavasesaṃ bhāvanābhisamayaṃ pariññābhisamayaṅca sandhāya vuttaṃ. “**Ārammaṇato nibbānārammaṇaṃ hutvā**”ti etena vā maggakkhaṇānurūpaṃ ekārammaṇataṃ dassetvā “**kiccato**”ti iminā pahānato avasesaṃ kiccattayaṃ dassitanti daṭṭhabbaṃ. “Maggakkhaṇe, nibbānārammaṇaṃ hutvā”ti ca vuttattā atthato

maggañāṇasaṅkhāto catusaccādhigamo eva lokuttarasaraṇagamananti viññāyati. Tattha hi catusaccādhigamane saraṇagamanupakkilesassa pahānābhisamayavasena samucchindanaṃ bhavati, nibbānadhammo pana sacchikiriyābhisamayavasena, maggadhammo ca bhāvanābhisamayavasena paṭivijjhiyamānoyeva saraṇagamanatthaṃ sādheti, buddhaguṇā pana sāvakaḡocarabhūtā pariññābhisamayavasena paṭivijjhiyamānā saraṇagamanatthaṃ sādheti, tathā ariyasaṅhaguṇā. Tenāha “**sakalepi ratanattaye ijjhati**”ti.

Phalapariyattīnampettha vuttanayena maggānugunappavattiyā gahaṇaṃ, aparīññeyyabhūtānañca buddhasaṅhaguṇānaṃ tagguṇasāmaññatāyāti daṭṭhabbaṃ. Evañhi sakalabhāvaviṣiṭṭhacanaṃ upapannaṃ hotīti. Ijjhantañca saheva ijjhati, na lokiyaṃ viya paṭipāṭiyā asammohapaṭivedhena paṭividdhattāti gahetabbaṃ. Padīpassa viya hi ekakkhaṇeyeva maggassa catukiccasāadhananti. Ye pana vadanti “saraṇagamaṇaṃ nibbānāramaṇaṃ hutvā na pavattati, maggassa adhigatattā pana adhigatameva taṃ hoti ekaccānaṃ tevijjādīnaṃ lokiyavijjādayo viyā”ti, tesam pana vacane lokiyameva saraṇagamaṇaṃ siyā, na lokuttaraṃ, tañca ayuttameva duvidhassāpi tassa icchitabbatā. Tadaṅgappahānena **saraṇagamanupakkilesavikkhambhanaṃ. Ārammaṇato buddhādiguṇāramaṇaṃ hutvāti** etthāpi vuttanayena attho, saraṇagamanupakkilesavikkhambhanaṃ, ārammaṇato ca sakalepi ratanattaye ijjhati vuttaṃ hoti.

Tanti lokiyasaraṇagamaṇaṃ. “Sammāsambuddho bhagavā”tiādīna **saddhāpaṭilābho. Saddhāmūlikā**ti yathāvuttasaddhāpubbaṅgamā. Sahajātavasena pubbaṅgamatāyeva hi tammūlikatā saddhāviraḡhitassa buddhādīsu sammādassanassa asambhavato. **Sammādiṭṭhi** nāma buddhasubuddhataṃ, dhammasudhammataṃ saṅhasuppaṭipannatañca lokiyāvabodhavasena sammāñāyena dassanato. “**Saddhāpaṭilābho**”ti iminā sammādiṭṭhiviraḡhitāpi saddhā lokiyasaraṇagamaṇanti dasseti, “**saddhāmūlikā ca sammādiṭṭhi**”ti pana etena saddhūpanissayā yathāvuttā paññāti. Lokiyampi hi saraṇagamaṇaṃ duvidhaṃ ñāṇasampayuttaṃ, ñāṇavippayuttañca. Tattha paṭhamena padena mātādīhi ussāhitadārakādīnaṃ viya ñāṇavippayuttaṃ saraṇagamaṇaṃ gahitaṃ, dutiyena pana ñāṇasampayuttaṃ. Tadubhayameva puññakiriyavatthu visesabhāvena dassetuṃ “**dasasu puññakiriyavatthūsu diṭṭhijukammanti vuccati**”ti āha. Diṭṭhi eva attano paccayehi ujum karīyatīti hi atthena sammādiṭṭhiyā diṭṭhijukammabhāvo, diṭṭhi ujum karīyati etenāti atthena pana saddhāyapi. Saddhāsammādiṭṭhiggaḡhaṇena cettha tappadhānassāpi cittuppādassa gahaṇaṃ, diṭṭhijukammapadena ca yathāvuttena karaṇasāadhanena, evañca katvā “tapparāyaṇatākārappavatto cittuppādo”ti hetthā vuttavacanaṃ samatthitaṃ hoti, saddhāsammādiṭṭhīnaṃ pana visum gahaṇaṃ taṃsampayuttacittuppādassa tappadhānatāyāti daṭṭhabbaṃ.

Tayidanti lokiyaṃ saraṇagamaṇameva paccāmasati lokuttarassa tathā bhedābhāvato. Tassa hi maggakkhaṇeyeva vuttanayena ijghanato tathāvidhassa samādānassa avijjamānattā esa bhedo na sambhavatīti. Attā sanniyāyati appiyati pariccajīyati etenāti **attasanniyātaṇaṃ**, yathāvuttaṃ saraṇagamaṇasaṅkhātaṃ diṭṭhijukammaṃ. Taṃ ratanattayaṃ parāyaṇaṃ paṭisaraṇametassāti **tapparāyaṇo**, puggalo, cittuppādo vā, tassa bhāvo **tapparāyaṇatā**, tadeva diṭṭhijukammaṃ. “Saraṇa”nti adhippāyena sissabhāvaṃ antevāsikabhāvasaṅkhātaṃ vattapaṭivattādikaraṇaṃ upagacchati etenāti **sissabhāvūpagamaṇaṃ**. Saraṇagamaṇādhippāyeneva paṇipatati etenāti **paṇipāto**, paṇipatanañcettha abhivādanapaccuṭṭhānañjalikammaṃsāmīcikkammaṃ, sabbattha ca atthato yathāvuttadiṭṭhijukammameva veditabbaṃ.

Saṃsāradukkhanittharaṇatthaṃ attano attabhāvassa pariccajanaṃ **attapariccajanaṃ. Tapparāyaṇatādīsupi** eseva nayo. Hitopadesakathāpariyāyena dhammassāpi ācariyabhāvo samudācarīyati “phalo ambo aphalo ca, te satthāro ubho mamā”tiādīsū viyāti āha “**dhammassa antevāsiko**”ti. “**Abhivādanā**”tiādī paṇipātassa atthadassanaṃ. **Buddhādīnaṃyevāti** avadhāraṇassa attasanniyātanādīsupi sīhagatikavasena adhiḡkāro veditabbo. Evañhi tadaññanivattanaṃ kataṃ hotīti. “**Imesañhi**”tiādī catudhā pavattanassa samatthanaṃ, kāraṇadassanaṃ vā.

Evam attasanniyyātanādīni ekena pakārena dassetvā idāni aparehipi pakārehi dassetuṃ “**apicā**”tiādi āradhamaṃ, etena attasanniyyātanatapparāyaṇatādīnaṃ catunnaṃ pariyāyantarehipi attasanniyyātanatapparāyaṇatādī katameva hoti atthassa abhinnattā yathā taṃ “sikkhāpaccakkhānaabhūtārocanānī”ti dasseti. **Jīvitapariyantikanti** bhāvanapumsakavacanaṃ, yāvajīvaṃ gacchāmīti attho. **Mahākassapo** kira sayameva pabbajitavesaṃ gahetvā **mahātitthabrāhmaṇagāmato** nikkhamitvā gacchanto tigāvutamaggaṃ paccuggamaṃ katvā antarā ca rājagahaṃ, antarā ca nālandaṃ bahuputtakanigrodharukkhamūle ekakameva nisinnaṃ bhagavantaṃ passitvā “ayaṃ bhagavā arahaṃ sammāsambuddho”ti ajānantoyeva “satthāraṇca vatāhaṃ passeyyaṃ, bhagavantameva passeyya”ntiādīnā (saṃ. ni. 2.154) saraṇagamanamakāsi. Tena vuttaṃ “**mahākassapassa saraṇagamaṃ viyā**”ti. Vitthāro **kassapasamyuttaṭṭhakathāyaṃ** (saṃ. ni. aṭṭha. 2.2.154) gahetabbo. Tattha **satthāraṇcavatāhaṃ passeyyaṃ, bhagavantameva passeyyanti** sace ahaṃ satthāraṃ passeyyaṃ, imaṃ bhagavantaṃyeva passeyyaṃ. Na hi me ito aññena satthārā bhavituṃ sakkā. **Sugataṇca vatāhaṃ passeyyaṃ, bhagavantameva passeyyanti** sace ahaṃ sammāpaṭipattiyā suṭṭhu gatattā sugataṃ nāma passeyyaṃ, imaṃ bhagavantaṃyeva passeyyaṃ. Na hi me ito aññena sugatena bhavituṃ sakkā. **Sammāsambuddhaṇca vatāhaṃ passeyyaṃ, bhagavantameva passeyyanti** sace ahaṃ sammā sāmaṇca saccāni buddhattā sammāsambuddhaṃ nāma passeyyaṃ, imaṃ bhagavantaṃyeva passeyyaṃ, na hi me ito aññena sammāsambuddhena bhavituṃ sakkāti ayamettha aṭṭhakathā. Sabbattha **ca-saddo, vata-saddo** ca padapūraṇamattaṃ, ce-saddena vā bhavitabbaṃ “sace”ti **aṭṭhakathāyaṃ** (saṃ. ni. aṭṭha. 2.2.154) vuttattā. **Vata-saddo** ca passitukāmatāya ekamsatthaṃ dīpetīti yujjati.

“**So aha**”ntiādi **suttanipāte ālavakasutte**. Tattha kiñcāpi maggeneva tassa saraṇagamanamāgataṃ, sotāpanabhāvadassanattaṃ, pana pasādānurūpadassanattaṇca evaṃ vācaṃ bhindatīti **tadaṭṭhakathāyaṃ** (su. ni. aṭṭha. 1.181) vuttaṃ. **Gāmā gāmanti** aññasmā devagāmā aññaṃ devagāmaṃ, devatānaṃ vā khuddakaṃ, mahantaṇca gāmanti attho. **Purā puranti** etthāpi eseva nayo. **Dhammassa ca sudhammatanti** buddhassa subuddhataṃ, dhammassa sudhammataṃ, saṅghassa suppaṭipannataṇca abhithavitvāti saha samuccayena, pāṭhasesena ca attho, sambuddhaṃ namassamāno dhammaghosako hutvā vicarissāmīti vuttaṃ hoti.

Ālavakādīnanti ādi-saddena sātāgīrahemavatādīnampi saṅgaho. Nanu ca ete ālavakādayo adhigatamaggattā maggeneva āgatasaraṇagamaṇā, kasmā tesam tapparāyaṇatāsaraṇagamaṇaṃ vuttanti? Maggenāgatasaraṇagamanehipi tehi tapparāyaṇatākārassa paveditattā. “So ahaṃ vicarissāmi...pe... sudhammataṃ, (saṃ. ni. 1.246; su. ni. 194) te mayaṃ vicarissāma, gāmā gāmaṃ nagā nagaṃ...pe... sudhammata”nti (su. ni. 182) ca hi etehi tapparāyaṇatākāro pavedito. Tasmā saraṇagamanavisesamanapekkhitvā pavedanākāramattaṃ upadisantena evaṃ vuttanti daṭṭhabbaṃ. **Athāti** “kathaṃ kho brāhmaṇo hotī”tiādīnā puṭṭhassa aṭṭhavidhapañhassa “pubbenivāsaṃ yo vedī”tiādīnā byākaraṇapariyosānakāle. Idañhi **majjhimaṇṇāsake brahmāyusutte** (ma. ni. 2.394) **paricumbatīti** pariphusati. **Parisambāhatīti** parimajjati. **Evampi paṇipāto daṭṭhabboti** evampi paramanipaccakārena paṇipāto daṭṭhabbo.

So panesāti paṇipāto. Nāti...pe... vasesāti ettha nātivāsena, bhayavasena, ācariyavasena, dakkhiṇeyyavasenāti paccekaṃ yojetabbaṃ dvandaparato suyyamānattā. Tattha **nātivāsena**ti nātibhāvavasena. Bhāvappadhānaniddeso hi ayaṃ, bhāvalopaniddeso vā tabbhāvasseva adhippetattā. Evam sesesupi paṇipātapadena cetesaṃ sambandho tabbasena paṇipātassa catubbidhattā. Tenāha “**dakkhiṇeyyapaṇipātenā**”ti, dakkhiṇeyyatāhetukena paṇipātenevāti attho. **Itarehīti** nātibhāvādihetukehi paṇipātehi. “**Seṭṭhavasenevā**”tiādi tassevatthassa samatthanaṃ. Idāni “na itarehī”tiādīnā vuttameva atthattayaṃ yathākkamaṃ vitthārato dassetuṃ “**tasmā**”tiādi vuttaṃ. “**Sākiyo vā**”ti pitupakkhato nātikuladassanaṃ, “**koliyo vā**”ti pana mātupakkhato. **Vandatīti** paṇipātassa upalakkhaṇavacanaṃ. **Rājapūjito**ti rājūhi, rājūnaṃ vā pūjito yathā “gāmapūjito”ti. Pūjāvacaṇapayoge hi kattari sāmivacaṇamicchanti saddavidū. **Bhagavatoti** bodhisattabhūtassa, buddhabhūtassa vā bhagavato. **Uggahitanti** sikkhitasippaṃ.

“**Catudhā**”tiādi **siṅgālovādasutte** (dī. ni. 3.265) **gharamāvasanti** ghare vasanto, kammappavacanīyayogato cettha bhummatthe upayogavacanam. **Kammaṃ payojayeti** kasivāñijjādikammaṃ payojeyya. Kulānañhi na sabbakālam ekasadisam vattati, kadāci rājādivasena āpadāpi uppajjati, tasmā “āpadāsu uppanāsu bhavissatī”ti evaṃ manasi katvā nidhāpeyyāti āha “**āpadāsu bhavissatī**”ti. Imesu pana catūsu koṭṭhāsesu “ekena bhoge bhuñjeyyā”ti vuttakoṭṭhāsatoyeva gahetvā bhikkhūnampi kapaṇaddhikādīnampi dānam dātabbam, pesakāranhāpitakādīnampi vetanam dātabbanti ayam bhogapariggahaṇānusāsani, evarūpaṃ anusāsaniṃ uggahetvāti attho. Idañhi diṭṭhadhammikaṃyeva sandhāya vadati, samparāyikam, pana niyyānikam vā anusāsaniṃ paccāsisantopi dakkhiṇeyyapaṇipātameva karoti nāmāti daṭṭhabbam. “**Yo panā**”tiādi “seṭṭhavaseneva...pe... gañhātī”ti vuttassatthassa vitthāravacanam.

“**Eva**”ntiādi pana “seṭṭhavasena ca bhijjati”ti vuttassa byatirekadassanam. Atthavasā līngavibhattivipariṇāmoti katvā gahitasaraṇāya upāsikāya vātipi yojetabbam. Evamīdisesu. **Pabbajitampī pi**-saddo sambhāvanatthoti vuttam “**pageva apabbajita**”nti. **Saraṇagamanam na bhijjati** seṭṭhavasena avanditattā. **Tathāti** anukaḍḍhanatthe nipāto “saraṇagamanam na bhijjati”ti. **Raṭṭhapūjitattāti** raṭṭhe, raṭṭhavāsīnam vā pūjitattā. Tayidaṃ bhayavasena vanditabbabhāvasseva samatthanam, na tu abhedassa kāraṇadassanam, tassa pana kāraṇam seṭṭhavasena avanditattāti veditabbam. Vuttañhi “seṭṭhavasena ca bhijjati”ti. **Seṭṭhavasenāti** loke aggadakkhiṇeyyatāya seṭṭhabhāvavasenāti attho. Tenāha “ayam loke aggadakkhiṇeyyoti vandati”ti. **Titthiyampi vandato na bhijjati**, pageva itaram. **Saraṇagamanappabhedoti** saraṇagamanavibhāgo, tabbivhāgasambandhato cettha sakkā abhedopi sukkena dassetunti abhedadassanam katam.

Ariyamaggo eva lokuttarasaraṇagamananti cattāri sāmāññaphalāni vipākaphalabhāvena vuttāni. **Sabbadukkhakkhayoti** sakalassa vaṭṭadukkhassa anuppādanirodho nibbānam. Ettha ca kammaśadisam **vipākaphalam**, tabbiparītam **ānisaṃsaphalanti** daṭṭhabbam. Yathā hi sālībījādīnam phalāni taṃsadisāni vipakkāni nāma honti, vipākaniruttiñca labhanti, na mūlaṅkurapattakkhandhanāḷāni, evaṃ kusalākusalānam phalāni arūpadhamabhāvena, sārammaṇabhāvena ca sadisāni vipakkāni nāma honti, vipākaniruttiñca labhanti, na tadaññāni kammanibbattānipi kammaśadisāni, tāni pana ānisaṃsāni nāma honti, ānisaṃsaniruttimattañca labhanti. “**Vuttañheta**”ntiādinā **dhammapade** **aggidattabrāhmaṇavatthupālimāharitvā** dasseti.

Yo cāti ettha **ca**-saddo byatireke, yo panāti attho. Tatrāyamadhippāyo – byatirekatthadīpane yadi “bahum ve saraṇam yanti, pabbatāni vanāni cā”tiādinā (dha. pa. 188) vuttam khemaṃ saraṇam na hoti, na uttamaṃ saraṇam, etañca saraṇamāgamma sabbadukkhā na pamuccati, evaṃ sati kiṃ nāma vatthu khemaṃ saraṇam hoti, uttamaṃ saraṇam, kiṃ nāma vatthum saraṇamāgamma sabbadukkhā pamuccatīti ce?

Yo ca buddhañca dhammañca, saṅghañca saraṇam gato...pe...

Etaṃ kho saraṇam khemaṃ, etaṃ saraṇamuttamaṃ;

Etaṃ saraṇamāgamma, sabbadukkhā pamuccatīti. (dha. pa. 190-92);

Evamīdisesu. Lokiyassa saraṇagamanassa aññatitthiyāvandanādinā kuppanato, calanato ca akuppaṃ acalam lokuttarameva saraṇagamanam pakāsetum “**cattāri ariyasaccāni, sammappaññāya passatī**”ti vuttam. Vācāsiliṭṭhatthañcettha sammāsaddassa rassattam. “**Dukkha**”ntiādi “cattāri ariyasaccāni”ti vuttassa sarūpadassanam. **Dukkhassa ca atikkamanti** dukkhanirodham. **Dukkhūpasamagāminanti** dukkhanirodhagāmiṃ. “**Eta**”nti “cattāri...pe... passatī”ti (dha. pa. 190) evaṃ vuttam lokuttarasaraṇagamanasaṅkhātam ariyasaccadassanam. **Kho**-saddo avadhāraṇattho padattayepi yojetabbo.

Niccato anupagamanādivasenāti “nicca”nti aggahaṇādivasena, itinā niddisitabbehi to-saddamicchanti saddavidū. “**Vuttañheta**”ntiādinā **ñāṇavibhaṅgādīsu** (ma. ni. 3.126; a. ni. 1.268)

āgataṃ pāliṃ sādhakabhāvena āharati. **Aṭṭhānanti** janakahetupaṭikkhepo. **Anavakāsoti** paccayahetupaṭikkhepo. Ubhayenāpi kāraṇameva paṭikkhipati. **Yanti** yena kāraṇena. **Diṭṭhisampannoti** maggaḍḍhiyā sampanno sotāpanno. **Kaṅci saṅkhāranti** catubhūmakesu saṅkhatasaṅkhāresu ekampi saṅkhāraṃ. **Niccato upagaccheyyāti** “nicco”ti gaṇheyya. **Sukhato upagaccheyyāti** “ekantasukhī attā hoti arogo paraṃ maraṇā”ti (dī. ni. 1.76) evaṃ attadiṭṭhivasena “sukho”ti gaṇheyya, diṭṭhivippayuttacittena pana ariyasāvako pariāhavūpasamattamaṃ mattahatthiparittāsito cakkhabrahmaṇo viya ukkārahūmiṃ kaṅci saṅkhāraṃ sukhato upagacchati. Attavāre kasiṇādipaṇṇattisaṅghaṇattham “saṅkhāra”nti avatvā “**dhamma**”nti vuttaṃ. Yathāha **parivāre** –

“Aniccā sabbe saṅkhārā, dukkhānattā ca saṅkhatā;
Nibbānañceva paññatti, anattā iti nicchayā”ti. (pari. 257);

Imesu pana tīsupi vāresu ariyasāvakaassa catubhūmakavaseneva paricchedo veditabbo, tebhūmakavaseneva vā. Yaṃ yañhi puthujjano “niccaṃ sukhaṃ attā”ti gāhaṃ gaṇhāti, taṃ taṃ ariyasāvako “aniccaṃ dukkhaṃ anattā”ti gaṇhanto gāhaṃ viniveṭheti.

“**Mātara**”ntiādīsu janikā **mātā**, janako **pitā**, manussabhūto khīṇāsavo **arahāti** adhippeto. Kiṃ pana ariyasāvako tehi aññaṃpi pāṇaṃ jīvitaṃ voropeyyāti? Etampi aṭṭhānameva. Cakkavattirajjasakajīvitahetupi hi so taṃ jīvitaṃ na voropeyya, tathāpi puthujjanabhāvassa mahāsāvajjātādassanattamaṃ ariyabhāvassa ca balavatāpakāsanattamaṃ evaṃ vuttanti datṭhabbaṃ. **Paduṭṭhacittoti** vadhakacittena padūsanacitto, padūsitacitto vā. **Lohitaṃ uppādeyyāti** jīvamānakasarīre khuddakamakkhikāya pivanamattampi lohitaṃ uppādeyya. **Saṅghaṃ bhindeyyāti** samānasamvāsakaṃ samānasīmāyaṃ ṭhitaṃ saṅghaṃ pañcahi kāraṇehi bhindeyya, vuttañhetam “pañcahupāli ākārehi saṅgho bhijjati kammena, uddesena, voharanto, anussāvanena, salākaggāhenā”ti (pari. 458) **aññaṃ satthāranti** ito aññaṃ titthakaraṃ “ayaṃ me satthā”ti evaṃ gaṇheyya, netam ṭhānaṃ vijjatīti attho. **Bhavasampadāti** sugatibhavana sampadā, idaṃ vipākaphalaṃ. **Bhogasampadāti** manussabhogadevabhogeḥi sampadā, idaṃ pana ānisaṃsaphalaṃ. “**Vuttañheta**”ntiādīnā **devatāsaṃyuttādipāliṃ** (saṃ. ni. 1.37) sādhakabhāvena dasseti.

Gatā seti ettha **se**-iti nipātamattaṃ. **Na te gamissanti apāyabhūminti** te buddhaṃ saraṇaṃ gatā tannimittaṃ apāyaṃ na gamissanti. **Mānusi** ca gāthābandhavasena visaññoganiddeso, manussesu jātanti attho. **Devakāyanti** devasaṅghaṃ, devapuraṃ vā “devānaṃ kāyo samūho etthā”ti katvā.

“**Aparampi**”tiādīnā saḷāyatanavagge **moggallānasamnyutte** (saṃ. ni. 4.341) āgataṃ aññaṃpi phalamāha, aparampi phalaṃ **mahāmoggallānattherena** vuttanti attho. **Aññe deveti** asaraṇaṅgate deve. **Dasahi ṭhānehīti** dasahi kāraṇehi. “**Dibbenā**”tiādi tassarūpadassanaṃ. **Adhigaṇhanti** abhibhavanti atikkamitvā tiṭṭhanti. “**Esa nayo**”ti iminā “sādhu kho devānaminda dhammasaraṇagamaṇaṃ hoti”ti (saṃ. ni. 4.341) suttapadaṃ atidisati. **Velāmasuttaṃ** nāma **aṅguttaranikāye** navanipāte jātigottarūpabhogasaddhāpaññādīhi mariyādavelātikantehi ulārehi guṇehi samannāgatattā **velāmanāmakassa** bodhisattabhūtaṃ caturāsītisahasārājūnaṃ ācariyabrāhmaṇassa dānakathāpaṭisaññuttaṃ suttaṃ (a. ni. 9.20) tattha hi karīsassa catutthabhāgappamāṇānaṃ caturāsītisahasasankhyānaṃ suvaṇṇapātirūpiyapātikamsapātīnaṃ yathākkamaṃ rūpiyasuvaṇṇa hiraññapūrānaṃ, sabbālankārapaṭimaṇḍitānaṃ, caturāsītīyā hatthisahasānaṃ caturāsītīyā assasahasānaṃ, caturāsītīyā rathasahasānaṃ, caturāsītīyā dhenusahasānaṃ, caturāsītīyā kaññāsahasānaṃ, caturāsītīyā pallaṅkasahasānaṃ, caturāsītīyā vatthakoṭṭisahasānaṃ, aparimāṇassa ca khajjabhojjādibhedassa āhārassa pariccajanavasena sattamāsādhikāni sattaṃvaccharāni nirantaraṃ pavattavelāmamahādānato ekassa sotāpannaṃ dinnadānaṃ mahapphalataraṃ, tato satamsoṭāpannānaṃ dinnadānato ekassa sakadāgāmino, tato ekassa anāgāmino, tato ekassa arahato, tato ekassa paccekabuddhassa, tato sammāsambuddhassa, tato buddhappamukhassa saṅghassa dinnadānaṃ mahapphalataraṃ, tato cātuddisaṃ saṅghaṃ uddissa vihāra karaṇaṃ, tato saraṇagamaṇaṃ mahapphalataranti ayamattho pakāsito. Vuttañhetam –

“Yaṃ gahapati velāmo brāhmaṇo dānaṃ adāsi mahādānaṃ, yo cekkaṃ diṭṭhisampannaṃ bhojeyya, idaṃ tato mahapphalataraṃ, yo ca satamaṃ diṭṭhisampannaṃ bhojeyya, yo cekkaṃ sakadāgāmiṃ bhojeyya, idaṃ tato mahapphalatara”ntiādi (a. ni. 9.20).

Iminā ca ukkaṭṭhaparicchedato lokuttarasseva saraṇagamanassa phalaṃ dassitanti veditabbaṃ. Tathā hi **velāmasuttaṭṭhakathāyaṃ** vuttaṃ “saraṇaṃ gaccheyyāti ettha maggenāgataṃ anivattanasaraṇaṃ adhippetamaṃ, apare panāhu ‘attānaṃ niyyātetvā dinnattā saraṇagamanamaṃ tato mahapphalatara’nti vutta”nti (a. ni. aṭṭha. 3.9.20) **kūṭadantasuttaṭṭhakathāyaṃ** pana vakkhati “yasmā ca saraṇagamanamaṃ nāma tiṇṇamaṃ ratanānaṃ jīvitapariccāgamayaṃ puññakammaṃ saggasampattiṃ deti, tasmā mahapphalatarañca mahānisamsatarañcāti veditabba”nti (dī. ni. aṭṭha. 1.350, 351) iminā pana nayena lokiyassāpi saraṇagamanassa phalaṃ idha dassitamevāti gahetabbaṃ. **Ācariyadhammapālattherenāpi** (dī. ni. ṭī. 1.250) hi ayamevattho icchitoti viññāyati idha ceva aññāsu ca **majjhimāgamaṭṭikādīsu** avisesatoyeva vuttattā, **ācariyasāriputtathārenāpi** ayamatto abhimato siyā **sāratthadīpaniyaṃ**, (sārattha. ṭī. verañjakaṇḍavaṇṇanā.15) **aṅguttaraṭṭikāyaṃ**ca tadubhayasādhāraṇavacanato. Apare pana vadanti “**kūṭadantasuttaṭṭhakathāyampi** (dī. ni. ṭī. 1.249) lokuttarasseva saraṇagamanassa phalaṃ vutta”nti, tadayuttameva tathā avuttattā. “Yasmā...pe... deti”ti hi tadubhayasādhāraṇakāraṇavasena tadubhayassāpi phalaṃ tattha vuttanti. **Velāmasuttādīnanti** ettha **ādisaddena** (a. ni. 4.34; itivu. 90) **aggappasādasuttachattamāṇavakavimānādīnaṃ** (vi. va. 886 ādayo) saṅgaho daṭṭhabbo.

Aññānaṃ nāma vatthuttayassa guṇānamajānaṃ tattha sammoho. **Samsayo** nāma “buddho nu kho, na nu kho”tiādinā (dī. ni. aṭṭha. 2.216) vicikicchā. **Micchāññānaṃ** nāma vatthuttayassa guṇānaṃ aguṇabhāvaparikkappanena viparītaggāho. **Ādisaddena** anādarāgāravādīnaṃ saṅgaho. **Samkilissatī** samkiliṭṭhaṃ malīnaṃ bhavati. **Na mahājutikanti**ādiṃ samkilesapariyāyo eva. Tattha **na mahājutikanti** na mahujjalaṃ, aparissuddhaṃ apariyodātanti attho. **Na mahāvippāranti** na mahānubhāvaṃ, apañītaṃ anulāranti attho. **Sāvajjoti** taṇhādīṭṭhādivasena sadoso. Tadeva phalavasena vibhāvetuṃ “**aniṭṭhaphalo**”ti vuttaṃ, sāvajjattā akantiphalo hotīti attho. Lokiyasaraṇagamanamaṃ sikkhāsamādānaṃ viya agahitakālaparicchedamaṃ jīvitapariyantameva hoti, tasmā tassa khandhabhedena bhedo, so ca taṇhādīṭṭhādivirahitattā adosoti āha “**anavajjo kālakiriyāya hoti**”ti. **Soti** anavajjo saraṇagamanabhedo. Satipi anavajjatte iṭṭhaphalopi na hoti, pageva aniṭṭhaphalo avipākattā. Na hi taṃ akusalaṃ hoti, atha kho bhedanamattanti adhippāyo. **Bhavantarepīti** aññasmimpi bhavati.

Dharasaddassa dvikammikattā “upāsaka”nti idampi kammameva, tañca kho ākāraṭṭhāneti atthamattaṃ dassetuṃ “**upāsako ayanti evamaṃ dhāretū**”ti vuttaṃ. **Dhāretūti** ca upadhāretūti attho. Upadhāraṇaṅcetta jānanamevāti dasseti “**jānatū**”ti iminā. **Upāsakavidhikosallatthanti** upāsakabhāvavidhānakosallatthaṃ. **Ko upāsakoti** sarūpapucchā, kiṃ lakkhaṇo upāsako nāmāti vuttaṃ hoti. **Kasmāti** hetupucchā, kena pavattinimittena upāsakasaddo tasmīṃ puggale niruḥhoti adhippāyo. Tenāha “**kasmā upāsakoti vuccatī**”ti. Saddassa hi abhidheyye pavattinimittameva tadatthassa tabbhāvākāraṇaṃ. **Kimassa sīlanti** vatasamādānapucchā, kīdisamaṃ assa upāsakassa sīlaṃ, kittakena vatasamādānenāyaṃ sīlasampanno nāma hotīti attho. **Ko ājivoti** kammamādānapucchā, ko assa sammāājīvo, kena kammamādānena assa ājīvo sambhavatīti pucchati, so pana micchājīvassa parivajjanena hotīti micchājīvopi vibhajiyati. **Kā vipattīti** tadubhayesaṃ vipaṭṭipattipucchā, kā assa upāsakassa sīlassa, ājīvassa ca vipattīti attho. Sāmaññaniddiṭṭhe hi sati anantarasseva vidhi vā paṭisedho vāti anantarassa gahaṇaṃ. **Kā sampattīti** tadubhayesameva sammāpaṭṭipattipucchā, kā assa upāsakassa sīlassa, ājīvassa ca sampattīti vuttanayena attho. Sarūpavacanattādisaṅkhātena pakārena kiratīti **pakiṇṇamaṃ**, tadeva **pakiṇṇakamaṃ**, anekākārena pavattaṃ atthavinicchayanti attho.

Yo kocīti khattiyabrāhmaṇādīsu yo koci, iminā padena akāraṇamettha jātiādivisesoti dasseti, “**saraṇagato**”ti iminā pana saraṇagamanamevettha pamāṇanti. “**Gahaṭṭho**”ti ca iminā āgārikesveva upāsakasaddo niruḥho, na pabbajjūpagatesūti. Tamattaṃ mahāvaggasamyutte **mahānāmasuttena** (saṃ. ni. 5.1033) sādheṇto “**vuttañheta**”ntiādimāha. Tattha **yatoti** buddhādisaraṇagamanato. **Mahānāmāti** attano cūlapituno sukkodanassa puttamaṃ mahānāmaṃ nāma sakyarājānaṃ bhagavā ālapati. **Ettāvātīti**

ettakena buddhādisaraṇagamanena upāsako nāma hoti, na jātiādīhi kāraṇehīti adhippāyo. Kāmañca tapussabhallikānaṃ viya dvecācikaupāsakabhāvopi atthi, so pana tadā vatthuttayābhāvato kadāciyeva hotīti sabbadā pavattaṃ tevācikaupāsakabhāvaṃ dassetuṃ “saraṇagato”ti vuttaṃ. Tepi hi pacchā tisaraṇagatā eva, na cettha sambhavati aññaṃ paṭikkhipitvā ekaṃ vā dve vā saraṇagato upāsako nāmāti imamatthampi ñāpetuṃ evaṃ vuttanti daṭṭhabbaṃ.

Upāsanatoti teneva saraṇagamanena, tattha ca sakkaccakāritāya gāravabahumānādiyogena payirupāsana, iminā katvatthaṃ dasseti. Tenāha “**so hī**”tiādi.

Veramaṇiyoti ettha veraṃ vuccati pāṇātipātādidussīlyam, tassa maṇanato hananato vināsanato veramaṇiyo nāma, pañca viratiyo viratipadhānattā tassa sīlassa. Tathā hi udāhaṭṭe **mahānāmasutte** vuttaṃ “**pāṇātipātā paṭivirato hotī**”tiādi (saṃ. ni. 5.1033) “**yathāhā**”tiādinā sādhaṃ, sarūpañca dasseti yathā taṃ uyyānapālassa ekeneva udakapatiṭṭhānapayogena ambasecanaṃ, garusinānañca. Yathāha **ambavimāne** (vi. va. 1151 ādayo) –

“Ambo ca sitto samaṇo ca nhāpito,
Mayā ca puññaṃ pasutaṃ anappakam;
Iti so pītiyā kāyaṃ, sabbaṃ pharati attano”ti.
[“Ambo ca siñcato āsi, samaṇo ca nahāpito;
Bahuñca puññaṃ pasutaṃ, aho saphalaṃ jīvita”nti. (idha ṭīkāyaṃ mūlapāṭho)]

Evamādisesu. **Ettāvatāti** ettakena pañcaveraviratimattena.

Micchāvaṇijjāti ayuttavaṇijjā, na sammāvaṇijjā, asāruppavaṇijjakammānīti attho. **Pahāyāti** akaraṇeneva pajahitvā. **Dhammenāti** dhammato anapetena, tena micchāvaṇijjakammāna ājīvanato aññaṃ paṭikkhipati. **Samenāti** avisamena, tena kāyavisamādiduccaritaṃ vajjjetvā kāyasamādinā sucaritena ājīvanam dasseti. “**Vuttañheta**”ntiādinā **pañcaṅguttarapālimāharitvā** sādhaṃ, sarūpañca dasseti. Vāṇijānaṃ ayanti **vaṇijjā**, yassa kassaci vikkayo, itthilingapadametaṃ. **Satthavaṇijjāti** āvudhabhaṇḍaṃ katvā vā kāretvā vā yathākatam paṭilabhitvā vā tassa vikkayo. **Sattavaṇijjāti** manussavikkayo. **Maṃsavaṇijjāti** sūnakārādayo viya migasūkarādiḥ posevā maṃsaṃ sampādetvā vikkayo. **Majjjavaṇijjāti** yaṃ kiñci majjaṃ yojetvā tassa vikkayo. **Visavaṇijjāti** viṣaṃ yojetvā, saṅgahetvā vā tassa vikkayo. Tattha satthavaṇijjā paroparodhanimittatāya **akaraṇiyāti** vuttā, sattavaṇijjā abhujissabhāvakaraṇato, maṃsavaṇijjā vadhaḥetuto, majjjavaṇijjā pamādaṭṭhānato, visavaṇijjā parūpaghātakāraṇato.

Tassevāti yathāvuttassa pañcaveramaṇilakkhaṇassa sīlassa ceva pañcamicchāvaṇijjādippahānalakkhaṇassa ājīvassa ca paṇiniddeso. **Vipattīti** bhedo, pakopo ca. Evaṃ sīlājīvavipattivasena upāsakassa vipattim dassetvā assaddhiyādivasenaṃpi dassento “**apicā**”tiādimāha. **Yāyāti** assaddhiyādivipattipattiyā. **Caṇḍālōti** nīcadhammajātikaṭṭhena upāsakacaṇḍālo. **Malanti** malīnaṭṭhena upāsakamalaṃ. **Patikiṭṭhoti** lāmakatṭhena upāsakanihīno. **Sāpissāti** sāpi assaddhiyādivipattipatti assa upāsakassa vipattīti veditabbā. Kā panāyanti vuttaṃ “**te cā**”tiādi. Upāsakacaṇḍālasuttaṃ, (a. ni. 5.175) upāsakaratanasuttañca pañcaṅguttare. Tattha buddhādīsu, kammakammaphalesu ca saddhāvīpariyāyo micchāvīmokkho assaddhiyaṃ, tena samannāgato **assaddho**. Yathāvuttasīlavipattījīvavipattivasena **dussīlo**. “Iminā diṭṭhādinā idaṃ nāma maṅgalaṃ hotī”ti evaṃ bālajānaparikkappitena kotūhalasañkhātena diṭṭhasutamutamaṅgalena samannāgato **kotūhalamaṅgaliko**. **Maṅgalaṃ paccetīti** diṭṭhamaṅgalādibhedam maṅgalameva pattiyāyati **no kammanti** kammassakataṃ no pattiyāyati. **Ito ca bahiddhāti** ito sabbaññubuddhasāsanato bahiddhā bāhirakasamaye. **Ca**-saddo aṭṭhānapayutto, sabbattha “assaddho”tiādīsu yojetabbo. **Dakkhiṇeyyaṃ pariyesatīti** duppaṭipannaṃ dakkhiṇārahasaññī gavesati. **Tatthāti** bahiddhā bāhirakasamaye. **Pubbakāraṃ karotīti** paṭhamataraṃ dānamānanādikaṃ kusalakiriyaṃ karoti, bāhirakasamaye paṭhamataraṃ kusalakiriyaṃ katvā pacchā sāsane karotīti vuttaṃ hotīti. **Tatthāti** vā tesam bāhirakānaṃ

titthiyānantipi vadanti. Ettha ca dakkhiṇeyyapariyesanapubbakāre ekaṃ katvā pañca dhammā veditabbā.

Assāti upāsakassa. **Silasampadāti** yathāvuttena pañcaveramaṇilakkhaṇena sīlena sampadā. **Ājīvasampadāti** pañcamicchāvaṇijjādippahānalakkhaṇena ājīvena sampadā. Evaṃ silasampadāājīvasampadāvasena upāsakassa sampattim dassetvā saddhādivasenapi dassento “**ye cassā**”tiādīmāha. Ye ca pañca dhammā, tepi assa sampattīti yojanā. **Dhammehīti** guṇehi. Catunnaṃ parisānaṃ ratijjanatthēna upāsakova ratanaṃ **upāsakaratanam**. Guṇasobhākittisaddasugandhatādīhi upāsakova padumaṃ **upāsakapadumaṃ**. Tathā **upāsakapuṇḍarikaṃ**. Sesam vipattiyam vuttavipariyāyena veditabbam.

Nigaṇṭhīnanti nigaṇṭhasamaṇīnaṃ. **Ādimhīti** paṭhamatthe. **Ucchagganti** ucchuaggaṃ ucchukoṭi. Tathā **velagganti** etthāpi. **Koṭiyanti** pariyantakoṭiyam, pariyantattheti attho. **Ambilagganti** ambilakoṭṭhāsam. Tathā **tittakagganti** etthāpi. **Vihāraggenāti** ovarakakoṭṭhāsenā “imasmiṃ gabbhe vasantānaṃ idaṃ nāma phalaṃ pāpuṇāti”tiādīnā taṃtaṃvasanaṭṭhānakoṭṭhāsenāti attho. **Pariveṇaggenāti** etthāpi eseva nayo. **Aggeti** ettha upayogavacanassa ekārādeso, vacanavipallāso vā, katvā-saddo ca sesoti vuttam “**ādim katvā**”ti. Bhāvatthe tā-saddoti dasseti “**ajjabhāva**”nti iminā, ajjabhāvo ca nāma tasmim dhammassavanasamaye dharamānakatāpāpuṇakabhāvo. Tadā hi taṃ nissayavasena dharamānataṃ nimittaṃ katvā taṃdivasanissitaaruṇuggamanato paṭṭhāya yāva puna aruṇuggamanā etthantare ajjasaddo pavattati, tasmā tasmim samaye dharamānakatāsāṅkhātaṃ ajjabhāvaṃ ādim katvāti attho daṭṭhabbo. **Ajjatanti** vā ajjaiceva attho tā-saddassa sakatthavuttito yathā “devatā”ti, ayam ācariyānaṃ mati. Evaṃ paṭhamakkharena dissamānapāṭhānurūpaṃ attham dassetvā idāni tatiyakkharena dissamānapāṭhānurūpaṃ attham dassetuṃ “**ajjadaggeti vā pāṭho**”tiādi vuttam. Āgamamattattā **dakāro padasandhikaro**. **Ajjāti** hi nepātikamidaṃ padaṃ. Tenāha “**ajja agganti attho**”ti.

“**Pāṇo**”ti idaṃ paramatthato jīvitindriye eva, “**pāṇupeta**”nti ca karaṇattheneva samāsoti nāpetuṃ “**yāva me jīvitam pavattati, tāva upeta**”nti āha. Upeti upagacchatīti hi **upeto**, pāṇehi karaṇabhūtehi upeto **pāṇupetoti** attho ācariyehi abhimato. Iminā ca “pāṇupetanti idaṃ padaṃ tassa saraṇagamanassa āpāṇakoṭikatādassana”nti imamattaṃ vibhāveti. “Pāṇupeta”nti hi iminā yāva me pāṇā dharanti, tāva saraṇam upeto, upento ca na vācāmattena, na ca ekavāraṃ cittuppādamattena, atha kho pāṇānaṃ pariccajanavasena yāvajīvaṃ upetoti āpāṇakoṭikatā dassitā. “**Tīhi...pe... gata**”nti idaṃ “saraṇam gata”nti etassa atthavacanam. “**Anaṅṅasatthuka**”nti idaṃ pana antogadhāvadhāraṇena, aṅṅatthāpohanena ca nivattetabbatthadassanaṃ. Ekacco kappiyakāraṇasaddassa attho upāsakasaddassa vacanīyopi bhavatīti vuttam “**upāsakaṃ kappiyakāraṇa**”nti, attasanniyyātanasaraṇagamanam vā sandhāya evam vuttanti daṭṭhabbam. Evaṃ “pāṇupeta”nti iminā nītatthato dassitam tassa saraṇagamanassa āpāṇakoṭikataṃ dassetvā evam vadanto panesa rājā “jīvitena saha vatthuttayam paṭipūjento saraṇagamanam rakkhāmī”ti adhippāyam vibhāvetīti neyyatthato vibhāvitam tassa raṅṅo adhippāyam vibhāvento “**ahaṅṅhī**”tiādīmāha. Tattha **hi**-saddo samatthane, karaṇatthe vā, tena imāya yuttiyā, iminā vā karaṇena upāsakaṃ maṃ bhagavā dhāretūti ayamattho pakāsito.

Accayanaṃ sādhumariyādaṃ atikkamma madditvā pavattanaṃ **accayo**, kāyikādiajjhācārasāṅkhāto dosoti āha “**aparādho**”ti, acceti abhibhavitvā pavattati etenāti vā **accayo**, kāyikādivītikamassa pavattanako akusaladhammasāṅkhāto doso eva, so ca aparajjhāti etenāti **aparādhoti** vuccati. So hi aparajjhantaṃ purisaṃ abhibhavitvā pavattati. Tenāha “**atikkamma abhibhavitvā pavatto**”ti. **Dhammanti** dasarājadhammaṃ. Vitthāro panetassa **mahāhaṃsajātakādīhi** vibhāvetabbo. **Caratīti** ācarati karoti. **Dhammenevāti** dhammato anapeteneva, anapetakusaladhammenevāti attho. Tenāha “**na pitughātanādīnā adhammenā**”ti. “**Paṭiggaṇhātū**”ti etassa adhivāsanaṃ sampaṭicchātūti saddato attho, adhippāyato pana attham dassetuṃ “**khamatū**”ti vuttam. Puna akaraṇamettha saṃvaroti dasseti “**puna evarūpassā**”tiādīnā. “**Aparādhassā**”tiādi aṅṅamaṅṅam vevacanam.

251. “Yathādhammo ʒhito, tathevā”ti imināpi yathā-saddassa anurūpatthamāha, sādhusamāciṅṅakusaladhammānurūpanti attho. Paṭisaddassa anatthakataṃ dasseti **“karosī”**ti iminā. Paṭikammaṃ karosītipi vadanti. Yathādhammaṃ paṭikaraṇaṃ nāma katāparādhassa khamāpanamevāti āha **“khamāpesīti vuttaṃ hotī”**ti. “Paṭiggaṇhāmā”ti etassa adhvāsanāṃ sampaṭicchāmāti atthaṃ dasseti **“khamāmā”**ti iminā. **Vuddhi hesāti** ettha **ha**-kāro padasiliṭṭhatāya āgamo, **hi**-saddo vā nipātamattaṃ. **Esāti** yathādhammaṃ paṭikiriya, āyatim saṃvarāpajjanā ca. Tenāha “yo accayaṃ...pe...āpajjati”ti. Sadevakena lokena “saraṇa”nti araṇīyato upagantabbato tathāgato **ariyo** nāmāti vuttaṃ **“buddhassa bhagavato”**ti. Vineti satte etenāti **vinayo**, sāsanāṃ. Vaddhati saggamokkhasampatti etāyāti **vuddhi**. Katamā pana sā, yā “esā”ti niddiṭṭhā vuddhīti codanamapanetuṃ “yo accaya”ntiādi vuttanti sambandhaṃ dasseti **“katamā”**tiādinā, yā ayaṃ saṃvarāpajjanā, sā “esā”ti niddiṭṭhā vuddhi nāmāti attho. “Yathādhammaṃ paṭikarotī”ti idaṃ āyatim saṃvarāpajjanāya pubbakiriyaḍassananti viññāpanatthaṃ **“yathādhammaṃ paṭikarivā āyatim saṃvarāpajjanā”**ti vuttaṃ. Esā hi ācariyaṇaṃ pakati, yadidaṃ yena kenaci pakārena adhippāyantaraviññāpanaṃ, etapadena pana tassāpi paṭiniddeso sambhavati “yathādhammaṃ paṭikarotī” tipi paṭiniddisitabbassa dassanato. Keci pana “yathādhammaṃ paṭikarotī”ti idaṃ pubbakiriyaṃmattasseva dassanaṃ, na paṭiniddisitabbassa. ‘Āyatiṅca saṃvaram āpajjati’ti idaṃ pana paṭiniddisitabbassevāti viññāpanatthaṃ evaṃ vutta’nti vadanti, tadayuttameva khamāpanassāpi vuddhihetubhāvena ariyūpavāde vuttattā. Itarathā hi khamāpanābhāvepi āyatim saṃvarāpajjanāya eva ariyūpavādāpagamaṇaṃ vuttaṃ siyā, na ca pana vuttaṃ, tasmā vuttanayeneva attho veditabboti.

Kasmā pana “yāya”ntiādinā dhammaniddeso dassito, nanu pāliyaṃ “yo accaya”ntiādinā puggalaniddeso katoti codanaṃ sodhetuṃ **“desanaṃ panā”**tiādi āraddhaṃ. **Puggalādhiṭṭhānaṃ karontoti** puggalādhiṭṭhānadhammadesanaṃ karonto. Puggalādhiṭṭhānāpi hi puggalādhiṭṭhānadhammadesanā, puggalādhiṭṭhānapuggaladesanāti duvidhā hoti. Ayametthādhippāyo – kiṅcāpi “vuddhi hesā”tiādinā dhammādhiṭṭhānadesanā āraddhā, tathāpi puna puggalādhiṭṭhānaṃ karontena “yo accaya”ntiādinā puggalādhiṭṭhānadesanā āraddhā desanāvilāsavasena, veneyyajjhāsayasasena cāti. Tadubhayavaseneva hi dhammādhiṭṭhānādibhedena catubbidhā desanā.

252. Vacasāyatteti vacasā āyatte. Vācāpaṭibandhatteti vadanti, taṃ “so hī”tiādinā viruddhaṃ viya dissati. **Vacasāyatteti** pana vācāpariyosānattheti attho yutto osānakaraṇatthassa sāsaddassa vasena sāyasaddanipphattito yathā “dāyo”ti. Evañhi samatthanavacanampi upapannaṃ hoti. Gamaṇāya kataṃ vācāpariyosānaṃ katvā vuttattā tasmimyeva atthe vattatīti. **Handasaddaṅhi** codanatthe, vacasaggatthe ca icchanti. “Handa dāni bhikkhave āmantayāmī”tiādīsu (dī. ni. 2.218; saṃ. ni. 1.186) hi codanatthe, “handa dāni apāyāmī”tiādīsu (jā. 2.22.843) vacasaggatthe, **vacasaggo** ca nāma vācāvissajjanaṃ, taṅca vācāpariyosānamevāti daṭṭhabbaṃ. Dukkarakiccavasena bahukiccatāti āha **“balavakiccā”**ti. “Avassaṃ kattabbaṃ **kiccaṃ**, itaraṃ **karaṇīyaṃ**. Paṭhamaṃ vā kattabbaṃ **kiccaṃ**, pacchā kattabbaṃ **karaṇīyaṃ**. Khuddakaṃ vā **kiccaṃ**, mahantaṃ **karaṇīya**”ntipi **udānaṭṭhakathādīsu** (udā. aṭṭha. 15) vuttaṃ. Yaṃtaṃ-saddānaṃ nīccasambandhattā, gamanakālaḍānanaṃ, aññakiriyaṃca anupayuttattā **“tassa kālaṃ tvameva jānāsī”**ti vuttaṃ. Idaṃ vuttaṃ hoti “tayā ñātaṃ gamanakālaṃ tvameva ñatvā gacchāhī”ti. Atha vā yathā kattabakiccaniyojane “imaṃ jāna, imaṃ dehi, imaṃ āharā”ti (pāci. 88, 93) vuttaṃ, tathā idhāpi tayā ñātaṃ kālaṃ tvameva jānāsī, gamanasasena karohīti gamane niyojetīti dassetuṃ **“tvameva jānāsī”**ti pāṭhaseso vuttoti daṭṭhabbaṃ. **“Tikkhattuṃ padakkhiṇaṃ katvā”**tiādi yathāsamāciṅṅaṃ pakaraṇādhiḍātamattaṃ dassetuṃ vuttaṃ. Tattha **padakkhiṇanti** pakārato kataṃ dakkhiṇaṃ. Tenāha **“tikkhattu”**nti. **Dasanakhasamodhānasamujjalanti** dvīsu hatthesu jātānaṃ dasanaṃ nakhānaṃ samodhānena ekībhāvena samujjalantaṃ, tena dvinnaṃ karatalānaṃ samaṭṭhapaṇaṃ dasseti. **Añjalinti** hatthapuṭaṃ. Añjati byattim pakāseti etāyāti **añjali**. Añju-saddaṅhi byattiyaṃ, alipaccayaṅca icchanti saddavidū. **Abhimukhovāti** sammukho eva, na bhagavato piṭṭhiṃ dassetvāti attho. Pañcappatiṭṭhitavandanāyato vutto eva.

253. Imasmimyeva attabhāve vipaccanakānaṃ attano pubbe katakusalamūlānaṃ khaṇanena **khato**, tesameva upahanaṇena **upahato**, padadvayenapi tassa kammāparādhameva dasseti pariyaṃvacanattā

padadvayassa. Kusalamūlasaṅkhātapatitṭhābhedanena khatūpahatabhāvaṃ dassetuṃ “**bhinnapatiṭṭho jāto**”ti vuttaṃ. Patiṭṭhā, mūlanti ca atthato ekaṃ. Patiṭṭhahati sammattaniyāmokkamaṇaṃ etāyāti hi **patiṭṭhā**, tassa kusalūpanissayasampadā, sā kiriyāparādheṇa bhinnā vināsītā etenāti **bhinnapatiṭṭho**. Tadeva vitthārento “**tathā**”tiādimāha. Yathā kusalamūlasaṅkhātā attano patiṭṭhānajatā, tathā anena raññā attanāva attā khato khanitoti yojanā. **Khatoti** hi idaṃ idha kammavasena siddhaṃ, pāḷiyaṃ pana kattuvasenāti daṭṭhabbaṃ. Padadvayassa pariyaṃyattā “upahato”ti idha na vuttaṃ.

“Rāgo rajo na ca pana reṇu vuccatī”tiādi (mahāni. 209; cūḷani. 74) vacanato rāgadosamohāva idha rajo nāmāti vuttaṃ “**rāgarajādivirahita**”nti. Vītasaddassa vigatapariyaṃyataṃ dasseti “**vigatattā**”ti iminā. **Dhammesu cakkhūnti** catusaccadhammesu pavattaṃ tesāṃ dassanaṭṭhena cakkhuṃ. **Dhammesūti** vā heṭṭhimesu tīsu maggadhammesu. **Cakkhūnti** sotāpattimaggasaṅkhātāṃ ekaṃ cakkhuṃ, samudāyekadesavasena ādhāratthasamāsoyaṃ, na tu niddhāraṇatthasamāso. So hi sāsanaṅgānthesu, sakkataganthesu ca sabbattha paṭisiddhoti. **Dhammamayanti** samathavipassanādhammena nibbattaṃ, iminā “dhammena nibbattaṃ cakkhu **dhammacakkhū**”ti atthamāha. Apica **dhammamayanti** sīlāditiividhadhammakhandhoyeva **maya**-saddassa sakatthe pavattanato, anena “dhammoyeva cakkhu **dhammacakkhū**”ti atthamāha. **Aññesu ṭhānesūti** aññesu suttapadesesu, etena yathāpāṭhaṃ tividdhatthataṃ dasseti. Idha pana sotāpattimaggassevetaṃ adhivacanaṃ, tasmimpi anadhigate aññesaṃ vattabbatāyeva abhāvatoṭi adhippāyo.

Idāni “khatāyaṃ bhikkhave rājā”tiādi pāṭhassa suviññeyyamadhippāyaṃ dassento “**idaṃ vuttaṃ hotī**”tiādimāha. Tattha **nābhavissāti** sace na abhavissatha, evaṃ satīti attho. Atīte hi idaṃ kālātipattivacanaṃ, na anāgateti daṭṭhabbaṃ. Esa nayo **sotāpattimaggam patto abhavissāti** etthāpi. Nanu ca maggapāpuṇanavacanaṃ bhavissamānattā anāgatakalikanti? Saccam aniyamite, idha pana “**idhevāsane nisinno**”ti niyamittā atītakālikamevāti vedittabbaṃ. Idañhi bhagavā rañño āsanā vuṭṭhāya acirapakkantasseva avocāti. **Pāpamittasamsaggenāti** devadattena, devadattaparisaṅkhātēna ca pāpamittēna samsaggato. **Assāti** sotāpattimaggassa. “**Evaṃ santepī**”tiādinā pāṭhānāruḷhaṃ vacanāvasesaṃ dasseti. **Tasmāti** saraṇaṃ gatattā muccissatīti sambandho. “**Mama ca sāsana mahantatāyā**”ti pāṭho yutto, katthaci pana **ca**-saddo na dissati, tattha so luttanidditṭhoti daṭṭhabbaṃ. Na kevalaṃ saraṇaṃ gatattāyeva muccissati, atha kho yattha esa pasanno, pasannākāraṇa karoti, tassa ca tividdhassapī sāsanaṃ uttamattāyāti hi saha samuccayena attho adhippetoti.

“**Yathā nāmā**”tiādi dukkarakammavipākato sukarena muccanena upamādassanaṃ. **Kocīti** koci puriso. **Kassacīti** kassaci purisassa, “vadhā”nti ettha bhāvayoge kammatthe sāmivacanaṃ. **Pupphamuṭṭhimattēna daṇḍenāti** pupphamuṭṭhimattasaṅkhātēna dhanadaṇḍena. **Mucceyyāti** vadhakammadaṇḍato mucceyya, **daṇḍenāti** vā nissakkatthe karaṇavacanaṃ “sumuttā mayaṃ tena mahāsamaṇenā”tiādisu (dī. ni. 2.232; cūḷava. 437) viya, pupphamuṭṭhimattēna dhanadaṇḍato, vadhadaṇḍato ca mucceyyāti attho. **Lohakumbhiyanti** lohakumbhinarake. Tattha hi tadanubhavanakānaṃ sattānaṃ kammabalena lohamayā mahatī kumbhī nibbattā, tasmā taṃ “**lohakumbhī**”ti vuccati. Uparimatalato **adho patanto**, heṭṭhimatalato **uddhaṃ gacchanto**, ubhayathā pana saṭṭhivassasahassāni hontī. Vuttaṅga –

“Saṭṭhivassasahassāni, paripuṇṇāni sabbaso;
Niraye paccamānānaṃ, kadā anto bhavissatī”ti. (pe. va. 802; jā. 1.4.54);

“Heṭṭhimatalaṃ patvā, uparimatalaṃ pāpuṇitvā muccissatī”ti vadanto imamatthaṃ dīpeti – yathā aññe seṭṭhiputtādayo aparāparaṃ adho patantā, uddhaṃ gacchantā ca anekāni vassasatasahassāni tattha paccanti, na tathā ayaṃ, ayaṃ pana rājā yathāvuttakāraṇena ekavārameva adho patanto, uddhaṅga gacchanto saṭṭhivassasahassāniyeva paccitvā muccissatīti. Ayaṃ pana attho kuto laddhoti anuyogaṃ pariharanto “**idampi kira bhagavatā vuttamevā**”ti āha. **Kirasaddo** cettha anussavanattho, tena bhagavatā vuttabhāvassa ācariyaparamparato suyyamānataṃ, imassa ca atthassa

ācariyaparamparābhatabhāvaṃ dīpeti. Atha pāḷiyaṃ saṅgītaṃ siyāti codanamapaneti “**pāḷiyaṃ pana na āruḷha**”nti iminā, pakiṇṇakadesanābhāvena pāḷiyamanāruḷhattā pāṭhabhāvena na saṅgītanti adhippāyo. Pakiṇṇakadesanā hi pāḷiyamanāruḷhāti aṭṭhakathāsu vuttaṃ.

Yadi anantare attabhāve narake paccati, evaṃ sati imaṃ desanaṃ sutvā ko rañño ānisaṃso laddhoti kassaci āsankā siyāti tadāsankānivattanatthaṃ codanaṃ uddharitvā pariharitvaṃ “**idam panā**”tiādi vuttaṃ. “**Ayañhi**”tiādinā niddālābhādikaṃ diṭṭhadhammikasamparāyikaṃ anekavidhaṃ mahānisaṃsaṃ sarūpato niyamevā dasseti. Ettha hi “**ayaṃ...pe... niddaṃ labhati**”ti iminā niddālābhaṃ dasseti, tadā kāyikacetasikadukkhāpagatabhāvañca niddālābhasīsenā, “**tiṇṇaṃ...pe... akāsi**”ti iminā tiṇṇaṃ ratanānaṃ mahāsakkārikariyaṃ, “**pothujjanikāya...pe... nāhosī**”ti iminā sātisaṃsaṃ pothujjanikasaddhāpaṭilābhaṃ dasseti evamādi diṭṭhadhammiko, “**anāgate...pe... parinibbāyissati**”ti iminā pana ukkaṃsato samparāyiko dassito, anavasesato pana aparāparesu bhavesu aparimāṇoyeva samparāyiko veditabbo.

Tattha **madhurāyāti** madhurarasabhūtāya. **Ojavantiyāti** madhurarasassāpi sārabhūtāya ojāya ojavatiyā. Puthujjane bhavā **pothujjanikā**. Pañca māre viasesato jītavāti **vijitāvī**, parūpadesavirahatā cettha viasesabhāvo. Paccekāṃ abhisambuddhoti **paccekabuddho**, anācariyako hutvā sāmāññeva sambodhiṃ abhisambuddhoti attho. Tathā hi “paccekabuddhā sayameva bujjhanti, na pare bodhenti, attharasameva paṭivijjhanti, na dhammarasaṃ. Na hi te lokuttaradhammaṃ paññattiṃ āropetvā desetva sakkonti, mūgena diṭṭhasupino viya, vanacarakena nagare sāyitabyañjanaraso viya ca nesāṃ dhammābhisamayo hoti, sabbaṃ iddhisamāpattipaṭisambhidāpabhedaṃ pāpuṇanti”ti (su. ni. aṭṭha. 1.khaggavisāṇasuttavaṇṇanā; apa. aṭṭha. 1.90, 91) aṭṭhakathāsu vuttaṃ.

Etthāha – yadi rañño kammantarāyābhāve tasmimyeva āsane dhammacakkhu uppajjissatha, atha kathaṃ anāgate paccekabuddho hutvā parinibbāyissati. Yadi ca anāgate paccekabuddho hutvā parinibbāyissati, atha kathaṃ tasmimyeva āsane dhammacakkhu uppajjissatha, nanu ime sāvakabodhipaccekabodhiupanissayā bhinnanissayā dvinnāṃ bodhīnaṃ asādhāraṇabhāvato. Asādhāraṇā hi etā dve yathākkamaṃ pañcaṅgadvayaṅgasampattiyā, abhinīhārasamiddhivasena, pāramīsambharaṇakālavasena, abhisambujjhanavasena cāti? Nāyaṃ virodho ito paratoyevassa paccekabodhisambhāraṇaṃ sambharaṇiyattā. Sāvakabodhiyā bujjhanakasattāpi hi asati tassā samavāye kālantare paccekabodhiyā bujjhissanti tathābhinihārasa sambhavatoti. Apare pana bhaṇanti – “paccekabodhiyāyevāyaṃ rājā katābhinihāro. Katābhinihārāpi hi tattha niyatimappattā tassa ñāssa paripākaṃ anupagatatā satthu sammukhībhāve sāvakabodhiṃ pāpuṇissanti bhagavā ‘sacāyaṃ bhikkhave rājā’tiādimavoca, mahābodhisattānameva ca ānantariyaparimutti hoti, na itaresaṃ bodhisattānaṃ. Tathā hi paccekabodhiyaṃ niyato samāno devadatto cirakālasambhūtena lokanāthe āghātena garutarāni ānantariyakammāni pasavi, tasmā kammantarāyena ayaṃ idāni asamavetadassanābhisamayo rājā paccekabodhinīyāmena anāgate vijitāvī nāma paccekabuddho hutvā parinibbāyissati”ti daṭṭhabbaṃ, yuttataramettha vīmaṃsitvā gahetabbaṃ.

Yathāvuttaṃ pāḷimeva saṃvaṇṇanāya nigamavasena dassento “**idamavocā**”tiādimāha. Tassattho hi heṭṭhā vuttoti. Apica pāḷiyamanāruḷhampi atthaṃ saṅgahetuṃ “**idamavocā**”tiādinā nigamanaṃ karotīti daṭṭhabbaṃ.

Iti sumaṅgalavilāsiniyā dīghanikāyāṭṭhakathāya paramasukhumagambhīraduranubodhatthaparidīpanāya suvimalavipulapaññāveyyattiyajananāya ajjavamaddavasoraccasaddhāsatiḍḍhitibuddhikhantivīriyādidhammasamaṅginā sātṭhakathe piṭakattaye asaṅgāsamhiraṇasāradaññācārīnā anekappabhedasakasamayasaṃsāraṅgahanajjhogāhinā mahāgaṇinā mahāveyyākaraṇena ñāṇābhivaṃsadhammasenāpatināmatherena mahādhammarājādhirājagaruṇā katāya sādhuvilāsiniyā nāma līnatthappakāsaniyā sāmāññaphalasuttavaṇṇanāya līnatthappakāsanaṃ.

Sāmāññaphalasuttavaṇṇanā niṭṭhitā.

3. Ambaṭṭhasuttavaṇṇanā

Addhānagamanavaṇṇanā

254. Evaṃ sāmāññaphalasuttaṃ saṃvaṇṇetvā idāni ambaṭṭhasuttaṃ saṃvaṇṇento yathānupubbam saṃvaṇṇokāsassa pattabhāvaṃ vibhāvetuṃ, sāmāññaphalasuttassānantaraṃ saṅgītassa suttassa ambaṭṭhasuttabhāvaṃ pakāsetuṃ “**evaṃ me suttaṃ...pe... kosalesūti ambaṭṭhasutta**”nti āha. Evamīdisesu. Itisaddo cettha ādiattho, padatthavipallāsajotako pana itisaddo luttaniddiṭṭho, ādisaddalopo vā esa, upalakkhaṇaniddeso vā. **Apubbapadavaṇṇanā** nāma heṭṭhā aggahitatāya apubbassa padassa atthavibhajanā. “Hitvā punappunāgata-matthaṃ atthaṃ pakāsayissāmi”ti (dī. ni. aṭṭha. 1.ganthārambhakathā) hi vuttaṃ, “anupubbapadavaṇṇanā”ti kathaci pāṭho, so ayuttova ṭikāya anuddhatā, tathā asaṃvaṇṇitā ca.

“Rājakumārā **gottavasena** kosalā nāmā”ti (dī. ni. ṭi. 1.254) ācariyena vuttaṃ. Akkharacintakā pana vadanti “kosam lanti gaṇhanti, kusalam vā pucchanti **kosalā**”ti. **Janapadinoti** janapadavanto, janapadassa vā issarā. “Kosalā nāma rājakumārā”ti vuttēyeva siddhepi “janapadino”ti vacanaṃ santesupi aññesu taṃtaṃnāmapaññātesu tattha nivasantesu janapadibhāvato tesameva nivasanamupādāya janapadassāyaṃ sāmāññāti dassanatthaṃ. “**Tesam nivāso**”ti iminā “kosalanam nivāsā kosalā”ti taddhitam dasseti. “**Ekopi janapado**”ti iminā pana saddatoyevetaṃ puthuvacanaṃ, atthato panesa eko evāti vibhāveti. **Api**-saddo cettha anuggahe, tena kāmam ekoyevesa janapado, tathāpi iminā kāraṇena puthuvacanamupapannanti anuggaṇhāti. Yadi ekova janapado, katham tattha bahuvacanti āha “**ruḥhisaddenā**”tiādi, ruḥhisaddatā bahuvacanamupapannanti vuttaṃ hoti. Nissitesu payuttassa puthuvacanaṃ, puthubhāvassa vā nissaye abhiniropāna idha ruḥhi, tena vuttaṃ ācariyena idha ceva aññattha ca **majjhimāgamaṭṭikādisu** “akkharacintakā hi īdisesu ṭhānesu yutte viya īdisalingavacanaṃ icchanti, ayamettha ruḥhi yathā ‘aññatthāpi kurūsu viharati, aṅgesu viharatī”ti cā”ti. Keci pana kosalanāmābhiniropanicchanti, ayuttametam puthuvacanaṃ appayujjītabbattā. Nāmābhiniropānāya hi ekavacanaṃpi bhavati yathā “sīho gāyatī”ti. Tabbisesitepi janapadasadde jātisaddatā ekavacanameva. Tenāha “**tasmim kosalesu janapade**”ti, kosalanāmake tasmim janapadeti attho. Abhūtato hi vohāramattaṃ ruḥhi, bhūtato yeva attho vinicchinitabbo. Yathā hi –

“Santi puttā videhānaṃ, dīghāvu raṭṭhavaḍḍhano;

Te rajjam kārayissanti, mithilāyaṃ pajāpatī”ti. (jā. 2.22.276) ādisu –

Taṃputtasāṅkhātassa ekatthassa ruḥhivasena “puttā”ti bahuvacanaṃpayogo, tathā idhāpi tannivāsasāṅkhātassa ekatthassa ruḥhivasena “kosalesū”ti bahuvacanaṃpayogo hoti. Yathā ca “pāṇam na haññe, na ca’ dinnamādiye”tiādisu (a. ni. 8.42, 43, 45) jātivāsena bahvatthānamekavacanaṃpayogo, tathā idhāpi jātivāsena avayavappabhedena bahvatthassa “janapade”ti ekavacanaṃpayogo hoti. Vuttaṃca ācariyena **majjhimāgamaṭṭikāyaṃ** “tabbisesanepi janapadasadde jātisadde ekavacanameva. Tenāha ‘tasmim aṅgesu janapade’ti”.

Evaṃ ruḥhivasena bahumhi viya vattabbe bahuvacanaṃ dassetvā idāni bahvatthavasena bahumpi eva vattabbe bahuvacanaṃ dassento “**porāṇā panāhū**”tiādimāha. **Pana**-saddo cettha visesatthajotano, tena puthuatthavisayatāya evetaṃ puthuvacanaṃ, na ruḥhivasenāti vakkhamānaṃ visesaṃ joteti. So hi padeso tiyojanasataparimāṇatāya bahuppabhedoti, imasmim pana naye tesu kosalesu janapadesūti attho veditabbo. **Mahāpanādanti** mahāpanādajātaka (jā. 1.3.40, 41, 42) surucijātakesu (jā. 1.14.102 ādayo) āgataṃ surucino nāma videharañño puttaṃ mahāpanādanāmakaṃ rājakumāraṃ. **Nānāṇāṭakānī** bhaṇḍukaṇḍapaṇḍukaṇḍapamukhāni chasatasahassāni nānāvidhanāṭakāni, kathaci pana ādisaddopi diṭṭho, so jātakatthakathāyaṃ na dissati, yadi ca dissati, tena naṭalaṅghakādīnaṃ saṅgaho daṭṭhabbo. **Sitamattampī**ti mihitamattampi. Tassa kira dibbanāṭakānaṃ anantarabhavēyeva diṭṭhattā manussanāṭakānaṃ naccaṃ amanuññaṃ ahoṣi. **Naṅgalānīpi chaddetvā**ti kasikammappahānavasena

naṅgalāni pahāya, nidassanamattañcetam. Na hi kevalam kassakā eva, atha kho aññepi ubhayaṅgaṅgāhāvāsino manussā attano attano kiccaṃ pahāya tasmim maṅgalatṭhāne sannipatiṃsu. Tadā kira mahāpanādakumārassa pāsādamaṅgalaṃ, chattamaṅgalaṃ, āvāhamaṅgalanti tīṇi maṅgalāni ekato akaṃsu, kāsivideharaṅgāhāvāsino pi tattha sannipatitvā atirekasattavassāni chaṇamanubhaviṃsūti, adhunā pana “naṅgalādīnī”ti pāṭho dissati, so na porāṇapāṭho tīkāyamanuddhaṭṭā.

Mahājanakāye sannipatitē keci “pahaṃsanavidhiṃ dassetvā rājakumāraṃ hāsāpessāmā”ti, keci “taṃ kīlaṇaṃ passissāmā”ti evaṃ mahājanasamūhe sannipatite. Atulambābhiruhanadārucitakapavesanādi **nānākīlāyo dassetvā**. Sakkapesito kira dibbanāṭako rājaṅgaṇe ākāse thatvā upaḍḍhabhāgaṃ nāma dasseti, ekova hattho, eko pādo, ekaṃ akkhi, ekā dāṭhā naccati calati, upaḍḍhaṃ phandati, sesaṃ niccalamahosi, taṃ disvā mahāpanādo thokaṃ hasitamakāsi, imamatthaṃ sandhāya “**so dibbanāṭakaṃ dassetvā hasāpesī**”ti vuttaṃ. **Suhajjā** nāma vissāsikā “suṭṭhu hadayametesā”nti katvā. **Ādisaddena** nītakaparijanādīnaṃ saṅgaho. **Tasmāti** tathā vacanato. **Taṃ kusalanti vacanaṃ upādāyāti** ettha “kacci kusalaṃ? Āma kusala”nti vacanapaṭivacanavasena pavattakusalavāditāya te manussā ādito “**kusalā**”ti samaññaṃ labhiṃsu, tesam kusalānaṃ issarāti rājakumārā **kosalā** nāma jātā, tesam nivāsaṭṭhānatāya pana padeso **kosalāti** pubbe vuttanayameva. Tenāha “**so padeso kosalāti vuccati**”ti. Evaṃ **majjhimāgamaṭṭhikāyaṃ** ācariyeneva vuttaṃ. Tatrāyamadhippāyo siyā – “so padeso kosalāti vuccati”ti saññisaññā yathākkamaṃ ekavacanabahuvacanavasena vuttatā purimanaye viya idhāpi ruḥhivaseneva bahuvacanaṃ hoti. Rājakumārānaṃ nāmalābhahetumattañhettha visesoti. Idha pana ācariyena evaṃ vuttaṃ **so padesoti** padesasāmaññato vuttaṃ, vacanavipallāsena vā, te padesāti attho. **Kosalāti vuccati** kusala eva kosalāti katvā”ti (dī. ni. 1.254) tatrāyamadhippāyo siyā – **so padesoti** jātisaddavasena, vacanavipallāsena vā vuttatā puthuattavisayatāya eva bahuvacanaṃ hoti. Padesassa nāmalābhahetu hettha visesoti. “Kusala”nti hi vacanamupādāya ruḥhināmasena vuttanayena kosalā yathā “yevāpanakaṃ, natumhā kavaggo”ti. Apica vacanapaṭivacanavasena “kusala”nti vadanti etthāti **kosalā**. Vicitrā hi taddhitavuttīti. **Kusalanti** ca ārogyaṃ “kacci nu bhoto kusalaṃ, kacci bhoto anāmaya”nti ādisu (jā. 1.15.145; jā. 2.20.129) viya, kacci tumhākaṃ ārogyaṃ hotīti attho, chekaṃ vā “kusalā naccagītassa, sikkhitā caturitthiyo”ti ādisu (jā. 2.22.94) viya, kacci tesam nāṭakānaṃ chekatā hotīti attho.

Caraṇaṃ **cārikā**, caraṇaṃ vā cāro, so **eva cārikā**, tayidaṃ maggagamanameva idhādhippetam, na cuṅṅikagamanamattanti dassetuṃ “**addhānagamana**”nti vuttaṃ, bhāvanapūṃsakañcetam, addhānagamanaśākhātāya cārikāya caramānoti vuttaṃ hoti, abhedepi vā bhedavohārena vuttaṃ yathā “divāvihāraṃ nisīdi”ti, (ma. ni. 1.256) addhānagamanaśākhātāya **cārikaṃ caramāno**, caraṇaṃ karontoti attho. Sabbatthako hi karabhūdhātūnamatthoti. “Addhānamagga”ntipi katthaci pāṭho, so na sundaro. Na hi cārikāsaddo maggavācakoti. Idāni taṃ vibhāgena dassetvā idhādhippetam niyamento “**cārikā ca nāmesā**”ti ādimāha. Sāvakānampi ruḥhivasena cārikāya sambhavato tato viseseti “**bhagavato**”ti iminā. Tathā hi **majjhimāgamaṭṭhakathāyaṃ** vuttaṃ “cārikaṃ caramānoti ettha kiñcāpi ayaṃ cārikā nāma mahājanasaṅgahatthaṃ buddhānaṃyeva labbhati, buddhe upādāya pana ruḥhisaddena sāvakānampi vuccati kilañjādīhi katabījanīpi tālavaṇṇaṃ viyā”ti. **Dūrepīti** ettha **pi**-saddena, **api**-saddena vā nātidūrepīti sampiṇḍanaṃ tatthāpi cārikāsambhavato. **Bodhaneyyapuggalanti** catusaccapaṭivedhavasena bodhanārahapuggalaṃ. **Sahasā gamananti** sīghagamaṇaṃ. “Mahākassapassa paccuggamanādīsū”ti vuttameva sarūpato dasseti “**bhagavā hī**”ti ādinā. **Paccuggacchantoti** paṭimukhaṃ gacchanto, paccuṭṭhahantoti attho. “**Tathā**”ti iminā “tiṃsayojana”nti padamanukaḍḍhati. **Pakkusāti** nāma **gandhārarājā**. **Mahākappino** nāma kukkuṭavātīrājā. **Dhaniyo** nāma koraṇḍasetṭhiputto gopo.

Evaṃ dhammagarutākittanamukhena mahākassapapaccuggamanādīni (saṃ. ni. aṭṭha. 2.154) ekadesena dassetvā idāni vanavāsitisasāmaṇerassa vatthum vitthāretvā cārikaṃ dassetuṃ “**ekadivasa**”nti ādi āradhaṃ. Ko panesa tisasāmaṇero nāma? Sāvattiyāṃ dhammasenāpatino upaṭṭhākakule jāto mahāpuñño “piṇḍapātadāyakatisso, kambaladāyakatisso”ti ca pubbe laddhanāmo pacchā “vanavāsitisso”ti pākaṭo khīṇāsavasāmaṇero. Vitthāro **dhammapade** (dha. pa. aṭṭha. 1.74

vanavāsītissasāmaṇeravattu). Ākāsagāmīhi saddhiṃ ākāseneva gantukāmo bhagavā “**chaḷabhiññāṇaṃ ārocehi**”ti avoca. **Tassāti** tissasāmaṇerassa. **Tanti** bhagavantam saddhiṃ bhikkhusaṅghena cīvaraṃ pārupantaṃ. No thero no oramattako vatāti sambandho, guṇena lāmakappamaṅiko no hotīti attho.

Attano pattāsaneti bhikkhūnaṃ āsanapariyante. Tesam gāmikānaṃ dānapaṭisaṃyuttaṃ **maṅgalaṃ vatvā**. Kasmā pana sadevakassa lokassa maggadesakopi samāno bhagavā evamāhāti codanaṃ sodhetuṃ “**bhagavā kirā**”tiādi vuttaṃ. **Maggadesakoti** nibbānamaggassa, sugatimaggassa vā desako.

Tāyāti araññasaññāya. Saṅghakammavasena sijjhamānāpi upasampadā satthu añāvasena sijjhanato “**buddhadāyajjaṃ te dassāmi**”ti vuttanti vadanti. Apare pana “aparipuṇṇavīsativassasseva tassa upasampadaṃ anujānanto satthā ‘**buddhadāyajjaṃ te dassāmi**’ti avocā”ti vadanti. Dhammasenāpatinā upajjhāyena **upasampādetvā**, tatoyevesa dhammasenāpatino saddhivihārikoti aṭṭhakathāsu vutto. **Dhammapadaṭṭhakathāyaṃ** pana dhammasenāpatiāditherānaṃ cattālīsabhikkhusahassaparivārānaṃ attano attano parivārehi saddhiṃ paccemaṃ gamaṇaṃ, bhagavato ca ekakasēva gamaṇaṃ **khuddakabhāṇakānaṃ** matena vuttaṃ, idha, pana **majjhimāgamatṭhakathāya**ñca (ma. nī. aṭṭha. 2.65) aññathā gamaṇaṃ **dīghabhāṇakamajjhimabhāṇakānaṃ** matenāti daṭṭhabbaṃ. **Ayanti** mahākassapādīnamatthāya cārikā. Yaṃ pana anuggaṇhantassa bhagavato gamaṇaṃ, ayaṃ aturita cārikā nāmāti sambandho.

Imaṃ pana cārikanti aturita cārikaṃ. **Mahāmaṅḍalanti** majjhimadesapariyāpanneva bāhirimena pamāṇena paricchinnatā mahantataraṃ maṅḍalaṃ. **Majjhimamaṅḍalanti** itaresaṃ ubhinnaṃ vemajjhe pavattaṃ maṅḍalaṃ. **Antomaṅḍalanti** itarehi khuddakaṃ maṅḍalaṃ, itaresaṃ vā antogadhattā antimaṃ maṅḍalaṃ, abbhantarimaṃ maṅḍalanti vuttaṃ hoti. Kiṃ panimesaṃ pamāṇanti āha “**katthā**”tiādi. Tattha navayojanasatikatā majjhimadesapariyāpannavaseneva gahetabbā tato paraṃ aturita cārikāya agamanato. Taduttari hi turita cārikāya eva tathāgato gacchati, na aturita cārikāya. Pavāretvāva cārikācāraṇaṃ buddhāciṇṇanti vuttaṃ “**mahāpavāraṇāya pavāretvā**”tiādi. **Pāṭipadadivaseti** paṭhamakattikapuṇṇamiyā anantare pāṭipadavase. **Samantāti** gatagataṭṭhānassa catūsu passesu samantato. Mahājanakāyassa sannipatanato **purimaṃ purimaṃ āgatā nimantetuṃ labhanti**. Tathā sannipatanameva dassetuṃ “**itaresū**”tiādi vuttaṃ. **Samathavipassanā taruṇā hontīti** ettha samathassa taruṇabhāvo upacārasamādhivasena, vipassanāya pana saṅkhāraparicchedaññaṃ, kaṅkhāvitaraṇaññaṃ, sammasaññaṃ, maggāmaggaññaṃ catunnaṃ ñāṇaṃ vasena veditabbo. **Taruṇavipassanāti** hi tesam catunnaṃ ñāṇānamadhivacanaṃ. **Pavāraṇāsaṅgahaṃ datvāti** anumati dānavasena datvā. **Kattikapuṇṇamāyanti** pacchimakattikapuṇṇamiyaṃ. “**Migasirassa paṭhamapāṭipadadivase**”ti idaṃ majjhimadesavohāravasena migasiramaṣassa paṭhamam pāṭipadadivasaṃ sandhāya vuttaṃ, etarahi pavattavohāravasena pana pacchimakattikamaṣassa kāḷapakkhapāṭipadadivaso veditabbo.

Aññenapi kāraṇenāti bhikkhūnaṃ samathavipassanātaruṇabhāvato aññenapi majjhimamaṅḍale veneyyānaṃ ñāṇaparipākādikāraṇena. **Catumāsanti** āsalhīpuṇṇamiyā pāṭipadato yāva pacchimakattikapuṇṇamī, tāva catumāsaṃ. “Samantā yojanasata”ntiādinā **vuttanayeneva**. **Vasanaṃ vassaṃ**, vasanakiriyā, vutthaṃ vasitaṃ vassamassāti **vutthavasso**, tassa. Tathāgatena vinetabbatā “**bhagavato veneyyasattā**”ti sāmīniddeso vutto, kattuniddeso vā esa. **Veneyyasattāti** ca caritānurūpaṃ vinetabbasattā. **Indriyaparipākam āgamayamānoti** saddhādiindriyānaṃ vimutti paripācanabhāvena paripakkaṃ paṭimānento. Phussamāghaphagguṇacittamāsānaṃ aññataramāsaṃ paṭhamadivase nikkhamanato māsanīyamo ettha na katoti daṭṭhabbaṃ. Tenāha “**ekamāsaṃ vā dvitacatumāsaṃ vā tattheva vasitvā**”ti. **Tatthevāti** vassūpagamaṇatṭhāne eva. “**Sattahi vā**”tiādi “ekamāsaṃ vā”tiādinā yathākkamaṃ yojetabbaṃ – yadi aparampi ekamāsaṃ tattheva vasati, sattahi māsehi cārikaṃ pariyoṣāpeti. Yadi dvimāsaṃ chahi, yadi timāsaṃ pañcahi, yadi catumāsaṃ tattheva vasati, catūhi māsehi cārikaṃ pariyoṣāpeti. Kasmā pana cārikāgamaṇanti āsaṅkānivattanatthaṃ “**itī**”tiādi vuttaṃ.

Atirekaṃ jarādubbalo **bālhajjīṇo**. **Te kadā passissanti**, na passissanti eva. **Lokānukampakāyāti** lokānukampakāya eva. Tena vuttaṃ “na cīvarādihetū”ti.

Jaṅghavihāravasenāti jaṅghāhi vicaraṇavasena, jaṅghāhi vicarivā tattha tattha katipāhaṃ nivasanavasena vā. Sabbiriyāpathasādhāraṇāñhi vihāravacanamaṃ. **Sarīraphāsukatthāyāti** ekasmiṃyeva ṭhāne nibaddhavāsavasena ussannadhātukassa sarīrassa vicaraṇena phāsubhāvattāya.

Aṭṭhuppattikālābhikaṅkhanatthāyāti aggikkhandhopamasutta (a. ni. 7.72) maghadevajātakādi (jā. 1.1.9) desanānaṃ viya dhammadesanāya abhikaṅkhitabbaaṭṭhuppattikālathāya, aṭṭhuppattikālassa vā abhikaṅkhanatthāya, aṭṭhuppattikāle dhammadesanattāyāti vuttaṃ hoti.

Sikkhāpadapaññāpanatthāyāti surāpānasikkhāpadādi (pāci. 327, 328, 329) paññāpane viya sikkhāpadānaṃ paññāpanatthāya. **Bodhanatthāyāti** aṅgulimālādayo (ma. ni. 2.347) viya **bodhaneyyasatte** catusaccabodhanatthāya. **Mahatāti** mahatiyā. Kañci, katipaye vā puggale uddissa cārikā **nibaddhacārikā**. Tadaññā sambahule uddissa gāmanigamanagarapaṭipāṭiyā cārikā **anibaddhacārikā**. Tenāha “**tatthā**”tiādi. **Yaṃ caratīti** kiriyāparāmasanaṃ.

“Esā idha adhippetā”ti vuttameva vitthārato dassetuṃ “**tadā kirā**”tiādi vuttaṃ.

Dasasahasilokadhātuyāti jātikkhettabhūtaṃ dasasahassacakkavālaṃ sandhāya vuttaṃ. Kasmāti ce? Tattheva bhabbasattānaṃ sambhavato. Tattha hi satte bhacce paripakkindriye passituṃ buddhaññaṃ abhinīharitvā ṭhito bhagavā ñāṇajālaṃ pattharati vuccati, idaṅca devabrahmānaṃ vasena vuttaṃ. Manussā pana imasmiṃyeva cakkavāle, imasmiṃyeva ca saparivāre jambudīpe bodhaneyyā honti. **Bodhaneyyabandhaveti** bodhaneyyasattasaṅkhāte bhagavato bandhave. Gottādisambandhā viya hi saccapaṭivedhasambandhā veneyyā bhagavato bandhavā nāmāti. Gocarabhāvūpagamaṃ sandhāya “**sabbaññutaññāṇajalassa anto pavittho**”ti vuttaṃ. Bhagavā kira mahākaruṇāsamāpattim samāpajjitvā tato vuṭṭhāya “ye sattā bhabbā paripakkaññā, te mayhaṃ ñāṇassa upaṭṭhahantū”ti cittam adhiṭṭhāya samannāharati, tassa sahasamannāhārā eko vā dve vā sambahulā vā tadā vinayūpagā veneyyā ñāṇassa āpāthamāgacchanti, ayamettha buddhānubhāvo. Evamāpāthagātānaṃ pana nesaṃ upanissayaṃ pubbacariyaṃ, pubbahetuṃ, sampati vattamānaṅca paṭipattim oloketi. Veneyyasattapariggaṇhanatthañhi samannāhāre kate paṭhamaṃ nesaṃ veneyyabhāvena upaṭṭhānaṃ hoti, atha “kiṃ nu kho bhavissati”ti saraṇagamanādivasena kañci nipphattim vīmaṃsamāno pubbūpanissayādīni oloketi. Tenāha “**atha bhagavā**”tiādi. **Soti** ambaṭṭho. **Vādapaṭivādaṃ katvāti** “evaṃ nu te ambaṭṭhā”tiādinā (dī. ni. 1.262) mayā vuttavacanassa “ye ca kho te bho gotama muṇḍakā samaṇakā”tiādinā (dī. ni. 1.263) paṭivacanamaṃ datvā, **asabbhivākyanti** asappurisavācaṃ, tikkhattuṃ ibbhavādanipātanavasena nānappakāraṃ sādhusabhāvāya vācāya vattumayuttaṃ vākyamaṃ vakkhatīti vuttaṃ hoti. **Nibbisevananti** vīgatatudanaṃ, mānadappavasena apagatapariniṭṭhandaṃ attho.

Avasaritabbanti upagantabbaṃ. Tassa gāmassa idaṃ nāmamattaṃ, kimettha atthapariyesanāyāti vuttaṃ “**ijjhānaṅgalantipi pāṭho**”ti. “Yena disābhāgenā”ti karaṇaniddesānurūpaṃ karaṇatthe upayogavacananti dasseti “**tena avasari**”ti iminā. “Yasmiṃ padese”ti pana bhūmaniddesānurūpaṃ “**taṃ vā avasari**”ti vuttaṃ. Tadubhayamevatthaṃ vivarati “**tena disābhāgenā**”tiādinā. **Gatoti** upagato, agamāsīti attho. Puna **gatoti** sampatto, sampāpuṇīti attho. “**icchānaṅgale**”ti idaṃ tadā bhagavato gocaragāmanidassanaṃ, samīpatthe cetamaṃ bhūmmaṃ. “**icchānaṅgalavanasaṅḍe**”ti idaṃ pana nivāsaṭṭhānadassanaṃ, nippariyāyato adhikaraṇe cetamaṃ bhūmmanti tadubhayampi padaṃ visesatthadassanena vivaranto “**icchānaṅgalaṃ upanissāyā**”tiādimāha. “**Sīlakhandhāvāra**”ntiādi vuttanayena veneyyahitasamapekkhanavaseneva bhagavato vihāradassanaṃ. Tattha dhammarājassa bhagavato sabbaso adhammaniggaṇhanaparā eva paṭipatti, sā ca sīlasamādhīpaññāvasenāti sīlādittayasseva gahaṇamaṃ. **Sīlakhandhāvāraṃ**ti cakkavattirañño dāruṭṭhakādikaṃ khandhāvārasadisamaṃ sīlasaṅkhātaṃ khandhāvāraṃ bandhitvā viharatīti sambandho. Dārukhandhādīhi āsamantato varanti parikkhipanti etthāti hi **khandhāvāro** a-kārassa dīghamaṃ katvā, rājūnaṃ aciranivāsaṭṭhānaṃ. Tattha pana bhagavato aciranivasanakiriyāsambandhamattena bhayanivāraṇaṭṭhena taṃsadisatāya sīlampi tathā vuccati. **Samādhikontanti** sammāsamaṃdhisaṅkhātaṃ maṅgalasattim. **Sabbaññutaññāṇapadanti** sabbaññutaññāsaṅkhātaṃ jayamantapadaṃ. **Parivattayamānoti**

parijappamāno. “**Sabbaññutaññāṇasara**”ntipi pāṭho, sabbaññutaññāṇavajiraggasaraṃ aparāparaṃ samparivattamānoti attho. **Yathābhirucitena vihārenā**ti sabbavihārasādhāraṇadassanaṃ, dibbavihārādīsu yena yena attanā abhirucitena vihārena viharatīti attho.

Pokkharasātivatthuvaṇṇanā

255. Manteti iruvedādīmantasatthe. Iruvedādayo hi guttabhāsītabbaṭṭhena “mantā”ti vuccanti. Aṇa-saddo saddeti āha “**sajjhāyati**”ti. Lokiyā pana vadanti “brahmuno apaccaṃ brāhmaṇo, nāgamo, nattaṃ, dīghādī”ti. Kasmā ayameva vacanatto vuttoti āha “**idamevā**”tiādi. Atha kesam itaro vacanattohi codanamapaneti “**ariyā panā**”tiādinā. Atha vā yaṃ lokiyā vadanti “brahmunā jāto brāhmaṇo”tiādiniruttiṃ, taṃ paṭikkhipituṃ evaṃ vuttaṃ. “Idamevā”ti hi avadhāraṇena taṃ paṭikkhipati. “**Jātibrahmaṇāna**”nti pana iminā saddantarena dassitesu jātibrahmaṇavisuddhibrahmaṇavasena duvidhesu brāhmaṇesu visuddhibrahmaṇānaṃ niruttiṃ dassento “**ariyā panā**”tiādimāha. Bahanti pāpe bahi karontīti hi ariyā **brāhmaṇā** niruttinayena. “**Tassa kira kāyo setapokkharasādiso**”ti idamevassa nāmalābhahetudassanaṃ, sesaṃ pana tappasaṅgena yathāvijjānāvisesadassanaṃ. Tenāha “**iti naṃ pokkharasādisattā pokkharasāṭīti sañjānanti**”ti. Pokkharena sādiso kāyo yassāti hi **pokkharasāṭī** niruttinayena. Sātasaddo vā sādisattho, pokkharena sāto sādiso kāyo tathā, so yassāti **pokkharasāṭī**. **Setapokkharasādisoti** setapadumavaṇṇo. **Devanagareti** ālakamandādivapure. **Ussāpitarajatorāṇanti** gambhīranemanikhātāṃ accuggatāṃ rajatamayāṃ indakhīlāṃ. **Kāḷamegharājīti** kadāci dissamānā kāḷaabbhalekhā. **Rajatapanālikāti** rajatamayātumbaṃ. **Suvaṭṭitāti** vaṭṭabhāvassa yuttaṭṭhāne suṭṭhu vaṭṭulā. Kāḷavaṅgatīlakādīnamabhāvena **suparisuddhā**. “**Arājake**”tiādināpi sobhaggappattabhāvameva nidasseti.

Idāni aparaṃpi tassa nāmalābhahetutaṃ dassento “**ayaṃ panā**”tiādimāha. Tattha ca “**himavantaṇṇapadesa mahāsare padumagabbhe nibbattī**”ti idamevassa nāmalābhahetudassanaṃ. Sesaṃ pana tappasaṅgena tathāpavattākāradassanaṃ. Tenāha “**iti naṃ pokkhare sayitattā pokkharasāṭīti sañjānanti**”ti. Pokkhare kamale sayatīti hi **pokkharasāṭī**, sātaṃ vā vuccati samasaṅghānaṃ, pokkhare jātaṃ samasaṅghānaṃ tathā, tamassatthīti **pokkharasāṭī**. Yaṃ pana ācariyena vuttaṃ “imassa brāhmaṇassa kīdiso pubbayogo, yena naṃ bhagavā anuggaṇhituṃ taṃ ṭhānaṃ upagatoti āhā”ti, (dī. ni. ṭī. 1.255) tadetaṃ “ayaṃ panā”tiādivacanaṃ ekadesameva sandhāya vuttaṃ. “So tato manussaloka”ntiādivacanaṃ **devaloke nibbattīti** ettha aparāparaṃ nibbatti eva vuttāti daṭṭhabbaṃ. Tathārūpena kammaṇa nibbattimeva sandhāya “**mātukucchivāsaṃ jigucchivā**”tiādi vuttaṃ. “**Padumagabbhe nibbattī**”ti iminā saṃsedajoyeva hutvā nibbattīti dasseti. **Na pupphatīti** na vikaṣatī. **Tenāti** tāpasena. **Nālatoti** pupphadaṇḍato. Suvannaṇṇaṇṇehi piṅjaraṃ hemavaṇṇo yassāti **suvannaṇṇaṇṇapiṅjaro**, taṃ, suvaṇṇaṇṇehi vikiṇṇabhāvena hemavaṇṇanti attho. Piṅjarasaddo hi hemavaṇṇapariyāyoti **sāratthadīpaniyaṃ** (sārattha. ṭī. 1.22) vuttaṃ. Esa nayo **padumareṇupīṅjaranti** etthāpi. **Rajatabimbakanti** rūpiyamayarūpakam. **Paṭijaggāmīti** posemi. **Pāranti** pariyoṣānaṃ, nipphatti vā vuccati nadīsamuddādīnaṃ pariyoṣānaṃhūtaṃ pāraṃ viyāti katvā. Paṭisandhipaññāsāṅkhātena sabhāvañāṇena **paṇḍito**. Iti kattabbesu, vedesu vā visāradapaññāsāṅkhātena veyyattiyena **byatto**. **Aggabrahmaṇoti** disāpāmokkhabrahmaṇo. **Sippanti** vedasippaṃ tasseva pakaraṇādhigatattā. **Brahmadeyyaṃ adāsīti** vakkhamānanayena brahmadeyyaṃ katvā adāsī.

“Ajjhāvasatī”ti ettha **adhi**-saddo, **ā**-saddo ca upasaggamattaṃ, tato “ukkaṭṭha”nti idaṃ ajjhāpubbavasayoge bhummattaṃ upayogavacanaṃ. **Adhi**-saddo vā issariyattho, **ā**-saddo mariyādattho tato “ukkaṭṭha”nti idaṃ kammappavacanīyayoge bhummattaṃ upayogavacanaṃ dasseti “**ukkaṭṭhanāmake**”tiādinā. Tadevatthaṃ vivarituṃ “**tassā**”tiādi vuttaṃ. “**Tassa nagarassa sāmiko hutvā**”ti hi “abhibhavitvā”ti etassatthavivaraṇaṃ, tenetaṃ dīpeti “sāmibhāvo abhibhavana”nti. “**Yāya mariyādāyā**”tiādi pana ā-saddasatthavivaraṇaṃ, tenetaṃ dīpeti “āsaddo mariyādattho, mariyādā ca nāma yāya tattha vasiṭṭhaṃ, sāyeva aparādhīnatā”ti. **Yāya mariyādāyāti** hi yāya aparādhīnatāsāṅkhātāya anaññāsādhāraṇāya avatthāyāti attho. “**Upasaggavasena**”tiādi pana

“ukkaṭṭhanāmake”ti etassatthavivaraṇaṃ, tenetaṃ dīpeti “satipi bhummavacanappasaṅge dhātvatthānuvattakavisesakabhūtehi duvidhehipi upasaggehi yuttattā upayogavacanamevettha vihita”nti. “**Tassa kirā**”tiādi pana atthānugatasamaññāparidīpanaṃ. **Vatthu** nāma nagaramāpanārahabhūmippadeso “ārāmavattu, viharavattū”tiādīsu viya.

Ukkāti daṇḍadīpikā. **Aggahe**sunti “ajja maṅgaladivaso, tasmā sunakkhattaṃ, tatthāpi ayaṃ sukhaṇo mā atikkamī”ti rattivibhāyanaṃ anurakkhantā, rattiyaṃ ālokakaraṇatthāya ukkā ṭhapetvā ukkāsu jalamānāsu nagarassa vatthuṃ aggaheṣuṃ, tenetaṃ dīpeti – ukkāsu ṭhitāti **ukkaṭṭhā**. Mūlavibhujādi ākatigaṇapakkhepena, niruttinayena vā ukkāsu vijjotayantīsu ṭhitāti **ukkaṭṭhā**, tathā ukkāsu ṭhitāsu ṭhitā āsītipi **ukkaṭṭhā**ti. **Majjhimāgamaṭṭhakathāyaṃ** pana evaṃ vuttaṃ “tañca nagaraṃ ‘maṅgaladivaso sukhaṇo, sunakkhattaṃ mā atikkamī’ti rattimpi ukkāsu ṭhitāsu māpitattā ukkaṭṭhātipi vuccati, daṇḍadīpikāsu jāletvā dhāriyamānāsu māpitattāti vuttaṃ hoti”ti, (ma. ni. aṭṭha. 1.mūlapariyāyasuttavaṇṇanā) tadapiminā saṃsandati ceva sameti ca nagaravattupariggaḥassapi nagaramāpanapariyāpannattāti daṭṭhabbaṃ. Apare pana bhaṇanti “bhūmibhāgasampattiyā, upakaraṇasampattiyā, manussasampattiyā ca taṃ nagaraṃ ukkaṭṭhaguṇayogato **ukkaṭṭhā**ti nāmaṃ labhati”ti. Lokiyā pana vadanti “ukkā dhārīyati etassa māpitakāleti **ukkaṭṭhā**, vaṇṇavikāroya”nti, itthilingavasena cāyaṃ samaññā, tenevidha payogo dissati “yathā ca bhavaṃ gotamo ukkaṭṭhāya aññāni upāsakakulāni upasaṅkamaṭī”ti (dī. ni. 1.299) **mūlapariyāyasuttādīsu** (ma. ni. 1.1) ca “ekaṃ samayaṃ bhagavā ukkaṭṭhāyaṃ viharati subhagavane sālārājamūle”tiādi. Evamettha hotu upasaggavasena upayogavacanaṃ, kathaṃ panetaṃ sesapadesu siyāti anuyogenāha “**tassa anupayogattā sesapadesū**”ti. Tattha **tassā**ti upasaggavasena upayogasaññuttassa “ukkaṭṭha”nti padassa. **Anupayogattā**ti visesanabhāvena anupayuttattā. **Sesapadesū**ti “sattussada”ntiādīsu sattuṃ padesu.

Kim nu khvāyaṃ saddapayogo saddalakkhaṇānugatotī codanamapaneti “**tattha...pe... pariyesitabba**”nti iminā. **Tatthā**ti upasaggavasena, anupayogavasena ca upayogavacananti vutte dubbidhepi vidhāne. **Lakkhaṇanti** gahaṇūpāyaññābhūtaṃ saddalakkhaṇaṃ, suttaṃ vā. **Pariyesitabbanti** saddasatthesu vijjamānattā ñāṇena gavesitabbaṃ, gahetabbanti vuttaṃ hoti. Etena hi saddalakkhaṇānugato vāyaṃ saddapayogoti dasseti, saddavidū ca icchanti “upaanuadhiāiccādīpubbavasayoge sattamiyatthe upayogavacanaṃ pāpuṇāti, visesitabbapade ca yathāvidhimanupayogo visesanapadānaṃ samānādhikaraṇabhūtaṇa”nti. Tatra yadā adhi-saddo, ā-saddo ca upasaggamattaṃ, tadā “tatiyāsattamīnañcā”ti lakkhaṇena ajjhāpubbavasayoge upayogavacanaṃ. Tathā hi vadanti “sattamiyatthe kāladisāsu upānvajjhāvasayoge, adhipubbasiṭhāvasānaṃ payoge, tappānacāresu ca dutiyā. **Kāle** pubbaṇhasamayaṃ nivāsetvā, ekaṃ samayaṃ bhagavā, kañci kālaṃ purejātapaccayena paccayo, imaṃ rattiṃ cattāro mahārājāno. **Disāyaṃ** purimaṃ disaṃ dhatarattho. **Upādīpubbavasayoge** gāmaṃ upavasati, gāmaṃ anuvasati, gāmaṃ āvasati, agāraṃ ajjhāvasati, **adhipubbasiṭhāvasānaṃ payoge** pathaviṃ adhissati, gāmaṃ adhitiṭṭhati, gāmaṃ ajjhāvasati. **Tappānacāresu** nadīṃ pivati, gāmaṃ carati iccādīti.

Yadā pana adhi-saddo issariyattho, ā-saddo ca mariyādattho, tadā “kammappavacanīyayutte”ti lakkhaṇena kammappavacanīyayoge upayogavacanaṃ. Tathā hi vadanti “anuādāyo upasaggā, dhīādāyo nipātā ca kammappavacanīyasaññā honti kiriyāsaṅkhātaṃ kammaṃ pavacanīyaṃ yesaṃ te **kammappavacanīyā**”ti. Sesapadānaṃ pana yathāvidhimanupayoge katarena lakkhaṇena upayogavacananti? Yathāvuttalakkhaṇeneva. Yajjevaṃ tesampi ādhārabhāvato nānādhāratā siyāti? Na, bahūnampi padānaṃ nagaravasena ekatthabhāvato. Sakatthamattañhi tesamā nānākaraṇanti. Aññe pana saddavidū evamicchanti “samānādhikaraṇapadānaṃ paccekamā kiriyāsambandhanena visesitabbapadena samānavacanaṭā yathā ‘kaṭaṃ karoti, vipulaṃ, dassanīya’nti ettha ‘kaṭaṃ karoti, vipulaṃ karoti, dassanīyaṃ karoti’ti paccekamā kiriyāsambandhanena kammatttheyeva dutiyā”ti, tadetaṃ vicāretabbaṃ visesanapadānaṃ samānādhikaraṇānaṃ kiriyāsambajjhanābhāvato. Yadā hi kiriyāsambajjhanamā, tadā visesanameva na hotīti.

Ussadatā nāmettha bahulatāti vuttaṃ “**bahujana**”nti. Taṃ pana bahulataṃ dasseti

“**ākiṇṇamanussa**”ntiādinā. Araññādīsu gahetvā posetabbā **posāvaniyā**, etena tesam dhammabhāvaṃ dasseti. **Āvijjhivā**ti parikkhipivā. Khaṇivā katā **pokkharāṇī**, ābandhitvā kataṃ taḷākāṃ. Acchinnūdakatṭhāneyeva jalajakusumāni jātānti vuttaṃ “**udakassa niccabharitānevā**”ti. **Udakassā**ti ca pūraṇakiriyāyoge karaṇatthe sāmivacanaṃ “mahante mahante sāṇipasibbake kārāpetvā hiraññasuvaṇṇassa pūrāpetvā”tiādīsu (pārā. 34) viya. **Saha dhaññenāti sadhaññanti** nagarasaddāpekkhāya napuṃsakalīṅgena vuttaṃ, yathāvākyam vā upayogavacanaena. Evaṃ sabbattha. **Pubbaṇṇāparaṇṇādibhedam bahudhaññasannicayanti** ettha **ādisaddena** tadubhayavinimuttaṃ alābukumbhaṇḍādisūpeyyam saṅgaṇhāti. Tenāyamattho viññāyati – nayidha dhaññasaddo sāliādīdhaññavisesavācako, posane sādhattamattena pana niravasesapubbaṇṇāparaṇṇasūpeyyavācako, virūpekasesavasena vā payuttoti. **Ettāvātā**ti yathāvuttapadattayena. **Rājāḷīlāyā**ti rājūnaṃ vilāsena. Samiddhiyā upabhogaparibhogasampunṇabhāvena sampatti **samiddhisampatti**.

“Rājabhogga”nti vutte “kena dinna”nti avassam pucchitabbato evam vuttanti dasseti “**kenā**”tiādinā. Raññā viya bhuñjitabbanti vā **rājabhogganti** aṭṭhakathāto aparo nayo. Yāva puttānattapanattaparamparā kulasantakabhāvena rājato laddhattā “**rañño dāyabhūta**”nti vuttaṃ. “Dhammādāyādā me bhikkhave bhavathā”tiādīsu (ma. ni. 1.29) viya ca **dāyasaddo** dāyajjapariyāyoti āha “**dāyajjanti attho**”ti. Kathaṃ dinnattā brahmadeyyam nāmāti codanaṃ pariharati “**chattam ussāpetvā**”tiādinā. Rājānīhārena paribhuñjitabbato hi uddham paribhogalābhassa brahmadeyyatā nāma natthi, idaṅca tathā dinnameva, tasmā brahmadeyyam nāmāti vuttaṃ hoti. **Chejjabhejjanti** sarīradaṇḍadhanadaṇḍādibhedam daṇḍamāha. **Nadīttthapabbatādīsūti** nadīttthapabbatapādagāmadvāraaṭṭavimukhādīsū. **Setacchattaggahaṇena** sesarājākakudhabhaṇḍampi gahitaṃ tappamukhattāti veditabbam. “**Raññā bhuñjitabba**”ntveva vutte idhādhippetattho na pākaṭoti **hutvā**-saddaggahaṇam kataṃ. Tañhi so rājakulato asamudāgatopi rājā hutvā bhuñjituṃ labhatīti ayamidhādhippeto attho. Dātābanti **dāyam**, “rājādāya”nti imināva raññā dinnabhāve siddhe “raññā pasenadinā kosalena dinna”nti puna ca vacanaṃ kimatthiyanti āha “**dāyakarājādīpanattha**”ntiādi. Asukena raññā dinnanti dāyakarājassa adīpitattā evam vuttanti adhippāyo. Ettha ca paṭhamanaye “rājabhogga”nti pade pucchāsambhavato idaṃ vuttaṃ, dutiyanaye pana “rājādāya”nti padeti ayampi viseso daṭṭhabbo. Tattha atibahulatāya purato ṭhapanokāsābhāvato passenapi odanasūpabyañjanādi dīyati etassāti **pasenadi**, aluttasamāsavasena. So hi rājā taṇḍuladoṇassa odanampi tadupiyena sūpabyañjanena bhuñjati. Tathā hi naṃ bhuttapātarāsakāle satthu santikamāgantvā ito cito ca samparivattantaṃ niddāya abhibhuyyamaṇam ujukaṃ nisīditumasakkontaṃ bhagavā –

“Middhī yadā hoti mahagghaso ca,
Niddāyitā samparivattasāyī;
Mahāvarāhova nivāpavutṭho,
Punappunaṃ gabbhamupeti mando”ti. (dha. pa. 325; netti. 26, 90);

Imāya gāthāya ovadi. Bhāgineyyaṅca so sudassanaṃ nāma māṇavaṃ –

“Manujassa sadā satīmato,
Mattaṃ jānato laddhabhojane;
Tanukassa bhavanti vedanā,
Saṅikaṃ jīrati āyupālaya”nti. (saṃ. ni. 1.24) –

Imaṃ gātham bhagavato santike uggahāpetvā attano bhuñjantassa osānapiṇḍakāle devasikaṃ bhaṇāpeti, so aparena samayena tassā gāthāya attham sallakkhetvā punappunaṃ osānapiṇḍapariharaṇena nālīkodaṇamattāya saṅghahitvā tanusarīro balavā sukhappatto ahoṣīti. **Udānatṭhakathāyam** (udā. aṭṭha. 12) pana evam vuttaṃ “paccāmittam parasenaṃ jinātīti pasenadi”ti. Saddavidūpi hi ja-kārassa da-kāre idamudāharanti. So hi attano bhāgineyyam ajātasatturājānam, pañcācorasatādīni ca avaruddhakāni jinātīti. Kosalaraṭṭhassādhipatibhāvato **kosalo**, tasmā kosalādhipatinā pasenadi nāmakena raññā dinnanti attho veditabbo. Nissatṭhapariccattatāsankhātena puna aggahetabbabhāveneva dinnattā idha

brahmadeyyam nāma, na tu purimanaye viya rājasāṅkhepena paribhuñjitabbabhāvena dinnattāti āha “**yathā**”tiādi. Nissaṭṭhaṃ hutvā, nissaṭṭhabhāvena vā pariccattam **nissaṭṭhapariccattam**, muttacāgavasena cajjanti attho.

Savanam upalabbhoti dasseti “**upalabhī**”ti iminā, so cāyamupalabbho savanavaseneva jānananti vuttam “**sotadvārasampattavacananigghosānusārena aññāsī**”ti. Sotadvārānusāraviññānavīthivasena jānanameva hi idha savanam teneva “samaṇo khalu bho gotamo”tiādinā vuttassatthassa adhigatattā, na pana sotadvāravīthivasena sutamattam tena tadatthassa anadhigatattā. Avadhāraṇaphalattā saddapayogassa sabbampi vākyam antogadhāvadhāraṇam. Tasmā tadatthajotakasaddena vināpi aññatthāpohanavasena assosi eva, nāssa koci savanantarāyo ahoṣīti ayamatto viññāyatīti āha “**padapūraṇamate nipāto**”ti, antogadhāvadhāraṇepi ca sabbasmim vākye nītatthato avadhāraṇattham kho-saddaggaṇam “evā”ti sāmattiyā sātisayam etadatthassa viññāyamānattāti paṭhamavikappo vutto, nītatthato avadhāraṇena ko attho ekantiko kato, avadhārito cāti vuttam “**tatthā**”tiādi. Atha padapūraṇamattena kho-saddena kiṃ payoananti codanamapaneti “**padapūraṇenā**”tiādinā, akkharasamūhapadassa, padasamūhavākyassa ca siliṭṭhatāpayoanamatamevāti attho. “**Assosī**”ti hidam padaṃ kho-sadde gahite tena phullitam maṇḍitam vibhūsitam viya hontam pūritam nāma hoti, tena ca purimapacchimapaḍāni sukhuccāraṇavasena siliṭṭhāni honti, na tasmim aggahite, tasmā padapūraṇamattampi padabyañjanasiliṭṭhatāpayoananti vuttam hoti. Mattasaddo cettha visesanivattiattho, tenassa anattantaradīpanatā dassitā, **eva**-saddena pana padabyañjanasiliṭṭhatāya ekantikā.

“Samaṇo khalū”tiādi yathāsuttatthanidassananti dasseti “**idānī**”tiādinā. **Samitapāpattāti** ettha accantam anavasesato savāsanam samitapāpattāti attho gahetabbo. Evañhi bāhirakavītarāgasekkhāsekkhapāpasamanato bhagavato pāpasamanam yathārahaṃ visesitam hoti. Tena vuttam “**bhagavā ca anuttarena ariyamaggena samitapāpo**”ti. Tadevattham niddesapāṭhena sādhetum “**vuttañheta**”ntiādimāha. **Assāti** anena bhikkhunā, bhagavatā vā. **Samitāti** samāpitā, samabhāvaṃ vā āpādayitā, assa vā sampadānabhūtassa santā hontīti attho. Atthānugatā cāyam bhagavati samaññāti vuttam “**bhagavā cā**”tiādi. **Tenāti** tathā samitapāpattā. Yathābhūtam pavatto **yathābhuccam**, tadeva guṇo, tena adhigatam tathā. “**Khalū**”ti idam nepātikam khalupacchābhattikapade (mi. pa. 4.1.8) viya, na nāmam, anekatthattā ca nipātānam anussavanatthova idhāhippetoti āha “**anussavanatthe nipāto**”ti, paramparasavanañcetta anussavanam. **Brāhmaṇajāṭisamudāgatanti** brāhmaṇajāṭiyā āgatam, jāṭisiddhanti vuttam hoti. **Ālapanamattanti** piyālapanavacanamatam, na taduttari atthaparidīpanam. Piyasamudāhārā hete “bho”ti vā “āvuso”ti vā “devānam piyā”ti vā. **Dhammapade brāhmaṇavatthupāṭhena**, (dha. pa. 315 ādayo) **suttanipāte** ca **vāseṭṭhasuttapadena** brāhmaṇajāṭisamudāgatālapanabhāvaṃ samatthetum “**vuttampi ceta**”ntiādimāha.

Tatrāyamatto – sace rāgādikiñcanehi sakiñcano assa, so āmantanādīsu “bho bho”ti vadanto hutvā vicaraṇato bhovādīyeva nāma hoti, na brāhmaṇo. “Akiñcanaṃ anādānam, tamahaṃ brūmi brāhmaṇa”nti (dha. pa. 396, su. ni. 625) sesagāthāpadaṃ. Tattha rāgādayo satte kiñcanti maddanti palibuddhantīti **kiñcanāni**. Manussā kira goṇehi khalam maddāpentā “kiñcehi kapila, kiñcehi kāḷakā”ti vadanti, tasmā kiñcanasaddo maddanatto veditabbo. Yathāha **niddese** “akiñcananti rāgakiñcanaṃ, dosa, moha, māna, diṭṭhi, kilesakiñcanaṃ, duccharitakiñcanaṃ, yassete kiñcanā pahīnā samucchinnā vūpasantā paṭippassaddhā abhubbupattikā nāṇagginā daḍḍhā, so vuccati akiñcano”ti (cūḷani. 28, 32, 60, 63). **Gotamoti** gottavasena parikittanam, yam “ādiccagotta”ntipi loke vadanti, **sakyaputtoti** pana jāṭivasena sākiyoti ca tasseva vevacanam. **Vuttañhetam pabbajjāsutte** –

“Ādiccā nāma gottena, sākiyā nāma jāṭiyā;

Tamhā kulā pabbajjitomhi, na kāme abhipatthaya”nti. (su. ni. 425);

Tathā cāha “**gotamoti bhagavantam gottavasena parikitteti**”tiādi. Tattha gam tātātīti **gottam**, “gotamo”ti pavattamānam abhidhānam, buddhiñca ekamsikavisayatāya rakkhatīti attho. Yathā hi

buddhi ārammaṇabhūtena atthena vinā na vattati, evaṃ abhidhānaṃ abhidheyabhūtena, tasmā so gottasaṅkhāto attho tāni rakkhatīti vuccati, go-saddo cettha abhidhāne, buddhiyañca vattati. Tathā hi vadanti –

“Go goṇe cendriye bhūmyaṃ, vacane ceva buddhiyaṃ;
Ādicce rasmiyañceva, pānīyepi ca vattate;
Tesu atthesu goṇe thī, pumā ca itare pumā”ti.

Tattha “gosu duyhamānāsu gato, gopañcamo”tiādīsu gosaddo goṇe vattati. “Gocarō”tiādīsu indriye. “Gorakkha”ntiādīsu bhūmiyaṃ. Tathā hi **suttanipātaṭṭhakathāya vāsetṭhasuttasamvaṇṇanāyaṃ** vuttaṃ “gorakkhanti khettarakkhaṃ, kasikkammanti vuttaṃ hoti. Pathavī hi ‘go’ti vuccati, tappabhedo ca ‘khetta’nti (su. ni. aṭṭha. 2.619-626). “Gottaṃ nāma dve gottāni hīnañca gottaṃ, ukkaṭṭhañca gotta”ntiādīsu (pāci. 15) vacane, buddhiyañca vattati. “Gogottaṃ gotamaṃ name”ti porāṇakavīracanāya ādicce, ādiccabandhuṃ gotamaṃ sammāsambuddhaṃ namāmīti hi attho, “uṇhagū”tiādīsu rasmiyaṃ, uṇhā gāvo rasmiyo etassāti hi **uṇhagu**, sūriyo. “Gosītacandana”ntiādīsu (a. ni. ṭī. 1.49) pānīye, gosāṅkhātaṃ pānīyaṃ viya sītaṃ, tadeva candanaṃ tathā. Tasmīhi uddhanato uddharitapakkuṭhitatelasmiṃ pakkhitte taṅkhaṇaṇṇeva taṃ telaṃ sītalaṃ hotīti. Etesu pana atthesu goṇe vattamāno go-saddo yathārahaṃ itthiliṅgo ceva pulliṅgo ca, sesesu pana pulliṅgoyeva.

Kiṃ panetaṃ gottaṃ nāmāti? Aññakulaparamparāya asādhāraṇaṃ tassa kulassa ādipurisasamudāgataṃ taṃkulapariyāpannasādhāraṇaṃ sāmāññarūpanti daṭṭhabbaṃ. Sādhāraṇameva hi idaṃ taṃkulapariyāpannānaṃ sādharmaṇato ca sāmāññarūpaṃ. Tathā hi taṃkule jātā suddhodanamahārājādayopi “gotamo” tveva vuccanti, teneva bhagavā attano pitaraṃ suddhodanamahārājānaṃ “atikkantavarā kho gotama tathāgatā”ti (mahāva. 105) avoca, vessavaṇopi mahārājā bhagavantaṃ “vijjācaraṇasampannaṃ, buddhaṃ vandāma gotama”nti, (dī. ni. 3.288) āyasmāpi vaṅgīso āyasmantaṃ ānandaṃ “sādhu nibbāpanaṃ brūhi, anukampāya gotamā”ti (saṃ. ni. 1.212). Idha pana bhagavantaṃ tasmā “bhagavantaṃ gottavasena parikitteti”ti. **Tasmāti** yathāvuttamatthattaṃ paccāmasati. Ettha ca “**samaṇo**”ti iminā sarikkhakajanehi bhagavato bahumatabhāvo dassito tabbisayasamitapāpatāparikittanato, “**gotamo**”ti iminā lokiyajanehi tabbisayaulāragottasambhūtatāparikittanato.

Sakyassa suddhodanamahārājassa putto **sakyaputto**, iminā pana uccākulaparidīpanaṃ uditoditavipulakhattiyakulasambhūtatāparikittanato. Sabbakhattiyānañhi ādibhūtamahāsammata mahārājato paṭṭhāya asambhinnaṃ ulāratamaṃ sakyarājakulaṃ. Yathāha –

“Mahāsammatarājassa, vaṃsajo hi mahāmuni;
Kappādismiñhi rājāsi, mahāsammata nāmako”ti. (mahāvamse dutiyaparicchede paṭhamagāthā);

Kathaṃ saddhāpabbajitabhāvaparidīpananti āha “**kenacī**”tiādī. Parijijanaṃ parihāyanaṃ **pārijuññaṃ**, parijirātīti vā **parijijṇo**, tassa bhāvo **pārijuññaṃ**, tena. Nātipārijuññaṃ abhogapārijuññādinā kenaci pārijuññaṃ parihāniyā anabhibhūto anajjhotthaṇo hutvā pabbajitoti attho. Tadeva pariyaṇtarena vibhāvetuṃ “**aparikkhīṇaṃyeva taṃ kulaṃ pahāyā**”ti vuttaṃ. **Aparikkhīṇanti** hi nātipārijuññaṃ abhogapārijuññādinā kenaci pārijuññaṃ aparikkhayaṃ. **Saddhāya pabbajitoti** saddhāya eva pabbajito. Evañhi “kenacī”tiādīnā nivattitavacanaṃ sūpapannaṃ hoti. Nanu ca “sakyakulā pabbajito”ti idaṃ uccākulā pabbajitabhāvaparidīpanameva siyā tadatthasseva viññāyamānattā, na saddhāpabbajitabhāvaparidīpanaṃ tadatthassa aviññāyamānattāti? Na kho panevaṃ daṭṭhabbaṃ mahantaṃ nātiparivaṭṭaṃ, mahantañca bhogakkhandhaṃ pahāya saddhāpabbajitabhāvassa atthato siddhattā. Tathā hi lokanāthassa abhijātiyaṃ tassa kulassa na kiñci pārijuññaṃ, atha kho vuḍḍhiyeva, tato tassa samiddhatamabhāvo loke pākāṇo paññāto hoti, tasmā “sakyakulā pabbajito”ti ettakeyeva vutte

tathā samiddhatamaṃ kulamaṃ pahāya saddhāpabbajitabhāvo siddhoyevāti, imaṃ parihāraṃ “kenaci pārijuñṇenā”tiādinā vibhāvetīti daṭṭhabbaṃ. **Tato paranti** “kosalesu cārikaṃ caramāno”tiādivacanamaṃ.

“Sādhu dhammaruci rājā, sādhu paññāṇavā naro;
Sādhu mittānamadubbho, pāpassākaraṇamaṃ sukha”nti. ādīsu –

Viya sādhusaddo idha sundaratthoti āha “**sundaram kho panā**”ti. **Khoti** avadhāraṇatthe nipāto, **panāti** pakkhantaratthe. Evaṃ sātthakatāviññāpanatthañhi saṃvaṇṇanāyametesaṃ gahaṇamaṃ. **Sundaranti** ca bhaddakamaṃ, bhaddakatā ca passantānaṃ hitasukhāvahabhāvenāti vuttaṃ “**atthāvahamaṃ sukhāvaha**”nti. **Attho** cettha diṭṭhadhammikasaṃparāyikaparamatthavasena tividdhaṃ hitamaṃ **sukhampi** tatheva tividdhaṃ sukhaṃ.

Tathārūpānanti tādisānaṃ, ayaṃ saddato attho. Atthamattaṃ pana dassetaṃ “**evarūpāna**”nti vuttaṃ. Yādisehi ca guṇehi bhagavā samannāgato catuppamāṇikassa lokassa sabbakālampi-accantāya-saddhāya-pasādāniyo tesamaṃ yathābhūtasabhāvattā, tādisēhi guṇehi samannāgatabhāvaṃ sandhāya “tathārūpānaṃ arahata”nti vuttanti dassento “**yathārūpo**”tiādimāha. **Laddhasaddhānanti** laddhasaddahānaṃ, paraḥjanassa saddhaṃ paṭilabhantānanti vuttaṃ hoti. **Laddhasaddānanti** vā paṭiladdhakittisaddānaṃ, etena “arahata”nti padassa arahantānanti attho, arahantasamaññāya ca pākāṭabhāvo dassito, apica “yathārūpo so bhavaṃ gotamo”ti iminā “tathārūpāna”nti padassa aniyamavasena atthaṃ dassetvā sarūpaniyamavasenaṃpi dassetaṃ “**yathābhuccaguṇādhigamena loke arahantoti laddhasaddhāna**”nti vuttaṃ, idampi hi “tathārūpāna”nti padasseva atthadassanaṃ, ayameva ca nayo ācariyehi adhippeto idha **ṭikāyaṃ**, (dī. ni. ṭī. 1.255) **sāratthadīpaniya**ñca tatheva vuttattā. “Yathārūpā te bhavanto arahanto”ti avatvā “yathārūpo so bhavaṃ gotamo”ti vacanaṃ bhagavatiyeva garuḡaravavasena “tathārūpānaṃ arahata”nti puthuvacananiddiṭṭhabhāvaviññāpanatthaṃ. Attani, garūsu ca hi bahuvacanaṃ icchanti saddavidū. “**Yathābhucca...pe... arahata**”nti iminā ca dhammapamāṇānaṃ, lūkhappamāṇānañca sattānaṃ bhagavato pasādāvahataṃ yathārutato dasseti arahantabhāvassa tesaññeva yathārahaṃ visayattā, taṃdassanena pana itaresampi rūpappamāṇaghosappamāṇānaṃ pasādāvahatā dassitāyeva tadavinābhāvatoti daṭṭhabbaṃ.

Pasādasommānīti pasannāni, sītalāni ca, pasādavasena vā sītalāni, anena pasannamanataṃ dasseti. “Dassana”nti vuttepi taduttari kattabbatāsambhavato ayaṃ sambhāvanattho labbhatīti āha “**dassanamattampi sādhu hotī**”ti. Itarathā hi “dassanaññeva sādhu, na taduttari karaṇa”nti anadhippetattho āpajjati, sambhāvanattho cettha pi-saddo, api-saddo vā luttaniddiṭṭho. “Brahmacariyaṃ pakāsetī”ti ettha itī-saddo “abbhuggato”ti iminā sambandhamupagato, tasmā ayaṃ “sādhu hotī”ti idha itī-saddo “brāhmaṇo pokkharasātī ambaṭṭhaṃ māṇavaṃ āmantesī”ti iminā sambajjhitabbo, “ajjhāsayaṃ katvā”ti ca pāṭhaseso tadatthassa viññāyamānattā. Yassa hi attho viññāyati, saddo na payujjati, so “pāṭhaseso”ti vuccati, imamattaṃ vibhāvento āha “**dassanamattampi sādhu hotīti evamaṃ ajjhāsayaṃ katvā**”ti. **Mūlapaṇṇāsake cūlasīhanādasuttaṭṭhakathāya** (ma. ni. aṭṭha. 1.144) āgataṃ **kosiyasakuṇavatthu** cettha kathetabbaṃ.

Ambaṭṭhamāṇavakathāvaṇṇanā

256. “Ajjhāyako”ti idaṃ paṭhamapakatīyā garahāvacaṇameva, dutiyapakatīyā pasamsāvacaṇamaṃ katvā voharanti yathā taṃ “puriso naro”ti dassetaṃ **aggaññasutta**pada (dī. ni. 3.132) mudāhaṭamaṃ. Tattha **imeti** jhāyakanāmena samaññitā janā. **Na jhāyantīti** paṇṇakuṭṭisu jhānaṃ na appenti na nipphādentī, gāmanigamasāmantamaṃ osarītvā vedaganthe karontāva acchantīti attho. Taṃ panetesamaṃ brāhmaṇajhāyakaśākhātamaṃ paṭhamadutiyānāmaṃ upādāya tatiyameva jātanti āha “**ajjhāyakātveva tatiyamaṃ akkharamaṃ upanibbatta**”nti, **akkharanti** ca nirutti samaññā. Sā hi tasmīmyeva niruḷhabhāvena aññattha asaṅcaraṇato “akkhara”nti vuccati. **Mante parivattetīti** vede sajjhāyati, pariyāpuṇāṭṭīti attho. Idha hi adhiāpubbhai-saddavasena padasandhi, itarattaṃ pana jhe-saddavasena. **Mante dhāretīti**

yathāadhīte mante asammūlḥe katvā hadaye ṭhapeti.

Āthabbanavedo parūpaghātakarattā sādḥūnamaparibhogoti katvā “**irurvedayajurvedasāmavedāna**”nti vuttaṃ. Tattha iccante thomīyante devā etāyāti **iru** ica-dhātuvāsena ca-kārassa ra-kāraṃ katvā, itthilingoyam. Yajjante pujjante devā anenāti **yaju** punnapuṃsakalingavasena. Soyanti antaṃ karonti, sāyanti vā tanuṃ karonti pāpamanenāti **sāmaṃ** so-dhātupakkhe o-kārassa ā-kāraṃ katvā. Vidanti dhammaṃ, kammaṃ vā etehīti **vedā**, te eva **mantā** “sugatiyopi munanti, suyanti ca etehī”ti katvā. Paharaṇaṃ saṅghaṭṭanaṃ **pahataṃ**, oṭṭhānaṃ pahataṃ tathā, tassa karaṇavasena, oṭṭhāni cāletvā paṇuṇabhāvakarāṇavasena pāraṃ gato, na atthavibhāvanavasenāti vuttaṃ hoti. **Pāragūti** ca niccasāpekkhatāya kitanasamāso.

“**Saha nighaṇṭunā**”tiadinā yathāvākyam vibhatyantavasena nibbacanadassanaṃ. **Nighaṇṭurukkhādīnanti nighaṇṭu** nāma rukkhaviseso, tadādīkānamatthānanti attho, etena nighaṇṭurukkhapariyāyam ādim katvā tappamukhena sesapariyāyānaṃ tattha dassitattā so gantho nighaṇṭu nāma yathā taṃ “pārājikakaṇḍo, kusalattiko”ti ayamattho dassito iminā yathārutameva tadatthassa adhigatattā. Ācariyā pana evaṃ vadanti “vacanīyavācakahāvena atthaṃ, saddaṇca nikhaḍati bhindati vibhajja dasseti **nikhaṇḍu**, so eva kha-kārassa gha-kāraṃ katvā “**nighaṇḍū**”ti vutto”ti (dī. ni. ṭī. 1.256), tadetaṃ aṭṭhakathānāyato aññanayadassananti gahetabbaṃ. Itarathā hi so aṭṭhakathāya virodho siyā, vicāretabbametam. Akkharacintakā pana evamicchanti “tattha tatthāgatāni nāmāni nissesato ghaṭenti rāsiṃ karonti etthāti **nighaṇṭu** niggahitāgamenā”ti. **Vevacanappakāsakanti** pariyaśaddadīpakaṃ, ekekassa atthassa anekapariyāyavacanavibhāvakanti attho. Nidassanamattañcetaṃ anekesampi atthānaṃ ekasaddavacanīyatāvibhāvanavasenaṃ tassa ganthassa pavattattā. Ko panesoti? Etarahi nāmalingānusāsanaṃ ratanamālābhīdhanappadīpikādi. Vacībhedādīlakkhaṇā kiriyā kappīyati etenāti **kiriyākappo**, tatheva vividhaṃ kappīyati etenāti **vikappo**, kiriyākappo ca so vikappo cāti **kiriyākappavikappo**. So hi vaṇṇapadasambandhapadatthādivibhāgato bahuvikappoti katvā “kiriyākappavikappo”ti vuccati, so ca ganthavisesoyevāti vuttaṃ “**kavīnaṃ upakārāvahaṃ sattha**”nti, catunnampi kavīnaṃ kavibhāvasampadābhogasampadādīpayoṇavasena upakārāvaho ganthoti attho. Ko panesoti? Kabyabandhanavidhivīdhāyako kabyālaṅkāragītāsudhālaṅkāradī. Idaṃ pana mūlakiriyākappaganthaṃ sandhāya vuttaṃ. So hi mahāvisayo sataśasagāthāparimāṇo, yaṃ “nāyacariyādīpakaraṇa”ntipi vadanti. Vacanatthato pana kiṭayati gameti ñāpeti kiriyādivibhāganti **keṭubhaṃ** kiṭa-dhātuto abhapaccayavasena, a-kārassa ca ukāro. Atha vā kiriyādivibhāgaṃ anavasesapariyādānato kiṭento gamanto obheti pūretīti **keṭubhaṃ** kiṭa-saddūpapadaubhadhātuvāsena. Apica kiṭanti gacchanti kavayo bandhesu kosallametenāti **keṭubhaṃ**, purimanayenevettha padasiddhi. Ṭhānakaraṇādivibhāgato, nibbacanavibhāgato ca akkharā pabhedīyanti etenāti **akkharappabhedo**, taṃ pana chasu vedāṅgesu pariyaṇnaṃ pakaraṇadvayamevāti vuttaṃ “**sikkhā ca nirutti cā**”ti. Tattha sikkhanti akkharasamayametāyāti **sikkhā**, akārādivaṇṇānaṃ ṭhānakaraṇapayatanaṃ paṭīpādakasatthaṃ. Nicchayena, nissesato vā utti **nirutti**, vaṇṇāgamavaṇṇavipariyāyādīlakkhaṇaṃ. Vuttañca –

“Vaṇṇāgamo vaṇṇavipariyāyo,
Dve cāpare vaṇṇavikāranāsā;
Dhātussa atthātisayena yogo,
Taduccate pañcavidhā nirutti”ti. (pārā. aṭṭha. 1.veraṇṇajakaṇḍavaṇṇanā; visuddhi. 1.144;
mahāni. aṭṭha. 1.50);

Idha pana tabbasena anekadhā nibbacanaparidīpakaṃ satthaṃ uttarapadalopena “niruttī”ti adhippetam nibbacanavibhāgatopi akkharapabhedabhāvassa ācariyehi (dī. ni. ṭī. 1.256) vuttattā, tamantarena nibbacanavibhāgassa ca byākaraṇaṅgena saṅgahitattā. Byākaraṇaṃ, nirutti ca hi paccekameva vedāṅgaṃ yathāhu –

“Kappo byākaraṇaṃ joti-satthaṃ sikkhā nirutti ca;

Chandoviciti cetāni, vedaṅgāni vadanti chā’’ti.

Tasmā byākaraṇaṅgena asaṅkarabhūtaeva niruttinayena nibbacanamidhādhippetam, na chasu byañjanapadesu viya tadubhayasādhāraṇanibbacanam vedaṅgavisayattāti veditabbaṃ. Ayaṃ panettha **mahāniddeṣaṭṭhakathāya** (mahāni. aṭṭha. 50) āgataniruttinayavinicchayo. Tattha hi “nakkhattarājāriya tārakāna’’nti (jā. 1.1.11, 25) ettha ra-kārāgamo viya avijjamānassa akkharassa āgamo **vaṇṇāgamo** nāma. Hiṃsanattā “hiṃso’’ti vattabbe “sīho’’ti parivattanaṃ viya vijjamānānamakkharānaṃ heṭṭhupariyavasena parivattanaṃ **vaṇṇavipariyāyo** nāma. “Navachannakedāni diyyatī’’ti (jā. 1.6.88) ettha a-kārassa e-kārāpajjanaṃ viya aññakkharassa aññakkharāpajjanaṃ **vaṇṇavikāro** nāma. “Jīvanassa mūto jīvanamūto’’ti vattabbe “jīmūto’’ti va-kāra na-kārānaṃ vināso viya vijjamānakkharānaṃ vināso **vaṇṇavināso** nāma. “Pharusāhi vācāhi pakubbamāno, āsajja maṃ tvaṃ vadase kumārā’’ti (jā. 1.10.85) ettha “pakubbamāno’’ti padassa abhibhavamānoti atthapaṭipādanaṃ viya tattha tattha yathāyogaṃ viṣesatthapaṭipādanaṃ **dhātūnamatthāṭṭhisayena yogo** nāmāti.

Yathāvuttappabhedānaṃ tiṇṇaṃ vedānaṃ ayaṃ catutthoyeva siyā, atha kena saddhiṃ pañcamoti āha “**āthabbaṇavedaṃ catutthaṃ katvā**’’ti. **Āthabbaṇavedo** nāma āthabbaṇavedikehi vihito parūpaghātakaro manto, so pana itihāsapañcamabhāvappakāsanatthaṃ gaṇitatāmattena gahito, na sarūpavasena, evañca katvā “**etesa**’’nti padassa tesam tiṇṇaṃ vedānantveva attho gahetabbo. Tañhi “tiṇṇaṃ vedāna’’nti etassa viṣesananti. **Itiha asāti** evaṃ idha loke ahosi “**āsā**’’tipi katthaci pāṭho, soyevattho. **Iha** ṭhāne **iti** evaṃ, idaṃ vā kammaṃ, vatthum vā **āsa** icchāhītipi attho. Tassa ganthassa mahāvisayatādīpanatthañcetta vicchāvacaṇaṃ, iminā “itihāsā’’ti vacanena paṭisaṃyutto **itihāso** taddhitavasenāti atthaṃ dasseti. Itiha āsa, itiha āsā’’ti īdisavacanapaṭisaṃyutto **itihāso** niruttinayenāti atthadassananti vadanti. Akkharacintakā pana evamicchanti “itihā-saddo pārampariyopadeso ekova nipāto, asati vijjatīti **aso**, itihā aso etasminti **itihāso** samāsavasenā’’ti, tesam mate “**itihā asā**’’ti ettha evaṃ pārampariyopadeso asa vijjamāno ahosīti attho. “**Purāṇakathāsāṅkhāto**’’ti iminā tassa ganthavisesabhāvamāha, bhāratanaṃmakānaṃ dvebhātikarājūnaṃ yuddhakathā, rāmarañño sītāharaṇakathā, naraśīharājuppattikathāti evamādi purāṇakathāsāṅkhāto bhāratapurāṇarāmapurāṇanaraśīhapurāṇādigantho itihāso nāmāti vuttaṃ hoti. “**Tesam itihāsapañcamānaṃ vedāna**’’nti iminā yathāvākyaṃ “tiṇṇaṃ vedāna’’nti ettha viṣesanabhāvaṃ dasseti.

Pajjati attho etenāti **padam**, nāmākhyātopasagganipātādivasena anekavibhāgaṃ vibhattiyantapadam. Tadapi byākaraṇe āgatamevāti vuttaṃ “**tadavasesa**’’nti, padato avasesaṃ pakatipaccayādisaddalakkhaṇabhūtaṃ attho. Taṃ taṃ saddaṃ, tadatthañca byākaroti byācikkhati etenāti **byākaraṇam**, viṣesena vā ākarīyante pakatipaccayādayo abhinipphādīyante ettha, anenāti vā **byākaraṇam**, sādhusaddānāmanvākhyāyakaṃ **muddhabodhabyākaraṇa sārassatabyākaraṇa pāṇinībyākaraṇacandrabyākaraṇādi** adhunāpi vijjamānasatthaṃ. **Adhīyatīti** ajjhāyati. **Vedētīti** paresaṃ vāceti. **Ca**-saddo atthadvayasamuccinanattho, vikappanattho vā atthantarassa vikappitattā. Vicitrā hi taddhitavutti. **Padakoti** byākaraṇesu āgatapadakoṣallaṃ sandhāya vuttaṃ, **veyyākaraṇoti** tadavasiṭṭhapakatipaccayādisaddavidhikosallanti imassatthassa viññāpanatthaṃ padadvayassa ekato atthavacaṇaṃ. Esā hi ācariyānaṃ pakati, yadidaṃ yena kenaci pakārena atthantaraviññāpanaṃ. Ayaṃ **aṭṭhakathāto** aparō nayo – te eva vede padaso kāyatīti **padakoti**. Tattha **padasoti** gajjabandhapajjabandhapadena. **Kāyatīti** katheti yathā “jātaka’’nti, iminā vedakārakasamatthataṃ dasseti. Evañhi “ajjhāyako’’tiādīhi imassa viṣeso pākāṭo hotīti.

Āyatim hitam bālajanasāṅkhāto loko na yatati na īhati anenāti **lokāyatam**. Tañhi ganthaṃ nissāya sattā puññakiriyāya cittampi na uppādentī, lokā vā bālajānā āyatanti ussahanti vādassādena etthāti **lokāyatam**. Aññamaññaviruddhaṃ, saggamokkhaviruddhaṃ vā tanonti etthāti **vitāṇḍo** ḍa-paccayavasena, na-kārassa ca ṇa-kāraṃ katvā, viruddhena vādadaṇḍena tāḷenti vādino etthāti **vitāṇḍo** taḍi-dhātuvāsena, niggaḥitāgamañca katvā. Adesampi yaṃ nissāya vādīnaṃ vādo pavatto, taṃ tesam desatopi upacāravasena vuccati yathā “cakkhum loke piyarūpaṃ sātārūpaṃ, etthesā taṇhā pahīyamānā

pahīyati, ettha nirujjhamānā nirujjhatī”ti, (dī. ni. 2.401; ma. ni. 1.133; vibha. 204) visesena vā paṇḍitānaṃ maṇaṃ taḍenti cālenāti etenāti **viṭaṇḍo**, taṃ vadanti, so vādo vā etesanti **viṭaṇḍavādā**, tesam sattaṃ tathā. Lakkhaṇadīpakasattaṃ uttarapadalopena, taddhitavasena vā **lakkhaṇanti** dasseti **“lakkhaṇadīpaka”**ntiadinā. Lakkhīyati buddhabhāvādi anenāti **lakkhaṇaṃ**, nigrodhabimbatādi. Tenāha **“yesaṃ vasaṇā”**tiādi. **Dvādasasahassaganthapamāṇanti** ettha bhāṇavārappamāṇādīsu viya bāttiṃsakkharaganthova adhippeto. Vuttañhi –

“Aṭṭhakkharā ekapadaṃ, ekā gāthā catuppadaṃ;
Gāthā cekā mato gantho, gantho bāttiṃsatakkharo”ti.

Dvādasahi guṇitasahassabāttiṃsakkharaganthapamāṇanti attho. **Yatthāti** yasmim lakkhaṇasatthe, ādhāre cetam bhummaṃ yathā **“rukkhe sākā”**ti. Soḷasa ca sahassaṅca **soḷasasahassaṃ**, soḷasādhikasahassagāthāparimāṇāti attho. Evañhi ādhārādheyyavacanāṃ sūpapannaṃ hotīti. Padhānavasena buddhānaṃ lakkhaṇadīpanato **buddhamantā nāma**. Paccekabuddhādīnampi hi lakkhaṇaṃ tatha dīpitameva. Tena vuttaṃ **“yesaṃ vasaṇā”**tiādi.

“Anūno paripūrakārī”ti atthamattadassanaṃ, saddato pana adhigatamatthaṃ dassetuṃ **“avayo na hotī”**ti vuttaṃ. Ko pana avayoti anuyogamapaneti **“avayo nāmā”**tiadinā. Ayamettādhippāyo – yo tāni sandhāretuṃ sakkoti, so **“vayo”**ti vuccati. Yo pana na sakkoti, so avayo nāma. Yo ca avayo na hoti, so **“dve paṭisedhā pakatiyatthagamakā”**ti nāyena vayo evāti. Vayatīti hi **vayo**, ādimajjhapariyosānesu katthacipi aparikilamanto avitthāyanto te ganthe santāne paṇeti byavaharatīti attho. Ayaṃ pana **vinayaṭṭhakathānayo** (pārā. 84) – **anavayoti** anu avayo, sandhivasena u-kāralopo, anu anu avayo anūno, paripunṇasippoti attho. **Vayoti** hi hāni **“āyavayo”**tiādīsu viya, natthi etassa yathāvuttaganthesu vayo unatāti **avayo**, anu anu avayo **anavayoti**.

“Anuññāto”ti padassa kammaśādhānavasena, **“paṭiññāto”**ti padassa ca kattusādhānavasena atthaṃ dassento **“ācariyena”**tiādimāha. **Assāti** ambaṭṭhassa. Pāḷiyam **“yamahaṃ jānāmi, taṃ tvaṃ jānāsī”**ti idaṃ anujānanākāradassanaṃ, **“yaṃ tvaṃ jānāsī, tamahaṃ jānāmī”**ti idaṃ pana paṭijānanākāradassanaṃ dasseti **“yaṃ aha”**ntiadinā. **“Āma ācariyā”**ti hi yathāgataṃ paṭijānavacanameva atthavasena vuttaṃ. **Yanti** tevijjakaṃ pāvacaṇaṃ. **Tassāti** ācariyassa. Paṭivacanadānameva paṭiññā tathā, tāya sayameva **paṭiññātoti** attho. **“Sake”**tiādi anujānanapaṭijānanādhikāradassanaṃ. Adesassapi desamiva kappanāmattenāti vuttaṃ **“katarasmi”**ntiādi. Sassa attano santakaṃ sakaṃ. Ācariyānaṃ paramparato, paramparabhūtehi vā ācariyehi āgataṃ **ācariyakaṃ**. Tisso vijjā, tāsaṃ samūho **tevijjakaṃ**, vedattayaṃ. Padhānaṃ vacanaṃ, pakatthānaṃ vā aṭṭhakādīnaṃ vacanaṃ **pāvacaṇaṃ**.

257. Idāni yenādhippāyena brāhmaṇo pokkharasāti ambaṭṭhaṃ māṇavaṃ āmantetvā **“ayaṃ tātā”**tiādivacanamabrvi, tadadhippāyaṃ vibhāvento **“esa kirā”**tiādimāha. Tatha **uggatassāti** pubbe pākāssa kittimato porāṇajanassa. **Bahū janāti** pūraṇakassapādayo sandhāya vuttaṃ. **Ekaccanti** khattiyādijātimaṇaṃ, lokasammatam vā **janam**. **Garūti** bhāriyaṃ, attānaṃ tato mocetvā apagamanamattampi dukkaraṃ hoti, pageva taduttari karaṇanti vuttaṃ hoti. **Anattho** nāma tathāpagamanādinā nindābyārosaupārambhādi.

“Abbhuggato”ti ettha abhisaddayogena **itthambhūtākhyānatthavaseneva** **“gotama”**nti **upayogavacanam**. **“Taṃ bhavantaṃ, tathā santamēvā”**ti padesuṃ tassa anupayogattā tadatthavasenevāti dasseti **“tassa bhoto”**tiadinā. Tenāha **“idhāpi”**tiādi. **Tathā satoyevāti** yenākārena arahatādinā saddo abbhuggato, tenākārena santassa bhūtassa eva tassa bhavato gotamassa saddo yadi vā abbhuggatoti attho. Apica **taṃ bhavantaṃ gotamaṃ tathā santamēvāti** ekassapi atthassa dvikkhattuṃ sambandhabhāvena vacanaṃ sāmāññavisitthāparikappanena atthavisesaviññāpanatthaṃ, tasmā **“tassa bhoto gotamassā”**ti sāmāññasambandhabhāvena vicchinditvā **“tathā satoyevā”**ti visesasambandhabhāvena yojetabbaṃ. **Yadi**-saddo cettha saṃsayattho dvinnampi atthānaṃ

samsayitabbattā. **Vā**-saddo ca vikappanattho tesu ekassa vikappetabbattā. Saddavidū pana evaṃ vadanti – “imassa vacanaṃ saccam vā yadi vā musā”tiādīsu viya yadi-saddo vā-saddo ca ubhopi vikappatthāyeva. Yadi-saddopi hi “yaṃ yadeva parisam upasaṅkamati yadi khattiyaparisaṃ yadi brāhmaṇaparisa”ntiādīsu (a. ni. 5.34) vā-saddattho dissati. “Appaṃ vassasataṃ āyu, idānetarahi vijjati”tiādīsu viya ca idha samānatthasaddapayogoti. Pāḷiyam **“yadi vā no tathā”**ti idampi “santaṃyeva saddo abbhuggato”ti iminā sambajjhivā yathāvuttanayeneva yojetabbaṃ. Nanu “gotama”nti padeyeva upayogavacanaṃ siyā, na etthāti codanāya **“idhāpi”**tiādi vuttaṃ, tassa anupayogattā, vicchinditvā sambandhavesabhāvena yojetabbattā vā idhāpi itthambhūtākhyānatthavaseneva upayogavacanaṃ nāmāti vuttaṃ hoti. Itthambhūtākhyānaṃ attho yassa tathā, abhisaddo, itthambhūtākhyānameva vā attho tathā, soyevattho. Yadaggena hi saddayogo hoti, tadaggena atthayogopīti.

258. Bhoti attano ācariyaṃ ālapati. Yathā-saddaṃ sātthakaṃ katvā saha pāṭhasesena yojetuṃ **“yathā sakkā”**tiādi vuttaṃ. **Soti** bhagavā. Purimanaye ākāratthajotanayathā-saddayogyato kathanti pucchāmatam, idha pana tadayogyato **“ākārapucchā”**ti vuttaṃ. Bāhirakasamaye ācariyamhi upajjhāyasamudācāroti āha **“atha naṃ upajjhāyo”**ti, upajjhāyasaññito ācariyabrāhmaṇoti attho.

Kāmañca manto, brahmaṃ, kappoti tibbidho vedo, tathāpi aṭṭhakādi vuttaṃ padhānabhūtaṃ mūlaṃ **manto**, tadatthavivaraṇamattham **brahmaṃ**, tattha vuttanayena yaññakiriyāvidhānaṃ **kappoti** mantasseva padhānabhāvato, itaresaṅca tannissayeneva jātattā mantaggahaṇena brahmakappānampi gahaṇaṃ siddhamevāti dasseti **“tīsu vedesū”**ti iminā. **Mantoti** hi aṭṭhakādīhi isīhi vuttamūlavedasseva nāmaṃ, **vedoti** sabbassa, tasmā “vedesū”ti vutte sabbesampi gahaṇaṃ sijjhatīti veditabbaṃ. **Lakkhaṇānīti** lakkhaṇadīpakāni mantapadāni. Pajjagajjabandhapavesanavasena **pakkhipitvā. Brāhmaṇavesenevāti** vedavācakabrāhmaṇalingeneva. **Vedeti** mahāpurisalakkhaṇamante. **Mahesakkhā sattāti** mahāpuññavanto paṇḍitasattā. Jānissanti iti manasi katvā vācentīti sambandho. **Tenāti** tathā vācanato. **Pubbeti** “tathāgato uppajjissati”ti vattabbakālato pabhuti tathāgatassa dharamānakāle. Ajjhāyitabbavācetaḥbhāvena **āgacchanti** pākaṭā bhavanti. Ekagāthādvigāthādivasena **anukkamena antaradhāyanti**. Na kevalaṃ lakkhaṇamantāyeva, atha kho aññepi vedā brāhmaṇānaṃ aññābhāvena anukkamena antaradhāyanti evāti ācariyena (dī. ni. 1.258) vuttaṃ.

Buddhabhāvapatthanā **paṇidhi**, pāramīsambharaṇaṃ **samādānaṃ**, kammassakatādipaññā **ñāṇaṃ**. “Paṇidhimahato samādānamahatotiādīnā paccakaṃ mahantasaddo yojetabbo”ti (dī. ni. 1.258) ācariyena vuttaṃ. Evañca sati karuṇā ādi yesaṃ saddhāsīlādīnaṃ te **karuṇādayo**, te eva guṇā **karuṇādiguṇā**, paṇidhi ca samādānañca ñāṇaṅca karuṇādiguṇā ca, tehi mahanto **paṇidhisamādānaññākaruṇādiguṇamahantoti** nibbanaṃ kātābbaṃ. Evañhi dvandatoparattā mahantasaddo paccakaṃ yojīyatīti. Apica paṇidhi ca samādānañca ñāṇaṅca karuṇā ca, tamādi yesaṃ te tathā, teyeva guṇā, tehi mahantoti nibbanaṇepi attho sūpapanno hoti, paṇidhimahantatādi cassa buddhavaṃsa (bu. vaṃ. 9 ādayo) cariyāpiṭakādi (cariyā. 1 ādayo) vasena veditabbo. **Mahāpadānasuttaṭṭhakathāyaṃ** pana “mahāpurisassāti jātigottakulapadesādivasena mahantassa purisassā”ti (dī. ni. aṭṭha. 2.33) vuttaṃ. Tattha “khattiyō, brāhmaṇo”ti evamādi **jāti**. “Koṇḍañño, gotamo”ti evamādi **gottam**. “Poṇikā, cikkhallikā, sākiyā, koliyā”ti evamādi **kulapadeso**, tadetaṃ sabbampi idha ādisaddena saṅgahitanti daṭṭhabbaṃ. Evañhi sati “dveyeva gatiyo bhavanti”ti ubhinnaṃ sādharmaṇavacanaṃ samatthitaṃ hotīti.

Niṭṭhāti nipphattiyo siddhiyo. Nanvāyaṃ gati-saddo anekattho, kasmā niṭṭhāyameva vuttoti āha **“kāmañcāya”**ntiādi. **Bhavabhedeti** nirayādibhavavisesa. So hi sucaritaduccaritakammena sattehi upapajjanavasena gantabbāti **gati**. Gacchati pavattati etthāti **gati**, nivāsaṭṭhānaṃ. Gamati yathāsabhāvaṃ jānātīti **gati**. Paññā, gamanaṃ byāpanaṃ **gati**, vissatābhāvo, so pana ito ca etto ca byāpetvā ṭhitatāva. Gamaṇaṃ nipphattaṇaṃ **gati**, niṭṭhā, ajjhāsayaapaṭisaraṇatthāpi nidassananayena gahitā. Tathā hesa “imesaṃ kho ahaṃ bhikkhūnaṃ sīlavantānaṃ kalyāṇadhammānaṃ neva jānāmi āgatiṃ vā gatiṃ vā”ti (ma. ni. 1.508) ettha ajjhāsaya vattati, “nibbānaṃ arahato gati”ti (pari. 339) ettha paṭisaraṇe, parāyaṇe

apassayeti attho. Gacchati yathārucci pavattatīti **gati**, ajjhāsayo. Gacchati avacarati, avacaranavasena vā pavattati etthāti **gati**, paṭisaraṇaṃ. Sabbasaṅkhatavisaññuttassa hi arahato nibbānameva paṭisaraṇaṃ, idha pana niṭṭhāyaṃ vattatīti veditabbo tadaññesamavisayattā.

Nanu dvinnaṃ nipphattīnaṃ nimittabhūtāni lakkhaṇāni visadisāneva, atha kasmā “yehi samannāgatassā”’tiadinā tesam sadisabhāvo vuttoti codanālesam dassetvā sodhento “**tattha kiñcāpi**”’tiadināha. Samānepi nigrodhabimbatādilakkhaṇabhāve attheva koci nesaṃ visesoti dassetuṃ “**na teheva buddho hoti**”’ti vuttaṃ. “Yathā hi buddhānaṃ lakkhaṇāni suvisadāni, supariyattāni, paripuṇṇāni ca honti, **na** evaṃ cakkavattīna”’nti ayaṃ pana viseso **ācariyadhammapālattherena** (dī. ni. 1.258) pakāsito. Jāyanti bhinnesupi atthesu abhinnadhīsaddā etāyāti **jāti**, lakkhaṇabhāvamattaṃ. Vuttañhi –

“Sabalādīsu bhinnesu, yāya vattantubhinnadhī;
Saddā sā jātiresā ca, mālāsuttamivanvitā”’ti.

Tasmā lakkhaṇatāmattena samānabhāvato visadisānīpi tāniyeva cakkavattinipphattinimittabhūtāni lakkhaṇāni sadisāni viya katvā tāni buddhanipphattinimittabhūtāni lakkhaṇāni nāmāti idaṃ vacanaṃ vuccatīti attho. Adhiāpubbavasayoge bhummatthe upayogavacananti āha “**agāre vasati**”’ti **catūhi acchariyadhammehī** abhirūpatā, dīghāyukatā, appābādhatā, brāhmaṇagahapatikānaṃ piyamanāpatāti imehi catūhi acchariyasabhāvabhūtāhi iddhīhi. Yathāha –

“Rājā ānanda, mahāsudassano catūhi iddhīhi samannāgato ahoṣi. Katamāhi catūhi iddhīhi?
Idhānanda, rājā mahāsudassano abhirūpo ahoṣi dassanīyo pāsādiko”’tiadi (dī. ni. 2.252).

Cetiya jātake (jā. aṭṭha. 3.8.44) āgatanayaṃ gahetvāpi **evaṃ** vadanti “sarīrato candanagandho vāyati, ayaṃ ekā iddhī. Mukhato uppalagandho vāyati, ayaṃ dutiyā. Cattāro devaputtā catūsu disāsu sabbakālaṃ khaggahatthā ārakkhaṃ gaṇhanti, ayaṃ tatiyā. Ākāsena vicarati, ayaṃ catutthī”’ti. **Anāgatavamsasamvaṇṇanāyaṃ** pana “abhirūpabhāvo ekā iddhī, samavepākiniyā gahaṇiyā samannāgatabhāvo dutiyā, yāvātāyukampi sakalalokassa dassanātittikabhāvo tatiyā, ākāsacāribhāvo catutthī”’ti vuttaṃ. Tattha **samavepākiniyā gahaṇiyā samannāgatabhāvoti** samavipācaniyā kammajatejodhātuyā sampannatā. Yassa hi bhuttamattova āhāro jīrati, yassa vā pana puṭabhattaṃ viya tatheva tiṭṭhati, ubhopete na samavepākiniyā samannāgatā. Yassa pana puna bhattakāle bhattacchando uppajjateva, ayaṃ samavepākiniyā samannāgato nāma, tathārūpatāti attho. **Saṅgahavatthūhī** dānaṃ, piyavacanaṃ, atthacariyā, samānattatāti imehi saṅgahopāyehi. Yathāha –

“Dānañca peyyavajjañca, atthacariyā ca yā idha;
Samānattatā ca dhammesu, tattha tattha yathārahaṃ;
Ete kho saṅgahā loke, rathassāṇīva yāyato.

Ete ca saṅgahā nāssu, na mātā puttakāraṇā;
Labhetha mānaṃ pūjaṃ vā, pitā vā puttakāraṇā.

Yasmā ca saṅgahā ete, samapekkhanti paṇḍitā;
Tasmā mahattaṃ pappontī, pāsamsā ca bhavanti te”’ti. (dī. ni. 3.273);

Raṅjanatoti pītisomanassavasena raṅjanato, na rāgavasena, pītisomanassānaṃ jananatoti vuttaṃ hoti. Catūhi saṅgahavatthūhi raṅjanaṭṭhena rājāti pana sabbesaṃ rājūnaṃ samaññā tathā akarontānampi vilīvabījanādīsu tālavaṇṭavohāro viya ruḥhivasena pavattito, tasmā “acchariyadhammehī”’ti asādhāraṇanibbanaṃ vuttanti daṭṭhabbaṃ.

Saddasāmatthiyato anekadhā cakkavattīsaddassa vacanatthaṃ dassento padhānabhūtaṃ

vacanattham paṭhamam dassetuṃ “**cakkaratana**”ntiādimāha. Idameva hi padhānaṃ cakkaranassa pavattanamantarena cakkavattibhāvānāpattito. Tathā hi **aṭṭhakathāsu** vuttaṃ “kittāvata cakkavattī hotīti? Ekaṅguladvaṅgulamattampi cakkaratane ākāsaṃ abbhuggantvā pavatte”ti (dī. ni. aṭṭha. 2.243; ma. ni. aṭṭha. 3.256). Yasmā pana rājā cakkavattī ekaṃsaṃ uttarāsaṅgaṃ karitvā vāmahatthena hatthisoṇḍasadisapanāliṃ suvaṇṇabhinkāraṃ ukkhipitvā dakkhiṇahatthena cakkaranam udakena abbhukkiritvā “pavattatu bhavaṃ cakkaranam, abhivijjātu bhavaṃ cakkaratana”nti (dī. ni. 2.244) vacanena cakkaranam vehāsaṃ abbhuggantvā pavattesi, tasmā tādisaṃ pavattāpanam sandhāya “**cakkaratanam vatteti**”ti vuttaṃ. Yathāha “atha kho ānanda rājā mahāsudassano uṭṭhāyāsana...pe... cakkaranam abbhukkiri ‘pavattatu bhavaṃ cakkaratana’nti”ādi (dī. ni. 2.244). Na kevalaṅca cakkasaddo cakkaraneyeva vattati atha kho sampatticakkādīsopi, tasmā taṃtadatthavācakasaddasāmatthiyatopi vacanattham dasseti “**sampatticakkehi**”tiādinā. Tattha **sampatticakkehi** –

“Patirūpe vase dese, ariyamittakaro siyā;
Sammāpaṇidhisampanno, pubbe puññakato naro;
Dhaññaṃ dhanam yaso kitti, sukhañcetaṃdhivattati”ti. (a. ni. 4.31) –

Vuttehi patirūpadesavāsādisampatticakkehi. **Vattatīti** pavattati sampajjati, uparūpari kusaladhammaṃ vā paṭipajjati. **Tehīti** sampatticakkehi. **Paranti** sattanikāyaṃ, yathā sayamsaddo suddhakattutthassa jotako, tathā paraṃsaddopi hetukattutthassāti veditabbaṃ. **Vatteti** pavatteti sampādeti, uparūpari kusaladhammaṃ vā paṭipajjāpeti. Yathāha –

“Rājā mahāsudassano evamāha ‘pāṇo na hantabbo, adinnaṃ na ādāttabbaṃ, kāmesu micchā na caritabbā, musā na bhaṇitabbā, majjaṃ na pātābbaṃ, yathābhuttaṅca bhujjathā’ti. Ye kho panānanda puratthimāya disāya paṭirājāno, te rañño mahāsudassanassa anuyantā ahesu”ntiādi (dī. ni. 2.244).

Iriyāpathacakkānanti iriyāpathabhūtānaṃ cakkānaṃ. Iriyāpathopi hi “cakka”nti vuccati “catucakkaṃ navadvāra”ntiādisu (saṃ. ni. 1.29, 109). Yathāha –

“Rathaṅge lakkhaṇe dhammo-racakkesviriyāpathe;
Cakkaṃ sampattiyam cakka-ratane maṇḍale bale;
Kulālabhaṇḍe āṇāya-māyudhe dānarāsīsū”ti.

Vattoti pavattanam uppajjanaṃ, imināva iriyāpathacakkaṃ vatteti parahitāya uppādetīti nibbacanampi dasseti atthato samānattā. Tathā cāha –

“Atha kho taṃ ānanda cakkaranam puratthimam disaṃ pavatti, anvadeva rājā mahāsudassano saddhim caturaṅginīyā senāya. Yasmim kho panānanda, padese cakkaranam paṭiṭṭhāsi, tattha rājā mahāsudassano vasaṃ upagacchi saddhim caturaṅginīyā senāyā”tiādi (dī. ni. 2.244).

Ayam aṭṭhakathāto aparo nayo – appaṭihatam āṇāsankhātam cakkaṃ vatteti **cakkavattī**. Tathā hi vuttaṃ –

“Pañcahi bhikkhave dhammehi samannāgato rājā cakkavattī dhammeneva cakkaṃ vatteti, taṃ hoti cakkaṃ appaṭivattiyam kenaci manussabhūtena paccatthikena paṇinā. Katamehi pañcahi? Idha bhikkhave rājā cakkavattī atthaññū ca hoti, dhammaññū ca mattaññū, ca kālaññū ca parisāññū ca. Imehi kho...pe... paṇinā”tiādi (a. ni. 5.131).

Khattiyamaṇḍalādīsaññitaṃ cakkaṃ samūhaṃ attano vase vatteti anuvatteti **cakkavattī**.

Vuttañhi “ye kho panānanda puratthimāya disāya paṭirājāno, te rañño mahāsudassanassa anuyantā ahesu”tiādi (dī. ni. 2.244). Cakkalakkhaṇaṃ vattati etassātipi **cakkavattī**. Tenāha “imassa deva kumārassa heṭṭhā pādātalesu cakkāni jātāni sahasārāni sanemikāni sanābhikāni sabbākāraparipūrāni”tiādi (dī. ni. 2.35). Cakkaṃ mahantaṃ kāyabalaṃ vattati etassātipi **cakkavattī**. Vuttañhettaṃ “ayañhi deva kumāro sattussado...pe... ayañhi deva kumāro sīhapubbaddhakāyo”tiādi (dī. ni. 2.35). Tena hissa lakkhaṇena mahabballabhāvo viññāyati. Cakkaṃ dasavidhaṃ, dvādasavidhaṃ vā vattadhammaṃ vattati paṭipajjati **cakkavattī**. Tena vuttaṃ “na hi te tāta dibbaṃ cakkaratanaṃ pettikaṃ dāyajjaṃ, iṅgha tvamaṃ tāta ariye cakkavattivatte vattāhi”tiādi (dī. ni. 3.83). Cakkaṃ mahantaṃ dānaṃ vatteti pavatteti **cakkavattī**. Vuttañca –

“Paṭṭhapesi kho ānanda rājā mahāsudassano tāsaṃ pokkharāṇiṇaṃ tīre evarūpaṃ dānaṃ annaṃ annatthikassa, pānaṃ pānatthikassa, vatthaṃ vatthatthikassa, yānaṃ yānatthikassa, sayanaṃ sayanatthikassa, itthiṃ itthitthikassa, hiraññaṃ hiraññatthikassa, suvaṇṇaṃ suvaṇṇatthikassa”tiādi (dī. ni. 2.254).

Rājāti sāmāññaṃ tadaññasādhāraṇato. **Cakkavattīti visesaṃ** anaññasādhāraṇato. **Dhammasaddo** ñāye, samo eva ca ñāyo nāmāti āha “**ñāyena samena**”ti. **Vattati** uppajjati, paṭipajjati vā attho. “Idaṃ nāma caratī”ti avuttepi sāmāññajotanaṃ visese avatṭhānato, visesatthinaṃ ca visesassa payujjitabbattā “sadatthaparatthe”ti yojjati. Padesaggahaṇe hi asati gahetabbassa nippadesatā viññāyati yathā “dikkhito na dadātī”ti. Yasmā cakkavattirājā dhammeneva rajjamadhigacchati, na adhammena parūpaghātadinā. Tasmā vuttaṃ “**dhammena rajjaṃ labhitvā**”tiādi, **dhammenāti** ca ñāyena, kusaladhammena vā. Rañño bhāvo **rajjaṃ**, issariyaṃ.

Paresaṃ hitopāyabhūtaṃ dhammaṃ karoti, caratīti vā **dhammiko**. Attano hitopāyabhūtaṃ dhammassa kāraṇo, carako vā rājāti **dhammarājāti** imaṃ savisesaṃ atthaṃ dasseti “**parahitadhammakaraṇena vā**”tiādinā. Ayaṃ pana mahāpadānaṭṭhakathānayo – dasavidhe kusaladhamme, agatirahite vā rājadhamme niyuttoti **dhammiko**; teneva dhammena lokaṃ rañjetīti **dhammarājā**. Pariyāyavacanameva hi idaṃ padadvayanti. Ācariyena pana evaṃ vuttaṃ “cakkavattivattasaṅkhātaṃ dhammaṃ carati, cakkavattivattasaṅkhāto vā dhammo etassa, etasmiṃ vā atthīti **dhammiko**, dhammato anapetattā dhammo ca so rañjanaṭṭhena rājā cāti **dhammarājā**”ti (dī. ni. 1.258). “Rājā hoti cakkavattī”ti vacanato “cāturanto”ti idaṃ catudīpissarataṃ vibhāvetīti āha “**cāurantāyā**”tiādi. Cattāro samuddā antā pariyosānā etissāti **cāurantā**, pathavī. Sā hi catūsu disāsu puratthimasamuddādicatusamuddapariyosānattā evaṃ vuccati. Tena vuttaṃ “**catusamudda antāyā**”ti, sā pana avayavabhūtehi catubbidhehi dīpehi vibhūsitā ekalokadhātupariyāpannā pathavīyevāti dasseti “**catubbidhadīpavibhūsitāyā pathaviyā**”ti iminā. Yathāha –

“Yāvata candimasūriyā, pariharanti disā bhanti virocanaṃ;
Sabbeva dāsā mandhātu, ye ca paṇā pathavissitā”ti.

Ettha ca “catudīpavibhūsitāyā”ti avatvā **catubbidhadīpavibhūsitāyāti vidhasaddaggaṇaṃ** paccekaṃ pañcasataparittadīpānampi mahādīpeyeva saṅghaṇatthaṃ saddātirittena atthātirittassa viññāyamānattā, koṭṭhāsavācakena vā vidhasaddena samānabhāgānaṃ gahitattāti daṭṭhabbaṃ. **Kopādipaccatthiketi** ettha ādisaddena kāmamohamānamadādike saṅghāti. **Vijetīti** taṃkālāpekkhāya vattamānavacanaṃ, vijitavāti attho. Saddavidū hi atīte tāvīsaddamicchanti. “Sabbarājāno vijetī”ti vadanto kāmaṃ cakkavattino kenaci yuddhaṃ nāma natthi, yuddhena pana sādhetabbassa vijayassa siddhiyā “vijitasāṅgamo” tveva vuttoti dasseti.

Thāvarassa dhuvassa bhāvo **thāvariyaṃ**, yathā janapade thāvariyaṃ patto, taṃ dassetaṃ “**na sakkā kenaci**”tiādi vuttaṃ, iminā kenaci akampiyatṭhena janapade thāvariyaṃ patto tappurisasaṃsaṃsaṃ dasseti, itarena ca daḥhabhattibhāvato janapado thāvariyaṃ patto etasminti aññapadatthasamāsaṃ. **Tamhīti** asmiṃ rājini. Yathā janapado tasmim thāvariyaṃ patto, tadāvikaronto “**anuyutto**”tiādimāha.

Tattha **anuyuttoti** niccapayutto. **Sakammaniratoti** cakkavattino rajjakamme sadā pavatto. **Acalo asampavedhī** pariyāyavacanametam, corānaṃ vā vilopanamattena **acalo**, dāmarikattena **asampavedhī**. Corehi vā **acalo**, paṭirājūhi **asampavedhī**. Anatumudubhāvena vā **acalo**, anaticāṇḍabhāvena **asampavedhī**. Tathā hi aticāṇḍassa rañño balikhaṇḍādīhi lokam piḷayato manussā majjhima janapadam chaḍḍetvā pabbatasamuddatīrādīni nissāya paccante vāsam kappenti, atimudukassa ca rañño corasāhasikajanavilopapīlitā manussā paccantaṃ pahāya janapadamajjhe vāsam kappenti, iti evarūpe rājini janapado thāvarabhāvaṃ na pāpuṇāti. Etasmiṃ pana tadubhayavirahite suvaṇṇatulā viya samabhāvappatte rājini rajjam kārayamāne janapado pāsānapiṭṭhiyaṃ ṭhapetvā ayopaṭṭena parikkhitto viya acalo asampavedhī thāvāriyappattoti.

Seyyathidanti ekova nipāto, “so katamo, taṃ katamaṃ, sā katamā” tiādinā yathārahaṃ līngavibhattivacanavasena payojyamānova hoti, idha tāni katamānīti payuttoti āha “**tassa cetānī**” tiādi. Cacati cakkavattino yathārucci ākāśādigamanāya paribbhamatīti **cakkaṃ**. Cakkaratanañhi antosamuṭṭhitavāyodhātuvāsena rañño cakkavattissa vacanasamanantameva pavattati, na candasūriyavimānādi viya bahisamuṭṭhitavāyodhātuvāsena **vimānaṭṭhakathāyaṃ** (vi. va. aṭṭha. 1. paṭhamapīṭhavimānavāṇṇanā) vuttaṃ. **Ratijananatṭhenāti** pītisomanassuppādanatṭhena. Tañhi passantassa, suṇantassa ca anappakaṃ pītisomanassaṃ uppajjati acchariyadhammattā. Vacanatthato pana rameti ratim karotīti **ratanam**, ramanam vā ratam, taṃ netīti **ratanam**, ratam vā janetīti **ratanam** ja-kāralopavasenaṭīpi neruttikā. **Sabbatthāti** hatthiratanādīsu.

Cittīkatabhāvādināpi cakkassa ratanaṭṭho veditabbo, so pana ratijananatṭheneva ekasaṅgahatāya viṣuṃ na gahito. Kasmā ekasaṅgahoti ce? Cittīkatādibhāvassapi ratinimittattā. Atha vā ganthabyāsaṃ pariharitukāmena cittīkatādibhāvo na gahitoti veditabbaṃ. Aññāsu pana **aṭṭhakathāsu** (dī. ni. aṭṭha. 2.33; sam. ni. aṭṭha. 3.5.223; khu. pā. aṭṭha. 6.3.yānīdhātīgāthāvaṇṇanā; su. ni. aṭṭha. 1.226; mahāni. aṭṭha. 156) evaṃ vuttaṃ –

“Ratijananatṭhena ratanam. Apica –

Cittīkataṃ mahagghaṇca, atulaṃ dullabhadassanaṃ;
Anomasattaparibhogaṃ, ratanam tena vuccati.

“Cakkaratanassa ca nibbattakālato paṭṭhāya aññaṃ devatṭhānaṃ nāma na hoti, sabbepe gandhapupphādīhi tasseva pūjaṇca abhivādanādīni ca karontīti cittīkatatṭhena ratanam. Cakkaratanassa ca ettakaṃ nāma dhanam agghatīti aggho natthi, iti mahagghatṭhenapi ratanam. Cakkaratanañca aññehi loke vijjamaṇaratanehi asadisanti atulatṭhena ratanam. Yasmā pana yasmiṃ kappe buddhā uppajjanti, tasmimyeva cakkavattino uppajjanti, buddhā ca kadāci karahaci uppajjanti, tasmā dullabhadassanatṭhenapi ratanam. Tadetam jātirūpakulaissariyādīhi anomassa ulārasattasseva uppajjati, na aññassāti anomasattaparibhogatṭhenapi ratanam. Yathā ca cakkaratanaṃ, evaṃ sesānipī” ti.

Tatrāyaṃ **tattīkāya**, aññattha ca vuttanayena atthavibhāvanā – idañhi “**cittīkata**” ntiādivacanam nibbacaṇatthavasena vuttaṃ na hoti, atha kinti ce? Loke “ratana” nti sammatassa vatthuno garukātabbabhāvena vuttaṃ. Sarūpato panetaṃ lokiyamahājanena sammatam hiraññasuvaṇṇādikaṃ, cakkavattirañño uppannam cakkaratanaḍīkaṃ, kataññukatavedipuggalādikaṃ, sabbukatṭhāparicchedavasena buddhādisaraṇattayañca daṭṭhabbaṃ. “Aho manohara” nti citte kattabbatāya **cittīkatam**, svāyaṃ cittīkāro tassa pūjanīyatāyāti katvā pūjanīyanti attham vadanti. Keci pana “vicitrakatatṭhena cittīkata” nti bhaṇanti, taṃ na gahetabbaṃ idha cittasaddassa hadayavācakattā “cittīkatvā suṇātha me” ti (bu. vaṃ. 1.80) āhaccabhāsitaṭṭhiyaṃ viya. Tathā cāhu “yathārahamaṇṇāgamo bhūkaresū” ti. “Passa cittīkataṃ rūpaṃ, mañinā kuṇḍalena cā” tiādīsu (ma. ni. 2.302) pana pubbe avicitraṃ idāni vicitraṃ katanti **cittīkatanti** attho gahetabbo tattha cittasaddassa vicitravācakattā. Mahantaṃ vipulaṃ aparimitaṃ agghatīti **mahaggham**. Natthi etassa tulā upamā, tulaṃ

vā sadisanti **atulaṃ**. Kadācideva uppajjanato dukkhena laddhabbadassanattā **dullabhadassanaṃ**. Anomehi uḷāraguṇeheva sattehi paribhuñjitabbato **anomasattaparibhogaṃ**.

Idāni nesamaṃ cittikatādiatthānaṃ savisesamaṃ cakkaratane labbhamānataṃ dassetvā itaresupi te atidisitumaṃ **“yathā ca cakkaratana”**ntiādi āradhamaṃ. Tattha **aññaṃ devaṭṭhānaṃ nāma na hoti** rañña anaññasādhāraṇissariyādisampattiapaṭilābhahetuto, aññesaṃ sattānaṃ yathicchitatthapaṭilābhahetuto ca. **Aggho natthi** ativiya uḷārasamujjalaratanattā, acchariyabbhutadhammatāya ca. Yadaggena ca mahagghamaṃ, tadaggena atulaṃ. Sattānaṃ pāpajigucchanaena vigatakāḷako puññapasutatāya maṇḍabhūto yādiso kālo buddhuppādāraho, tādise eva cakkavattīnampi sambhavoti āha **“yasmā panā”**tiādi. **Kadāci karahacīti** pariyāyavacanaṃ, **“kadāci”**ti vā yathāvuttakālaṃ sandhāya vuttaṃ, **“karahacī”**ti **jambusiridīpasankhātamaṃ** desaṃ. Tenāha –

“Kālaṃ dīpañca desañca, kulaṃ mātarameva ca;
Ime pañca viloketvā, uppajjati mahāyaso”ti. (dha. pa. aṭṭha. 1.1.10);

Upamāvasena cetamaṃ vuttaṃ. Upamopameyyānañca na accantameva sadisatā, tasmā yathā buddhā kadāci karahaci uppajjanti, na tathā cakkavattino, cakkavattino pana anekadāpi buddhuppādakappe uppajjanti attho gahetabbo. Evaṃ santepi cakkavattivattapūraṇassa dukkarabhāvato dullabhuppādoyevāti iminā dullabhuppādātāsāmaññaena tesamaṃ dullabhadassanattā vuttāti veditabbaṃ. Kāmaṃ cakkaratanañubhāvena samijjhamāno guṇo cakkavattiparivārajanasādhāraṇo, tathāpi cakkavattī eva namaṃ sāmibhāvena visavitāya paribhuñjatīti vattabbaṃ arahati tadatthameva uppajjanatoti dassento **“tadeta”**ntiādimāha. Yathāvuttānaṃ pañcamaṃ, channampi vā atthānaṃ sesaratanesupi labbhanato **“evaṃ sesānipī”**ti vuttaṃ.

Imehi pana ratanehi rājā cakkavattī kimatthamaṃ paccanubhoti, nanu vināpi tesu kenaci rañña cakkavattinā bhavitabbanti codanāya tassa tehi hathārahamatthapaccanubhavanadassanena kenacipi avinābhāvitamaṃ vibhāvetumaṃ **“imesu panā”**tiādi āradhamaṃ. **Ajitaṃ** puratthimādidisāya khattiyamaṇḍalaṃ **jināti** mahesakkhātāsamaṃvattaniyakammaṇissandabhāvato. **Yathāsukhamaṃ anuvarati** hatthiratanamaṃ, assaratanañca abhiruhitvā tesamaṃ ānubhāvena antopātārasamaṃyeva samuddapariyantaṃ pathaviṃ anupariyāyitvā rājadhāniyā eva paccāgamanato. **Pariñāyakaratanena vijitamanurakkhati** tattha tattha kattabbakiccaṃ vidahanato. **Avasesehi** maṇiratanaitthiratanagahapatiratanehi upabhuñjanaena pavattaṃ **upabhogasukhamaṃ anubhavati** yathārahamaṃ tehi tathānubhavanasiddhito. So hi maṇiratanena yojanappamaṇe padese andhakāraṃ vidhametvā ālokadassanādinā sukhamanubhavati, itthiratanena atikkantamānusakarūpadassanādivasena, gahapatiratanena icchiticchitamaṇikanakarajatādidhanapaṭilābhavasena sukhamanubhavati.

Idāni sattiyaṃ, sattiphaleṇa ca yathāvuttamatthamaṃ vibhāvetumaṃ **“paṭhamenā”**tiādi vuttaṃ. Tividhā hi **sattiyo** “sakkonti samatthenti rājāno etāya”ti katvā. Yathāhu –

“Pabhāvussāhamantānaṃ, vasā tisso hi sattiyo;
Pabhāvo daṇḍajo tejo, patāpo tu ca kosajo.

Manto ca mantanaṃ so tu, catukkaṇṇo dvigocaro;
Tigocaro tu chakkaṇṇo, rahassaṃ guyhamuccate”ti.

Tattha vīriyabalaṃ **ussāhasatti**. Paṭhamena cassa cakkaratanaena tadanuyogo paripuṇṇo hoti. Kasmāti ce? Tena ussāhasattiyā pavattetabbassa appaṭihatāñcakkabhāvassa siddhito. Paññābalaṃ **mantasatti**. **Pacchimena** cassa pariñāyakaratanena tadanuyogo. Kasmāti ce? Tassa sabbarājakiccesu kusalahāvena mantasattiyā viya avirajjanapayogattā. Damanena, dhanena ca pabhuttaṃ **pabhūsatti**. **Hatthiassagahapatiratanehi** cassa tadanuyogo paripuṇṇo hoti. Kasmāti ce? Hatthiassaratanānaṃ mahānubhāvātāya, gahapatiratanato paṭiladdhakosasaṃpattiyā ca pabhāvasattiyā viya

pabhāvasamiddhisiddhito. Itthimaṇiratanehi tividhasattiyogaphalaṃ paripuṇṇaṃ hotīti sambandho, yathāvuttāhi tividhāhi sattīhi payujjanato yaṃ phalaṃ laddhabbaṃ. Taṃ sabbamaṃ tehi paripuṇṇaṃ hotīti attho. Kasmāti ce? Teheva upabhogasukhassa sijjhanato.

Duvidhasukhavasena yathāvuttamatthaṃ vibhāvetuṃ “**so itthimaṇiratanehī**”tiādi kathitaṃ. **Bhogasukhanti** samīpe katvā paribhogavasena pavattasukhaṃ. **Sesehīti** tadavasesehi cakkādipaṅcaratanehi. Apaccatthikatāvasena pavattasukhaṃ **issariyasukhaṃ**. Idāni tesamaṃ sampannahetuvasena kenaci avinābhāvitameva vibhāvetuṃ “**visesato**”tiādimāha. **Adosakusalamūlajanitakammānubhāvenāti** adosasaṅkhātena kusalamūlena sahaajātādipaccayavasena uppāditakammassa ānubhāvena **sampajjanti** sommataratanajātikattā. Kammaphalañhi yebhuyyena kammasarikkhakaṃ. **Majjhimāni** maṇiitthigahapatiratanāni **alobhakusalamūlajanitakammānubhāvena sampajjanti** uḷāradhanassa, uḷāradhanapaṭilābhakāraṇassa ca pariccāgasampadāhetukattā. **Pacchimaṃ** pariṇāyakaratanamaṃ **amohakusalamūlajanitakammānubhāvena sampajjati** mahāpaññeneva cakkavattirājakicassa parinetabbatā, mahāpaññabhāvassa ca amohakusalamūlajanitakammanissandabhāvato. **Bojjhaṅgasamaṃyutteti** mahāvagge dutiye bojjhaṅgasamaṃyutte (saṃ. ni. 5.223). **Ratanasuttassāti** tattha paṅcamavagge saṅgītassa dutiyassa ratanasuttassa (saṃ. ni. 5.223). **Upadeso** nāma savisesamaṃ sattannaṃ ratanānaṃ vicāraṇavasena pavatto nayo.

Saraṇato paṭipakkhavidhamaṇato **sūrā** sattivanto, nibbhayāvahāti attho. Tenāha “**abhīrukajātikā**”ti. Asure vijjintvā ṭhitattā sakko devānamindo dhīro nāma, tassa senaṅgabhāvato devaputto “aṅga”nti vuccati, dhīrassa aṅgaṃ, tassa rūpamīva rūpaṃ yesamaṃ te **dhīraṅgarūpā**, tena vuttaṃ “**devaputtasadisakāyā**”ti. **Eketi sārasmāsanāmakā** ācariyā, tadakkhamanto āha “**ayama panetthā**”tiādi. **Sabhāvoti** sabhāvabhūto attho. **Uttamasūrāti** uttamayodhā. Sūrasaddo hi idha yodhattho. Evañhi purimanayato imassa visesatā hoti, “uttamattho sūrasaddo”tipi vadanti, “**uttamā sūrā vuccanti**”tipi hi pāṭho dissati. **Vīrānanti** vīriyavantānaṃ. **Aṅganti** kāraṇaṃ “aṅgīyati ñāyati phalametenā”ti katvā. Yena vīriyena “dhīrā”ti vuccanti, tadeva dhīraṅgaṃ nāmāti āha “**vīriyanti vuttaṃ hoti**”ti. **Rūpanti** sarīraṃ. Tena vuttaṃ “**vīriyamayasarīrā viyā**”ti. Vīriyameva **vīriyamayaṃ** yathā “dānamaya”nti, (dī. ni. 3.305; itivu. 60; netti. 34) tasmā vīriyasāṅkhātasarīrā viyāti attho. Vīriyaṃ pana na ekantarūpanti viya-saddaggaṇaṃ kataṃ. Apica dhīraṅgena nibbattaṃ dhīraṅganti atthaṃ dassetuṃ “**vīriyamayasarīrā viyā**”ti vuttaṃ, evampi vīriyato rūpaṃ na ekantaṃ nibbattanti viya-saddena dasseti. Atha vā rūpaṃ sarīrabhūtaṃ dhīraṅgaṃ vīriyametesanti yojetabbamaṃ, tathāpi vīriyaṃ nāma kiñci saviggahaṃ na hotīti dīpeti “**vīriyamayasarīrā viyā**”ti iminā, idhāpi mayasaddo sakattheyeva daṭṭhabbo, tasmā saviggahavīriyasadisāti attho. Idamaṃ vuttaṃ hoti – saviggahaṃ ce vīriyaṃ nāma siyā, te cassa puttā taṃsadisāyeva bhaveyyunti ayameva cattho ācariyena (dī. ni. ṭi. 1.258) anumato. **Mahāpadānaṭṭhakathāyaṃ** pana evamaṃ vuttaṃ “dhīraṅgaṃ rūpametesanti **dhīraṅgarūpā**, vīriyajātikā vīriyasabhāvā vīriyamayā akilāsuno ahesuṃ, divasampi yujjhantā na kilamantīti vuttaṃ hoti”ti, (dī. ni. aṭṭha. 2.34) tadetaṃ rūpasaddassa sabhāvattathaṃ sandhāya vuttanti daṭṭhabbaṃ. Idha ceva aññattha katthaci “**dhīraṅgarūpā**”ti pāṭho dissati. Vīriyatthopi hi dhitisaddo hoti “saccaṃ dhammo dhiti cāgo, diṭṭhaṃ so ativattati”tiādisu (jā. 1.1.57) dhitisaddo viya. Katthaci pana “**vīraṅga**”nti pāṭhova diṭṭho. Yathā rucati, tathā gahetabbamaṃ.

Nanu ca rañño cakkavattissa paṭisenā nāma natthi, ya’massa puttā pamaddeyyuṃ, atha kasmā “parasenappamaddanā”ti vuttanti codanaṃ sodhento “**sace**”tiādimāha, parasenā hotu vā, mā vā, “sace pana bhaveyyā”ti parikkappanāmattena tesamaṃ evamānubhāvataṃ dassetuṃ tathā vuttanti adhippāyo, “parasenappamaddanā”ti vuttepi paraseṇaṃ pamaddituṃ samatthāti attho gahetabbo pakaraṇatopi atthantarassa viññāyamānattā, yathā “sikkhamānena bhikkhave bhikkhunā aññātabbaṃ paripucchitabbamaṃ paripaṇhitabba”nti (pāci. 434) etassa padabhājanīye (pāci. 436) “sikkhitukāmenā”ti atthaggahaṇanti imamatthaṃ dassetuṃ “**taṃ parimaddituṃ samatthā**”ti vuttaṃ. Na hi te paraseṇaṃ pamaddantā tiṭṭhanti, atha kho pamaddanasamatthā eva honti. Evamaññatrapī yathārahaṃ. Paraseṇaṃ pamaddanāya samatthentīti **parasenappamaddanāti** atthaṃ dassetiṭipi vadanti.

Pubbe katūpacitassa etarahi vipaccamānakassa puññadhammassa cirataraṃ vipaccitaṃ paccayabhūtaṃ cakkavattivattasamudāgataṃ payogasampattisankhātaṃ dhammaṃ dassetaṃ “dhammenā”ti padassa “**pāṇo na hantabbotiādīnā pañcasīladhammenā**”ti atthamāha. Ayañhi attho “ye kho panānanda puratthimāya disāya paṭirājāno, te rājānaṃ mahāsudassanaṃ upasaṅkamitvā evamāhaṃsu ‘ehi kho mahārāja, svāgataṃ te mahārāja, sakaṃ te mahārāja, anusāsa mahārājā’ti. Rājā mahāsudassano evamāha ‘pāṇo na hantabbo, adinnaṃ na ādāttabbaṃ, kāmesu micchā na caritabbā, musā na bhaṇitabbā, majjamaṃ na pātābbaṃ, yathābhuttañca bhūñjathā’ti. Ye kho panānanda puratthimāya disāya paṭirājāno, te rañño mahāsudassanassa anuyantā ahesu’ntiādīnā (dī. ni. 2.244) āgataṃ rañño ovādadhammaṃ sandhāya vutto. Evañhi “**adaṇḍena asatthenā**”ti idampi visesanavacanaṃ susamatthitaṃ hoti. Aññāsupi **suttanipātaṭṭhakathādīsu** (su. ni. aṭṭha. 226; khu. pā. aṭṭha. 6.3; dī. ni. aṭṭha. 2.33; sam. ni. aṭṭha. 3.223) ayamevattho vutto.

Mahāpadānaṭṭhakathāyaṃ pana “**adaṇḍenā**ti ye katāparādhe satte satampi sahasampi gaṇhanti, te dhanadaṇḍena rajjaṃ kārenti nāma, ye chejjabhejjaṃ anusāsanti, te satthadaṇḍena. Ayaṃ pana duvidhampi daṇḍaṃ pahāya adaṇḍena ajjhāvasati. **Asatthenā**ti ye ekatodhārādīnā satthena paraṃ vihesanti, te satthena rajjaṃ kārenti nāma. Ayaṃ pana satthena khuddakamakakkhikāyapi pivanamattaṃ lohitaṃ kassaci anuppādetvā dhammeneva, ‘ehi kho mahārājā’ti evaṃ paṭirājūhi sampaṭicchitāgamano vuttapakāraṃ pathaviṃ abhivijjintvā ajjhāvasati abhibhavitvā sāmī hutvā vasatīti attho”ti (dī. ni. aṭṭha. 2.34) vuttaṃ, tadevaṃ “dhammenā”ti padassa “pubbe katūpacitena etarahi vipaccamānakena yena kenaci puññadhammenā”ti atthaṃ sandhāya vuttaṃ. Teneva hi “dhammena paṭirājūhi sampaṭicchitāgamano vuttapakāraṃ pathaviṃ abhivijjintvā ajjhāvasatī”ti. Ācariyenapi (dī. ni. 1.258) vuttaṃ **dhammenā**ti katūpacitena attano puññadhammena. Tena hi sañcoditā pathaviyaṃ sabbarājāno paccuggantvā “svāgataṃ te mahārājā”tiādīni vatvā attano rajjaṃ rañño cakkavattissa niyyātentī. Tena vuttaṃ “so imaṃ pathaviṃ sāgarapariyantaṃ adaṇḍena asatthena dhammena abhivijjīya ajjhāvasatī”ti, tenapi yathāvuttamevatthaṃ dasseti, tasmā ubhayathāpi ettha attho yutto evāti daṭṭhabbaṃ. Cakkavattivattapūraṇādīpayogasampattimantarena hi pubbe katūpacitakammeneva evamajjhāvasanaṃ na sambhavati, tathā pubbe katūpacitakammamantarena cakkavattivattapūraṇādīpayogasampattiyā evāti.

Evaṃ ekaṃ nipphattiṃ kathetvā dutiyaṃ nipphattiṃ kathetvaṃ yadetvaṃ “sace kho panā”tiādīvacanaṃ vuttaṃ, tatha anuttānamatthaṃ dassento “**arahaṃ...pe... vivaṭṭacchadoti etthā**”tiādīmāha. Yasmā rāgādayo satta pāpadhammā loke uppajjanti, uppajjamānā ca te sattasantānaṃ chādetvā pariyanandhitvā kusalappavattiṃ nivārenti, tasmā te idha chadasaddena vuttāti dasseti “**rāgadosā**”tiādīnā. **Duccaritanti** micchādīṭṭhito aññena manoduccaritena saha tīṇi duccaritāni, micchādīṭṭhi pana visesena sattānaṃ chadanato, paramasāvajjattā ca viṣuṃ gahitā. Vuttañca “sabbe te imeheva dvāsaṭṭhiyā vatthūhi antojālīkatā, ettha sitāva ummujjamānā ummujjantī”tiādi (dī. ni. 1.146). Tathā muyhanaṭṭhena **moho**, aviditakaraṇaṭṭhena **avijjā**ti pavattiākārabhedena aññānameva dvidhā vuttaṃ. Tathā hissa dvidhāpi chadanattho kathito “andhatamaṃ tadā hoti, yaṃ moho sahate nara”nti, (mahāni. 5, 156, 195) “avijjāya nivuto loko, vevicchā pamādā nappakāsati”ti (su. ni. 1039; cūḷani. pārāyanavagga.2) ca. Evaṃ rāgadosādīnampi chadanattho vattabbo. **Mahāpadānaṭṭhakathāyaṃ** (dī. ni. aṭṭha. 2.33) pana rāgadosamohamānādīṭṭhikilesatanhāvasena satta pāpadhammā gahitā. Tatra rañjanaṭṭhena **rāgo**, taṇhāyanaṭṭhena **taṇhā**ti pavattiākārabhedena lobho eva dvidhā vutto. Tathā hissa dvidhāpi chadanattho ekantikova. Yathāha “andhatamaṃ tadā hoti, yaṃ rāgo sahate nara”nti, “kāmandhā jālasañchannā, taṇhāchadanachādītā”ti (udā. 94) ca, kilesaggahaṇena ca vuttāvasiṭṭhā vicikicchādayo vuttā.

Sattahi paṭicchanneti hetugabbhavanaṃ, sattahi pāpadhammehi paṭicchannattā kilesavasena andhakāre loketi attho. **Taṃ chadananti** sattapāpadhammasankhātaṃ chadanam. **Vivaṭṭetvā**ti vivaṭṭaṃ katvā vigametvā. Tadeva pariyaṃyantarena vuttaṃ “**samantato sañjātāloko hutvā**”ti. Kilesachadanavigamo eva hi āloko, etena vivaṭṭayitabbo vigametabboti **vivaṭṭo**, chādeti paṭicchādetīti **chado**, vivaṭṭo chado anenāti **vivaṭṭacchadā**, **vivaṭṭacchado** vāti atthaṃ dasseti. Ayañhi

vivaṭṭacchadasaddo daḷhadhammapaccakkhadhammasaddādayo viya pulliṅgavasena ākāranto, okāranto ca hoti. Tathā hi **mahāpadānaṭṭhakathāyaṃ** vuttam “rāgadosamohamānadiṭṭhikilesatanḥāsāṅkhātāṃ chadanāṃ āvaraṇāṃ vivaṭṭaṃ viddhamsitaṃ vivaṭṭakaṃ etenāti vivaṭṭacchado, ‘vivaṭṭacchadā’tipi pāṭho, ayamevattho”ti, (dī. ni. aṭṭha. 2.33) tassā līnatthappakāsaniyampi vuttam “vivaṭṭacchadāti okārassa ākāraṃ katvā niddeso”ti. Saddavidū pana “ādhanvāditoti lakkhaṇena samāsantagatehi dhanusaddādāhi kvaci āpaccayo”ti vatvā “kaṇḍivadhanvā, paccakkhadhammā, vivaṭṭacchadā”ti payogamudāharanti.

Kasmā padattayametam vuttanti anuyogaṃ hetālankāranayena pariharanto “**tatthā**”tiādimāha, **tatthā**ti ca tīsu padesūti attho. Pūjāvisesaṃ paṭiggaṇhituṃ arahatīti **arahanti** atthena **pūjārahatā** vuttā. **Yasmā sammāsambuddho**, tasmā pūjārahatāti **tassā** pūjārahatāya **hetu** vutto. Savāsanasabbakilesappahānapubbakattā buddhabhāvassa **buddhattahetubhūtā vivaṭṭacchadatā vuttā**. Kammādivasena tividham vaṭṭaṇca rāgādivasena sattavidho chado ca **vaṭṭacchadā**, vaṭṭacchadehi vigato, vigatā vā vaṭṭacchadā yassāti **vivaṭṭacchado, vivaṭṭacchadā** vā, dvandapubbago pana vi-saddo ubhayattha yojetabboti imamatham dassetuṃ “**vivaṭṭo ca vicchado cā**”ti vuttam. Evampi vadanti “vivaṭṭo ca so vicchado cāti **vivaṭṭacchado**, uttarapade pubbapadalopoti attham dasseti”ti. “**Araham vaṭṭābhāvenā**”ti idaṃ kilesehi ārakattā, kilesārīnaṃ samsāracakkassārānaṃ hatattā, pāpakaraṇe ca rahābhāvāti attham sandhāya vuttam. Idañhi phalena hetānumānadassanaṃ – yathā tam dhūmena aggissa, udakoghena upari vuṭṭhiyā, etena ca atthena arahabhāvo hetu, vaṭṭābhāvo phalanti ayaṃ ācariyamati. “Paccayādīnaṃ, pūjāvisesassa ca arahattā”ti pana hetunā phalānumānadassanampi siyā yathā tam agginā dhūmassa, upari vuṭṭhiyā udakoghassa. “**Sammāsambuddho chadanābhāvenā**”ti idaṃ pana hetunā phalānumānadassanaṃ savāsanasabbakilesacchadanābhāvapubbakattā sammāsambuddhabhāvassa. Arahattamaggena hi vicchadatā, sabbaññutaññāṇena sammāsambuddhabhāvo. “**Vivaṭṭo ca vicchado cā**”ti idaṃ hetudvayaṃ. Kāmaṇca ācariyamatiyā phalena hetūnumānadassane vivaṭṭatā phalameva hoti, hetūnumānadassanassa, pana tathāññāṇassa ca hetubhāvato hetuyeva nāmāti veditabbaṃ.

Evam padattayavacane hetālankāranayena payojanaṃ dassetvā idāni catuvesārajjasenapi dassento “**dutiyenā**”tiādimāha. Tatha **dutiyena vesārajjenāti** “cattārimāni bhikkhave tathāgatassa vesārajjāni, yehi vesārajjehi samannāgato tathāgato āsabham ṭhānaṃ paṭijānāti, parisāsu sīhanādaṃ nadati, brahmacakkaṃ pavatteti”tiādinā (a. ni. 4.8; ma. ni. 1.150) bhagavatā vuttakkamena dutiyabhūtena “khīṇāsavassa te paṭijānato ‘ime āsavā aparikkhīṇā’ti, tatra vata maṃ samaṇo vā brāhmaṇo vā devo vā māro vā brahmā vā koci vā lokasmiṃ saha dhammena paṭicodessatīti nimittametam bhikkhave na samanupassāmi, etamahaṃ bhikkhave nimittam asamanupassanto khemappatto abhayappatto vesārajjappatto viharāmi”ti paridīpitena vesārajjena. **Purimasiddhī** purimassa “araha”nti padassa atthasiddhi arahattasiddhi, dutiyavesārajjassa tadatthabhāvato tena vesārajjena tadatthasiddhīti vuttam hoti. “Khīṇāsavassa te paṭijānato ‘ime āsavā aparikkhīṇā’ti”ādinā vuttameva hi dutiyavesārajjam “kilesehi ārakattā”tiādinā vutto “araha”nti padassa atthoti. Tato ca viññāyati “yathā dutiyena vesārajjena purimasiddhi, evam purimenapi atthena dutiyavesārajjasiddhi”ti. Evaṇca katvā iminā nayena catuvesārajjasena padattayavacane payojanadassanaṃ upapannaṃ hoti. Itarathā hi kiñcipayojanābhāvato idaṃyeva vacanaṃ idha avattabbaṃ siyāti. Esa nayo sesesupi.

Paṭhamenāti vuttanayena paṭhamabhūtena “sammāsambuddhassa te paṭijānato ‘ime dhammā anabhisambuddhā’ti, tatra...pe... viharāmi”ti paridīpitena vesārajjena. **Dutiyasiddhī** dutiyassa “sammāsambuddho”ti padassa atthasiddhi buddhattasiddhi tassa tadatthabhāvato. **Tatīyacatutthehī** vuttanayeneva tatīyacatutthabhūtehi “ye kho pana te antarāyikā dhammā vuttā, te paṭisevato nālam antarāyāyāti, tatra...pe... viharāmi”ti ca “yassa kho pana te atthāya dhammo desito, so na niyyāti takkarassa sammā dukkhakkhayāyāti, tatra...pe... viharāmi”ti (a. ni. 4.8; ma. ni. 1.150) ca paridīpītehi vesārajjehi. **Tatīyasiddhī** tatīyassa “vivaṭṭacchadā”ti padassa atthasiddhi vivaṭṭacchadatthasiddhi tehi tassa pākaṭabhāvato attho. “Yāthāvato antarāyikanīyānikadhammāpadesena hi satthu vivaṭṭacchadabhāvo loke pākaṭo aho”ti (dī. ni. ṭi. 1.258) ācariyena vuttam, vivaṭṭacchadabhāveneva

antarāyikaniyyānikadhammadesanāsiddhito “tatiyena tatiyacatutthasiddhī”tipi vuttuṃ yujjati.

Evam padattayavacane catuvesārajjavasena payojanaṃ dassetvā idāni cakkhuttayavasena pi dassento “**purimañcā**”tiādīmāha. Tattha **ca**-saddo upanyāsatto. **Purimaṃ** “araha”nti padaṃ bhagavato heṭṭhimamaggaphalattayañāṇasañkhātāṃ **dhammacakkhuṃ sādheti** kilesārīnaṃ, saṃsāracakkassa arānañca hatabhāvadīpanato. **Dutiyaṃ** “sammāsambuddho”ti padaṃ āsayānusayaindriyaparopariyattañāṇasañkhātāṃ **buddhacakkhuṃ sādheti** sammāsambuddhasseva taṃsambhavato. Tadatañhi ñāṇadvayaṃ sāvaka paccekabuddhānaṃ na sambhavati. **Tatiyaṃ** “vivaṭṭacchadā”ti padaṃ sabbaññutaññāṇasañkhātāṃ **samantacakkhuṃ sādheti** savāsanasabbakilesappahānadīpanato. “Sammāsambuddho”ti hi vatvā “vivaṭṭacchadā”ti vacanaṃ sammāsambuddhabhāvāya savāsanasabbakilesappahānaṃ vibhāvetīti. “Ahaṃ kho pana tāta ambaṭṭha mantānaṃ dātā”ti idaṃ appadhānaṃ, “tvam mantānaṃ paṭiggahetā”ti idameva padhānaṃ samuttejanāvacaṇanti sandhāya “**tvam mantānaṃ paṭiggahetāti iminā’ssa mantesu sūrabhāvaṃ janetī**”ti vuttaṃ, lakkhaṇavibhāvane visadaññatāsañkhātāṃ sūrabhāvaṃ janetīti attho.

259. Evaṃ bhoti ettha evaṃ-saddo vacanasampañcchane nipāto, vacanasampañcchanañcetta tathā mayaṃ taṃ bhavantaṃ gotamaṃ vedissāma, tvam mantānaṃ paṭiggahetāti ca evaṃ pavattassa pokkharasātino vacanassa sampañciggaho. “**Tassatto**”tiādīnāpi hi tadevatthaṃ dasseti. Tathā ca vuttaṃ “brāhmaṇassa pokkharasātissa paṭissutvā”ti, taṃ pana ācariyassa samuttejanāya lakkhaṇesu vigatasammohabhāvena buddhamante sampassamānattā vadatīti dassento “**sopi**”tiādīmāha. Tattha “**tāyāti** tāya yathāvuttāya samuttejanāya”ti (dī. ni. ṭi. 1.259) ācariyena vuttaṃ, adhunā pana potthakesu “**tāya ācariyakathāyā**”ti pāṭho dissati. Atthato cesa aviruddhoyeva. Mantesu satisamuppādikā hi kathā samuttejanāti.

Ayānabhūminti yānassa abhūmiṃ, yānena yātumasakkuṇeyyaṭṭhānabhūtaṃ, dvārakoṭṭhakasamīpaṃ gantvāti attho.

Avisesena vuttassapi vacanassa attho aṭṭhakathāpamāṇato visesena gahetabboti āha “**ṭhitamajjhānikasamaye**”ti. Sabbesamāciṇṇavasena paṭhamanayaṃ vatvā padhānikānameva āveṇikāciṇṇavasena dutiyanayo vutto. **Divāpadhānikāti** divāpadhānānuyūñjanakā, divasabhāge samaṇadhammakaraṇatthaṃ te evaṃ caṅkamantīti vuttaṃ hoti. Tenāha “**tādisānañhī**”tiādi. “Pariveṇato pariveṇamāgacchanto papañco hoti, pucchitvāva pavisissāmī”ti ambaṭṭhassa tadupasaṅkamanādhīppāyaṃ vibhāvento “**so kirā**”tiādīmāha.

260. Abhiññātakule jāto **abhiññātakolañño**. Kāmañca vakkhamānanayena pubbe ambaṭṭhakulamapaññātaṃ, tadā pana paññātanti āha “**tadā kirā**”tiādi. **Rūpajātimitakulāpadesehīti** “ayamīdiso”ti apadisana hetubhūtehi catūhi rūpajātimitakulehi. Yena te bhikkhū cintayimāsu, tadadhīppāyaṃ āvi kātuṃ “**yo hī**”tiādi vuttaṃ. Avisesato vuttampi visesato viññāyamānatthaṃ sandhāya bhāsitavacaṇanti dasseti “**gandhakuṭiṃ sandhāyā**”ti iminā. Evamīdisesu.

Aturitoti avegāyanto, “**aturanto**”tipi pāṭho, soyevattho. Kathaṃ pavisanto ataramāno pavisati nāmāti āha “**saṅhika**”ntiādi. Tattha **padappamāṇaṭṭhāneti** dvinnāṃ padānaṃ antare muṭṭhiratanapamāṇaṭṭhāne. **Sinduvāro** nāma eko pupphūpagarukkho, yassa setaṃ pupphaṃ hoti, yo “nigguṇḍī”tipi vuccati. **Pamukhanti** gandhakuṭigabbhapamukhaṃ. “Kuñcikasiddhasamīpe”ti vuttavacaṇaṃ samatthetuṃ “**dvāraṃ kirā**”tiādi vuttaṃ.

261. “**Dānaṃ dadamānehī**”ti iminā pāramitānubhāvena sayameva dvāravivaraṇaṃ dasseti.

Bhagavatā saddhiṃ sammodimsūti ettha samatthena **sam**-saddena viññāyamānaṃ bhagavato tehi saddhiṃ paṭhamāṃ pavattamodatāsañkhātāṃ neyyatthaṃ dassento “**yathā**”tiādīmāha. Bhagavāpi hi “kacci bho māṇavā khamāniyaṃ, kacci yāpanīya”ntiādīni pucchanto tehi māṇavehi saddhiṃ

pubbabhāsītāya paṭhamaññeva pavattamodo ahosi. **Samappavattamodāti** bhagavato tadanukaraṇena samaṃ pavattasaṃsandana. Tadatthaṃ saha upamāya dassetuṃ “**sītodakaṃ viyā**”tiādi vuttaṃ. Tatha paramanibbutakilesadarathatāya bhagavato sītodakasadisatā, anibbutakilesadarathatāya ca māṇavaṇaṃ uṇhodakasadisatā daṭṭhabbā. **Sammoditanti** saṃsanditaṃ. **Mudasaddo** hettha saṃsandaneyeva, na pāmojje, evañhi yathāvuttaupamāvacaṇaṃ samatthitaṃ hoti. Tathā hi vuttaṃ “**ekībhāva**”nti, sammodanakiriyāya samānataṃ ekarūpatanti attho.

Khamanīyanti “catucakkaṃ navadvāraṃ sarīrayantaṃ dukkhabahulatāya sabhāvato dussahaṃ kacci khamitaṃ sakkuṇeyya”nti pucchanti, **yāpanīyanti** āhārādipaccayapaṭibaddhavuttikaṃ cirappabandhasaṅkhātāya yāpanāya kacci yāpetuṃ sakkuṇeyyaṃ, sīsarogādiābādhābhāvena **kacci appābādhaṃ**, dukkhajīvikābhāvena **kacci appātāṅkaṃ**, taṃtaṃkiccakaraṇe uṭṭhānasukhatāya **kacci lahuṭṭhānaṃ**, tadanurūpabalayogato **kacci balaṃ**, sukhavihāraphalasabbhāvena **kacciphāsuvihāro** atthīti sabbattha kacci-saddaṃ yojetvā attho veditabbo. Balappattā pīti **pītiyeva**. Taruṇā pīti **pāmojjaṃ**. Sammodanaṃ janeti karotīti sammodanikaṃ, tadeva **sammodaniyaṃ** ka-kārassa ya-kāraṃ katvā. Sammodetabbato sammodanīyanti imamattaṃ dasseti “**sammodituṃ yutta bhāvato**”ti iminā. Evaṃ ācariyehi vuttaṃ. Sammodituṃ arahaṭīti sammodanikaṃ, tadeva **sammodaniyaṃ** yathāvuttanayenāti imamattampi dassetīti daṭṭhabbaṃ. “**Sāretu**”nti etassa “**nirantaraṃ pavattetu**”nti atthavacaṇaṃ. **Saritabbabhāvato**ti anussaritabbabhāvato. “Sāretuṃ arahaṭī”ti atthe yathāpadaṃ dīghena “sāraṇīya”nti vuttaṃ. “Saritabba”nti atthe pana “saraṇīya”nti vattabbe dīghaṃ katvā “**sāraṇīya**”nti vuttanti veditabbaṃ. Evaṃ saddato atthaṃ dassetvā idāni atthamattato dassetuṃ “**suyyamānasukhato**”tiādi vuttaṃ. Tatha **suyyamānasukhatoti** āpāthamadhurattamāha, **anussariyamānasukhatoti** vimaddaramaṇīyattaṃ. **Byañjanaparisuddhatāyāti** sabhāvaniruttibhāvena tassā kathāya vacanaçāturiyaṃ, **atthaparisuddhatāyāti** atthassa nirupakkilesattaṃ. **Anekehi pariyāyehīti** anekehi kāraṇehi.

Apasādessāmīti maṅkuṃ karissāmi. Ubhosu khandhesu sāṭakaṃ āsajjetvā kaṅṭhe olambanaṃ sandhāya “**kaṅṭhe olambitvā**”ti vuttaṃ. **Dussakaṅṇaṃ gahetvāti** nivatthasāṭakassa koṭiṃ ekena hatthena gahetvā. Caṅkamitaṃmāruhanaṃ sandhāya “**caṅkamaṃ abhiruhitvā**”ti āha. **Dhātusamatāti** rasādīdhātūnaṃ samāvattatā, arogatāti attho. **Pāsādikathanti** pasādajananatthaṃ “gatagataṭṭhāne”ti iminā sambandho. “**Pāsādikattā**”tipi pāṭho, tassattho – aṅgapaccaṅgānaṃ pasādāvahattāti, “uppanabahumānā”ti iminā sambandho. **Uppaṇḍanakathanti** avahasitabbatāyuttakathaṃ. “**Anācārabbhāvasāraṇīya**”nti tassa visesaṇaṃ, anācārabbhāvena sāraṇīyaṃ “anācāro vatāya”nti saritabbakanti attho.

262. Kātuṃ dukkaramasakkuṇeyyaṃ kiccamaṃ ārabhīti dassetuṃ “**bhavaggaṃ gahetukāmo viyā**”tiādi vuttaṃ. Asakkuṇeyyañhetuṃ sadevakenapi lokena, yadidaṃ bhagavato apasādanaṃ. Tenāha “**aṭṭhāne vāyamaṭī**”ti. **Handa tena saddhiṃ mantemīti** evaṃ aṭṭhāne vāyamantopi ayaṃ bālo “mayi kiñci akathente mayā saddhiṃ uttari kathetumpi na visahati”ti mānameva paggaṇhissati, kathente pana kathāpasanṅgenassa jātigotte vibhāvite mānaniggaho bhavissati, “handa tena saddhiṃ mantemī”ti bhagavā ambaṭṭhaṃ māṇavaṇaṃ etadavocāti attho. Ācārasamācārasikkhāpanena **ācariyā**, tesam pana ācariyānaṃ pakaṭṭhā ācariyāti **pācariyā** yathā “papitāmaho”ti imamattaṃ dassetuṃ “**ācariyehi ca tesam ācariyehi cā**”ti vuttaṃ.

Paṭhamaibbhavādavaṇṇanā

263. Kiñcāpi “sayāno vā”tiādivacaṇaṃ na vattabbaṃ, mānavasena pana yugaggāhaṃ karonto vadatīti dassento “**kāmaṃ tīsū**”tiādimāha. Tatha **tīsū iriyāpathesūti** ṭhānagamananisajjāsu. Tesveva hi ācariyena saddhiṃ sallapitumarahati, na tu sayane garukaraṇīyānaṃ sayānānampi sammukhā garukārehi sayanassa akattabbabhāvato. **Kathāsallāpanti** kathāvasena yugaggāhakarāṇatthaṃ sallapaṇaṃ. Sayānena hi ācariyena saddhiṃ sayānassa kathā nāma ācāro na hoti, tathāpetam itarehi sadisaṃ katvā kathanam idha kathāsallāpo.

Yaṃ panetaṃ “sayāno vā hi bho gotama brāhmaṇo sayānena brāhmaṇena saddhiṃ sallapitumarahatī”ti vuttassa sallāpassa anācārabhāvavibhāvanam sathhārā ambaṭṭhena saddhiṃ kathentena kataṃ, taṃ pālivasena saṅgītimanāruḥampi agarahitāya ācariyaparamparāya yāvajjatanā samābhatanti “ye ca kho te bho gotamā”tiādikāya uparipāḷiyā sambandhabhāvena dassento “**tato kirā**”tiādimāha. **Gorūpanti** go nūna rūpakavasena vuttatā, rūpasaddassa ca tabbhāvavuttito. Yadi ahīlento bhavēyya, “muṇḍā samaṇā”ti vadeyya, hīlento pana garahatthena ka-saddena padaṃ vadḍhetvā “muṇḍakā samaṇakā”ti vadatīti dassetuṃ “**muṇḍe muṇḍā**”tiādi vuttaṃ. **Ibbhāti gahapatikā**ti atthamattavacanam, saddato pana ibhassa payogo **ibho** uttarapadalopena, taṃ ibham arahantīti **ibbhā** dvittam katvā. Kiṃ vuttaṃ hoti – yathā sobhanam gamanato ibhasaṅkhāto hatthivāhanabhūto parassa vasena pavattati, na attano, evametepi brāhmaṇānam sussūsakā suddā parassa vasena pavattanti, na attano, tasmā ibhasadisapayogatāya **ibbhāti**. Te pana kuṭumbikatāya gharavāsino gharasāmikā hontīti atthamattam dasseti “**gahapatikā**”ti iminā.

Kaṇhāti kaṇhajātikā. Dvijā eva hi suddhajātikā, na itareti tassādhippāyo. Tenāha “**kāḷakā**”ti. Pitāmahabhāvena ñātibandhavattā **bandhu**. Tenāha “**pitāmahoti voharantī**”ti. **Apaccāti** puttā. **Mukhato nikkhantā**ti brāhmaṇānam pubbapurisā brahmuno mukhato nikkhantā, ayaṃ tesam paṭhamuppattīti adhippāyo. Sesapadesupi eseva nayo. Ayaṃ panettha viseso – “ibbhā kaṇhā”ti vatvā “bandhupādāpaccā”ti vadanto kulavasena samaṇā vessakulapariyāpannā, paṭhamuppattivasena pana brahmuno piṭṭhipādato nikkhantā, na pakativessā viya nābhitoti dassetīti, idaṃ panassa “mukhato nikkhantā”tiādivacanatopi ativiya asamavekkhitapubbavacanam catuvaṇṇapariyāpannasēva samaṇabhāvasambhavato. **Aniyametvāti** avisesetvā, anuddesikabhāvenāti attho.

Mānameva nissāya kathesīti mānamevāpassayaṃ katvā attānam ukkaṃsento, pare ca vambhento “muṇḍakā samaṇakā”tiādivacanam kathesī. **Jānāpessāmīti** attano gottapamāṇam yāthāvato vibhāvanena viññāpessāmi. **Atthoti** hitam, icchitavattu vā, taṃ pana kattabbakiccamevāti vuttaṃ “**āgantvā kattabbakiccasāṅkhāto attho**”ti, so **etassa atthīti atthikam** yathā “daṇḍiko”ti. Dutiyassapi puggalavācakassa tadassatthipaccayassa vijjamānattā paṭhamena tadārammaṇikacittameva viññāyatīti āha “**tassa māṇavassa citta**”nti. **Atthikamassa atthīti atthikavā** yathā “guṇavā”ti.

“Yāyeva kho panatthāyā”ti līngavipallāsavasena vuttanti dasseti “**yeneva kho panatthenā**”ti iminā. Tenevāha “**tameva atthanti idaṃ purisaliṅgavaseneva vutta**”nti. Tattha hi sābhāvikaliṅgatādassanena idha asābhāvikaliṅgatāsiddhīti. Ayaṃ panettha **aṭṭhakathāto** aparo nayo – **yāya atthāyāti** pullīngavaseneva tadatthe sampadānavacanam, yassa kattabbakiccasāṅkhātassa atthassa atthāyāti atthoti. **Assāti** ambaṭṭhassa dassetvāti sambandho. **Aññesaṃ santikam āgatānanti** garuṭṭhāniyānam santikamupagatānam sādhurūpānam. **Vattanti** tesam samāciṇṇam. Pakaraṇatoyeva “ācariyakule”ti attho viññāyati, “avusitavā”ti ca asikkhitabhāvoyeva vohāravasena vutto yathā taṃ cīvaradānam ticīvarena acchādesīti. Tenāha “**ācariyakule avusitavā asikkhito**”ti. Asikkhitattā eva **appassuto**, “vusitamānī”ti ca padāpekkhāya apariyositavacanattā samānoti pāṭhasēsoti dasseti “**appassutova samāno**”ti iminā. Bāhusaccañhi nāma yāvadeva upasamattham icchitabbam, tadabhāvato panāyam ambaṭṭho avusitavā asikkhito appassutoti viññāyatīti evampi atthāpattito kāraṇam vibhāvento āha “**kimaññatra avusitattā**”ti. Imampi sambandham dīpeti “**etassa hī**”tiādinā. Yathārutato pana pharusavacanasamudācārena anupasamakāraṇadassanametam. Tatrāyam yojanā – “kimaññatra avusitattā”ti idaṃ kāraṇam etassa ambaṭṭhassa pharusavacanasamudācāre kāraṇanti. “**Pharusavacanasamudācārenā**”tipi pāṭho, tathā samudācāravasena vuttaṃ kāraṇanti attho. Evampi yojenti – avusitattā avusitabhāvam aññatra ṭhapetvā etassa evam pharusavacanasamudācāre kāraṇam kimaññam atthīti. Purimayojanāvettha yuttatarā yathāpāṭham yojetabbato. “Aññatrā”ti nipātayogato **avusitattāti** upayogathe nissakkavacanam. Tadeva kāraṇam samattheti “**ācariyakule**”tiādinā.

264. Kodhasaṅkhātassa parassa vasānugatacittatāya **asakamano**. **Mānanimmadanatthanti** mānassa nimmadanattham abhimaddanattham, amadanattham vā, mānamadavirahatthanti attho. **Dosaṃ uggiletvāti** sinehapānena kilinnaṃ vātapittasemhadosam ubbamaṇam katvā. **Gottena gottanti**

ambaṭṭheneva bhagavatā puṭṭhena vuttana sāvajjena purātanagottena adhunā anavajjasaññitaṃ gottaṃ. **Kulāpadesena kulāpadesanti** etthāpi eseva nayo. **Uṭṭhāpetvāti** sāvajjato uṭṭhahanam katvā, uddharitvāti vuttaṃ hoti. Gottañcetta ādipurisavasena, kulāpadeso pana tadanvaye uppanābhīññātapurisavasena gahetabbo yathā “ādicco māghavo”ti. Sākiyānañhi **ādiccagottaṃ** aditiyā nāma devadhītāya puttabhūtaṃ ādipurisaṃ pati hoti, taṃ “gotamagotta”ntipi vadanti. Yathāha **pabbajjāsutte** –

“Ādiccā nāma gottena, sākiyā nāma jātiyā;
Tamaḥ kulā pabbajjitomhi, na kāme abhipatthaya”nti. (su. ni. 425);

Māghavakulaṃ pana tadanvaye abhiññātaṃ macalagāmikapurisaṃ pati hotīti. Gottamūlassa gārayhatāya amānavatthubhāvapavedanato “**mānaddhajaṃ mūle chetvā nipātesāmi**”ti vuttaṃ. **Ghaṭṭentoti** jātigottavasena omasanto. **Hīlentoti** hīlanaṃ garaṃ karonto. “Caṇḍā bho gotama sakyajātī”tiādinā sākiyesu caṇḍabhāvādidosaṃ pāpitesu samaṇopi gotamo **pāpito bhavissatīti** adhippāyo.

Yasmiṃ mānussayakodhussayā aññamaññūpatthaddhā, so “caṇḍo”ti vuccatīti dasseti “**mānanissitakodhayuttā**”ti iminā, pakatūpanissayārammaṇavasena cettha nissitabhāvo, na saḥajātādivasena. **Kharāti** cittaṃ, vācāya ca kakkhaḷā. **Lahukāti** taruṇā avuddhakammā. Tenāha “**appakenevā**”tiādi. **Alābukaṭṭhāhanti** lābuphalassa abhejjakapālaṃ. Aṭṭhakathāmuttanayaṃ dassetaṃ “**bhassāti** sāhasikāti keci vadanti, sārāmbhakāti apare”ti (dī. ni. 1.264) ācariyena vuttaṃ. **Samānāti** hontā bhavamānāti asasaddavasenaṭṭhoti āha “**santāti purimapadasseva vevacana**”nti. **Na sakkarontīti** sakkāraṃ na karontīti atthameva viññāpeti “**na brāhmaṇāna**”ntiādinā. **Apacitikammanti** paṇipātakammaṃ. “Yadime sakyā”ti pacchimavākye ya-saddassa kiriyāparāmasanassa aniyamassa “tayidaṃ bho gotamā”ti purimavākye ta-saddena niyamaṇaṃ veditaṃ banti āha “**yaṃ ime sakyā**”tiādi. **Nānulomanti** attano jātiyā na anucchavikaṃ.

Dutiyaibbhavādavaṇṇanā

265. Sandhāgārapadanibbacanaṃ heṭṭhā vuttameva. Tadā abhisittasakyarājūnampi bahutaṃ sandhāyāha “**abhisittasakyarājāno**”ti. Kāmañhi sakyarājakule yo sabbesaṃ vuddhataro, samattho ca, so eva abhisekaṃ labhati. Ekacco pana abhisitto samāno “idaṃ rajjaṃ nāma bahukiccaṃ bahubyāpāra”nti tato nibbijja rajjaṃ vayasā anantarassa niyyātetī, kadāci sopi aññassāti evaṃ paramparāniyyātanavasena tadā bahū abhisittapubbā sakyarājāno hontīti idaṃ ācariyassābhimaṃ (dī. ni. 1.265). Apica yathārahaṃ ṭhānantaresu abhisittasakyarājūnampi bahutaṃ sandhāya evamāhātipi yujjati. Te hi “rājāno”ti vuccanti. Yathāha –

“Rājāno nāma pathabyārājā, padesarājā, maṇḍalikā, antarabhogikā, akkhadassā, mahāmattā,
ye vā pana chejjabhejjaṃ karontā anusāsanti, ete rājāno nāmā”ti (pārā. 92).

Samhārimēhi vālarūpehi kato **pallaṅko**, bhaddapīṭhaṃ **vettāsaṇaṃ**. Mihitamattaṃ **hasitamattaṃ**. **Anuhasantīti** mamuddesikaṃ mahāhasitaṃ karonti, idañhi “**anujagghantā**”ti etassa saṃvaṇṇanāpadaṃ. **Jagghasaddo** ca mahāhasane pavattati “na ujjagghikāya antaraghaṇe gamissāmi”tiādisu (pāci. 586) viya.

Kaṇhāyanato paṭṭhāya paramparāgataṃ kulavaṃsaṃ anussavavasena jānanti. Kulābhīmānino hi yebhuyyena paresaṃ uccāvacaṃ kulaṃ tathā tathā udāharanti, attano ca kulavaṃsaṃ jānanti, evaṃ ambaṭṭhōpi, tathā hesa parato bhagavatā pucchito vajirapāṇi bhayena attano kulavaṃsaṃ yāthāvato kathesīti. **Olambetvāti** hatthisoṇḍasaṇṭhānādinā sātakaṃ avalambetvā. **Tatoti** tathājānanato, gamanato ca. **Mamaññeva maññeti** mamameva anujagghantā maññe.

Tatiyaibbhavādavaṇṇanā

266. Khettaleḍḍūnanti khetto kasanavasena uṭṭhāpitamattikākhaṇḍānaṃ. Leḍḍukānamantare nivāsītattā “leḍḍukikā” icceva (dī. ni. ṭī. 1.266) saññātā **khuddakasakuṇikā. Majjhimapaṇṇāsake leḍḍukikopamasuttavaṇṇanāyaṃ** “cātakasakuṇikā”ti (ma. ni. aṭṭha. 3.150) vuttā, nighaṇṭusatthesu pana taṃ “lāpasakuṇikā”ti vadanti. **Kodhavasena laggitunti** upanayhituṃ, āghātaṃ bandhitunti attho.

“Amhe haṃsakoṇcamorasame karotī”ti vadanto heṭṭhā gahitaṃ “na taṃ koci haṃso vā koṇco vā moro vā āgantvā kiṃ tvaṃ lapasīti nisedheti”ti idampi vacanaṃ saṅgītimaṇṇaruḷhaṃ tadā bhagavatā vuttamevāti dasseti. Tadā vadantoyeva hi evaṃ karotīti vattumarahati. “Evaṃ nu te”tiādivacanaṃ, “avusitavāyevā”tiādivacanaṃca mānavasena samaṇena gotamena vuttanti ambaṭṭho maññatīti adhippāyenāha “**nimmāno dāni jātoti maññamāno**”ti.

Dāsiputtavādavaṇṇanā

267. Nimmādetīti a-kārassa ā-kāraṃ katvā niddeso ummāde madasaddena nipphannattāti dasseti “**nimmādetī**”ti iminā. **Nimmāneti** vigatamāne. Yadi panāhaṃ gottaṃ puccheyyaṃ sādhu vatāti attho. Pākaṭaṃ kātukamyatāya **tikkhattuṃ mahāsaddena avoca. Kasmā avocāti** pana asuddhabhāvaṃ jānantassāpi tathāvacane kāraṇapucchā. Gottabhūtaṃ nāmameva adhippettaṃ, na viṣuṃ gottanti āha “**mātāpettikanti mātāpitūnaṃ santaka**”nti. Gottañhi pitito laddhabbaṃ pettikameva, na mātāpettikaṃ. Na hi brāhmaṇānaṃ sagottāya eva āvāhavivāho icchito, gottanāmaṃ pana jātisiddhaṃ, na kittimaṃ, na guṇanāmaṃ vā, jāti ca ubhayasambandhinīti mātāpettikameva, na pettikamattaṃ. **Nāmagottanti** gottabhūtaṃ nāmaṃ, na kittimaṃ, na guṇanāmaṃ vā viṣesanaparanipātavasena vuttattā yathā “agyāhito”ti. Nāmaṃca tadeva pavenīvasena pavattattā gottañcāti hi **nāmagottaṃ**. Tattha yā “kaṇhāyano”ti nāmapaṇṇatti niruḷhā, taṃ sandhāyāha “**paṇṇattivasena nāma**”nti. Taṃ panetaṃ nāmaṃ kaṇhaisito paṭṭhāya tasmīṃ kulaparamparāvasena āgataṃ, na etasmimīyeva niruḷhanti vuttaṃ “**pavenīvasena gotta**”nti. Gottapadassa vacanattho heṭṭhā vuttoyeva.

“Anussarato”ti ettha na kevalaṃ anussaraṇamattaṃ adhippettaṃ, atha kho kulasuddhivīmaṃsanavasenevāti āha “**kulakoṭiṃ sodhentassā**”ti, kulaggaṃ visodhentassāti attho. “Ayyaputtā”ti ettha ayyasaddo ayyiraketi vuttaṃ “**sāmīno puttā**”ti. Catūsu dāsīsu disā okkārañño antojātadāsī. Tenāha “**gharadāsīyā putto**”ti. Ettha ca yasmā ambaṭṭho jātiṃ nissāya mānathaddho, na ca tassa yāthāvato jātiyā avibhāvitāya mānaniggaho karīyati, akate ca mānaniggāhe mānavasena ratanattayaṃ aparajjhissati, kate pana mānaniggāhe aparabhāge ratanattaye pasīdissati, na cedisī vācā pharusavācā nāma hoti cittassa saṇhābhāvato. Majjhimapaṇṇāsake abhayasuttaṃca (ma. ni. 2.83) ettha nidassanaṃ. Keci ca janā kakkhaḷāya vācāya vuttā agginā viya lohādayo mudubhāvaṃ gacchanti, tasmā bhagavā ambaṭṭhaṃ nibbisevanāṃ kattukāmo “ayyaputtā sakyā bhavanti, dāsiputto tvamasi sakyāna”nti avoca.

“Idhekacco pāpabhikkhu tathāgatappaveditaṃ dhammavinayaṃ pariyāpuṇitvā attano dahatī”tiādīsu (pārā. 195) viya dahasaddo dhāraṇattho, dhāraṇaṅcetha pubbapurisavasena saññāpananti āha “**okkāko no pubbapuriso**”tiādi. Dahasaddaṅhi bhasmīkaraṇe, dhāraṇe ca icchanti saddavidū. **Pabhā niccharatīti** pabhassaraṃ hutvā nikkhamati tathārūpena puññakammēna dantānaṃ pabhassarabhāvato.

Teti jeṭṭhakumāre. **Paṭhamakappikānanti** paṭhamakappaṃsa ādikāle nibbattānaṃ. Kirasaddena cettha anussavatthēna, yo vuccamānāya rājaparamparāya kesañci matibhedo, taṃ ullīngeti. Anussavavacanēna hi ananussuto uttaravihāravāsīādīnaṃ matibhedo nirākariyatīti. **Mahāsammattassāti** aggaññasutte vakkhamānanayena “ayaṃ no rājā”ti mahājanēna sammannitvā ṭhapitattā “mahāsammato”ti evaṃ sammattassa. Yaṃ sandhāya vadanti –

“Ādiccakulasambhūto, suvisuddhaguṇākaro;
Mahānubhāvo rājāsi, mahāsammatanāmako.

Yo cakkhubhūto lokassa, guṇaramsisamujjalo;
Tamonudo virocittha, dutiyo viya bhānumā.

Ṭhapitā yena mariyādā, loke lokahitesinā;
Vavatthitā sakkuṇanti, na vilaṅghayitu janā.

Yasassinam tejjassinam, lokasīmānurakkhakam;
Ādibhūtam mahāvīram, kathayanti ‘manū’ti ya’nti. (dī. ni. ṭī. 1.267);

Tassa ca puttapaputtaparamparam sandhāya evam vadanti –

“Tassa putto mahātejo, rojo nāma mahīpati;
Tassa putto vararojo, pavaro rājamaṇḍale.

Tassāsi kalyāṇaguṇo, kalyāṇo nāma atrajo;
Rājā tassāsi tanayo, varakalyāṇanāmako.

Tassa putto mahāvīro, mandhātā kāmabhoginam;
Aggabhūto mahindena, aḍḍharajjena pūjito.

Tassa sūnu mahātejo, varamandhātunāmako;
‘Uposatho’ti nāmena, tassa putto mahāyaso.

Varo nāma mahātejo, tassa putto mahāvaro;
Tassāsi upavaroti, putto rājā mahābalo.

Tassa putto maghadevo, devatulyo mahīpati;
Caturāsīti sahasāni, tassa puttaparamparā.

Tesam pacchimako rājā, ‘okkāko’iti vissuto;
Mahāyaso mahātejo, akhuddo rājamaṇḍale’nti. (dī. ni. ṭī. 1.267);

Idam aṭṭhakathānuparodhavacanaṃ. Yaṃ pana **dīpavaṃse** vuttaṃ –

“Paṭhamābhisitto rājā, bhūmipālo jutindharo;
Mahāsammatō nāmena, rajjam kāresi khattiyo.

Tassa putto rojo nāma, vararojo ca khattiyo;
Kalyāṇo varakalyāṇo, uposatho mahissaro.

Mandhātā sattamo tesam, catudīpamhi issaro;
Varo upavaro rājā, cetiyo ca mahissaro’’tiādi.

Yañca **mahāvamsādīsu** vuttaṃ –

“Mahāsammatarājassa, vaṃsajo hi mahāmuni;
Kappādismiṃ rājāsi, mahāsammatanāmako.

Rojo ca vararojo ca, tathā kalyāṇakā duve;
Uposatho ca mandhātā, varako pavarā duve’’tiādi.

Sabbametaṃ yebhuyyato aṭṭhakathāvirodhavadānaṃ. Aṭṭhakathāyañhi mandhātūrājā chaṭṭho vutto, maghadevarājā ekādasamo, tassa ca puttaparamparāya caturāsītisahassarājūnaṃ pacchimako okkākarājā, tesu pana mandhātūrājā sattamo vutto, maghadevarājā anekesaṃ rājasahassānaṃ pacchimako, tassa ca puttaparamparāya anekarājasahassānaṃ pacchimako okkākarājāti evamādinā anekadhā virodhavadānaṃ aṭṭhakathāyaṃ nirākaroti. Nanu avocumha ‘‘kirasaddena cettha anussavatthena, yo vuccamānāya rājaparamparāya kesañci matibhedo, taṃ ulliṅgetī’’ti. **Tesaṃ pacchatoti** maghadevaparamparābhūtānaṃ kaḷārajanakapariyosānānaṃ caturāsītikhattiyasahassānaṃ aparabhāgeti yathānussutaṃ ācariyena vuttaṃ. **Dīpavaṃsādīsu** pana ‘‘kaḷārajanakarañño puttaparamparāya anekakhattiyasahassānaṃ pacchimako rājā sujāto nāma, tassa putto okkāko rājā’’ti vuttaṃ. Maghadevaparamparāya anekasahassarājūnaṃ aparabhāge paṭhamo okkāko nāma rājā ahosi, tassa paramparābhūtānaṃ pana anekasahassarājūnaṃ aparabhāge dutiyo okkāko nāma rājā ahosi, tassapi paramparāya anekasahassarājūnaṃ aparabhāge tatiyo okkāko nāma rājā ahosi. Taṃ sandhāyāha ‘‘**tayo okkākavaṃsā ahesu**’’ntiādi.

Jātiyā pañcamadivase nāmakammādimaṅgalaṃ lokāciṅṅanti vuttaṃ ‘‘**pañcamadivase alaṅkaritvā**’’ti. **Sahasā varam adāsinti** puttadassanena balavasomanassappatto turitaṃ avīmaṃsitvā tuṭṭhidāyavasena varam adāsīm ‘‘yaṃ icchasi, taṃ gaṇhāhi’’ti. **Sāti jantukumāramātā. Rajjam pariṇāmetuṃ icchatī** mama varadānaṃ antaraṃ katvā imaṃ rajjam pariṇāmetuṃ icchati.

Rajjam kāressantī rājabhāvaṃ mahājanena mahājanaṃ vā kārapessanti. **Nappasaheyyāti** nivāsathāya pariyaṭṭo na bhaveyya.

Kaḷāravaṇṇatāya **kapilabrāhmaṇo** nāma ahosi. **Nikkhammāti** gharāvāsato kāmehi ca nikkhamitvā. **Sāko** nāma sabbasāramayo rukkhaviseso, yena pāsādādi karīyate, taṃsamudāyabhūte vanasaṇḍeti attho. Bhūmiyā pavattaṃ **bhummaṃ**, taṃ guṇadosaṃ jāleti joteti, taṃ vā jalati jotati pākataṃ bhavati etāyāti **bhummajālā. Heṭṭhā cāti** ettha ca-saddena ‘‘asītihatthe’’ti idamanukaḍḍhati. **Etasmim padeseti** sākavanasāṇḍamāha. Khandhapantivasena **dakkhiṇāvattā. Sākhāpantivasena pācīnābhimukhā. Tehīti** migasūkarehi, maṇḍūkamūsikehi ca. **Teti** sīhabyagghādayo sappabīlārā ca.

Etthāti evaṃ māpiyamāne nagare. Tumhākaṃ purisesu pariyaṭṭannaṃ ekekampi purisaṃ paccatthikabhūtaṃ aññaṃ purisasatampi purisasahassampi abhibhavituṃ na sakkhissatīti yojanā. **Cakkavattibalenāti** cakkavattibalabhāvena. **Atiseyyoti** ativiya uttamo bhaveyya. Kapilassa isino vasanaṭṭhānattā **kapilavatthu.**

Nesaṃ santike bhaveyyāti sambandho. **Asadisasaṃyogeti** jātiyā asadisānaṃ gharāvāsapayoge hetubhūte. **Avasesāhi** attano attano kaṇiṭṭhāhi.

Vaḍḍhamānānanti anādare sāmivacanaṃ, anantarāyikāya puttadhītuvaḍḍhanāya vaḍḍhamānesu eva udapādīti attho. Lohitakatāya **koviḷārapupphasadisāni.** Kuṭṭharogo nāma sāsamasūrīrogā viya yebhuyyena saṅkamanasabhāvoti vuttaṃ ‘‘**ayaṃ rogo saṅkamati**’’ti. **Upari** padarena **paṭicchādetvā paṃsuṃ** rāsikaraṇena **datvā. Nāṭakitthiyo** nāma naccantiyo. Rājabhāriyāyo **orodhā** nāma. **Tassāti** susirassa. **Migasakuṇādinanti** ettha **ādisaddena** vanacarapakapēṭādi ke saṅgaṇhāti.

Tasmim rāmarāññe nisinneti sambandho. **Padareti** dāruphalake. Khattiyamāyārocanaena **attano khattiyabhāvaṃ jānāpetvā.**

Mātikanti mātito āgataṃ. **Pābhatanti** mūlabhaṇḍaṃ, paṇṇākāro vā. **Raṇṇoti** rāmarājassa jeṭṭhaputtabhūtassa bārāṇasirañño. **Tatthāti** bārāṇasiyaṃ. **Idhevāti** himavantapasseyeva. **Nagaranti**

rājadhānībhūtaṃ mahānagaraṃ. **Kolarukkho** nāma kuṭṭhabhesajjupago eko rukkhaviseso. **Byagghapatheti** byagghamagge.

Mātulāti mātu bhātaro. **Kesaggahaṇanti** kesaveṇibandhanaṃ. **Dussaggahaṇanti** vatthassa nivasanākāro. **Nhānatitthanti** yathāvuttāya pokkharāṇiyā udakanhānatitthaṃ. Idānipi tesam jātisambhedābhāvaṃ dassento “**evaṃ tesa**”ntiādīmāha. **Āvāho** dārikāharaṇaṃ. **Vivāho** dārikādānaṃ. **Tatthāti** tesu sakyakoliyesu. Dhātusaddānamanekatthattā samusaddo nivāsattḥoti vuttaṃ “**vasantī**”ti. **Aggeti** upayogathe bhummavacanaṃ, ādyatthe ca aggasaddo, kiriyāvisesoti ca dasseti “**taṃ agga**”ntiādīnā. Yadettha bhagavatā vuttaṃ “**atha kho ambaṭṭha rājā okkāko udānaṃ udānesi ‘sakyā vata bho kumārā, paramasakyā vata bho kumārā’**ti, tadagge kho pana ambaṭṭha sakyā paññāyanti”ti, tadetaṃ saddato, atthato ca sābhāvikanibbaccanānidassanaṃ “**sakāhi bhaginīhipi saddhiṃ saṃvāsavasena jātisambhedamakātvā kulavaṃsaṃ anurakkhituṃ sakkuṇanti samatthentīti sakyā**”ti teyeva saddaracānāvisesena **sākiyā**. Yaṃ panetaṃ sakkatanighaṇṭusatthesu vuttaṃ –

“Sākarukkhaṭṭicchannaṃ, vāsaṃ yasmā purākamsu;
Tasmā diṭṭhā vaṃsajāte, bhuvī ‘sakyā’ti vissutā”ti.

Tadetaṃ saddamattaṃ pati asābhāvikanibbaccanānidassanaṃ “**kapilamunino vasanaṭṭhāne sākavane vasantīti sakyā, sākiyā**”ti ca.

Kālavaṇṇatāya **kaṇho** nāmāti vuttaṃ “**kālavaṇṇa**”ntiādi. Hanuyam jāta **massū**, uttarotṭhassa ubhosu passesu dāṭhākārena jāta **dāṭhikā**. Idañca atthamattena vuttaṃ, taddhitavasena pana yathā etarahi yakkhe “**pisāco**”ti samaññā, evaṃ tadā “**kaṇho**”ti, tasmā jātamattēyeva sabyāharaṇena pisācasadisatāya **kaṇhoti**. Tathāhi vuttaṃ “**yathā kho pana ambaṭṭha etarahi manussā pisāce disvā ‘pisācā’**ti sañjānanti, evameva kho ambaṭṭha tena kho pana samayena manussā pisāce ‘**kaṇhā**’ti sañjānanti”tiādi. Tattha **pisāco jātoti** idāni pākāṭanāmena suviññāpanatthaṃ purimapadasseva vevacanaṃ vuttaṃ. “**Na sakabaḷena mukhena byāharissāmī**”tiādīsu (pāci. 619) viya upasaggavasena saddakaraṇattho harasaddo, puna dutiyopasaggena yutto uccāsaddakaraṇe vattatīti vuttaṃ “**uccāsaddamakāsī**”ti.

268. Attano **upārambhamocanattḥāyāti** ācariyena, ambaṭṭhena ca attano attano upari pāpetabbopavādassa apanayanatthaṃ. “**Attano**”ti hetam vicchālopavacanaṃ. **Paribhindissatīti** anattakāmatāpavedanena paribhedam karissati, pesuññaṃ upasaṃharissatīti vuttaṃ hoti. Atthaviññāpane sādhanatāya vācā eva karaṇam **vākkaraṇam** niruttinayena, taṃ kalyāṇamassāti **kalyāṇavākkaraṇo**. **Asmiṃ vacaneti** ettha tasaddena kāmaṃ “**cattārome bho gotama vaṇṇā**”tiādīnā (dī. ni. 1.266) ambaṭṭhena heṭṭhā vutto jātivādo parāmasitabbo hoti, tathāpesa jātivādo vede vuttavidhināyeva tena paṭimantetabbo, tasmā paṭimantanahetubhāvena pasiddham vedattayavacanameva parāmasitabbanti dassetuṃ vuttaṃ “**attanā uggahite vedattayavacane**”ti. Idāni “**porāṇam kho pana te ambaṭṭha mātāpettika**”ntiādīnā bhagavatā vuttavacanassapi parāmasanaṃ dassento “**etasmim vā dāsiputtavacane**”ti āha. Apica **paṭimantetunti** ettha paṭimantanā nāma pañhāvissajjanā, uttarikathanā vā, tasmā atthadvayānurūpaṃ tabbisayassa ta-saddena parāmasanaṃ dassetīti daṭṭhabbam.

269. **Tāvāti** mantanāya paṭhamameva, akatāya eva mantanāyāti vuttaṃ hoti. **Dujjānāti** dubbhiñṇeyyā, paṭhamameva sisamukkhīpituṃ asamatthanato, jātiyā ca dubbhiñṇeyyattā, aṭṭassa ca dukkaraṇato ambaṭṭho sayameva mocetūti adhippāyo. Attanāva sakyesu ibbhavādanipātanena attano upari pāpuṇanaṃ sandhāya “**attanā baddham puṭaka**”nti vuttaṃ, attanāva baddham puṭolīnti attho.

270. **Dhammo** nāma kāraṇam “**dhammapaṭṭisambhidā**”tiādīsu (vibha. 718 ādayo) viya, dhammena saha vattatīti sahadhammo, so eva **sahadhammikoti** āha “**sahetuko**”tiādi, pariyaṇavacanaṃmetam. Janako vā **hetu**, upatthambhako **kāraṇam**. **Aññena** aṭṭhānagatena **aññaṃ** aṭṭhānagataṃ **vacanaṃ**. Tenāha “**yo hī**”tiādi.

Tatoti dvikkhattuṃ codanāto param, tatiyacodanāya anāgatāya eva pakkamissāmīti vuttam hoti.

271. Pūjitabbato sakko devarājā **yakkho** nāma. Yo aggissa pakativanṇo, tena samannāgatanti vuttam “**ādittanti aggivaṇṇa**”nti. **Kandalo** nāma pupphūpagarukkhaviseso, yassa setam puppham pupphati, maḷampissa setavaṇṇam dāṭṭhākāram hoti. **Virūparūpanti** viparītarūpasanṭhānam.

Aṭṭhamasattāhe ajapālanigrodhamūle nisinnassa sabbabuddhassa āciṇṇasamāciṇṇam appossukkatam sandhāya “**ahañcevā**”tiādi vuttam. **Avattamāneti** appaṭipajjamāne, ananuvattamāne vā. **Tasmāti** tadā tathāpaṭiññātattā. **Tāsetvā pañham** vissajjāpessāmīti āgato yathā tam mūlapaṇṇāsake āgatassa saccakaribbājakassa samāgame (ma. ni. 1.357).

“Bhagavā ceva passati ambaṭṭho cā”ti ettha itaresamadassane duvidhampi kāraṇam dassento “**yadi hi**”tiādimāha. **Hi**-saddo kāraṇatthe nipāto. Yasmā agaru, yasmā ca vadeyyuṃ, tasmāti sambandho. Aññesampi sādharmaṇato **agaru** abhāriyam. **Āvāhetvāti** mantabalena avhānam katvā. **Tassāti** ambaṭṭhassa. **Antokucchi** antaantaguṇādiko. **Vādasanṅhaṭṭeti** vācāsanṅhaṭṭane. **Maññamānoti** maññanato. Sambandhadassanañhetam.

272. Tānam gavesamānoti “ayameva samaṇo gotamo ito bhayato mama tāyako”ti bhagavantamyeva “tāna”nti pariyesanto, upagacchantoti vuttam hoti. Sesapadadvayepi eseva nayo. **Tāyatīti** yathūpaṭṭhitabhayato pāleti. Tenāha “**rakkhatī**”ti, kattusādhanametam. **Nīliyatīti** yathūpaṭṭhiteneva bhayena upadduto nilīno hoti, adhikaraṇasādhanametam. **Sarasaddo** hiṃsane, tañca viddhamsanameva adhippetanti vuttam “**bhayam hiṃsati viddhamsetī**”ti, kattusādhanametam.

Ambaṭṭhavaṃsakathāvaṇṇanā

274. Gaṅgāya dakkhiṇatoti gaṅgāya nāma nadiyā dakkhiṇadisābhāge. **Brāhmaṇatāpasāti** brahmakulino tāpasā. Saram vā sattiādayo vā parassa upari khipitukāmassa mantānubhāvena hattham na parivattati, hatthe pana aparivattante kuto āvudham parivattissatīti tathā aparivattanam sandhāya “**āvudham na parivattati**”ti vuttam. **Bhadram bhoti** sampaṭicchanam, sādhiṭti attho. Dhanunā khittasarena agamanīyam sasambhārakathānāyena “**dhanu agamanīya**”nti vuttam yathā “dhanunā vijjhati, cakkhunā passatī”ti. **Ambaṭṭham nāma vijjanti** sattānam sarīre abbhaṅgam ṭhapetīti **ambaṭṭhā** niruttinayena, evaṃladdhanāmaṃ mantavijjanti attho. Yato ambaṭṭhā vijjā etasmim atthīti katvā kaṅho isi “**ambaṭṭho**”ti paññāyittha, tabbamaṃsajātāya panāyam māṇavo “**ambaṭṭho**”ti voharīyati. So kira “katham nāmāham disāya dāsīyā kucchimhi nibbato”ti tam hīnam jātim jigucchanto “handāham yathā tathā imam jātim sodhessāmī”ti niggato. Tena vuttam “**idāni me manoratham pūressāmī**”ti. Ayañhissa manoratho – vijjābalena rājānam tāsetvā tassa dhītaram laddhakālato paṭṭhāya myāyam dāsajāti sodhitā bhavissatīti.

Setthamanteti setthabhūte vedamante. **Ko nu** kiṃ kāraṇā **dāsiputto** samāno maddarūpiṃ dhītaram yācatīti attho. Khurati chindati, khuram vā pāti pivatīti **khurappo**, khuramassa agge appīyati ṭhapīyatīti vā **khurappo**, saro. **Mantānubhāvena** rañño bāhukkhambhamattam jātam, tena pana bāhukkhambhena “ko jānāti, kiṃ bhavissatī”ti rājā bhīto ussaṅkī utraṣṭo ahoṣi. Tathā ca vuttam “**bhayena vedhamāno aṭṭhāsī**”ti.

Sarabhaṅgajātake (jā. 2.17.52) āgatānam daṇḍakīrājādīnam pacchā okkākarājā ahoṣi, tesam pavatti ca sabbattha cirakālam pākātāti āha “**daṇḍakīrañño**”tiādi. Aparaddhassa daṇḍakīrañño, aparaddho nālikero, ajjuno cāti sambandho. Satipi vālukādivasse āvudhavasseneva vināsoti vuttam “**āvudhavuṭṭhiyā**”ti. “Ayampi īdiso mahānubhāvo”ti maññamānā evaṃ **cintayantā bhayena avocunti** daṭṭhabbam.

Undriyissatīti bhindiyissati. Kammarūpañhetam “pathavī”ti kammakattivasena vuttattā yathā

“kusulo bhijjati”ti. Tenāha “**bhijjissati**”ti. **Thusamuttthi** palāsamuttthi, bhusamuttthi vā. Kasmāti āha “**sarasanthambhanamate**”tiādi.

Bhītatasiā bhayavasena chambhitasarīrā uddhaggaḷomā honti haṭṭhalomā, abhītatasiā pana bhayupaddavābhāvato acchambhitasarīrā patitalomā honti ahaṭṭhalomā, khemena sotthinā tiṭṭhanti, tāya pana patitalomatāya tassa sotthibhāvo pākaṭo hotīti phalena kāraṇaṃ vibhāvetuṃ pāḷiyaṃ “pallomo”ti vuttanti dasseti “**pannalomo**”tiādinā. Niruttinayena padasiddhi yathā taṃ **bhayabheravasutte** “bhiyyo pallomamāpādiṃ araṇṇe vihārāyā”ti (ma. ni. 1.36 ādayo). **Idanti** osānavacanaṃ. “Sace me rājā taṃ dārikaṃ dasseti, kumāro sotthi pallomo bhavissati”ti paṭiññākaraṇaṃ pakaraṇatoyeva pākaṭaṃ. **Tenāti** kaṇhena. **Manteti** bāhukkhambhakamantassa paṭippassambhakavijjāsankhāte mante. Evarūpānaṃhi bhayupaddavakarānaṃ mantānaṃ ekamseneva paṭippassambhakamantāhonti yathā taṃ kusumārakavijjādīnaṃ. **Parivattiteti** pajappite. Attano dhītuyā apavādamocanattaṃ taṃ adāsaṃ bhujissaṃ karoti. Tassā anurūpe issariye ṭhapanattaṃ **ulāre ca naṃ ṭhāne ṭhapesi. Ekena pakkhenāti** mātupakkhena. Karuṇāyanto **samassāsanattaṃ āha**, na pana uccākulīnabhāvadassanattaṃ. Tenāha “**atha kho bhagavā**”tiādi.

Khattiyasetṭhabhāvavaṇṇanā

275. Brāhmaṇesūti vohāramattaṃ, brāhmaṇānaṃ samīpe brāhmaṇehi laddhabbāni āsanādīni labhethāti vuttaṃ hoti. Tena vuttaṃ “**brāhmaṇānaṃ antare**”ti. Kevalaṃ vedasatthānurūpaṃ paralokagate saddhāya eva kātabbaṃ, na tadaññaṃ kiñci abhipatthententi **saddhanti** nibbanaṃ dassetuṃ “**matake uddissa katabhatte**”ti vuttaṃ. **Maṅgalādibhatteti** ettha **ādisaddena** ussavadevatārādhanādibhatte saṅgaṇhāti. **Yaññabhatteti** pāpasaññaṃādivasena katabhatte. “Pāpasaññaṃādivatto bhavissati”tiādinā hi aggihomo idha yaññaṃ. **Pāhunakānanti** atithīnaṃ. Anāgantukānampi pāheṇakabhattaṃ “pāhuna”ntveva vuccatīti āha “**paṇṇākārabhatte vā**”ti. **Āvaṭaṃ** nivāraṇaṃ. **Anāvaṭaṃ** anivāraṇaṃ. **Khattiyabhāvaṃ appatto** ubhatosujātābhāvato. Tenāha “**aparissuddho**”ti.

276. Itthiyā vā itthiṃ karitvāti ettha karaṇaṃ nāma kiriyāsāmaññaṃvisayaṃ karabhūdhātūnaṃ atthavasena sabbadhātvantogadhattāti āha “**pariyesitvā**”ti. Khattiyakumārassa bhariyābhūtaṃ brāhmaṇakaññaṃ itthiṃ pariyesitvā gahetvā brāhmaṇānaṃ itthiyā vā khattiyāva seṭṭhā, “hīnā brāhmaṇā”ti pāḷimudāharitvā yojetabbaṃ. “**Purisena vā purisaṃ karitvāti** etthāpi eseva nayo”ti (dī. ni. ṭi. 1.276) ācariyena vuttaṃ. Tathāpi hi khattiyakaññāya patibhūtaṃ brāhmaṇakumāraṃ purisaṃ pariyesitvā gahetvā brāhmaṇānaṃ purisena vā khattiyāva seṭṭhā, hīnā brāhmaṇāti yojanā. **Kismiñciveva pakaraṇeti ettha pakaraṇaṃ** nāma kāraṇaṃ “etasmim̐ nidāne etasmim̐ pakaraṇe”tiādisu (pāci. 42, 90) viya, tasmā rāgādivasena pakkhalite ṭhāne hetubhūtetī attho, taṃ pana atthato aparādhova, so ca akattabbakaraṇanti āha “**kismiñciveva dose**”tiādi. Bhassasaddo bhasmaṃpariyāyo. Bhasīyati niratthakabhāvena khipīyatīti hi **bhassaṃ**, chārikā. “Vadhitivā”ti etassa atthavacanaṃ “**okiritvā**”ti.

277. Kammakilesehi janetabbo, tehi vā jāyatīti janito, sveva **janeto**, manussova. Tathā hi vuttaṃ “ye gottapaṭisārino”ti. Tadeṭaṃ pajāvacaṇaṃ viya jātisaddavasena bahumhi ekavacanaṃti āha “**pajāyāti attho**”ti. Etasmim̐ janetiṃ yujjati. **Paṭisarantīti** gottaṃ paṭicca “ahaṃ gotamo, ahaṃ kassapo”tiādinā saraṇaṃ karonti vicinanti.

Paṭhamabhāṇavāraṇṇanā niṭṭhitā.

Vijjācaraṇakathāvaṇṇanā

278. Imasmim̐ pana siloke āhariyamāne brahmagarukā saddheyyataṃ āpajjissanti, ambaṭṭho ca “vijjācaraṇasampanno”ti padaṃ sutvā vijjācaraṇaṃ pucchissati, evamayaṃ vijjācaraṇaparidīpanī desanā mahājanassa sāthikā bhavissatīti passitvā lokanātho imaṃ silokaṃ sanānkumārabhāsitaṃ āharīti

imamatthampi vibhāvento “**imāya pana gāthāyā**”tiādimāha. Itarathā hi bhagavāpi asabbaññū parāvassayo bhaveyya, na ca yujjati bhagavato parāvassayatā sammāsambuddhabhāvato. Tenāha “ahampi hi, ambaṭṭha, evaṃ vadāmi”tiādi. **Brāhmaṇasamaye siddhanti** brāhmaṇaladdhiyā pākaṭaṃ. Vakkhamānanayena **jātivādādipaṭisaṃyuttaṃ**. “**Saṃsanditvāti** ghaṭetvā, aviruddhaṃ katvāti attho”ti (dī. ni. ṭī. 1.277) ācariyenavuttaṃ. Idāni pana potthakesu “paṭikkhipitvā”ti pāṭho dissati, so ayuttova. Kasmāti ce? Na hi pālīyaṃ brāhmaṇasamayasiddhaṃ vijjācaraṇaṃ paṭikkhipati, tadeva ambaṭṭhena cintitaṃ vijjācaraṇaṃ ghaṭetvā aviruddhaṃ katvā anuttaraṃ vijjācaraṇaṃ desetīti.

Vādoti laddhi, vacībhedo vā. Tenāha “**brāhmaṇa...pe...ādivacana**”nti. Laddhipi hi vattabbattā vacanameva. **Idanti** ajjhenajjhāpanayajanayājanādikammaṃ, na vessassa, na khattiyassa, na tadaññesanti atthaṃ **ādisaddena** saṅgaṇhāti. **Sabbatthāti** gottavādamānavādesu. Tatthāpi hi **gottavādoti** gottaṃ ārabha vādo, kassapassevidaṃ vaṭṭati, na kosiyassātiādivacananti attho. **Mānavādoti** mānaṃ ārabha attukkaṃsanaparavambhanavasena vādo, brāhmaṇassevidaṃ vaṭṭati, na suddassātiādivacananti attho. **Jātivāde vinibaddhāti** jātisannissitavāde paṭibaddhā. **Sabbatthāti** gottavādivinibaddhādisu. **Gottavādivinibaddhāti** hi gottavāde vinibaddhā. **Mānavādivinibaddhāti** mānavāde vinibaddhā, ye hi brāhmaṇasseva ajjhenajjhāpanayajanayājanādayoti evaṃ attukkaṃsanaparavambhanavasena pavattā, te mānavādivinibaddhā ca honti. **Āvāhavivāhavinibaddhāti** āvāhavivāhesu vinibaddhā. Ye hi vinibaddhattayavasena “arahasi vā maṃ tvaṃ, na vā maṃ tvaṃ arahasi”ti evaṃ pavattanakā, te āvāhavivāhavinibaddhā ca hontīti imamatthasesaṃ sandhāya “**esa nayo**”ti vuttaṃ. Āvāhavivāhavinibaddhabhāvavibhāvanatthañhi “arahasi vā maṃ tvaṃ, na vā maṃ tvaṃ arahasi”ti pālīyaṃ vuttaṃ, tadetaṃ jātivādādīhi tīhi padehi yojetabbam. Āvuttiādinayena hi jātivādādayo dvikkhattumatthadīpakā. Tathā hi ācariyena vuttaṃ “ye pana āvāhavivāhavinibaddhā, te eva sambandhattayavasena ‘arahasi vā maṃ tvaṃ, na vā maṃ tvaṃ arahasi’ti evaṃ pavattanakā”ti (dī. ni. ṭī. 1.278).

Nanu pubbe vijjācaraṇaṃ puṭṭhaṃ, kasmā taṃ puna pucchatīti codanaṃ sodhento “**tato ambaṭṭho**”tiādimāha. Tattha **yatthāti** yassaṃ vijjācaraṇasampattiyaṃ. Brāhmaṇasamayasiddhaṃ sandhāya vuttaṃ. **Laggissāmāti** olaggā antogadhā bhavissāma. **Tatoti** tāya vijjācaraṇasampadāya. **Avakkhipīti** avacāsi. Paramatthato avijjācaraṇāniyeva “vijjācaraṇāni”ti gahetvā ṭhito hi paramatthato vijjācaraṇesu vibhajiyamānesu so tato dūrato apanīto nāma hoti. **Yatthāti** yassaṃ pana vijjācaraṇasampattiyaṃ. Anuttaravijjācaraṇaṃ sandhāya vuttaṃ. Jānanakiriyāyoge kammampi yujjanakiriyāyoge kattāyeva upapanno. Padhānakiriyāpekkhā hi kārakāti vuttaṃ “**ayaṃ no vijjācaraṇasampadā nātum vaṭṭati**”ti. Evamīdisesu. **Samudāgamatoti** ādisamutṭhānato.

279. Kāmaṃ caraṇapariyāpannattā caraṇavasena niyyātetuṃ vaṭṭati, ambaṭṭhassa pana asamapathagamaṇaṃ nivārento sīlavaseneva niyyātetīti imamatthaṃ vibhāvetuṃ “**carāṇapariyāpannampi**”ti vuttaṃ. Brahmajāle (dī. ni. 1.7, 11, 21) vuttanayena khuddakādibhedam **tividhaṃ sīlaṃ**. **Sīlavasenevāti** sīlapariyāyavaseneva. **Kiñci kiñci sīlanti** brāhmaṇānaṃ jātisiddhaṃ ahimsanādiyamaniyamalakkhaṇaṃ appamattakaṃ sīlaṃ. **Tasmāti** tathā vijjamānattā, attani vijjamānaṃ sīlamattampi nissāya laggeyyāti adhippāyo. “**Tattha tattheva laggeyyāti** tasmim tasmimyeva brāhmaṇasamayasiddhe sīlamatte ‘caraṇa’nti laggeyyā”ti (dī. ni. ṭī. 1.279) ācariyena vuttaṃ, tadetaṃ aṭṭhakathāyameva sākāravacanassa vuttattā vicāretabbam, adhippāyamattadassanaṃ vā etaṃ. Ayaṃ panettha attho – **tattha tattheva laggeyyāti** tasmim tasmimyeva attani vijjamānasīlamattapaṭisaṃyuttaṭṭhāne “mayampi caraṇasampannā”ti laggeyya, tasmā sīlavaseneva niyyātetīti sambandho. Tathāpasanṅābhāvato pana upari caraṇavaseneva niyyātetīti dassento “**yaṃ panā**”tiādimāha. Rūpāvacaracatutthajjhānaniddeseneva arūpāvacarajjhānānampi niddiṭṭhabhāvāpattito “**aṭṭhapi samāpattiyo ‘caraṇa’nti niyyātita**”ti vuttaṃ. Tānīpi hi aṅgasamatāya catutthajjhānānevāti. **Niyyātītāti** ca asesato nīharitvā gahitā, nidassitāti attho. **Vipassanāññāto panāti** “so evaṃ samāhite citte parisuddhe pariyodāte anaṅgaṇe vigatūpakkilese mudubhūte kammaniye ṭhite āneñjappatte ñānadassanāya cittaṃ abhinīharati abhininnāmetī”tiādinā nayena vipassanāññāto paṭṭhāya.

Catuapāyamukhakathāvaṇṇanā

280. Asampāpuṇantoti ārabhitvāpi sampajjitumasakkonto. **Avisahamānoti** ārabhitumeva asakkonto. “**Khārī**”ti tāpasaparikkhārassetaṃ adhivacanāṃ, so ca anekabhedoti vibhajitvā dassetaṃ “**araṇī**”tiādi vuttaṃ. Tatha **araṇī**ti heṭṭhimuparimavasena aggidhamanakaṃ araṇīdvayaṃ. **Kamaṇḍalūti** kuṇḍikā. **Sujāti** homadabbi. Sujāsaddo hi homakammani habyanādīnamuddharaṇatthaṃ katadabbiyaṃ vattati yathā taṃ kūḍadantasutte “paṭhamo vā dutiyo vā sujaṃ paggaṇhantāna”nti (dī. ni. 1.341). Tathā hi imasmīyeva ṭhāne ācariyena vuttaṃ “sujāti dabbī”ti (dī. ni. ṭī. 1.280). Habyannādīnaṃ sukhaggahaṇatthaṃ jāyatīti hi **sujā**. Keci pana imamatthamavicāretvā tunnatthameva gahetvā “sūci”ti paṭhanti, tadayuttameva ācariyena tathā avaṇṇitattā. Camati adatīti **camaro**, migaviseso, tassa vālena katā **bījanī cāmarā**. **Ādisaddena** tidaṇḍatighaṭikādīni saṅgaṇhāti. Kucchitena vaṅkākarena jāyatīti **kājo** yathā “kālavaṇa”nti; kacati bhāraṃ bandhati etthāti vā **kāco**. Duvidhampi hi padamicchanti saddavidū. **Khāribharitanti** khārīhi paripuṇṇaṃ. Ekena vi-karena padaṃ vaḍḍhetvā “khārividha”nti paṭhantānaṃ vāde samuccayasamāsenā atthaṃ dassento “**ye panā**”tiādimāha.

Nanu upasampannassa bhikkhuno sāsānikopi yo koci anupasampanno atthato paricārakova hoti api khīṇāsavasāmaṇero, kimaṅgaṃ pana bāhirakapabbajītetī anuyogaṃ paṭi tatha viṣesaṃ dassetaṃ “**kāmañcā**”tiādi vuttaṃ. **Vuttanayenāti** “kappiya...pe... vattakaraṇavasenā”ti evaṃ vuttanayena. Anekasatasahassasaṃvaravinayasamādānavasena upasampannabhāvassa viṣiṭṭhabhāvato khīṇāsavasāmaṇeropi puthujjanabhikkhuno paricārakoti vutto.

“Navakoṭisahasāni, asītisatakoṭīyo;
Paññāsasatasahasāni, chattimsa ca punāpare;

Ete saṃvaravinayā, sambuddhena pakāsītā;
Peyyālamukhena niddiṭṭhā, sikkhā vinayasamvare”ti. (visuddhi. 1.20; apa. aṭṭha. 2.55; paṭi. ma. aṭṭha. 1.2.37);

Evaṃ vuttappabhedānaṃ anekasatasahasānaṃ saṃvaravinayānaṃ samādāya sikkhanena uparibhūtā aggabhūtā sampadāti hi **upasampadā**, tāya cesa upasampadāya puthujjanabhikkhu upasampannoti.

Ayaṃ panāti yathāvuttalakkhaṇo tāpaso. Tāpasā hi kammavādikiriyavādino, na sāsānassa paṭāṇībhūtā, yato nesaṃ pabbajitumāgatānaṃ vināva titthiyaparivāsenā khandhake pabbajjā anuññātā. Tapo etesamatthīti **tāpasā** ta-kārassa dīghaṃ katvā. “Lomasā”tiādīsu viya hi sa-paccayamicchanti saddavidū. Idaṃ vuttaṃ hoti – kāmaṃ khīṇāsavopi sāmaṇero puthujjanassa bhikkhuno atthato paricārakova hoti, so pana vattakaraṇamatteneva paricārako, na lāmakabhāvena. Tāpaso tu guṇavasena ceva veyyāvaccakaraṇavasena ca lāmakabhāveneva paricārako, na vattakaraṇamattena, evamimesaṃ nānākaraṇaṃ sandhāya tāpasasseva paricārakatā vuttāti.

“**Kasmā**”tiādinā codako kāraṇaṃ codeti. “**Yasmā**”tiādinā ācariyo kāraṇaṃ dassetvā pariharati. Evaṃ saṅkhepato pariharitamattaṃ vivarituṃ “**imasmīñhī**”tiādi vuttaṃ. **Asakkontanti** asamatthanena vipaṭipajjantaṃ alajjīm. **Khuradhārūpamanti** khuradhārānaṃ matthakeneva akkamitvā gamanūpamaṃ. **Bahujanassammatāti** mahājanena seṭṭhasammatā. **Aññeti** apare bhikkhū. **Idhāti** tāpasapabbajjāya. Chandena saha carantīti **sachandacārino**, yathākāmaṃ paṭipannaṃ vuttaṃ hoti. **Anusikkhantoti** diṭṭhānugatiyā sikkhanto. **Tāpasāva bahukā honti**, na bhikkhū.

Kudālapīṭakānaṃ nibbacaṇaṃ heṭṭhā vuttameva. **Bahujanakuhāpanatthanti** bahuno janassa vimhāpanatthaṃ. **Aggisālanti** aggihuttasālaṃ. **Nānādārūhīti** palāsaruḅkhadāṇḍādīhi nānāvidhasamidhādārūhi. **Homakaraṇavasenāti** yaññākaraṇavasena.

Udakavasenettha **pānāgāraṃ**. Tenāha “**pānīyaṃ upaṭṭhapetvā**”tiādi. Yaṃ bhattapuṭaṃ vā yāni taṇḍulādāni vāti sambandho. **Ambilayāgu** nāma takkādiambilasamyuttā yāgu. Taṇhādīhi āmasitabbato cīvarādi **āmisam** nāma. **Vaḍḍhiyāti** diguṇatiguṇādivaḍḍhiyā. **Kuṭumbaṃ saṅghapetīti** dhanam paṭiṭṭhāpeti. Yathāvuttamatthaṃ pāḷiyam nidassanamattena vuttanti āha “**idaṃ panassa paṭipattimukha**”nti, idaṃ pana pāḷivacanam assa catutthassa puggalassa kohaṅṅapaṭipattiyā mukhamattanti attho. Kasmāti ce? So hi nānāvidhena kohaṅṅena lokam vimhāpayanto tattha acchati. Tenāha “**iminā hī**”tiādi. **Evanti** “tattha pānīyaṃ upaṭṭhapetvā”tiādinā vuttanayena.

“Sabbāpi tāpasapabbajjā niddiṭṭhā”ti dhammādhiṭṭhānanayena dassitameva puggalādhiṭṭhānanayena vivarituṃ “**aṭṭhavidhā hī**”tiādi vuttaṃ. Khalādīsu manussānam santike upaṭiṭṭhitvā vīhimuggamāsatiḷādāni bhikkhācariyanīyāmena saṅkaḍḍhitvā uñchanam **uñchā**, sā eva cariyā vutti etesanti **uñchācariyā**. Aggipakkikāya bhattabhikkhāya jīvantīti **aggipakkikā**, na aggipakkikā **anaggipakkikā**, taṇḍulabhikkhāya eva jīvikāti vuttaṃ hoti. Uñchācariyā hi khalādīni gantvā upaṭiṭṭhitvā manussehi diyyamānam khalaggaṃ nāma dhaṅṅam paṭiggaṇhanti, anaggipakkikā pana tādisamapaṭiggaṇhitvā taṇḍulameva paṭiggaṇhantīti ayametesam viseso. Na sayam pacantīti **asāmapākā**, pakkabhikkhāya eva jīvikā. Ayo viya kaṭṭhino muṭṭhippamāṇo pāsāṇo **ayamuṭṭhi** nāma, tena vattantīti **ayamuṭṭhikā**. Dantena uppāṭitaṃ vakkalaṃ rukkhattaco **dantavakkalaṃ**, tena vattantīti **dantavakkalikā**. Pavattaṃ rukkhādito pātāpitaṃ phalaṃ bhuñjanti sīlenāti **pavattaphalabhojino**. Paṇḍupalāsasaddassa ekasesanayena dvidhā attho, jīṇṇatāya paṇḍubhūtaṃ palāsāṅceva jīṇṇapakkabhāvena taṃsadisaṃ pupphaphalādi cāti. Tena vakkhati “sayam patitāneva pupphaphalapaṇḍupalāsādīni khādantā yāpentī”ti, (dī. ni. aṭṭha. 1.280) tena vattantīti **paṇḍupalāsikā**, sayampatitapaṇṇapupphaphalabhojino. Idāni te aṭṭhavidhepi sarūpato dassetuṃ “**tatthā**”tiādi vuttaṃ. **Kenīyajāṭilavatthu** khandhakavaṇṇanāya (mahāva. aṭṭha. 300) gahetabbaṃ.

Saṅkaḍḍhitvāti bhikkhācariyāvasena ekajjhaṃ katvā.

Taṇḍulabhikkhanti taṇḍulameva bhikkhaṃ. Bhikkhitabbā yācitabbā, bhikkhūnam ayanti vā **bhikkhāti** hi bhikkhāsaddo taṇḍulādīsupi nirulho. Tena vuttaṃ “**pacitvā paribhuñjantī**”ti.

Bhikkhāpariyetthi nāma dukkhāti paresam gehato geham gantvā bhikkhāya pariyesanā nāma dīnavuttibhāvena dukkhā.

Ye pana “pāsāṅassa pariggaho nāma dukkho pabbajitassā”ti danteheva uppāṭetvā khādanti, te **dantavakkalikā nāmāti** ayam aṭṭhakathāmuttakanayo.

Paṇḍupalāsasaddo pupphaphalavisayopi sadisatākappanenāti dasseti “**pupphaphalapaṇḍupalāsādīni**”ti iminā.

Teti paṇḍupalāsikā. Nidassanamattametam aññesampi tathā bhedasambhavato. **Pāpuṇanaṭṭhāneti** gahetuṃ sampāpuṇanaṭṭhāne. **Ekarukkhato** paṭhamam upagatarukkhato.

Kathamettāvatā sabbāpi tāpasapabbajjā niddiṭṭhāti codanā na tāva visodhitāti āha “**imā panā**”tiādi. **Catūhiyevāti** “khārividhamādāyā”tiādinā vuttāhi pavattaphalabhojanikā, kandaṃulaphalabhojanikā, agyāgārikā, āgārikā ceti catūhi eva tāpasapabbajjāhi. **Agāraṃ bhajantīti** agāraṃ nivāsabhāvena upagacchanti. Iminā hi “catudvāraṃ agāraṃ karitvā acchati”tiādinā idha vuttāya catutthāya tāpasapabbajjāya tesamavarodhatam dasseti. Evamitaresupi paṭilomato yojanā veditabbā. Aggiparicaraanavasena **agyāgāraṃ bhajanti**. Evaṃ pana tesamavarodhatam vadanto tadanurūpaṃ imesampi paccekaṃ duvidhatam dassetiṭi daṭṭhabbaṃ.

281. Ācariyena pokkharasātinā saha pavattatīti **sācariyako**, tassa. **Apāyamukhampīti** vināsakāraṇampi. Pageva vijjācāraṇasampadāya sandissaneti pi-saddo garahāyam. Tena vuttaṃ “**api nu**

tvam imāya anuttarāya vijjācaraṇasampadāya sandissasi sācariyako’tiādi.

Tatrāyamaṭṭhakathāmuttakanayo – “no hidam bho gotamā”’ti sandissanam paṭikkhipitvā asandissanākārameva vibhāvetuṃ “**ko cāha**”’ntiādi vuttam. Sācariyako aham ko ca kīdiso hutvā anuttarāya vijjācaraṇasampadāya sandissāmi, anuttarā vijjācaraṇasampadā kā ca kīdisā hutvā sācariyake mayi sandissati, ārakā aham...pe... sācariyakoti saha pāṭhasesena yojanā.

282. Apāye vināsanupāye niyutto **āpāyiko**. Tabbhāvaṃ na paripūreti paripūretuṃ na sakkotīti **aparipūramāno**, tabbhāvena aparipuṇṇoti attho. Attanā āpāyikena hontenāpi tabbhāvaṃ aparipūramānena pokkharasātinā eṣā vācā bhāsītāti atthato sambandhattā katvatthe cetam paccattavacananti āha “**āpāyikenāpi aparipūramānenā**”’ti. Apica attanā aparipūramānena āpāyikenāpi sayam aparipūramānāpāyikena hutvāpi pokkharasātinā eṣā vācā bhāsītāti atthayuttito itthambhūtalakkhaṇe cetam paccattavacanantipi evam vuttam. Añño hi saddakkamo, añño atthakkamoti. Keci pana “karaṇatthameva dassetuṃ evam vutta”’nti vadanti, tadayuttameva padadvayassa kattupadena samānatthattā, samānatthānañca padānaṃ aññamaññaṃ karaṇabhāvānupapattito, alamatipapañcena.

Pubbakaisibhāvānuyogavaṇṇanā

283. Dīyateti datti, sā eva **dattikanti** āha “**dinnaka**”’nti. Adātukāmaṃpi dātukāmaṃ katvā sammukhā paramāvatteti sammūlham karoti etāyāti **sammukhāvattāni**. Tenāha “**na demīti vuttuṃ na sakkoti**”’ti. Puna **tassāti** brāhmaṇassa. Kāraṇānurūpaṃ rājūnaṃ puṇṇapattanti āha “**kasmā me dinno**”’ti. **Saṅkhalalitakuṭṭhanti** dhotasaṅkhamiva setakuṭṭham. Setapokkhararajatato guṇasamānakāyattā evamāha. **Anugacchatīti** paramanubandhati.

Yadi duvidhenapi kāraṇena rājā brāhmaṇassa sammukhābhāvaṃ na deti, atha kasmā tadupasaṅkamanam na paṭikkhittanti āha “**yasmā panā**”’tiādi. “**Khettavijjāyāti** nītisatthe”’ti (dī. ni. ṭī. 1.283) ācariyena vuttam. Heṭṭhāpi **brahmajālavaṇṇanāyam** evam vuttam “khettavijjāti abhēyyamāsuraṅkharājasatthādīnītisattha”’nti. (Dī. ni. aṭṭha. 1.21) **dussamettha** tirokaraṇiyam. Tenāha “**sāṇipākārassa anto thatvā**”’ti. Antasaddena pana tabbhāvena pade vaḍḍhiyamāne **dussantam** yathā “vananto”’ti. “**Payānti** saddham, sassatikam vā. Tenāha abhiharitvā dinna”’nti ācariyena vuttam, tasmā matakabhattasaṅkhepena vā niccabhattasaṅkhepena vā abhiharitvā dinnam bhikkhanti attho veditabbo. “**Ayam panā**”’tiādi atthāpattivacanam. **Niṭṭhanti** nicchayam. Kasmā pana bhagavā brāhmaṇassa evarūpaṃ amanāpaṃ mammavacanam avocāti codanam kāraṇam dassetvā sodhetuṃ “**idam panā**”’tiādi vuttam. Rahassampi paṭicchannampi mammavacanam pakāsesīti sambandho.

284. Rājāsanam nāma hatthikkhandhapadesam sandhāya “**hatthigīvāya vā nisinno**”’ti pāliyam vuttam. **Rathūpatthareti** rathassa upari attharitatpadesa. Tenāha “**rathamhī**”’tiādi. **Uggatuggatehīti** uggatānamatisayena uggatehi. Na hi vicchāsamāso lokikehi abhimatoti. Rañño apaccam **rājañño**, bahukattam pati, ekasesanayena vā “**rājaññehī**”’ti vuttam. **Pākaṭamantananti** pakāsabhūtam mantanam. Tadevidhāhippetam, na rahassamantanam suddādīhipi suyyamānassa icchittā. Tena vuttam “**atha āgaccheyya suddo vā suddadāso vā**”’tiādi. **Tādisehiyevāti** rañño ākārasadiseheva. Tassatthassa sādhanasamattham vacanam raññā bhaṇitam yathā, tathā sopi tassatthassa sādhanasamatthameva bhaṇitam vacanam apinu bhaṇatīti yojetabbam.

285. “**Pavattāro**”’ti etassa pāvacanabhāvena vattāroti saddato attho. Yasmā pana te tathābhūtā mantānam pavattakā nāma, tasmā adhippāyato attham dassetuṃ “**pavattayitāro**”’ti vuttam. Vadasaddena, hi tupaccayena ca “vattāro”’ti padasiddhi, tathā vatusaddena “pavattayitāro”’ti. Idam ācariyassa (dī. ni. ṭī. 1.285) ca ācariyasāriputtattherassa ca matam. Vatusaddeneva “pavattāro”’ti padasiddhiṃ dassetītipi keci vadanti. Padadvayassa tulyādhikaraṇattā “**mantamevā**”’ti vuttam. “Sudde bahi katvā raho bhāsītappaṭṭhena mantā eva tam tam atthapaṭipattihetutāya pada”’nti hi tulyādhikaraṇam hoti, anupanītāsādhāraṇatāya rahassabhāvena vattabbāya mantanakiriyāya padamadhigamupāyantipi **mantapadanti** aṭṭhakathāmuttako nayo. **Gītanti** gāyanavasena sajjhāyitam, gāyanampidha

udattānudattādisarasampādanavaseneva adhippetanti vuttam **“sarasampattivasenā”**ti. Pāvacanabhāvena **aññesaṃ vuttam**. Tamaññesaṃ vādāpanavasena **vācitam**. Saṅgahetvā uparūpari saññūlāhavasena **samupabyūlham**. Iruvedayajurvedasāmavedādivasena, tatthāpi paccekam mantabrahmādivasena, ajjhāyānuvākādivasena ca **rāsikatam**. Yathāvuttanayeneva **piṇḍam katvā ṭhapitam**. **Aññesaṃ vācitam anuvācentī**ti aññesaṃ kammabhūtānaṃ tehi vācāpitaṃ mantapadaṃ etarahi brāhmaṇā aññesaṃ anuvācāpentī.

Tesanti mantakattūnaṃ. Dibbacakkhuparibhaṇḍaṃ yathākammūpagaññaṃ, paccakkhato dassanaṭṭhena dibbacakkhusadisaṅca pubbenivāsānussatiññaṃ sandhāya **“dibbena cakkhunā”**ti vuttam. Ato dibbacakkhuparibhaṇḍena yathākammūpagaññaṃna sattānaṃ kammassakatādīni ceva dibbacakkhusadisena pubbenivāsānussatiññaṃna atītakappe brāhmaṇānaṃ mantajjhenavidhiṅca oloketvāti attho gahetabbo. Rūpameva hi paccuppannaṃ dibbacakkhussa ārammaṇanti tamidha aṭṭhānagataṃ hoti. **Pāvacanena saha saṃsanditvā**ti yaṃ kassapasammāsambuddhena vuttam vaṭṭasannissitaṃ vacanaṃ, tena saha saṃsanditvā aviruddham katvā. Na hi tesam vivatṭasannissito attho paccakkhato hoti. **Ganthimsūti** pajjagajjabandhavasena sakkatabhāsāya bandhimsu. **Aparā pareti** aṭṭhakādīhi aparā aññepi pare pacchimā okkākarājakālādīsu uppanā. **Pāṇātipātādīni pakkhipitvā**ti aṭṭhakādīhi ganthitamantapadesveva pāṇātipātādīkilesasannissitapadānaṃ tattha tattha pakkhipanaṃ katvā. **Viruddhe akamsūti** suttanipāte **brāhmaṇadhammikasuttādīsu** (su. nī. brāhmaṇadhammikasutta) āgatanayena saṃkilesikatthadīpanato paccanīkabhūte akamsu. **Isīti** nidassanamattaṃ. “Isi vā isitthāya paṭipanno vā”ti hi vattabbaṃ. Kasmā panettha paṭiññāgahaṇavasena desanāsotapatitaṃ na karotīti āha **“idha bhagavā”**tiādi. **Idhāti** “tyāham mante adhīyāmi, ‘sācariyako’ti tvam maññasi”ti vuttaṭṭhāne. **Paṭiññaṃ aggahetvā**ti yathā heṭṭhā paṭiñña gahitā, tathā “taṃ kiṃ maññasi ambaṭṭha, tāvatā tvam bhavissasi isi vā isitthāya vā paṭipanno sācariyakoti, no hidam bho gotamā”ti evaṃ idha paṭiññaṃ aggahetvā.

286. Nirāmagandhāti kilesāsucivasena vissagandharahitā. **Anitthigandhāti** itthīnaṃ gandhamattassapi avisahanena itthigandharahitā. **Rajojalladharāti** pakatirajasedādijalladharā. **Pākārapurisaguttīti** pākārāvaraṇaṃ, purisāvaraṇaṅca. Ettha pana **“nirāmagandhā”**ti etena tesam dasannaṃ brāhmaṇānaṃ vikkhambhitakilesataṃ dasseti, **“anitthigandhā, brahmacārino”**ti ca etena ekavīhāritaṃ, **“rajojalladharā”**ti etena maṇḍanavibhūsanābhāvaṃ, **“araññāyatane pabbatapādesu vasimsū”**ti etena manussūpacāraṃ pahāya vivittavāsaṃ, **“vanamūlaphalāhārā vasimsū”**ti etena sālīmaṃsodanādīpanīṭhāra paṭikkhepaṃ, **“yadā”**tiādinā yānavāhanapaṭikkhepaṃ, **“sabbadisāsū”**tiādinā rakkhāvaraṇapaṭikkhepaṃ. Evaṅca dassento micchāpaṭipadāpakkhikaṃ sācariyakassa ambaṭṭhassa vuttiṃ upādāya sammāpaṭipadāpakkhikāpi tesam brāhmaṇānaṃ vutti ariyavinaye sammāpaṭipattiṃ upādāya micchāpaṭipadāyeva. Kathaṅhi nāma te bhavissati sallekhaṇapaṭipattiyuttatāti. “Evaṃ su te”tiādinā bhagavā ambaṭṭhaṃ santajjento niggaṇhātīti vibhāveti. Idaṅhi vakkhamānāya pāliyaṃ piṇḍatthadassananti.

Dussapaṭṭikā **dussapaṭṭam**. Dussakalāpo **dussaveṇī**. **Veṭhakehīti** veṭhakaṇapaṭṭakehi, dussehi saṃveṭhetvā katanamitaphāsukāhīti vuttam hoti. **Kappetunti** kattarikāya chinditum. **Kappitavālehi**ti etthāpi eseva nayo. “Na bhikkhave massu kappāpetabba”ntiādisu (cūlava. 275) viya hi **kapusaddo** chedane vattati. **Yuttaṭṭhānesūti** gīvāsīsavāladhīsu. **Vālāti** tesu ṭhānesu jāyamānā lomā. Sahacaraṇavasena, ṭhānīnāmena vā **“kuttavālā”**ti vuttā. Keci pana “vāḷayuttattā”ti pāṭhaṃ kappetvā vāḷarūpayuttattāti atthaṃ vadanti, pāliyaṇapekkhānameva tesam doso. “Kuttavālehi vāḷavārathehi”ti pāliyaṃ vuttam. **Samantānagaranti** nagarassa samantato. **Pākārassa adbhōhāge katasudhākammaṃ** ṭhānaṃ nagarassa samīpe kattabbato, upakārakaraṇato ca **“upakārikā”ti vuccati**. Nagarassa upakārikā etāsanti **nagarūpakārikāyo**, rājadhānīapekkhāya itthilīṅganiddeso. Tenāha **“idha panā”**tiādi. **Matīti** vicikicchāvasena anekamsikajānanā. Upari desanāya avaḍḍhakāraṇaṃ dassento **“idam bhagavā”**tiādimāha. Pāliyaṃ **so maṃ pañhenāti** so jano maṃ pucchāvasena sodheyya. **Ahaṃ veyyākaraṇena sodhessāmīti** ahampimaṃ vissajjanāvasena sodhessāmīti yathārahamadhikāravasena attho vedītabbo.

Dvelakkhaṇadassanavaṇṇanā

287. “**Nisinnāna**”ntiādi anādare sāmivacanam, visesanam vā. Sankucite iriyāpathe anavasesato lakkhaṇanam dubbibhāvanato “**na sakkoti**”ti vuttam, tathā suvibhāvanato pana “**sakkoti**”ti. Pariyesanasukhatthameva tadāciṇṇatā daṭṭhabbā. **Tenāti** duvidhenapi kāraṇena.

Gavesīti ñāṇena pariyesanamakāsi. **Gaṇayantoti** ñāṇeneva saṅkalayanto. **Samānayīti** sammā ānaya samāhari. “**Kaṅkhati**”ti padassa ākaṅkhatīti atthoti āha “**aho vatā**”tiādi. Anupasaggampi hi padam katthaci saupasaggamiva atthavisesavācakaṃ yathā “gotrabhū”ti. **Tato tato** sarīrappadesato. **Kicchatīti** kilamati. Tenāha “**na sakkoti daṭṭhu**”nti. **Tāyāti** “vicinanto kicchatī”ti vuttāya **vicikicchāya**. **Tatoti** sannitṭhānam agamanato. Evaṃ “kaṅkhati”ti padassa āsisanatthataṃ dassetvā idāni saṃsayatthataṃ dassento “**kaṅkhāya vā**”tiādimāha. Tattha **kaṅkhāyāti** “kaṅkhatī”ti padena vuttāya kaṅkhāya. Asatvapadhānañhi ākhyātikam. Esa nayo sesesupi. Avatthāpabhedagatā vimati eva “**tīhi dhammehī**”ti vuttā, tippakārehi saṃsayadhammehīti attho. **Kālusiyabhāvoti** appasannatāya hetubhūto āvilabhāvo.

Vatthikosenāti nābhiyā adhobhāgasāṅkhāte vatthimhi jātena līṅgapasibbakena. “**Aṇḍakoso**”tiādisu (ma. ni. 1.152, 189; 2.27; a. ni. 7.71; pārā. 11) viya hi kosasaddo pariveṭhakapasibbake vattati. Vatthena guhitabbatā **vatthaguyham**. Yasmā bhagavato kosohitam vatthaguyham sabbabuddhāveṇikam aññehi asādhāraṇam suvisuddhakañcanamaṇḍalasannibham, attano saṅghānasannivesasundaratāya ājāneyyagandhahatthino varaṅgaparamacārubbhāvam, vikasamānatapaniyāravindasamujjalakesarāvattavilāsam, sañjhāpabhānurañjitajalavanantarābhilakkhitasampunṇacandamaṇḍalasobhañca attano siriyā abhibhuyya virājati, yaṃ bāhirabbhantaramalehi anupakkiliṭṭhatāya, cirakālaparicitabrahmacariyādhikāratāya, saṅghitasāṅghānasampattiyā ca kopīnampi samānam akopīnameva jātam. Tena vuttam “**bhagavato hī**”tiādi. **Varavāraṇassevāti** varagandhahatthino iva. **Pahūtabhāvanti** puthulabhāvam. Ettheva hi tassa saṃsayo. Tanumudusukumārādīsu panassa guṇesu vicāraṇā eva nāhosi.

288. “**Tathārūpa**”nti idam samāsapadanti āha “**taṃrūpa**”nti. **Etthāti** yathā ambaṭṭho kosohitam vatthaguyhamaddassa, tathā iddhābhisāṅkhāramabhisāṅkharāṇe. Iminā hi “**tathārūpaṃ iddhābhisāṅkhāram abhisāṅkharī**”tiādi pāḷiparāmasanam, ato cettha saha iddhābhisāṅkhāranayena vatthaguyhadassanakāraṇam milindapañhāpāṭhena (mi. pa. 3.3) vibhāvitam hoti. Keci pana “**vatthaguyhadassane**”ti parāmasanti, tadayuttameva. Na hi tam pāḷiyam, aṭṭhakathāyañca atthi, yaṃ evam parāmasitabbam siyā, iddhābhisāṅkhāranayo ca avibhāvito hoti. **Kimettha aññena vattabbam** catupaṭisambhidāpattena chaḷabhiññena vādīvarena bhadantanāgasenattherena vuttanayeneva sampaṭicchitabbatā. Hirī karīyate etthāti **hirikaraṇam**, tadeva okāso tathā, hiriyitabbatṭhānam. **Uttarassāti** suttanipāte āgatassa uttaramāṇavassa (ma. ni. 2.384). Sabbesampi cetesam vatthu suttanipātato gahetabbam.

Chāyanti paṭibimbam. Katham dassesi, kīdisam vāti āha “**iddhiyā**”tiādi. **Chāyārūpakamattanti** bhagavato paṭibimbarūpakameva, na pakativatthaguyham, tañca buddhasantānato vinimuttattā rūpakamattam bhagavatā sadisavaṇṇasaṅghānāvayavam iddhimayam bimbakameva hoti, evañca katvā appakathena ka-kārena visesitavacanam upapannam hoti. Chāyārūpakamattam iddhiyā abhisāṅkharitvā dassesīti sambandho. “**Tam** pana dassento bhagavā yathā attano buddharūpaṃ na dissati, tathā katvā dassetī”ti (dī. ni. 1.288) ācariyā vadanti. Tadetaṃ bhadantanāgasenattherena vuttena iddhābhisāṅkhatachāyārūpakamattadassanavacanena saṃsandati ceva sameti ca yathā tam “**khīrena khīram, gaṅgodakena yamunodaka**”nti daṭṭhabbam. Tathāvacaneneva hi sesabuddharūpassa taṅkhaṇe adassitabhāvo atthato āpanno hoti. Nivāsananivatthātādivacanena panettha buddhasantānato vinimuttassapi chāyārūpakassa nivāsanaḍābhigatabhāvo dassito, na ca codetabbam “**katham nivāsanaḍāntaragatam chāyārūpakam bhagavā dasseti, kathañca ambaṭṭho passati**”ti. Acinteyyo hi iddhivisayoti. **Chāyam diṭṭheti** chāyāya diṭṭhāya. **Etanti** chāyārūpakam. Bujjhanake satī jīvitanimittampi **hadayamaṃsam dasseyyāti** adhippāyo. **Ninnetvāti** nīharitvā. Ayameva vā pāṭho.

Kallosīti vissajjane tvam kusalo cheko asi, yathāvutto vā vissajjanāmaggo upapanno yutto asīti attho. “Kusalo”ti keci paṭhanti, ayuttametam. Milindapañhe hi sabbattha vissajjanāvasāne “kallo” icceva diṭṭhoti.

Ninnāmetvāti mukhato nīharaṇavasena kaṇṇasotādiabhimukhaṃ paṇāmetvā, adhippāyameva dassetuṃ “**nīharitvā**”ti vuttaṃ. **Kathinasūciṃ viyāti** ghanasukhumabhāvāpādanena kakkhaḷasūcimiva katvā. **Tathākaraṇenāti** kathinasūciṃ viya karaṇena. **Etthāti** pahūtajivhāya. **Mudubhāvo, dīghabhāvo, tanubhāvo** ca dassito amuduno ghanasukhumabhāvāpādanatthamasakkuṇeyyattāti ācariyena (dī. ni. ṭī. 1.288) vuttaṃ. Tatrāyamadhippāyo – yasmā mudumeva ghanasukhumabhāvāpādanattham sakkoti, tasmā tathākaraṇena mudubhāvo dassito aggi viya dhūmena. Yasmā ca muduyeva ghanasukhumabhāvāpajjanena dīghagāmi, tasmā kaṇṇasotānumasanena dīghabhāvo dassito. Yasmā pana mudu eva ghanasukhumabhāvāpajjanena tanu hoti, tasmā nāsikāsotānumasanena tanubhāvo dassitoti. Aputhulassa tathāpaṭicchādanatthamasakkuṇeyyattā **nalāṭacchādanena puthulabhāvo** dassito.

289. Patthento hutvā udikkhantoti yojetabbaṃ.

290. Mūlavacanam **kathā**. Paṭivacanam **sallāpo**.

291. “Uddhumātaka”ntiādīsu (saṃ. ni. 5.242; visuddhi. 1.102) viya ka-saddo jigucchanatthoti vuttaṃ “**tameva jigucchanto**”ti. **Tamevāti** paṇḍitabhāvameva, ambaṭṭhamevātipi attho. Ambaṭṭhañhi sandhāya evamāha. Tathā hi pāḷiyam vuttaṃ “evam...pe... ambaṭṭham māṇavam etadavocā”ti. Kāmañca ambaṭṭham sandhāya evam vuttaṃ, nāmagottavasena pana aniyamaṃ katvā garahanto puthuvacanena vadatīti veditabbaṃ. “Yadeva kho tva”nti etassa aniyamavacanassa “**evarūpenā**”ti idaṃ niyamavacananti dasseti “**yādiso**”tiādīnā. Bhāvenabhāvalakkhaṇe bhumavacanatthe karaṇavacananti vuttaṃ “**edise atthacarake**”ti. **Na aññatrāti** na aññattha sugatiyam. Ettha pana “**atthacarakenā**”ti iminā byatirekamukhena anatthacarakatamyeva vibhāvetīti daṭṭhabbaṃ. “Upaneyya upaneyyā”ti idaṃ tvādyantaṃ vicchāvacananti āha “**brāhmaṇo kho panā**”tiādi. **Evam upanetvā upanetvāti** tam tam dosaṃ upanīya upanīya. Tenāha “**suṭṭhu dāsādibhāvam āropetvā**”ti. **Pātesīti** pavaṭṭanavasena pātesī. Yañca agamāsi, tampi assa tathāgamanasañkhātam ṭhānam acchinditvāti yojanā.

Pokkharasātibuddhūpasāṅkamanavaṇṇanā

292-3-6. Kittako pana soti vuttaṃ “**sammodanīyakathāyapi kālo natthī**”ti. **Āgamā nūti** āgato nu. **Khoti** nipātamattaṃ. **Idhāti** ettha, tumhākaṃ santikanti attho. **Adhivāsetūti** sādiyatu, tam pana sādiyanam idha manasāva sampaṭiggaho, na kāyavācāhīti āha “**sampaṭicchātū**”ti. Ajja pavattamānam **ajjatanam**, puññaṃ, pītipāmojjañca, imamattham dassetuṃ “**yam me**”tiādi vuttaṃ. **Kāranti** upakāram, sakkāram vā. **Acopetvāti** acāletvā.

297. “**Sahatthā**”ti idaṃ karaṇatthe nissakkavacanam. Tenāha “**sahatthenā**”ti. **Suhitanti** dhātam, jigghacchādukkabhāvena vā sukhitaṃ. **Yāvadatthanti** yāva attho, tāva bhojanena tadā kataṃ. Paṭikkhepapavāraṇāvettha adhippetā, na nimantanapavāraṇāti āha “**ala**”ntiādi. “**Hatthasaññāyā**”ti nidassanamattaṃ aññattha mukhavikārena, vacībhedena ca paṭikkhepassa vuttattā, ekakkhaṇepi ca tathāpaṭikkhepassa labbhanato. Onītā pattato pāṇi etassāti **onītapattapāṇīti** bhinnādhikaraṇavisayo tipado bāhiratthasamāso. Muddhajaṇa-kārena, pana saññogata-kārena ca **onīttasaddo** vinābhūtetīti dasseti “**onītapattapāṇīntipi pāṭho**”tiādīnā. Sucikaraṇatthe vā **onīttasaddo**. Onīttam āmisāpanayanena sucikataṃ pattam pāṇi ca assāti hi **onītapattapāṇi**. Tenāha “**hatthe ca pattañca dhovivā**”ti. “Onīttam nānābhūtam vinābhūtam, āmisāpanayanena vā sucikataṃ pattam pāṇito assāti **onītapattapāṇī**”ti (sārattha. ṭī. 1.23) **sāratthadīpaniyam** vuttaṃ. Tattha pacchimavacanam “**hatthe ca pattañca dhovivā**”ti iminā asaṃsandano vicāretabbaṃ. **Evambhūtanti** “**bhuttāvim onītapattapāṇi**”nti vuttappakārena bhūtam.

298. Anupubbim kathanti anupubbaṃ kathetabbaṃ kathaṃ. Tenāha “**anupaṭipāṭikatha**”nti. Kā pana sāti āha “**dānānantaram sīla**”ntiādi, tenāyamattho bodhito hoti – dānakathā tāva pacurajanesupi pavattiyā sabbasādhāraṇattā, sukarattā, sīle patiṭṭhānassa upāyabhāvato ca ādito kathetabbā. Pariccāgasīlo hi puggalo pariggahavattḥūsu vinissaṭṭabhāvato sukheveva sīlāni samādiyati, tattha ca suppaṭiṭṭhito hoti, sīlena dāyakaṭṭiggāhakasuddhito parānuggahaṃ vatvā parapīḷānivattivacanato, kiriyadhammaṃ vatvā akiriyadhammavacanato, bhogasampattihetuṃ vatvā bhavasampattihetuvacanato ca **dānakathānantaram sīlakathā** kathetabbā. Tañce dānasīlaṃ vaṭṭanissitaṃ, ayaṃ bhavasampatti tassa phalanti dassanattaṃ **sīlakathānantaram saggakathā**. Tāya hi evaṃ dassitaṃ hoti “imehi dānasīlamayehi, paṇītaṇītataraḍibhedabhinnehi ca puññakiriyavattḥūhi etā cātumahārājikādīsu paṇītaṇītataraḍibhedabhinna aparimeyyā dibbasampattiyo laddhabbā”ti. Svāyaṃ saggo rāgādīhi upakkiliṭṭho, sabbathā pana tehi anupakkiliṭṭho ariyamaggoti dassanattaṃ **saggakathānantaram maggakathā**. Maggañca kathentena tadadhigamupāyadassanattaṃ kāmānaṃ ādīnavo, okāro, saṃkilesa, nekkhamme ānisaṃso ca kathetabbo. Saggapariyāpannāpi hi sabbe kāmā nāma bahvādīnavā aniccā addhuvā vipariṇāmadhammā, pageva itareti **ādīnavo**, sabbepi kāmā hīnā gammā pothujjanikā anariyā anattasamhitāti lāmakabhāvo **okāro**, sabbepi bhavā kilesānaṃ vatthubhūtāti **saṃkilesa**, sabbasaṃkilesavippayuttaṃ nibbānanti **nekkhamme ānisaṃso** ca kathetabboti. Ayampi attho bodhitoti veditabbo. **Maggoti** hi ettha **iti**-saddena ādyatthena kāmādīnavādīnampi saṅgahoti ayamattavaṇṇanā katā. Tenāha “seyyathidaṃ – dānakathaṃ sīlakathaṃ saggakathaṃ kāmānaṃ ādīnavaṃ okāraṃ saṃkilesaṃ nekkhamme ānisaṃsaṃ pakāseti”ti. Vitthāro **sāratthadīpaniyaṃ** (sārattha. ṭī. 3.26) gahetabbo.

Kasi-saddo ñāṇena gahaṇeti āha “**gahitā**”tiādi. Sāmaṃsaddena nivattetabbamatthaṃ dasseti “**asādhāraṇā aññesa**”nti iminā, lokuttaradhammādhigame parūpadesavigatattā, ekeneva loke paṭhamaṃ anuttarāya sammāsambodhiyā abhisambuddhattā ca aññesamasādhāraṇāti vuttaṃ hoti. **Dhammacakkhanti ettha sotāpattimaggo va adhippeto, na brahmāyusutte** (ma. ni. 2.383 ādayo) viya heṭṭhimā tayo maggā, na ca **cūlarāhulovādasutte** (ma. ni. 3.416) viya āsavakkhayo. “Tassa uppattiākāradassanatta”nti kasmā vuttaṃ, nanu maggañāṇaṃ asaṅkhatadhammārammaṇameva, na saṅkhatadhammārammaṇanti codanaṃ sodhento “**tañhī**”tiādimāha. **Kiccavasenāti** asammohapaṭivedhakiccavasena.

Pokkharasātiupāsakattapaṭivedanākathāvaṇṇanā

299. Pāḷiyaṃ “diṭṭhadhammo”tiādisu dassanaṃ nāma ñāṇato aññampi cakkhādidassanaṃ atthīti tannivattanattaṃ “**pattadhammo**”ti vuttaṃ. Patti ca ñāṇapattito aññāpi kāyagamanā dipatti vijjatīti tato visesadassanattaṃ “**viditadhammo**”ti vuttaṃ. Sā panesā viditadhammatā ekadesatopi hotīti nippadesato viditadhammataṃ dassetuṃ “**pariyogāhadhammo**”ti vuttaṃ, tenassa saccābhisambodhameva dīpeti. Maggañāṇaṇhi ekābhisamayavasena pariññādicatukiccaṃ sādheṇtaṃ nippadesena catusaccadhammaṃ samantato ogāḷhaṃ nāma hoti. Tenāha “**diṭṭho ariyasaccadhammo etenāti diṭṭhadhammo**”ti. “Kathaṃ pana ekameva ñāṇaṃ ekasmiṃ khaṇe cattāri kiccāni sādheṇtaṃ pavattati. Na hi tādisaṃ loke diṭṭhaṃ, na āgamo vā tādiso atthī”ti na vattabbaṃ. Yathā hi padīpo ekasmiṃyeva khaṇe vaṭṭim dahati, snehaṃ pariyādiyati, andhakāraṃ vidhamati, ālokañcāpi dasseti, evameṭaṃ ñāṇanti daṭṭhabbaṃ. “Maggasamaṅgissa ñāṇaṃ dukkhepetāṃ ñāṇaṃ, dukkhasamudayepetaṃ ñāṇaṃ, dukkhanirodhepetāṃ ñāṇaṃ, dukkhanirodhagāminiyā paṭipadāyapetaṃ ñāṇa”nti (vibha. 794) suttapadampettha udāharitabbanti.

Tiṇṇā vicikicchāti sappāṭibhayakantārasadisā soḷasavattḥukā, aṭṭhavattḥukā ca vicikicchā **anena** vitīṇṇā. **Vigatā kathaṃkathāti** pavattītiādisu “evaṃ nu kho, na nu kho”ti evaṃ pavattikā kathaṃkathā **assa** vigatā samucchinnā. **Visāradabhāvaṃ pattoti** sārājajakāraṇaṃ pāpadhammānaṃ pahīnattā, tappaṭipakkhesu ca sīlādiguṇesu suppaṭiṭṭhitattā visāradabhāvaṃ veyyattiyaṃ patto adhigato. Sāyaṃ vesārajappatti suppaṭiṭṭhitatā katthāti codanāya “satthusāsane”ti vuttanti dassento “**kattha?** **Satthusāsane**”ti āha. Attanāva paccakkhato diṭṭhattā, adhigatattā ca na assa paccayo paccetabbo paro

atthīti attho. Tatthādhippāyamāha “**na parassā**”tiādinā. **Na vattatīti** na pavattati, na paṭipajjati vā, na paraṃ pacceti pattiyaṃyati **aparappaccayoti**pi yujjati. Yaṃ panettha vattabbampi avuttam, tadetaṃ pubbe vuttatā, parato vuccamānattā ca avuttanti vedittabbaṃ.

Iti sumaṅgalavilāsiniyā dīghanikāyattakathāya paramasukhumagambhīraduranubodhatthaparidīpanāya suvimalavipulapaññāveyyattiyajananāya ajjavamaddavasoraccasaddhāsati dhitibuddhikhantivīriyādidhammasamaṅginā sātthakathe piṭakattaye asaṅgāsaṃhīravisāradaññācārīnā anekappabhedasakasamayasaṃyantaragahanajjhogāhinā mahāgaṇinā mahāveyyākaraṇena ñāṇābhivaṃsadhammasenāpatināmattherena mahādhammarājādhirājagarunā katāya sādhuvilāsiniyā nāma līnatthapakāsaniyā ambaṭṭhasuttavaṇṇanāya līnatthapakāsānā.

Ambaṭṭhasuttavaṇṇanā niṭṭhitā.

4. Soṇadaṇḍasuttavaṇṇanā

300. Evaṃ ambaṭṭhasuttam saṃvaṇṇetvā idāni soṇadaṇḍasuttam saṃvaṇṇento yathānupubbaṃ saṃvaṇṇanokāsassa pattabhāvaṃ vibhāvetuṃ, ambaṭṭhasuttassānantaram saṅgītassa suttassa soṇadaṇḍasuttabhāvaṃ vā pakāsetuṃ “**evaṃ me sutam...pe... aṅgesūti soṇadaṇḍasutta**”nti āha. Sundarabhāvena sātisayāni aṅgāni etesamatthīti **aṅgā**. Taddhitapaccayassa atisayavisiṭṭhe atthitāatthe pavattito, padhānato rājakumārā, ruḥhivasena pana janapadoti vuttam “**aṅgā nāmā**”tiādi. **Idhāpi adhippetā**, na ambaṭṭhasutte eva. “**Tadā kirā**”tiādi tassā cārikāya kāraṇavacanāṃ. Āgamane ādīnavam dassetvā paṭikkhipanavasena **āgantum na dassanti**, nānujānissanti adhippāyo.

Nīlāsokakaṇikārakoviḷārakundarājarukkhādisammissatāya taṃ campakavanam **nīlādipaṅcavaṇṇakusumapaṭimaṇḍitam**, na campakarukkhānāññeva nīlādipaṅcavaṇṇakusumatāyāti vadanti, tathārūpāya pana dhātuyā campakarukkhāva nīlādipaṅcavaṇṇampi kusumam pupphanti. Idānipi hi katthaci dese dissanti, evaṅca yathārutampi aṭṭhakathāvacanaṃ upapannaṃ hoti.

Kusumagandhasugandheti vuttanayena sammissakānaṃ, suddhacampakānaṃ vā kusumānaṃ gandhehi sugandhe. Evaṃ pana vadanto na māpanakāleyeva tasmim nagare campakarukkhā ussannā, atha kho aparabhāgepiṭi dasseti. Māpanakāle hi campakarukkhānamussannatāya taṃ nagaram “**campā**”ti nāmaṃ labhi. **Issarattāti** adhipatibhāvato. Senā etassa atthīti seniko, sveva **seniyo**. Bahubhāvavisiṭṭhā cettha atthitā taddhitapaccayena jotitāti vuttam “**mahatiyā senāya samannāgatattā**”ti. **Sārasuvaṇṇasadisatāyāti** uttamajātisuvaṇṇasadisatāya. **Cūladukkhakkhandhasuttaṭṭhakathāyaṃ** pana evaṃ vuttam “**seniyo**”ti tassa nāmaṃ, **bimbīti** attabhāvassa nāmaṃ vuccati, so tassa sārabhūto dassaniyo pāsādiko attabhāvasamiddhiyā bimbisāroti vuccati”ti (ma. ni. aṭṭha. 1.180).

301-2. Saṃhatāti sannipatanavasena saṅghaṭṭitā, sannipatitāti vuttam hoti. **Ekekissāya disāyāti** ekekāya padesabhūtāya disāya. Pāḷiyam brāhmaṇagahapatikānamadhippetattā “saṅghino”ti vattabbe “saṅghī”ti puthutte ekavacanāṃ vuttanti dasseti “**etesa**”nti iminā. Evaṃ ācariyena (dī. ni. ṭī. 1.301, 302) vuttam, **saṅghīti** pana dīghavasena bahuvacanampi dissati. **Aganāti** asamūhabhūtā agaṇabandhā, “**agaṇanā**”tipi pāṭho, ayamevattho, saṅkhyāthassa ayuttattā. Na hi tesam saṅkhyā atthīti. Idaṃ vuttam hoti – pubbe antonagare agaṇāpi pacchā bahinagare gaṇam bhūtā pattāti **gaṇībhūtāti**. Abhūtatabbhāve hi karāsabhūyoge a-kārassa ī-kārādeso, ipaccayo vā. Rājarājaññādīnaṃ daṇḍadharo purisova tato tato khattiyānaṃ tayanato rakkhaṇato **khattā** niruttinayena. So hi yattha tehi pesito, tattha tesam dosam pariharanto yuttapattavasena pucchitamattaṃ katheti. Tenāha “**pucchitapaṅhe byākaraṇasamattho**”ti. Kulāpadesādīnā mahatī mattā pamāṇametassāti **mahāmatto**.

Soṇadaṇḍagaṇakathāvaṇṇanā

303. Ekassa rañño añāpavattiṭṭhānāni rajjāni nāma, viṣiṭṭhāni rajjāni virajjāni, tāneva **verajjāni**, nānāvīdhāni verajjāni tathā, tesu jātātiadinā tidhā taddhitanibbacanam. Vicitrā hi taddhitavuttīti. **Yaññānubhavanatthanti** yassa kassaci yaññassa anubhavanattham. **Teti** nānāverajjakā brāhmaṇā. **Tassāti** soṇadaṇḍabrāhmaṇassa. **Uttamabrāhmaṇoti** abhijanasampattiyā, vittasampattiyā, vijjāsampattiyā ca uggatataro, uḷāro vā brāhmaṇo. **Āvaṭṭanīmāyā** vuttāva. Lābhamaccherena nippīḷitatāya **asannipāto bhavissati**.

Aṅgeti gameti attano phalaṃ ñāpeti, sayam vā aṅgīyati gamīyati ñāyatīti **aṅgam**, hetu. Tenāha **“kāraṇenā”**ti. Lokadhammatānussaraṇena aparānīpi kāraṇāni āhaṃsūti dassento **“eva”**ntiādīmāha.

Dvīhi pakkhehīti mātupakkhena, pitupakkhena cāti dvīhi ñātipakkhehi. **“Ubhato sujāto”**ti hi etthakeyeva vutte yehi kehici dvīhi bhāgehi sujātattam vijāneyya, sujātasaddo ca **“sujāto cārudassano”**tiādīsu (ma. ni. 2.399) ārohasampattipariyāyopi hotīti jātivaseneva sujātattam vibhāvetum **“mātito ca pitito cā”**ti vuttam. Tenāha **“bhoto mātā brāhmaṇī”**tiādī. **Evanti** vuttappakārena, mātupakkhato ca pitupakkhato ca paccekam tivīdhena ñātiparivaṭṭenāti vuttam hoti. **“Saṃsuddhagahaṇiko”**ti imināpi **“mātito ca pitito cā”**ti vuttamevattham samatthetīti āha **“saṃsuddhā te mātugahaṇī”**ti, saṃsuddhāva anaññapurisasādhāraṇāti attho. Anorasaputtavasenāpi hi loke mātāpitūsamāññā dissati, idha panassa orasaputtavaseneva icchitāti dassetum **“saṃsuddhagahaṇiko”**ti vuttam. Gabbham gaṇhāti dhāretīti **gahaṇī**, tatiyāvaṭṭasaṅkhāto gabbhāsayasāññito mātukucchipadeso **samavepākiniyāti** samavipācaniyā. **Etthāti** mahāsudassanasutte. Yathābhuttamāhāram vipācanavasena gaṇhāti na chaḍḍetīti **gahaṇī**, kammajatejodhātu, yā **“udaraggī”**ti loke paññāyati.

Pitupitāti pituno pitā. **Pitāmahoti** āmaha-paccayena taddhitasiddhi. **“Catuyuga”**ntiādīsu viya tam tadatthe yujjitabbato kālaviseso **yugam** nāma. **Etam** yugasaddena āyuppamāṇavacanam **abhilāpamattam** lokavohāravacanamattameva, adhippetatthato pana pitāmahoyeva pitāmahayugasaddena vutto tasseva padhānabhāvena adhippetattāti adhippāyo. **Tato uddhanti** pitāmahato upari. Tenāha **“pubbapurisā”**ti, tadavasesā pubbakā cha purisāti attho. Purisaggahaṇaṅcetha ukkaṭṭhaniddesena katanti daṭṭhabbam. Evañhi **“mātito”**ti pālīvacanam samatthitam hoti.

Tatrāyamaṭṭhakathāmuttakanayo – mātā ca pitā ca **pitāro**, pitūnam pitāro **pitāmahā**, tesam yugo dvando **pitāmahayugo**, tasmā, yāva sattamā pitāmahayugā pitāmahadvandāti attho veditabbo, evañca pitāmahaggahaṇeneva mātāmahopi gahito. Yugasaddo cetha ekaseso **“yugo ca yugo ca yugo”**ti, ato tattha tattha ñātiparivaṭṭe pitāmahadvandam gahitam hotīti.

“Yāva sattamā pitāmahayugā”ti idaṃ kākāpekkhanamiva ubhayattha sambandhagatanti āha **“eva”**ntiādī. Yāva sattamo puriso, tāva akkhitto anupakuṭṭho jātivādenāti sambandho. **Akkhittoti** appattakhepo. **Anavakkhittoti** saddhathālipākādīsu na chaḍḍito. **Na upakuṭṭhoti** na upakkosito. **“Jātivādenā”**ti idaṃ hetumhi karaṇavacananti dassetum **“kena kāraṇenā”**tiādī vuttam. **Itipīti** imināpi kāraṇena. Ettha ca **“ubhato...pe...yugā”**ti etena brāhmaṇassa yonidosābhāvo dassito saṃsuddhagahaṇikabhāvakittanato, **“akkhitto”**ti etena kiriyāparādhābhāvo. Kiriyāparādhena hi sattā khepaṃ pāpuṇanti. **“Anupakuṭṭho”**ti etena ayuttasamsaggābhāvo. Ayuttasamsaggañhi paṭicca sattā akkosam labhantīti.

Issaroti ādhipateyyasamvattaniyakammabalena īsanasiḷo, sā panassa issaratā vibhavasampattipaccayā pākāṭā jātā, tasmā aḍḍhabhāvapariyāyena dassento **“aḍḍhoti issaro”**ti āha. Mahantam dhanamassa bhūmigatam, vehāsagatañcāti **mahaddhano**. **Tassāti** tassa tassa guṇassa, ayameva ca pāṭho adhunā dissati. **Aguṇameyeva dassemāti** anvayato tassa guṇam vatvā byatirekato bhagavato anupasaṅkamanakāraṇam aguṇameva dassema.

Adhikarūpoti viṣiṭṭharūpo uttamasarīro. Dassanam arahatīti **dassanīyoti** āha **“dassanayoggo”**ti.

Pasādam āvahaṭṭi **pāsādiko**. Tenāha “**pasādajananato**”ti. Pokkharasaddo idha sundaratthe, sarīratthe ca niruḷho. **Vaṇṇassāti** vaṇṇadhātuyā. Pakāsaniyena parisuddhanimittena vaṇṇasaddassa vaṇṇadhātuyam pavattanato tannimittameva vaṇṇatā, sā ca vaṇṇanissitāti abhedavasena vuttam “**uttamena parisuddhena vaṇṇenā**”ti. **Sarīram** pana sannivesavisitṭham karacaraṇagīvāsīsādisamudāyam, tañca avayavabhūtena saṅghānanimittena gayhati, tasmā tannimittameva pokkharatāti vuttam “**sarīrasaṅghānasampattiyā**”ti, uttamāya sarīrasaṅghānasampattiyātipi yojetabbam. Atthavasā hi līngavibhattivipariṇāmo. Sabbesu vaṇṇesu suvaṇṇavaṇṇova uttamoti āha “**parisuddhavaṇṇesupi seṭṭhena suvaṇṇavaṇṇena samannāgato**”ti. Tathā hi buddhā, cakkavattino ca suvaṇṇavaṇṇāva honti. Yasmā pana vacchasasaddo sarīrābhe pavattati, tasmā **brahmavacchasīti** uttamasarīrābho, suvaṇṇābho icceva attho. Imameva hi attham sandhāya “**mahābrahmuno sarīrasadiseneva sarīrena samannāgato**”ti vuttam, na brahmujugattatam. **Okāsoti** sabbaṅgapaccanṅaṅgānaṃ. Ārohapariṇāhasampattiyā, avayavapāripūriyā ca dassanassa okāso na khuddakoti attho. Tenāha “**sabbānevā**”tiādi.

Sīlanti yamaniyamalakkhaṇam sīlam, tam panassa rattaññutāya vuddham vaddhitanti visesato “**vuddhasīlī**”ti vuttam. **Vuddhasīlenāti** sabbadā sammāyogato vuddhena dhuvasīlena. Evañca katvā padattayampetaṃ adhippetatthato visitṭham hoti, saddatthamattam pana sandhāya “**idam vuddhasīlipadasseva vevacana**”nti vuttam. Pañcasīlato param tattha sīlassa abhāvato, tesamajānanato ca “**pañcasīlamattamevā**”ti āha.

Vācāya parimaṇḍalapadabyañjanatā eva sundarabhāvoti vuttam “**sundarā parimaṇḍalapadabyañjanā**”ti. Ṭhānacaraṇasampattiyā, sikkhāsampattiyā ca kassacipi anūnatāya parimaṇḍalapadāni byañjanāni akkharāni etissāti **parimaṇḍalapadabyañjanā**. Akkhameva hi tamtadatthavācakabhāvena paricchinnam **padam**. Atha vā padameva atthassa byañjakattā **byañjanam**, sithiladhanitādiakkharapāripūriyā ca padabyañjanassa parimaṇḍalatā, parimaṇḍalam padabyañjanametissāti tathā. Apica pajjati attho etenāti **padam**, nāmādi, yathādhippetaṃattham byañjetīti **byañjanam**, vākyam, tesam paripuṇṇatāya **parimaṇḍalapadabyañjanā**. Atthaviññāpane sādhanatāya vācāva karaṇam **vākkaraṇanti** tulyādhikaraṇatam dassetuṃ “**udāharaṇaghoso**”ti vuttam, vacībhedasaddoti attho. Tassa brāhmaṇassa, tena vā bhāsitaṃ atthassa **guṇaparipuṇṇabhāvena pūre** guṇehi paripuṇṇabhāve bhavāti **porī**. Puna **pureti** rājadhānīmahanagare. **Bhavattāti** samvaḍḍhattā. **Sukhumālattanēti** sukhumālabhāvena, iminā tassā vācāya mudusaṅhattamāha. **Apalibuddhāyāti** pittasemhādīhi apariyonaddhāya, hetugabbhapadametaṃ. Tato eva hi yathāvuttadosābhāvoti. Ḍamsetvā viya ekadesakathanam **sandiṭṭham**, saṅkham cirāyitvā kathanam **vilambitam**, “sanniddhivilambitādi”tipi pāṭho. Saddena ajanakam vacinam, mammakasankhātam vā ekakkhameva dvattikkhattumuccāraṇam **sanniddham**. Ādisaddena dukkhalitānukaḍḍhitādīni saṅgaṇhāti. **Elāgaḷenāti** elāpaggharaṇena. “Elā gaḷantī”ti vuttasseva dvidhā attham dassetuṃ “**lālā vā paggharantī**”tiādi vuttam. “Passe’lamūgam uragam dujivha”ntiādisu (jā. 1.7.49) viya hi elāsaddo lālāya, kheḷe ca pavattati. **Kheḷaphusitānīti** kheḷabindūni.

Tatrāyamaṭṭhakathāmuttakanayo – **elanti** doso vuccati “yā sā vācā nelā kaṇṇasukhā”tiādisu (dī. ni. 1.8, 194) viya. Duppaññā ca sadosameva katham kathentā elam paggharāpentī, tasmā tesam vācā **elagaḷā** nāma hoti, **tabbiparītāyāti attho**. “**Ādimajjhapariyosānam pākaṭam katvā**”ti iminā tassā vācāya atthapāripūriṃ vadati. Viññāpanasaddena etassa sambandho.

Jarājīṇatāya jīṇoti khaṇḍiccapāliccādibhāvamāpādito. **Vuddhimariyādappattoti** vuddhiyā paricchedam pariyaṇṭam patto. **Jātimahallakatāyāti** upapattiyā mahallakabhāvena. Tenāha “**cirakālapasuto**”ti. **Addhasaddo** addhānapariyāyo dīghakālavācako. Kittako pana soti āha “**dve tayo rājaparivaṭṭe**”ti, dvinnam tiṇṇam rājūnam rajjapasāsanapaṭipāṭiyoti attho. “**Addhagato**”ti vatvāpi kataṃ vayogahaṇam osānavayāpekkhanti vuttam “**pacchimavayam sampatto**”ti. **Pacchimo tatiyabhāgoti** vassasatassa tidhā katesu bhāgesu tatiyo osānabhāgo. Paccekam tettiṃsavassato ca adhikamāsapakkhādīpi vibhajīyati, tasmā sattasaṭṭhime vasse yathāraham

labbhamānamāsapakkhadivasato paṭṭhāya pacchimavayo veditabbo. **Ācariyasāriputtatherenapi** hi imamevatthaṃ sandhāya “sattasatthivassato paṭṭhāya pacchimavayo koṭṭhāso”ti (sārattha. ṭī. 1.verañjakaṇḍavaṇṇanā) vuttaṃ. Itarathā hi “pacchimavayo nāma vassasatassa pacchimo tatiyabhāgo”ti aṭṭhakathāvacanena virodho bhaveyyāti.

Evam kevalajātivasena paṭhamavikappam vatvā guṇamissakavasena dutiyavikappam vadantena “**apicā**”tiādi āradhāṃ. Tattha nāyaṃ jīṇṇatā vayomattena, atha kho kulaparivaṭṭena purāṇatāti āha “**jīṇṇoti porāṇo**”tiādi. **Cirakālapavattakulanvayoti** cirakālam pavattakulaparivaṭṭo, tenāssa kulavasena uditoditabhāvamāha. “Vayoanuppatto”ti iminā jātivuddhiyā vakkhamānattā, guṇavuddhiyā ca tato sātisayattā “**vuddhoti silācārādiguṇavuddhiyā yutto**”ti vuttaṃ. Vakkhamānaṃ pati pārisesaggahaṇaṇhetam. Tathā jātimahallakatāyapi teneva padena vakkhamānattā, vibhavamahattatāya ca anavasesittā “**mahallakoti vibhavamahantatāya samannāgato**”ti āha. **Maggapaṭipannoti** brāhmaṇānaṃ yuttapaṭipattivīthim avokkamma caraṇavasena upagatoti atthaṃ dasseti “**brāhmaṇāna**”ntiādinā. Jātivuddhabhāvamānuppatto, tampi **antimavayam** pacchimavayameva anuppattoti sādhippāyayojanā. Iminā hi pacchimavayavasena jātivuddhabhāvamānuppattoti.

Buddhaguṇakathāvaṇṇanā

304. Tādisehi mahānubhāvehi saddhim yugaggāhasena ṭhapanampi na mādisānaṃ paṇḍitajātīnāmanucchavikaṃ, kuto pana ukkaṃsavasena ṭhapananti idaṃ brāhmaṇassa na yuttarūpanti dassento “**na kho pana meta**”ntiādimāha. Tattha yepi guṇā attano guṇehi sadisā, tepi guṇe uttaritāreyaeva maññamāno pakāsetīti sambandho. **Sadisāti** ca ekadesena sadisā. Na hi buddhānaṃ guṇehi sabbathā sadisā kecipi guṇā aññesu labbhanti. “**Ko cāha**”ntiādi uttaritarākāradassanaṃ. Ahañca kīdiso nāma hutvā sadiso bhavissāmi, samaṇassa...pe... guṇā ca kīdisā nāma hutvā sadisā bhavissanti sādhippāyayojanā. Keci navaṃ pāṭhaṃ karonti, ayameva mūlapāṭho yathā taṃ **ambaṭṭhasutte** “ko cāhaṃ bho gotama sācariyako, kā ca anuttarā vijjācaraṇasampadā”ti. **Itareti** attano guṇehi asadisē guṇe, “pakāsetī”ti imināva sambandho. **Ekantenevāti** sadisaguṇānaṃ viya pasaṅgābhāvena.

Evam niyāmento soṇadaṇḍo **idaṃ** atthajātaṃ **dīpeti**. **Yathā hīti** ettha **hi**-saddo kāraṇe. Tenāha “tasmā mayameva arahamā”ti. **Gopadakanti** gāvīyā khuraṭṭhāne ṭhitadakaṃ. **Guṇeti** sadisaguṇepi, pageva asadisaguṇe.

Saṭṭhikulasatasahassanti saṭṭhisahassādhikaṃ kulasatasahassaṃ. **Dhammapadaṭṭhakathā**dīsu (dha. pa. aṭṭha. 16) pana katthaci bhagavato asītikulasahasatāvacaṇaṃ ekekapakkhameva sandhāyāti veditabbaṃ.

Sudhāmaṭṭhapokkharāṇiyoti sudhāya parikkammakatā pokkharāṇiyō. **Sattaratanānanti** sattahi ratanehi. Pūrayoge hi karaṇatthe bahulaṃ chaṭṭhīvacanaṃ. **Pāsādaniyūhādayoti** uparipāsāde ṭhitatulāsīsādayo. “Sattaratanāna”nti adhikāro, abhedepi bhedavohāro esa. **Kulapariyāyenāti** suddhodanamahārājassa asambhinnakhattiyakulānukkamena. **Tesupīti** catūsu nidhīsipi. **Gahitaṃ gahitaṃ** ṭhānaṃ **pūratīyeva** dhanena pākatikameva hoti, na ūnaṃ.

Bhaddakenāti sundarena. Pacchimavaye vuttanayena paṭhamavayo veditabbo. Mātāpitūnaṃ anicchāya pabbajjāva **anādamo** tena yutte atthe **sānivacaṇanti** vuttaṃ hoti. **Etesanti** mātāpitūnaṃ. **Kanditvāti** “kahaṃ piyaputtakā”tiādinā paridevitvā.

Aparimāṇoyevāti “ettako eso”ti kenaci paricchinditumasakkuṇeyyatāya aparicchinnoyeva. Dve veḷū adhokaṭimattakameva hontīti āha “**dvinnaṃ veḷūnaṃ upari kaṭimattamevā**”ti. Pāramitānubhāvena brāhmaṇassa eva paññāyati, bhagavā pana tadā pakatippamāṇovāti dassetuṃ “**paññāyamāno**”ti vuttamiva dissati, vīmaṃsitvā gahetabbaṃ. “**Na hī**”tiādinā pāramitābaleneva evaṃ aparimāṇatā, na iddhibalenāti dasseti”ti vadanti. **Atuloti** asadisō. “**Dhammapade gāthamāhā**”ti

katthaci pāṭho ayuttova. Na hi dhammapade ayaṃ gāthā dissati. **Sudhāpiṇḍiyattherāpadānādīsu** (apa. 1.10.sudhāpiṇḍiyattherāpadāna) panāyaṃ gāthā āgatā, sā ca kho aññavatthusmiṃ eva, na imasmiṃ vatthumhi, tasmā pāḷivasena saṅgīṭimanāruḷhā pakīṇṇakadesanāyevāyaṃ gāthāti daṭṭhabbaṃ.

Tattha **te tādīseti** pariyaṃvacanametaṃ “appaṃ vassasataṃ āyu, idānetarahi vijjati” tiādīsu (bu. vaṃ. 27.21) viya, “etādīse” tipī paṭhanti, tadasundaraṃ apadānādīsu tathā adissanato. Kilesaparinibbānena **parinibbute** kutocipi abhaye te tādīse pūjayato ettha idaṃ puññaṃ **kenaci** mahānubhāvena api saṅkhātuṃ na sakkāti attho.

Bāhantaranti dvinnāṃ bāhūnamantaraṃ. **Dvādasa yojanasatānīti** dvādasādhikāni yojanasatāni. **Bahalantarenāti** samantā sarīrapariṇāhappamaṇena. **Puthulatoti** vitthārato. **Aṅgulipabbānīti** ekekāni aṅgulipabbāni. **Bhamukantaranti** dvinnāṃ bhamukānamantaraṃ. **Mukhaṃ** vitthārato **dviyojanasataṃ** parimaṇḍalato viṣuṃ vuttatā. “Ediso bhagavā” ti yā parehi vuttā kathā, tassā anurūpanti **yathākathaṃ**, iminā aññehi vuttaṃ bhagavato vaṇṇakathaṃ sutvā oloketukāmatāya āgatoti dasseti, **yathākathanti** vā kīdisaṃ. “Yathākathaṃ pana tumhe bhikkhave samaggā sammodamānā avivadamānā phāsukaṃ vassaṃ vasitthā” tiādīsu (pārā. 194) viya hi pucchāyaṃ esa nipātasamudāyo, eko vā nipāto.

Gandhakuṭipariveṇeti gandhakuṭiyā pariveṇe, gandhakuṭito bahi pariveṇabbhantareti attho. **Tatthāti** mañcake. “**Sīhaseyyaṃ kappesī**” ti yathā rāhu asurindo āyāmato, vitthārato, ubbedhato ca bhagavato rūpakāyassa paricchedaṃ gahetuṃ na sakkoti, tathā rūpaṃ iddhābhisaṅkhāraṃ abhisaṅkharonto **sīhaseyyaṃ kappesī**” ti (dī. ni. 1.304) evaṃ ācariyena vuttaṃ, “tadetaṃ ‘na mayā asurinda adhomukhena pāramiyo pūritā, uddhaggameva katvā dānaṃ dinna’ nti atṭhakathāvacanena accantameva viruddhaṃ hoti. Etañhi gandhakuṭidvāravaraṇādīsu viya pāramitānubhāvasiddhidassanaṃ, aññāthā tadeva vacanaṃ vattabbaṃ bhaveyyā” ti vadanti, vīmaṃsitvā sampañcchitabbaṃ. **Adhomukhenāti** osakkitaṃvīriyataṃ sandhāya vuttaṃ, **uddhaggamevāti** anosakkitaṃvīriyataṃ, ubbhakoṭikaṃ katvāti attho. Tadā rāhu upāsakabhāvaṃ paṭivedesīti āha “**taṃ divasa**” ntiādi.

Kīlesehi ārakattā **ariyaṃ** niruttinayena, atoyeva uttamāṃ parisuddhatāti vuttaṃ “**uttamaṃ parisuddha**” nti. **Anavajjaṭṭhena kusalaṃ**, na sukhavipākaṭṭhena tassa arahatamasambhavato. **Kusalasīlenāti** anavajjeneva viddhastavasāsanakīlesena sīlena. Evañca katvā padacatukkampetāṃ adhippetatthato viṣiṭṭhaṃ hoti, saddatthamattaṃ pana sandhāya “**idamassa vevacana**” nti vuttaṃ.

Katthaci caturāsītipāṇasahassāni, katthaci aparimāṇāpi devamanussāti atthaṃ sandhāya “**bhagavato ekekāya dhammadesanāyā**” tiādīmāha. Mahāsamayasutta (dī. ni. 2.331 ādayo) maṅgalasutta- (khu. pā. 5.1 ādayo; su. ni. 261 ādayo) desanādīsu hi catuvīsatiyā ṭhānesu asaṅkhyeyyā aparimeyyā devamanussā maggaphalāmatāṃ pivīṃsu. Koṭisatasahassādīparimāṇenapi bahū eva, nidassanavasena panevaṃ vuttaṃ. **Tasmā** anuttarasikkhāpakabhāvena bhagavā **bahūnaṃ ācariyo**, tesāṃ ācariyabhūtānaṃ sāvakānamācariyabhāvena **sāvakaveneyyānaṃ pācariyo**. Bhagavatā hi dinnanaye ṭhatvā sāvakā veneyyaṃ vinenti, tasmā bhagavāva tesāṃ padhāno ācariyoti.

Vadantassādhippetova attho pamāṇaṃ, na lakkhaṇahārādivisayoti āha “**brāhmaṇo panā**” tiādi. “**Imassa vā pūtikāyassā**” ti pāṭhavasāne peyyālaṃ katvā “**kelanā paṭikelanā**” ti vuttaṃ. Ayañhi khuddakavatthuvibhaṅgapāḷi (vibha. 854) “bāhirānaṃ vā parikkhārānaṃ maṇḍanā” tiādi peyyālavasena gayhati. Tattha **imassa vā pūtikāyassāti** imassa vā manussasarīrassa. Yathā hi tadahuṃjātopi siṅgālo “jarasiṅgālo” tveva, ūruppamāṇāpi ca galocilatā “pūtilatā” tveva saṅkhyāṃ gacchati, evaṃ suvaṇṇavaṇṇopi manussasarīro “pūtikāyo” tveva, tassa maṇḍanāti attho. **Kelanāti** kīlanā. “Kelāyanā” tipī paṭhanti. **Paṭikelanāti** paṭikīlanā. Capalassa bhāvo **cāpalyaṃ, cāpallaṃ** vā, yena samannāgato puggalo vassasatikopi samāno tadahuṃjātadārako viya hoti, tassedamadhivacananti veditabbaṃ.

Apāpe pure karoti, na vā pāpaṃ pure karotīti **apāpapurekkhāro**ti yuttāyuttasamāseṇa duvidhamatthaṃ dassetuṃ “**apāpe navalokuttaradhamme**”tiādi vuttaṃ. **Apāpeti** ca pāpapaṭipakkhe, pāpavirahite vā. Brahmani seṭṭhe bhagavati bhavā tassa dhammadesanāvasena ariyāya jātiyā jātattā, brahmuno vā bhagavato apaccaṃ garukaraṇādīnā, yathānusiṭṭhaṃ paṭipattiyā ca, brahmaṃ vā seṭṭhaṃ ariyamaggaṃ jānātīti **brahmaññā**, ariyasāvakaśākhātā pajā. Tenāha “**sāriputtamoggallānā**”tiādi. **Brāhmaṇapajāyā**ti bahitapāpapajāya. “Apāpapurekkhāro”ti ettha “purekkhāro”ti padamadhikāroti dasseti “**etissāya ca pajāya purekkhāro**”ti iminā. **Ca**-saddo samuccayattho “na kevalaṃ apāpapurekkhāro eva, atha kho brahmaññāya ca pajāya sambandhabhūtāya purekkhāro”ti. “**Ayañhi**”tiādi adhippāyamattadassanaṃ. “Apāpapurekkhāro”ti idaṃ “brahmaññāya pajāyā”ti imināva sambandhitabbaṃ, na ca paccekamatthadīpakāṃ, pakatibrāhmaṇajātivāsenāpi cetassa attho veditabboti dassenti “**apicā**”tiādimāha. Ayuttasamāso cāyaṃ. **Pāpanti** pāpakammaṃ, ahitaṃ dukkhanti attho. Tassa sambandhipekkhattā kassā apāpapurekkhāroti pucchāya evamāhāti dassetuṃ “**kassā**”tiādi vuttaṃ. “**Attanā**”tiādi tadatthavivaraṇaṃ. **Brāhmaṇapajāyā**ti brāhmaṇajātipajāya.

Rañjanti aṭṭhaṃ bhajanti rājāno etenāti **raṭṭhaṃ**, ekassa rañño rajjabhūtakāsikosalādīmahājanapadā. Janā pajjanti sukhajīvikaṃ pāpuṇanti etthāti **janapado**, ekassa rañño rajje ekekakoṭṭhāsabhūtā uttarapathadakkhiṇapathādīkhuddakajanapadā. **Tatthāti** tathā āgatesu. **Pucchāyāti** attanā abhisāṅkhatāya pucchāya. **Vissajjanāsampaṭicchane**ti vissajjanāya attano ñāṇena sampaṭiggahaṇe. Kesañci upanissayasampattiṃ, ñāṇaparipākaṃ, cittācāraṇa nātvā bhagavāya pucchāya ussāhaṃ janetvā vissajjēti adhippāyo.

“**Tattha katamaṃ sākhalāya**”ntiādi nikkhepaṇḍapāli (dha. sa. 1350). **Addhānadarathanti** dīghamaggāgamanaparissamaṃ. **Assāti** bhagavato, mukhapadumanti sambandho. **Bālātapasamphassanenevāti** abhinavuggatasūriyaraṃsisamphassanena iva. Tathā hi sūriyo “padmabandhū”ti loke pākaṭo, cando pana “kumudabandhū”ti. Puṇṇacandassa siriya samānā sirī etassāti **puṇṇacandasassirikaṃ**. Kathaṃ nikkujjitasadisatāti āha “**sampattāyā**”tiādi. Ettha pana “**ehi svāgatavādī**”ti iminā sukhasambhāsapubbakaṃ piyavāditaṃ dasseti, “**sakhilo**”ti iminā saṅghavācātaṃ, “**sammodako**”ti iminā paṭisandhārukusalataṃ, “**abbhākuṭiko**”ti iminā sabbattheva vipasannamukhataṃ, “**uttānamukho**”ti iminā sukhasallāpataṃ, “**pubbabhāsī**”ti iminā dhammānuggahassa okāsakaraṇena hitajjhāsayaṭṭhaṃ dassētīti veditabbaṃ.

Yattha kirāti ettha **kira**-saddo arucisūcane –

“Khaṇavatthuparittattā, āpāthaṃ na vajanti ye;
Te dhammārammaṇā nāma, ye’ saṃ rūpādayo kirā”ti. –

Ādīsu (abhidhammāvatāra-aṭṭhakathāyaṃ ārammaṇavibhāge chaṭṭhaanucchede – 77) viya, tena bhagavatā adhivutthapadesa na devatānubhāvena manussānaṃ anupaddavatā, atha kho buddhānubhāvenāti dasseti. Buddhānubhāveneva hi tā ārakkhaṃ gaṇhanti. **Pamsupisācakādayoti** paṃsunissitapisācakādayo. **Ādisaddena** bhūtarakkhasādīnaṃ gahaṇaṃ. Idāni buddhānubhāvameva pākaṭaṃ katvā dassetuṃ “**apicā**”tiādi vuttaṃ.

Anusāsitabbo saṅgho nāma sabbopi veneyyajanasaṃmūho. **Sayaṃ uppādito saṅgho** nāma nibbattitaariyapuggalasaṃmūho. “**Tādiso**”ti iminā “sayaṃ vā uppādito”ti vuttavikappo eva paccāmattho anantarassa vidhi paṭisedhovāti katvā, tasmā “purimapadasseva vā”ti vikappantaragahaṇanti ācariyena (dī. ni. ṭī. 1.304) vuttaṃ. Tatrāyamadhippāyo – kāmaṃ “gaṇī”ti idaṃ “saṅghi”ti padasseva vevacanaṃ, atthamattaṃ pana dassetuṃ yathāvuttavikappadvaye dutiyavikappameva paccāmasitvā “tādisovassa gaṇo atthī”ti vuttattā avasiṭṭhassapi paṭhamavikappassa saṅghaṇatthaṃ “**purimapadasseva vā vevacanameta**”nti vuttanti. Evampi vadanti – dhammasenāpatittherādīnaṃ paccekagaṇīnaṃ gaṇaṃ, suttantikādigaṇaṃ vā sandhāya “**tādiso**”tiādi vuttaṃ. Tatthāpi hi sabbova bhikkhugaṇo anusāsitabbo nāma, nibbattitaariyagaṇo pana sayaṃ uppādito nāma, tasmā “tādiso”ti

iminā vikappadvayassāpi paccāmasanaṃ upapannaṃ hoti. Evaṃ padadvayassa visesatthataṃ dassetvā sabbathā samānatthataṃ dassetuṃ “**purimapadassevā**”tiādi vuttanti. Pūraṇamakkhaliādīnaṃ **bahūnaṃ titthakarānaṃ**, niddhāraṇe cetāṃ sāmivacanaṃ. **Acelakādimattakenapi kāraṇenāti** niccoḷatādimmattakenapi appicchasantuṭṭhatādisamāropanalakkhaṇena kāraṇena.

Navakāti abhinavā. **Pāhunakāti** pahaṇakāṃ paṭiggaṇhitumanucchavikā, etena duvidhesu āgantukesu puretaramāgatavasena idha atithino, na bhojanavelāyamāgatavasena abbhāgatāti dasseti. **Pariyāpuṇāmīti** paricchindituṃ jānāmi, dhātvatthamattaṃ pana dassetuṃ “**jānāmi**”ti vuttaṃ.

Kappampīti āyukappampi, bhaṇeyya ceti sambandho. **Ciraṃ** cirakāle kappo khīyetha, **dīghamantare** dīghakālantarepi tathāgatassa vaṇṇo na khīyethāti yojanā. “**Cira**”nti cettha vattabbepi chandahānibhayā rassatthaṃ niggahitalopo, atidīghakālaṃ vā sandhāya “**ciradīghamantare**”ti vuttaṃ, ubhayattha sambandhitabbametāṃ, kiriyārahādiyoge viya ca antarayoge adhikakkharapādo anupavajjo, ayaṅca gāthā abhūtaparikappanāvasena aṭṭhakathāsu (dī. ni. aṭṭha. 1.304; 3.141; ma. ni. aṭṭha. 2.425; udā. aṭṭha. 53; bu. vaṃ. aṭṭha. 4.4; cariyā. aṭṭha. nidānakathā, pakiṇṇakakathā; apa. aṭṭha. 2.7.20) vuttā tathā bhāsamānassa abhāvato.

305. Nanti ācariyaṃ. **Alaṃ**-saddo idha arahattho “alameva nibbinditu”ntiādīsu (dī. ni. 2.272; saṃ. ni. 2.134, 143) viyāti āha “**yuttamevā**”ti. Puṭena netvā asitabbato paribhuñjitabbato **puṭosaṃ vuccati pātheyyaṃ**. Itthambhūtalakkhaṇe karaṇavacanaṃ dasseti “**taṃ gahetvā**”ti iminā. Pāliyaṃ puṭamsenapi kulaputtanāti sambandhaṃ dassetuṃ “**tena puṭamsenā**”ti vuttaṃ. “**Aṃsenā**”tiādi adhippāyamattadassanaṃ, vahantena kulaputtana upasaṅkamituṃ alamevāti attho.

Soṇadaṇḍaparivitakkavaṇṇanā

306-7. Na idha **tiro**-saddo “tirokuḍḍe vā tiropākāre vā chaḍḍeyya vā chaḍḍāpeyya vā”tiādīsu (pāci. 825) viya bahiatthoti āha “**antovanasaṇḍe gatassā**”ti. Tattha vihāropi vanasaṇḍapariyāpannoti dasseti “**vihārabbhantaraṃ pavitṭhassā**”ti iminā. **Ete** añjalim paṇāmetvā nisinnā micchādiṭṭhivasena **ubhatopakkhikā**, “itare pana sammādiṭṭhivasena ekatopakkhikā”ti atthato āpanno hoti. Daliddattā, ñātipārijuññādinā jīṇṇattā ca nāmagottavasena apākaṭā hutvā pākaṭā bhavitukāmā evamakamsūti adhippāyo. **Kerāṭikāti** saṭhā. **Tatthāti** dvīsu janesu. **Tatoti** vissāsato, dānato vā.

Brāhmaṇapaññattivaṇṇanā

309. Anonatakāyavasena **thaddhagatto**, na mānavasena. Tena pāliyaṃ vakkhati “abhunnāmetvā”ti. Cetovitakkāṃ sandhāya cittasīsenā “**cittāṃ aññāsī**”ti vuttaṃ. **Vighātanti** cittadukkhaṃ.

311. **Sakasamayeti** brāhmaṇaladdhiyaṃ. **Mīyamānoti** mariyamāno. **Diṭṭhisañjānanenevāti** attano laddhisañjānaneneva. **Sujanti** homadabbim, nibbacaṃ vuttameva. **Gaṇhantesūti** juhanatthaṃ gaṇhanakesu, iruvijjesūti attho. **Iruvedavasena** homakaraṇato hi yaññayajakā “iruvijjā”ti vuccanti. **Paṭhamo vāti** tattha sannipatitesu sujākiriyaṃ sabbapadhāno vā. **Dutiyo vāti** tadanantariko vā. “**Suja**”nti idaṃ karaṇatthe upayogavacanaṃti āha “**sujāyā**”ti. Aggihuttamukhatāya yaññassa yaññe diyyamānaṃ sujāmukhena diyyati. Vuttaṅca “aggihuttamukhā yaññā, sāvittī chandaso mukha”nti (ma. ni. 2.400). Tasmā “diyyamāna”nti ayaṃ pāṭhaseso viññāyatīti **ācariyena** (dī. ni. ṭi. 1.311) vuttaṃ. Apica sujāya diyyamānaṃ **sujanti** taddhitavasena atthaṃ dassetuṃ evamāha. **Porāṇāti** aṭṭhakathācariyā. Purimavāde cettha dānavasena paṭhamo vā dutiyo vā, pacchimavāde ādānavasenāti ayametesāṃ viseso. **Visesatoti** vijjācaraṇavisesato, na brāhmaṇehi icchitavijjācaraṇamattato. **Uttamabrāhmaṇassāti** anuttaradakkhiṇeyyatāya ukkaṭṭhabrāhmaṇassa. Yathādhippetassa hi vijjācaraṇavisesadīpakassa “katamaṃ pana taṃ brāhmaṇasīlaṃ, katamā sā paññā”tiādivacanaṃ okāsakaraṇatthameva “imesaṃ pana brāhmaṇa pañcannaṃ aṅgāna”ntiādivacanaṃ bhagavā avoca, tasmā

padhānavacanānurūpamanusandhiṃ dassetuṃ “**bhagavā panā**”tiādi vuttanti daṭṭhabbam.

313. Apavadatīti vaṇṇādīni apānetvā vadati, atthamattaṃ pana dassetuṃ “**paṭikkhipatī**”ti vuttaṃ. **Idanti** “mā bhavaṃ soṇadaṇḍo evaṃ avacā”tiādivacanaṃ. **Brāhmaṇasamayanti** brāhmaṇasiddhantaṃ. **Mā bhindīti** mā vināsesi.

316. Samoyeva hutvā samoti **samasamo**, sabbathā samoti attho. Pariyāyadvayañhi atisayatthadīpakaṃ yathā “dukkhadukkhaṃ, rūparūpa”nti. Ekadesamattato pana āṅgakena māṇavena tesam samabhāvato taṃ nivattento “**ṭhapetvā ekadesamatta**”ntiādimāha. **Kulakoṭiparidīpananti** kulassa ādiparidīpanaṃ. Yasmā attano bhaginiyā...pe... na jānissati, tasmā na tassa mātāpitumattaṃ sandhāya vadati, kulakoṭiparidīpanaṃ pana sandhāya vadatīti adhippāyo. “**Atthabhañjanaka**”nti iminā kammāpathapattaṃ vadati. **Guṇeti** yathāvutte pañcasīle. **Athāpi siyāti** yadipi tumbhakaṃ evaṃ parivittakko siyā, bhinnasīlassāpi **puna pakatisīle ṭhitassa brāhmaṇabhāvaṃ** vaṇṇādayo **sādhentīti** evaṃ siyāti attho. “Sādhentī”ti pāṭhe “vaṇṇo”ti kattā ācariyena (dī. ni. ṭī. 1.316) ajjhāhaṭo, nidassanañcetam. **Mantajātisupi** hi eseva nayo. **Sīlamevāti** puna pakatibhūtaṃ sīlameva brāhmaṇabhāvaṃ sādhesati, kasmāti ce “**tasmiṃ hi...pe... vaṇṇādayo**”ti. Tattha **sammohamattaṃ vaṇṇādayoti** vaṇṇamantajātiyo brāhmaṇabhāvassa āṅganti sammohamattametaṃ, asamavekkhitvā kathitamidaṃ.

Sīlapaññākathāvaṇṇanā

317. Kathito brāhmaṇena pañhoti “sīlavā ca hotī”tiādinā dvinameva āṅgānaṃ vasena yathāpucchito pañho yāthāvato vissajjito. **Etthāti** yathāvissajjite atthe, āṅgadvaye vā. **Tassāti** soṇadaṇḍassa. Yadi ekamaṅgaṃ ṭhapeyya, atha patiṭṭhātuṃ na sakkuṇeyya. Yadi pana na ṭhapeyya, atha sakkuṇeyya, kiṃ panesa tathā sakkhissati nu kho, notī vīmaṃsanatthameva evamāha, na tu ekassa āṅgassa ṭhapanīyattāti vuttaṃ hotī. Tathā cāha “**evametaṃ brāhmaṇā**”tiādi. Dhovittāva parisujjananti āha “**sīlāparisuddhā**”ti, sīlasampattiyā sabbaso suddhā anupakkiliṭṭhāti attho. **Kuto dussīle paññā** asamāhitattā tassa. **Kuto vā paññārahite jāle eḷamūge sīlaṃ** sīlavibhāgassa, sīlāparisodhanūpāyassa ca ajānanato. Eḷā mukhe gaḷati yassāti **eḷamūgo** kha-kārassa ga-kāraṃ katvā, **eḷamukho, eḷamūko** vā. Iti bahudhā pāṭhoti **bhayabheravasuttaṭṭhakathāyaṃ** (ma. ni. aṭṭha. 1.48) vutto. Pakatṭhaṃ ukkatṭhaṃ ñāṇaṃ **paññānanti** katvā pākatikaṃ ñāṇaṃ nivattetuṃ “**paññāna**”nti vuttaṃ. Vipassanādiññāñhi idhādhippetam, tadetaṃ pakārehi jānanato **paññāvāti** āha “**paññāyevā**”ti.

Catupārisuddhisīlena dhotāti samādhipadaṭṭhānena catupārisuddhisīlena sakalasaṃkilesamalavisuddhiyā dhovitā visuddhā. Tenāha “**kathaṃ panā**”tiādi. Tattha **dhovatīti** sujjhāti. **Saṭṭhīasītivassānīti** saṭṭhivassāni vā asītivassāni vā. **Maraṇakālepi**, pageva aññasmiṃ kāle. **Mahāsaṭṭhivassatthero viyāti** saṭṭhivassamahāthero viya. **Vedanāpariggahamattampīti** ettha **vedanāpariggaho** nāma yathāuppannaṃ vedanaṃ sabhāvasarasato upadhāretvā puna padaṭṭhānato “ayaṃ vedanā phassaṃ paṭicca uppajjati, so ca phasso anicco dukkho vipariṇāmadhammo”ti lakkhaṇattayaṃ āropetvā pavattitavipassanā. Evaṃ passantena hi sukkena sakkā sā vedanā adhvāsetuṃ “vedanā eva vedayati”ti. **Vedanaṃ vikkhambhetvāti** yathāuppannaṃ dukkhavedanaṃ anuvattitvā vipassanaṃ ārabhitvā vīthipaṭipannāya vipassanāya taṃ vinodetvā. **Saṃsumārapatitenāti** kumbhīlena viya bhūmiyaṃ urena nipajjamānena. “**Nāha**”ntiādiṃ tathā sīlarakkhaṇameva dukkaranti katvā vadati. Sīle patiṭṭhitaṃ hi arahattaṃ hatthagatameva. Yathāha “sīle patiṭṭhāya...pe... vijāyete jaṭa”nti (saṃ. ni. 1.23, 192; peṭako. 22; mī. pa. 2.9) catūsu puggalesu ugghāṭitaññuno evāyaṃ visayoti āha “**ugghāṭitaññutāyā**”ti. **Paññāya sīlaṃ dhovitvāti** sīlaṃ ādimajjhāpariyosānesu akhaṇḍādibhāvāpādanena paññāya suvisodhitam katvā. **Santamahāmatavattu** dhammapade (dha. pa. aṭṭha. 2.santimahāmatavattu).

318. “Kasmā āhā”ti uparidesanāya kāraṇaṃ pucchati. **Lajjā** nāma “sīlassa ca jātiyā ca guṇadosappakāsanena samaṇena gotamena pucchitapañhaṃ vissajjesī”ti parisāya paññātātā, sā tathā

vissajjitusamasamattatāya bhijjissatīti attho, paṭhamam alajjamānopi idāni lajjissāmīti vuttam hoti. **Paramanti** pamāṇam. ‘‘Ettakaparamā maya’’nti padānam tulyādhikaraṇatam dassetuṃ ‘‘**te maya**’’nti vuttam. Idam vuttam hoti – ‘‘sīlapañña’’nti vacanameva amhākam paramam, tadatthabhūtāni pañcasīlāni, vedattayavibhāvanam paññaṇca lakkhaṇādito niddhāretvā jānanam natthi, kevalam tattha vacīparamāva mayanti. Ayam panettha aṭṭhakathāmuttakanayo – **ettakaparamā**ti ettakaukkaṃsakoṭikā, paṭhamam pañhāvissajjanāva amhākam ukkaṃsakoṭīti attho. Tenāha ‘‘mayā sakasamayavasena pañho vissajjito’’ti. **Paranti** atirekam. **Bhāsītassā**ti vacanassa saddassa.

Ayam pana visesoti sīlaniddese niyyātanamattam apekkhitvā vuttam. Tenāha ‘‘**sīlamicceva niyyātita**’’nti. Sāmaññaphalasutte (dī. ni. 1.150) hi sīlam niyyātetvāpi puna sāmaññaphalamicceva niyyātitaṃ. Sabbesampi mahaggatacittānam ñāṇasampayuttatā, jhānānaṇca tam sampayogato ‘‘**atthato paññāsampadā**’’ti vuttam. Paññāniddese hi jhānapañnam adhiṭṭhānam katvā paṭhamam vipassanāpañña niyyātita. Tenāha ‘‘**vipassanāpaññāyā**’’tiādi.

Soṇadaṇḍaupāsakattapaṭivedanākathāvaṇṇanā

321. Daharo yuvāti ettha **daharavacanena** paṭhamayobbanabhāvam dasseti.

Paṭhamayobbanakālagato hi ‘‘daharo’’ti vuccati. Puttassa putto **nattā** nāma. **Nappahotī**ti na sampajjati, puttantattappamānopi na hotīti attho. ‘‘Āsanā me tam vuṭṭhāna’’nti etassa atthāpattim dassetuṃ ‘‘**mama agāra**venā’’tiādi vuttam. **Etanti** añjalipaggahaṇam. Ayañhi yathā tathā attano mahājanassa sambhāvanam uppādetvā kohaññaena pare vimhāpetvā lābhuppādanam nijigīsanto vicarati, tasmāssa ativiya kuhakabhāvam dassento ‘‘**iminā kirā**’’tiādim vadati. **Agāravam nāma natthī**ti agāravavacanam nāma natthi, nāyam bhagavati agāravena ‘‘ahañceva kho panā’’tiādimāha, atha kho attano lābhaparihānibhayenevāti vuttam hoti.

322. Tañkhaṇānurūpāyāti yādisī tadā tassa ajjhāsayappavatti, tadanurūpāyāti majjhepadalopena attho. Tadā tassa vivaṭṭasannissitassa tādisassa ñāṇaparipākassa abhāvato kevalam abbhudayasannissito eva attho dassitoti āha ‘‘**diṭṭhadhammikasamparāyikam attham sandassetvā**’’ti, paccakkhato vibhāvetvāti attho. **Kusale dhammeti** tebhūmake kusaladhamme, ayamettha nippariyāyato attho. Pariyāyato pana ‘‘catubhūmake’’tipi vuttam vaṭṭati lokuttarakusalassapi āyatim labbhamānattā. Tathā hi vakkhati ‘‘āyatim nibbānatthāya, vāsanābhāgiyāya vā’’ti. **Tatthāti** kusale dhamme yathāsamādapite. **Nanti soṇadaṇḍabrāhmaṇam. Samuttejetvāti** sammadeva uparūpari nisānetvā puññakiriyāya tikkhavisadabhāvamāpādetvā. Tam pana atthato tattha ussāhajananameva hotīti āha ‘‘**saussāham katvā**’’ti. **Tāya ca saussāhatāyāti** evam puññakiriyāya saussāhatā niyamato diṭṭhadhammikādiatthasampādanīti yathāvuttāya saussāhatāya ca sampahamsetvāti sambandho. **Aññehi ca vijjamānaguṇehī**ti evarūpā te guṇasamaṅgitā ca ekantena diṭṭhadhammikādiatthanipphādanīti tasmim vijjamānehi, aññehi ca guṇehi **sampahamsetvā** sammadeva haṭṭhatuṭṭhabhāvamāpādetvāti attho.

Yadi bhagavā dhammaratanavassam vassī, atha kasmā so visesam nādhigacchīti codanam sodhetuṃ ‘‘**brāhmaṇo panā**’’tiādi vuttam. **Kuhakatāyāti** vuttanayena kohaññakattā, iminā payogasampattiabhāvam dasseti. Yajjevam kasmā bhagavā tassa tathā dhammaratanavassam vassīti paṭīcodanampi sodhento ‘‘**kevalamassā**’’tiādimāha. Tattha **kevalanti** nibbedhāsekkhabhāgiyena asammissam. **Nibbānatthāyāti** nibbānādhigamatthāya, parinibbānatthāya vā. Āyatim visesādhigamanūpāyabhūtā puññakiriyāsu paricayasānkhatā vāsanā eva bhāgo, tasmim upāyabhāvena pavattāti **vāsanābhāgiyā**. Na hi bhagavato niratthakā catuppādikagāthāmatāpi dhammadesanā atthi. Tenāha ‘‘**sabbā purimacchimakathā**’’ti. Ādito cettha pabhuti yāva brāhmaṇassa vissajjanāpariyosānam, tāva **purimakathā**, bhagavato pana sīlapaññāvissajjanā **pacchimakathā**. Brāhmaṇena vuttāpi hi buddhaguṇādipaṭisaññuttā kathā āyatim nibbānatthāya vāsanābhāgiyā evāti. Sesam suviññeyyameva.

Iti sumaṅgalavilāsiniyā dīghanikāyatṭhakathāya

paramasukhumagambhīraduranubodhatthaparidīpanāya suvimalavipulapaññāveyyattiyajananāya sādhuvilāsiniyā nāma līnatthapakāsaniyā soṇadaṇḍasuttavaṇṇanāya līnatthapakāsana.

Soṇadaṇḍasuttavaṇṇanā niṭṭhitā.

5. Kūṭadantasuttavaṇṇanā

323. Evaṃ soṇadaṇḍasuttam samvaṇṇetvā idāni kūṭadantasuttam samvaṇṇento yathānupubbam samvaṇṇanokāsassa pattabhāvaṃ vibhāvetuṃ, soṇadaṇḍa suttasānantaram saṅgītassa suttassa kūṭadantasuttabhāvaṃ vā pakāsetuṃ “**evaṃ me sutam...pe... magadhesūti kūṭadantasutta**”nti āha. “**Magadhā nāma janapadino rājakumārā**”tiādīsu ambaṭṭhasutte kosala janapadavaṇṇanāyaṃ amhehi vuttanayo yathārahaṃ netabbo. Ayaṃ panettha viseso – magena saddhiṃ dhāvanti **magadhā**, rājakumārā, maṃsesu vā gijjhantīti **magadhā** niruttinayena. Ruḥhito, paccayalopato ca tesam nivāsabhūtepi janapade vuddhi na hotīti neruttikā. Janapadanāmeyeva bahuvacanaṃ, na janapadasadde jātisaddattāti vuttaṃ “**tasmim magadhesu janapade**”ti. **Ito paranti** “magadhesū”ti padato paraṃ “cārikam caramāno”tiādivacanaṃ. **Purimasuttadvayeti** ambaṭṭhasoṇadaṇḍasuttadvaye. **Vuttanayamevāti** yaṃ tattha āgatasadisam idhāgataṃ, taṃ atthavaṇṇanāto vuttanayameva, tattha vuttanayeneva vedittabanti vuttaṃ hoti. “Taruṇo ambarukkho ambalaṭṭhikā”ti brahmajālasuttavaṇṇanāyaṃ (dī. ni. aṭṭha. 1.2) vuttattā “**ambalaṭṭhikā brahmajāle vuttasadisāvā**”ti āha.

Yaññāvāṭam sampādetvā mahāyaññam uddissa saviññānakāni, aviññānakāni ca yaññūpakaraṇāni upaṭṭhapitānti atthaṃ sandhāya “mahāyañño upakkhaṭo”ti pāliyaṃ vuttaṃ, taṃ panetaṃ upakaraṇam tesam tathā sajjanamevāti dasseti “**sajjito**”ti iminā. **Vaccharasatānī**ti yuvabhāvappattāni balavavacchasatāni. Vacchānaṃ visesāti hi **vacchararā**, te pana vacchā eva honti, na dammā, na ca balābaddāti āha “**vacchasatānī**”ti. Ayaṃ ācariyamati (dī. ni. ṭī. 1.323). **Tara**-saddo vā anattakoti vuttaṃ “**vacchasatānī**”ti. Evañhi sabbopi vacchappabhedo saṅgahito hoti. **Eteti** usabhādayo urabbhapariyosānā. **Anekesanti** anekajātikānaṃ. **Migapakkhīnanti** mahimsarurupasadakuruṅgakaṇṇamigānañceva morakapiñjaravaṭṭakatittira lāpādipakkhīnañca. Saṅkhyāvasena anekataṃ sattasataggahaṇena paricchindituṃ “**sattasattasatānī**”ti vuttaṃ, sattasatāni, sattasatāni cāti attho. **Thūṇanti** yaññopakaraṇānaṃ migapakkhīnaṃ bandhanatthambhaṃ. **Yūpotipi** tassa nāmaṃ. Tenāha “**yūpasāṅkhāta**”nti.

328. Vidhāti vippaṭṭisāravīnodanā. Yo hi yaññasaṅkhātassa puññassa upakkilesa, tassa vidhamanato nivāraṇato nirodhanato vidhā vuccanti vippaṭṭisāravīnodanā, tā eva puññābhisandaṃ avicchinditvā ṭhapentīti “**ṭhapanā**”ti ca vuttā. Avippaṭṭisārato eva hi uparūpari puññābhisandappavattīti. Ṭhapanā cetā yaññassa ādimajjhāpariyosānavasena tīsu kālesu pavattiyā tippakārāti āha “**tiṭṭhapanā**”nti. **Parikkhārasaddo** cettha parivārapariyāyo “parikaronti yaññaṃ abhisāṅkharonti”ti katvā. Tenāha “**soḷasaparivāra**”nti.

Mahāvijitarājayaññakathāvaṇṇanā

336. Pubbe bhūtaṃ **bhūtapubbam** yathā “diṭṭhapubba”nti āha “**pubbacarita**”nti, attano purimajātisambhūtaṃ bodhisambhārabhūtaṃ puññācariyanti attho. Tathā hi tassa anugāminidhissa thāvaranidhinā nidassanaṃ upapannaṃ hoti. Saddavidū pana vadanti “**bhūtapubbanti** idaṃ kālasattamiyā nepātikapada”nti. Atītakāleti hi tesam matena attho. **Assāti** anena. Mahantaṃ pathavīmaṇḍalaṃ vijitanti sambandho. Mahantaṃ vā vijitaṃ pathavīmaṇḍalamassa atthīti attho. “Antoraṭṭheti yassa vijite viharati, tassa raṭṭhe”tiādīsu viya hi **vijitasaddo** rajje pavattati, iminā tassa ekaṛājabhāvaṃ dīpeti, na cakkavattirājabhāvaṃ sattaratanasampannatāvacanato. Pāliyaṃ na yena kenaci santakamattena aḍḍhatāti dassetuṃ “**aḍḍho**”ti vatvā “**mahaddhano**”ti vuttaṃ. Tenāha “**yo**

kocī’tiādi. Aḍḍhatā hi nāma vibhavasampannattā sā ca taṃ tadupādāya vuccati. Tathā mahaddhanatāpīti taṃ thāmapattam ukkaṃsagataṃ dassetuṃ “**aparimāṇasaṅkhyenā**”ti āha. Bhuñjitabbaṭṭhena visesato kāmā idha **bhogā** nāmāti dasseti. “**Pañcakāmaguṇavasenā**”ti iminā. **Piṇḍapiṇḍavasenāti** bhājanālaṅkāradivibhāgaṃ ahutvā kevalaṃ khaṇḍakhaṇḍavasena.

Rūpaṃ appetvā, anappetvā vā māsappamāṇena kato **māsako**. Ādisaddena thālakādīni saṅgaṇhāti. **Anekakoṭṭisaṅkhyenāti** kahāpaṇānaṃ koṭṭisatādippamāṇaṃ sandhāya vuttaṃ heṭṭhimantena koṭṭisatappamāṇeneva khattiyamahāsālabhāvappattito.

Tuṭṭhīti sumanatā. **Upakaraṇasaddo** cettha kāraṇapariyāyo. Kiṃ pana tanti āha “**nānāvidhālaṅkārasuvaṇṇarajatabhājanādibheda**”nti. Ādisaddena vatthaseyyāvasathādīni saṅgayhanti, suvaṇṇarajatamaṇimuttāveḷuriyavajirapavāḷāni **satta ratanānīti** vadanti. Yathāhu –

“Suvaṇṇaṃ rajataṃ muttā, maṇiveḷuriyāni ca;
Vajiraṅca pavāḷanti, sattāhu ratanānime”ti.

Sālivīhiādi sattadhaññaṃ sānulomaṃ pubbannaṃ nāma purekkhataṃ sassaphalanti katvā. Tabbipariyāyato muggamāsādi tadavasesaṃ aparannaṃ nāma. Aparannato pubbe pavattamaṇaṃ pubbannaṃ, tato aparasmaṃ pavattamaṇaṃ aparannaṃ. Nna-kārassa pana ṇṇa-kāre kate **pubbaṇṇaṃ**, **aparaṇṇaṅcāti** neruttikā. Pubbāparabhāvo panetesam ādikappe sambhavāsambhavavasena veditabbo. Purimaṃ “aḍḍho mahaddhano pahūtajātarūparajato”ti vacanaṃ devasikaṃ paribbayadānagahaṇādivasena, parivattanadhanadhaññavasena ca vuttaṃ, idaṃ pana “pahūtadhanadhañña”ti vacanaṃ nidhānagatadhanavasena, saṅgahitadhaññavasena cāti imaṃ visesaṃ sandhāya ayaṃ nayo dassito. Vīsakahāpaṇambaṇādidevasikavaḷaḷaṅjanampi hi mahāsālalakkhaṇaṃ.

Idāni tabbiparītavasena visesaṃ dassetuṃ “**atha vā**”tiādinā dutiyanayo āradḍho. Iminā eva hi purimavacanaṃ nidhānagatadhanavasena, saṅgahitadhaññavasena ca vuttanti atthato siddhaṃ hoti. Tattha **idanti** “pahūtadhanadhañña”ti vacanaṃ. **Assāti** mahāvijitarañño. Divase divase paribhuñjitabbaṃ **devasikaṃ**, bhāvanapūṃsakametaṃ. Dāsakammakaraporisādīnaṃ vettanānuppadānaṃ **paribbayadānaṃ**. Inasodhanādivasena dhanadhaññānamādānaṃ **gahaṇaṃ**. Ādisaddena inadānādīnaṃ saṅgaho. **Parivattanadhanadhaññavasenāti** kayavikkayakaraṇena parivattitabbānaṃ dhanadhaññānaṃ vasena. Katthaci pana samuccayavirahitapāṭho dissati. Tattha “paribbayadānaggahaṇādivasena”ti idaṃ parivattanapadena sambandhaṃ katvā tādīsena vidhinā ito cito ca parivattetabbānaṃ dhanadhaññānaṃ vasenāti attho veditabbo.

Koṭṭhaṃ vuccati dhaññaṭṭhapanatṭhānaṃ, tadeva agāraṃ tathā. Tenāha “**dhaññena paripuṇṇakoṭṭhāgāro**”ti. Evaṃ sārāgabbhaṃ **koso**, dhaññaṭṭhapanatṭhānaṃ **koṭṭhāgāraṇti** dassetvā idāni tato aññathāpi taṃ dassetuṃ “**atha vā**”tiādi vuttaṃ. Tattha yathā asino tikkhabhāvaparīhārato paricchado “koso”ti vuccati, evaṃ rañño tikkhabhāvaparīhārakattā caturaṅginī senā “koso”ti āha “**catubbidho koso**”tiādi. “Dvādasapuriso hatthī”tiādinā (pāci. 314) vuttalakkhaṇena cettha **hatthi**ādayo gahetabbā. Vatthakoṭṭhāgāragahaṇeneva sabbassapi kuppabhaṇḍatṭhapanatṭhānassa gahitattā “**koṭṭhāgāraṃ tividha**”ntiādi vuttaṃ. Jātarūparajatato hi aññaṃ lohaayadāruvisāṇavatthādīkamasāradabbaṃ gopetabbato ga-kārassa ka-kāraṃ katvā **kuppaṃ** vuccati. Jātarūparajatanidhānaṃ **dhanakoṭṭhāgāraṃ**. Tattha tatha ratanaṃ viloketvā caraṇaṃ **ratanavilokanacārikā**. Kāmaṃ tamatthaṃ rājā jānāti, bhaṇḍāgārikena pana kathāpetvā parisāya nissaddabhāvāpādanatthameva evaṃ pucchati. Tathā kathāpane hi asati parisā saddaṃ karissati “kasmā rājā paramparāgataṃ kuladhaṇaṃ vināseti”ti, tato ca pakatikkhobho bhavissati, sati pana tathā kathāpane “etaṃkāraṇa taṃ chaḍḍeti”ti nissaddabhāvamāpajjissati. Tato ca pakatikkhobho na bhavissati, tasmā tathā pucchati veditabbaṃ. **Maraṇavasanti** maraṇassa, maraṇasaṅkhātaṃ vā visayaṃ.

337. Pāliyaṃ “āmantetvā”ti etassa mantitukāmo hutvāti atthaṃ viññāpetuṃ “**ekena paṇḍitena saddhiṃ mantetvā**”ti vuttaṃ. Dhātvatthānuvattako hettha upasaggo, pakaraṇādhigato ca katthaci atthaviseso yathā “sikkhamānena bhikkhave bhikkhunā aññātabbaṃ paripucchitabbaṃ paripañhitabba”nti (pāci. 434). Tathā hissa padabhājjane vuttaṃ “sikkhamānenāti sikkhitukāmena. Aññātabbanti jānitabba”ntiādi (pāci. 436). **Āmantesi**ti mantitukāmosi. Janapadassa anupaddavatthaṃ, yaññassa ca cirānappavattanattaṃ brāhmaṇo cintesi āha “**ayaṃ rājā**”tiādi. Āharantānaṃ manussānaṃ gehānti sambandho, anādare vā etaṃ sāmivacanaṃ.

338. Sattānaṃ hitasukhassa vidūsanato, ahitadukkhassa ca āvahanato kaṇṭakasadisatāya corā eva idha “**kaṇṭakā**”ti vuttaṃ “**corakaṇṭakehi sakaṇṭako**”ti. Yathā gāmvāsīnaṃ ghātakā gāmaghātakā abhedavasena, upacārena ca nissayanāmassa nissitepi pavattanato, evaṃ panthikānaṃ duhanā bādhanā **panthaduhā**. Dhammato apetassa ayuttassa karaṇasīlo **adhammakārī**, yo vā attano vijite janapadādīnaṃ tato tato anattato tāyanena khattiyena kattabbadhammo, tassa akaraṇasīloti attho. **Dassūti** corānametaṃ adhivacanaṃ. Daṃsenti viddhaṃsentīti hi **dassavo** niggahītalopena, te eva khīlasadisattā **khīlanti dassukhīlaṃ**. Yathā hi khetto khīlaṃ kasanādīnaṃ sukhappavattiṃ, mūlasantānena sassaparibuddhiṃca vibandhati, evaṃ dassavopi rajje rājāṇāya sukhappavattiṃ, mūlavirulhiyā janapadaparibuddhiṃca vibandhanti. Pañacāgaṃ dassetuṃ “**māraṇenā**”ti vuttaṃ, hiṃsanaṃ dassetuṃ “**koṭṭānenā**”ti. **Vadhasaddo** hi hiṃsanatthopi hoti “vadhati na rodati, āpatti dukkaṭassā”tiādīsu (pāci. 880) viya, kapparādīhi pothanenāti attho. **Addu** nāma dārukkhandhena kato bandhanopakaraṇaviseso, tena bandhanaṃ tathā. **Ādisaddena** rajjubandhanasaṅkhalikabandhanagharabandhanādīni saṅgaṇhāti. **Hā**-dhātuyā jānipadanipphattiṃ dasseti “**hāniyā**”ti iminā, sā ca dhanahāyanaevāti vuttaṃ “**sataṃ gaṇhathā**”tiādi.

Pañcasikhamattaṃ ṭhapetvā muṇḍāpanaṃ **pañcasikhamuṇḍakaraṇaṃ**. Taṃ “kākapakkhakarāṇa”ntipi voharanti. Sīse chakaṇodakāvasecanaṃ **gomayasiñcanaṃ**. **Kudaṇḍako** nāma catuhatthato ūno rassadaṇḍako, yo “gaddulo”tipi vuccati, tena bandhanaṃ **kudaṇḍakabandhanaṃ**. **Ādisaddena** khuramuṇḍaṃ karitvā bhasmapuṭavadhanādīnaṃ saṅgaho. **Sammāsaddo** ñāyatthoti āha “**hetunā**”tiādi, pariyaṇavacanaṃ. **Ūhanissāmīti** uddharissāmi, apanessāmīti attho. Pubbe tattha kataparicayatāya **ussāhaṃ karonti**. “**Anuppadetū**”ti etassa anu anu padetūti atthaṃ sandhāya “**dinne appahonte**”tiādi vuttaṃ. **Kasiupakaraṇabhaṇḍaṃ** phālapājanayuganaṅgalādi, iminā pāliyaṃ bījabhattameva nidassanavasena vuttanti dasseti. Sakkhikaraṇapaṇṇāropananibandhanaṃ vaḍḍhiyā saha vā vinā vā puna gahetukāmassa dāne hoti, idha pana tadubhayampi natthi puna aggahetukāmattāti vuttaṃ “**sakkhiṃ akatvā**”tiādi. Tenāha “**mūlacchejjavasena**”ti. **Sakkhinti** tadā paccakkhakaṇaṃ. **Paṇṇe anāropetvāti** tālādipaṇṇe yathāciṇṇaṃ likhanavasena anāropetvā. Aññattha paṇṇākārepi **pābhatasaddo**, idha pana bhaṇḍamūleyevāti āha “**bhaṇḍamūlassā**”tiādi. Bhaṇḍamūlañhi pakārato udayabhaṇḍāni ābharati saṃharati etenāti **pābhatam**. Udayadhanato pageva ābhatam **pābhatanti** saddavidū, paṇṇākāro pana taṃ tadatthaṃ patthentehi ābharīyateti **pābhatam**. Patthanattahajotako hi ayaṃ **pa**-saddo.

“**Yathāhā**”tiādīnā pābhatasaddassa mūlabhaṇḍatthataṃ **cūlasetṭhijātaka**pāṭhena (jā. 1.1.4) sādheti. Tatrāyamaṭṭhakathā (jā. aṭṭha. 1.1.4) “**appakenapīti** thokenapi parittakenapi. **Medhāvīti** paññavā. **Pābhatenāti** bhaṇḍamūlena. **Vicakkhaṇoti** vohārakusalo. **Samuṭṭhāpeti attānanti** mahantaṃ dhanañca yasañca uppādetvā tattha attānaṃ saṅṭhāpeti patiṭṭhāpeti. Yathā kiṃ? **Aṇuṃ aggimva sandhamam**, yathā paṇḍitapuriso parittaṃ aggim anukkamena gomayacuṇṇādīni pakkhipitvā mukhavātena dhamanto samuṭṭhāpeti vaḍḍheti mahantaṃ aggikkhandham karoti, evameva paṇḍito thokampi pābhatam labhitvā nānāupāyehi payojetvā dhanañca yasañca vaḍḍheti, vaḍḍhetvā ca pana tattha attānaṃ patiṭṭhāpeti, tāya eva vā pana dhanayasamahantatāya attānaṃ samuṭṭhāpeti, abhiññātaṃ pākāṭam karotīti attho”ti.

Divase divase dātabbaṃ **devasikaṃ**. Māse māse dātabbaṃ **māsikaṃ**. **Ādisaddena** anuposathikādīni saṅgaṇhāti. **Tassa tassa** purisassa. Kusalānurūpena, kammānurūpena

sūrabhāvānurūpenāti dvandato param suyyamāno **anurūpasaddo** paccekam yojetabbo. Chekabhāvānurūpatā cetha **kusalānurūpaṃ**. Katthaci **kulasaddo** dissati, so ca jāṇuṣoṇiādikulānamiva **kulānurūpampi** dātabbato yujjateva. Senāpaccādi **jhānantaram**, iminā bhattavetanam niddiṭṭhamattanti dasseti. Sakakammapasutattā, anupaddavattā ca **dhanadhaññānam rāsiko** rāsikārabhūto. **Khemena thitāti** anupaddavena pavattā. Tenāha “**abhayā**”ti, kutoci pi bhayarahitāti attho. **Modā modamānāti** modāya modamānā, somanasseneva modamānā, na saṃsandanamattenāti vuttam hoti. “Bhagavatā saddhiṃ sammodi”tiādīsu (dī. ni. 1.381) hi **mudasaddo** saṃsandanepi pavattati, aññe modā hutvā aparepi modamānā viharantīti vā attho. Tenāha “**aññamaññam pamuditacittāti**, asaññogepi vatticchāyeva vuddhīti dvidhā pāṭho vutto. **Iddhaphītabhāvanti** samiddhavepullabhāvaṃ.

Catuparikkhāraṇṇanā

339. Tasmim tasmim kicce anuyanti anuvattantīti anuyantā. Teyeva **ānuyantā** yathā “anubhāvo eva ānubhāvo”ti, “ānuyuttā”tipi pāṭho, tasmim tasmim kicce anuyujjantīti hi **ānuyuttā** vuttanayena. **Assāti** rañño. **Teti** ānuyantakhattiyādayo. “Amhe ettha bahi karotī”ti **attamanā na bhavissanti**. “Nibandhavipulāyāgamo gāmo **nigamo**. Vivaḍḍhitamahāyā mahāgāmo”ti (dī. ni. 1.338) ācariyena vuttam. “Apākāraparikkhepo sāpaṇo **nigamo**, sapākārāpaṇam **nagaraṃ**, tam tabbiparīto **gāmo**”ti (kaṅkhāvitarāṇi abhinavaṭṭikāyaṃ saṅghādisesakaṇḍe kuladūsakasikkhāpade passitabbaṃ) vinayaṭṭikāsu. Gasanti madanti etthāti **gāmo**, sveva pākāto ce, **nigamo nāma** atireko gāmoti katvā. Bhusattho hettha **nī-saddo**, saññāsaddattā ca rassoti saddavidū. Janapadattho vuttova. “Sāmyāmacco sakhā koso, duggaṇca vijitam bala”nti vuttāsu sattasu rājapakatīsu rañño tadavasesānam channaṃ vasena hitasukhātivuddhi, tadekadesā ca ānuyantādayoti āha “**yaṃ tumhāka**”ntiādi.

Tamtamkicesu raññā amā saha bhavantīti **amaccā**. “Amāvāsī”tiādīsu viya hi samakiriyāya **amāti** abyayapadam, ca-paccayena taddhitasiddhīti neruttikā. Rajjakiccavosāsanakāle pana te raññā piyā, sahapavattanakā ca bhavantīti dasseti “**piyasahāyakā**”ti iminā. Rañño parisati bhavā “**pārisajjā**. Ke pana teti vuttam “**sesā āṇattikārakā**”ti, yathāvuttānuyuttakhattiyādīhi avasesā rañño āṇākarāti attho. Satipi deyyadhamme ānubhāvasampattiyā, parivārasampattiyā ca abhāve tādisaṃ dātuṃ na sakkā. Vuddhakāle ca tādīsānampi rājūnam tadubhayaṃ hāyateva, deyyadhamme pana asati pagevāti dassetuṃ “**deyyadhammasmiñhi**”tiādīmāha. Deyyadhammasmiṃ asati ca mahallakakāle ca dātuṃ na sakkāti yojanā. **Etenāti** yathāvuttakāraṇadvayena. **Anumatīyāti** anujānanena. **Pakkhāti** sapakkhā yaññassa aṅgabhūtā. Yaññam parikarontīti **parikkhārā**, sambhārā, te ca tassa yaññassa aṅgabhūtattā parivārā viya hontīti āha “**parivārā bhavanti**”ti. “**Ratho**”tiādīnā idhānadhīppetamattham nisedheti.

“Ratho setaparikkhāro, jhānakkho cakkavīriyo;
Upekkhā dhurasamādhi, anicchā parivāraṇa”nti. (saṃ. ni. 5.4);

Hi **saṃyuttamahāvaggapāli**. Tattha **rathoti** brahmayānasaññito aṭṭhaṅgikamaggaratho. **Setaparikkhāro**ti catupārisuddhisīlālakāro. “**Sīlaparikkhāro**”tipi pāṭho. **Jhānakkhoti** vipassanāsampayuttānam pañcannaṃ jhānaṅgānam vasena jhānamayaakkho. **Cakkavīriyoti** vīriyacakko. **Upekkhā dhurasamādhi**ti upekkhā dvinnam dhurānam samatā. **Anicchā parivāraṇanti** alobho sīhadhammādīni viya parivāraṇam.

Aṭṭhaparikkhāraṇṇanā

340. Ubhato **sujātādīhi** vuccamānehi. **Yasasāti** pañcavidhena ānubhāvena. Tenāha “**añāthapanasamatthatāyā**”ti. “**Saddho**”ti etassa “dātādānassa phalam paccanubhoti pattiyāyati”ti attham dassetuṃ “**dānassā**”tiādi vuttam. Dāne sūroti **dānasūro**, deyyadhamme īsakampi saṅgam akatvā muttacāgo, tabbhāvo pana kammassakatāññāssa tikkhavisadabhāvena veditabbo. Tassa hi tikkhavisadabhāvaṃ vibhāvetuṃ “saddo”ti vatvā “dānasūro”ti vuttanti daṭṭhabbaṃ. Tenāha “**na saddhāmattakenā**”tiādi. Yassa hi kammassakatā paccakkhamiva upaṭṭhāti, so evam vutto. **Yaṃ**

dānaṃ detīti yaṃ deyyadhammaṃ parassa deti. **Tassa pati hutvāti** tabbisayaṃ lobhaṃ sutthumabhibhavanto tassa adhipati hutvā deti. Kāraṇopacāravacanañhetam. Paratopi eseva nayo. Tabbisayena lobhena anākaḍḍhanīyattā **na dāso, na sahāyo**.

Tadevatthaṃ byatirekato, anvayato ca vivarivā dassento “**yo hī**”tiādimāha. Idhānadhīppetassa hi dāsādidvayassa byatirekato dassanaṃ. Khādanīyabhojanīyādīsu madhurasseva paṇītattā “**madhuraṃ bhuñjati**”ti vuttaṃ, nidassanamattaṃ vā etaṃ, paṇītaṃ paribhuñjati vuttaṃ hoti. **Dāso hutvā deti** taṇhāya dāsabyataṃ upagattā. **Sahāyo hutvā deti** tassa piyabhāvānissajjanato. **Sāmī hutvā deti** tattha taṇhādāsabyato attānaṃ mocetvā abhibhuyya pavattanato. Yaṃ panetaṃ ācariyena vuttaṃ “sāmi paribhogasadisā”ti, (dī. ni. tī. 1.340) taṃ taṇhādāsabyamatikkantatāsāmaññaṃ sandhāya vuttaṃ. Na hi khīṇāsavassa paribhogo sāmi paribhogo viya khīṇāsavasseva dānaṃ dānasāmīti attho upapanno hoti, pacchā vā pamādalikhitametaṃ. **Tādisoti** dānasāmīsabhāvo.

Samitapāpasamaṇabāhitapāpabrāhmaṇā ukkaṭṭhaniddesenettha vuttā, pabbajjāmatasamaṇajātimattabrāhmaṇā vā kapaṇādiggahaṇena gahitāti vedītabbaṃ. **Duggatāti** dukkaraṃ jīvikamupagatā kasiravuttikā. Tenāha “**daliddamanussā**”ti. **Pathāvinoti** maggaḡāmino. **Vaṇibbakāti** dāyakānaṃ guṇakittanavasena, kammaphalakittanamukhena ca yācanakā seyyathāpi naggacariyādayoti atthaṃ dassetuṃ “**ye iṭṭhaṃ dinna**”ntiādi vuttaṃ. Tadubhayeneva hi dānassa vaṇṇathomanā sambhavati. Ye vicaranti, te vaṇibbakā nāmāti yojetabbaṃ. **Pasatamattanti** vīhitaṇḍulādivasena vuttaṃ, **sarāvamattanti** yāgubhattādivasena. **Opānaṃ** vuccati ogāhetvā pātābato nadītalākādīnaṃ sabbasādhāraṇaṃ titthaṃ, opānamivabhūtoti **opānabhūto**. Tenāha “**udapānabhūto**”tiādi. **Hutvāti** bhāvato. **Sutameva sutajātanti jātasaddassa** anattantaravācakkattamāha yathā “kosajāta”nti.

Atītiādiatthacintanasamatthātā nāma tassa rañño anumānavasena, itikattābātāvasena ca vedītabbā, na buddhānaṃ viya tattha paccakkhadassitāyāti dassetuṃ “**afīte**”tiādi vuttaṃ. Puññāpuññānisamsacintanañcettha pakaraṇādhiḡatavasena vedītabbaṃ. **Puññassāti** yaññāpuññassa. **Dāyakacittampīti** dāyakānaṃ, dāyakaṃ vā cittampi, dātukamyatācittampīti vuttaṃ hoti. Imesu pana aṭṭhasu aṅgesu aḍḍhatādayo pañca yaññassa tāva parikkhārā hontu tehi vinā tassa asijjhanato, sujātātā, pana sūrūpatā ca kathaṃ yaññassa parikkhāro siyā tadubhayena vināpi tassa sijjhanatoti codanāya sabbesampi aṭṭhannaṃāṅgānaṃ parikkhārabhāvaṃ anvayato, byatirekato ca dassento “**ete hi kirā**”tiādimāha. Ettha ca keci evaṃ vadanti “yathā aḍḍhatādayo pañca yaññassa ekaṃsatova aṅgāni, na evaṃ sujātātā, sūrūpatā ca, tadubhayaṃ pana anekāṃsatova aṅgānti dīpetuṃ arucisūcakassa **kirasaddassa** gahaṇaṃ kata”nti. Te hi “ayaṃ dujjātotiādivacanassa anekāṃsikataṃ maññamānā tathā vadanti, tayidaṃ asāraṃ. Sabbasādhāraṇavasena hetam byatirekato yaññassa aṅgabhāvadassanaṃ tattha siyā kesañci tathā parivītakko”ti tassāpi avakāsābhāvadassanattameva evaṃ vuttattā, tadubhayaṃsādhāraṇavaseneva anekāṃsato aṅgabhāvassa adassanato ca. Kirasaddo panettha tadā brāhmaṇassa cintitākārasūcanattho daṭṭhabbo. Evamanena cintetvā “imānīpi aṭṭhaṅgāni tasseva yaññassa parikkhārā bhavanti vuttāni”ti kirasaddena tassa cintitākāro sūcīto hoti. **Evamādīnīti** ettha **ādisaddena** “ayaṃ virūpo kittakaṃ...pe... upacchindissati, ayaṃ daliddo, appesakkho, assaddho, appassuto, na atthaññū, na medhāvī kittakaṃ...pe... upacchindissati”ti etesaṃ saṅgaho vedītabbo.

Catuparikkhārādivaṇṇanā

341. “Sujam paggaṇhantāna”nti ettha **soṇadaṇḍasuttavaṇṇanāyaṃ** (dī. ni. aṭṭha. 1.311-313) vuttesu dvīsu vikappesu dutiyavikappaṃ nisedhento “**mahāyāga**”ntiādimāha, tena ca purohitassa sayameva kaṭacchuggahaṇajotanena evaṃ sahatthā sakkaccaṃ dāne yuttapayuttatā icchitābbāti dasseti. **Evaṃ dujjātassāti** etthāpi “sujātātāya anekāṃsato aṅgabhāvadassanamevida”nti aggahetvā heṭṭhā vuttanayena sabbasādhāraṇavaseneva attho gahetabbo. **Ādisaddena** hi “evaṃ anajjhāyakassa...pe... dussīlassa...pe... duppaññassa saṃvidhānena pavattadānaṃ kittakaṃ kālam pavattissati”ti etesaṃ saṅgaho daṭṭhabbo. **Tasmāti** tadubhayakāraṇato.

Tissovidhāvaṇṇanā

342. Tiṇṇaṃ ṭhānānanti dānassa ādimajjhapariyosānasāṅkhātānaṃ tissannaṃ bhūmīnaṃ, avatthānānanti attho. **Calantīti** kampanti purimākārena na tiṭṭhanti. **Karaṇattheti** tatiyāvibhattiatthe. Karaṇīyasaddāpekkhāya hi kattari **eva** etaṃ sāmivacanaṃ, na karaṇe. Yebhuyyena hi karaṇajotakavacanassa atthabhāvato anuttakattāva karaṇatthoti idhādhippeto. Pacchānutāpassa akaraṇūpāyaṃ dassetuṃ “**pubba...pe... patiṭṭhapetabbā**”ti vuttaṃ. Tattha **acalāti** dalhā kenaci asaṃhīrā. **Patiṭṭhapetabbāti** suppatiṭṭhitā kātabbā. Tathā patiṭṭhāpanūpāyampi dassento “**evañhī**”tiādīmāha. Tathā patiṭṭhāpanena hi yathā taṃ dānaṃ sampati yathādhippāyaṃ nippajjati, evaṃ āyatimpi vipulaphalatāya mahapphalaṃ hoti vippaṭṭisārena anupakkiliṭṭhabhāvato. **Dvīsu ṭhānesūti** yajamānayaṭṭhatṭhānesu. Vippaṭṭisāro...pe... na kattabboti atthaṃ sandhāya “**eseva nayo**”ti vuttaṃ. **Muñcacetanāti** pariccāgacetanā, tassā niccalabhāvo nāma muttacāgatā pubbābhisaṅkhāravasena ulārabhāvo. **Pacchāsamanussaraṇacetanāti** paracetanā, tassā pana niccalabhāvo “aho mayā dānaṃ dinnam sādhu suṭṭhū”ti dānassa sakkaccaṃ paccavekkhaṇavasena veditabbo. Tadubhayacetanānaṃ niccalakaraṇūpāyaṃ byatirekato dassetuṃ “**tathā...pe... hotī**”ti vuttaṃ. Tattha **tathā akarontassāti** muñcacetanaṃ, pacchāsamanussaraṇacetanañca niccalamakarontassa, vippaṭṭisāraṃ, uppādentassāti vuttaṃ hoti. “**Nāpi ulāresu bhogesu cittaṃ namatī**”ti idaṃ pana pacchāsamanussaraṇacetanāya eva byatirekato niccalakaraṇūpāyadassanaṃ. Evañhi yathānididdiṭṭhanidassanaṃ upapannaṃ hoti. Tattha **ulāresu bhogesu**ti khattavisesse pariccāgassa katattā laddhesupi ulāresu bhogesu. **Nāpi cittaṃ namati** pacchā vippaṭṭisārena upakkiliṭṭhabhāvato. Yathā kathanti āha “**mahāroruva**”ntiādi. Tassa hi seṭṭhissa gahapatino vatthu kosalasaṃyutte, (saṃ. ni. 1.131) mayhakajātake (jā. aṭṭha. 3.6.mayhakajātakavaṇṇanā) ca āgataṃ. Tathā hi vuttaṃ –

“Bhūtapubbaṃ so mahārāja seṭṭhi gahapati tagarasikhim nāma paccekasambuddhaṃ piṇḍapātena paṭipādesi, ‘detha samaṇassa piṇḍapāta’nti vatvā uṭṭhāyāsanaṃ pakkāmi, datvā ca pana pacchā vippaṭṭisārī ahosi ‘varametaṃ piṇḍapātaṃ dāsā vā kammakarā vā bhujjeyyu’ntiādi.

So kira aññesupi divasesu taṃ paccekabuddhaṃ passati, dātuṃ panassa cittaṃ na uppajjati, tasmiṃ pana divase ayaṃ padumavatiyā deviyā tatiyaputto tagarasikhī paccekabuddho gandhamādanapabbate phalasaṃpattisukhena vītināmetvā pubbaṇhasamaye vuṭṭhāya anotattadahe mukhaṃ dhovivā manosilātale nivāsetvā kāyabandhanaṃ bandhitvā pattacīvaramādāya abhiññāpādakaṃ jhānaṃ samāpajjitvā iddhiyā vehāsaṃ abbhuggantvā nagaradvāre oruyha cīvaraṃ pārupitvā pattamādāya nagaravāsīnaṃ gharadvāresu sahasabbhaṇḍikaṃ ṭhapento viya pāsādikehi abhikkamanādīhi anupubbena seṭṭhino gharadvāraṃ sampatto, taṃ divasañca seṭṭhi pātova uṭṭhāya paṇītaṃ bhojanaṃ bhujjivā gharadvāraḷḷhake āsanaṃ paññapetvā dantantarāni sodhento nisinna hoti. So paccekabuddhaṃ disvā taṃ divasaṃ pātova bhutvā nisinnattā dānacittaṃ uppādetvā bhariyaṃ pakkosāpetvā “imassa samaṇassa piṇḍapātaṃ dehi”ti vatvā rājupaṭṭhānatthaṃ pakkāmi. Seṭṭhibhariyā sampajaññajātikā cintesi “mayā ettakena kālena imassa ‘dethā’ti vacanaṃ na sutapubbaṃ, dāpentopi ca ajja na yassa vā tassa vā dāpeti, vītarāgadosamohassa vantakilesassa ohitabhārassa paccekabuddhassa dāpeti, yaṃ vā taṃ vā adatvā paṇītaṃ piṇḍapātaṃ dassāmi”ti gharā nikkamma paccekabuddhaṃ pañcapatiṭṭhitena vandivā pattaṃ ādāya antonivesane paññattāsane nisīdāpetvā suparisuddhehi sālitaṇḍulehi bhattaṃ sampādetvā tadanurūpaṃ khādaniyaṃ, byañjanaṃ, sūpeyyaṅca abhisāṅkharitvā pattaṃ pūretvā bahi gandhehi alaṅkaritvā paccekabuddhassa hatthesu patiṭṭhapetvā vandi. Paccekabuddho “aññesampi paccekabuddhānaṃ saṅghaṃ karissāmi”ti aparibhuñjivāva anumodanaṃ vatvā pakkāmi. Sopi kho seṭṭhi rājupaṭṭhānaṃ katvā āgacchanto paccekabuddhaṃ disvā āha “mayā tumhākaṃ piṇḍapātaṃ dethā”ti vatvā pakkantā, api vo laddho piṇḍapāto”ti? Āma, seṭṭhi laddhoti. “Passāmā”ti gīvaṃ ukkhipivā olokesi, athassa piṇḍapātagandho uṭṭhahitvā nāsapuṭaṃ pahari. So cittaṃ saṃyametūṃ asakkonto pacchā vippaṭṭisārī ahosi, tassa pana vippaṭṭisārassa uppānākāro “varameta”ntiādinā pāliyaṃ vuttoyeva. Piṇḍapātādānena panesa sattakkhattuṃ sugatiṃ saggam lokam upapanno, sattakkhattumeva ca sāvatthiyaṃ seṭṭhikule nibbato, ayañcassa sattamo bhavo, pacchā vippaṭṭisārena pana nāpi ulāresu

bhogesu cittaṃ namati. Vuttañhettaṃ **saṃyuttavaralañchake** –

“Yaṃ kho so mahārāja seṭṭhi gahapati datvā pacchā vippaṭṭisārī ahosi ‘varametaṃ piṇḍapātaṃ dāsā vā kammakarā vā bhūñjeyyu’nti, tassa kammassa vipākena nāssuḷārāya bhattabhogāya cittaṃ namati, nāssuḷārāya vatthabhogāya, yānabhogāya, nāssuḷārānam pañcannaṃ kāmagaṇānaṃ bhogāya cittaṃ namati”’ti (saṃ. ni. 1.131).

Mayhakajātakepi vuttaṃ –

“Iti mahārāja āgantukaseṭṭhi tagarasikhipaccekabuddhassa dinnapaccayena bahuṃ dhanam labhi, datvā aparacetanaṃ paṇītaṃ kātuṃ asamattatāya paṇīte bhoge bhūñjituṃ nāsakkhī”’ti (jā. aṭṭha. 3.6.mayhakajātakavaṇṇanā).

Bhātu panaesa ekaṃ puttaṃ (dha. pa. aṭṭha. 2.354) sāpateyyassa kāraṇā jīvitaṃ voropesi, tena kammena bahūni vassāni niraye paccittha, sattakkhattuñca aputtako jāto, idānipi teneva kammena mahāruruvaṃ upapanno. Tena vuttaṃ “**mahāruruvaṃ upapannassa seṭṭhigahapatino viyā**”’ti, purimacchimacetanāvasena cettha attho veditabbo. Ekā hi cetanā dve paṭisandhiyo na detīti.

Dasaākāraṇaṇā

343. Ākaroti attano anurūpatāya samariyādaparichedaṃ phalaṃ nibbattetīti **ākāro**, kāraṇanti āha “**dasahi kāraṇehī**”’ti. Mariyādattho hettha ā-saddo. Na dussīlesveva, atha kho **sīlavantesupi vippaṭṭisāraṃ uppādessati**. Tadubhayepi na uppādetabboti hi dassetuṃ api-saddena, pi-saddena vā sampiṇḍanaṃ karoti. **Paṭiggāhakatova uppajjati**ti balavataraṃ vippaṭṭisāraṃ sandhāya vuttaṃ, dubbalo pana deyyadhammato, parivārajanatopi uppajjateva. **Uppajjituṃ yuttanti** uppajjanārahaṃ. Vippaṭṭisāraṃpi vinodesīti sambandho. **Tesaṃyevāti** pāṇātipātīnameva. Yajanaṃ nāmettha dānamevādhippettaṃ, na aggijuhananti āha “**detu bhava**”’nti. **Vissajjati**ti muttacāgavasena cajatu. **Abhantaranti** ajjhattaṃ sakasantāne.

Soḷasākāraṇaṇā

344. Anumatipakkhādayo eva heṭṭhā yaññassa vatthuṃ katvā “soḷasaparikkhārā”’ti vuttā, idha pana sandassanādivasena anumodanāya āradhattā vuttaṃ “**soḷasahi ākārehī**”’ti. **Dassetvāti** attano desanānubhāvena paccakkhamiva phalaṃ dassetvā, anekavāraṃ pana dassanato “dassetvā dassetvā”’ti byāpanavacanam, tadeva ābhuso meḍanatṭhena **āmedītavacananti** ācariyena (dī. ni. ṭī. 1.344) vuttaṃ. “**Samādapetvā samādapetvā**”’tiādīsipi eseva nayo. **Tamatthanti** dānaphalavasena kammaphalasambandhamattaṃ. **Samādapetvāti** sutamattaṃ akatvā yathā rājā tamattaṃ sammadeva ādiyati citte karonto suggahitaṃ katvā gaṇhāti, tathā sakkaccaṃ ādapetvā.

“**Vippaṭṭisāraṇanodanē**”’ti idaṃ nidassanamattaṃ. Lobhadosaṃmohāssāmacchariyamānādayopi hi dānacittassa upakkilesā, tesaṃ vinodanēnapi taṃ vodāpitaṃ samuttejitaṃ nāma hoti tikkhavisadabhāvāpattito, āsannatarabhāvato pana vippaṭṭisāraṇanodanēna gahitaṃ. Pavattite hi dāne tassa sambhavoti. Yāthāvato vijjamañehi guṇehi haṭṭhapahaṭṭhabhāvāpādanam sampahaṃsananti āha “**sundara**”’ntiādi. **Dhammatoti** saccato. Tadatthameva dassetuṃ “**dhammena samena kāraṇē**”’ti vuttaṃ. Saccañhi dhammato anapetattā **dhammaṃ**, upasamacariyabhāvato **samaṃ**, yuttabhāvena **kāraṇanti** ca vuccati.

345. Tasmim yaññe rukkhatinaṇchedopi nāma nāhosi, kuto pāṇavadhoti pāṇavadhābhāvasseva dalhīkaraṇattaṃ, sabbaso viparītaggāhehi avidūsitatādassanattañca pāḷiyam “neva gāvo haññimsū”’tiādīni vatvāpi “na rukkha chijjimsū”’tiādi vuttanti dassento “**ye yūpanāmake**”’tiādīmāha. **Barihisatthāyāti** paricchedatthāya. **Vanamālāsāṅkhepenāti** vanapupphehi gandhitamālāniyāmena.

Evaṃ ācariyena (dī. ni. ṭī. 1.345) vuttaṃ, vanapantiākārenāti attho. **Bhūmiyaṃ vā pattharantī** vedibhūmiṃ parikkhipantā tatha tatha pattharanti. Mantādinā hi parisāṅkhatā bhūmi vindati assa lābhasakkāreti katvā “**vedī**”ti vuccati. Tepi rukkhā tepi dabbāti sambandho, kammakattā cetam dvayaṃ, abhihitakammaṃ vā. Vatticchāya hi yathāsattim kārakā bhavanti. Vuttanayena pānavadhābhāvassa daḥhikaraṇattham, viparītaggāhena avidūsitabhāvadassanattāñcetanti dasseti **kiṃ panā**”tiādinā. **Antogehadāso** antojāto. **Ādisaddena** dhanakkītakaramarānītasāmaṃdāsabyūpagatānaṃ saṅgaho. **Pubbamevāti** bhatikaraṇato pageva. **Dhanaṃ gahetvāti** divase divase yathākammaṃ gahetvā. **Bhattavetananti** devasikaṃ bhattañceva māsikādiparibbayañca. Vuttovāyamattho. **Tajjitāti** santajjitā. **Parikammānīti** sabbabhāgiyāni kammāni, uccāvacaṇi kammānīti attho. **Piyasamudācārenevāti** iṭṭhavaneneva. **Yathānāmasenevāti** pākaṇānāmanurūpeneva. **Sappitelanavanītadadhimadhuphāṇitena cevāti** ettha **ca**-saddo avuttasamuccayattho, tena paṇītapāṇītanāṃ nānappakārānaṃ khādanīyabhojanīyādīnañceva vatthayānamālāgandhavilepanaseyyāvasathādīnañca saṅgaho daṭṭhabbo, tenāha “**paṇītehi sappitelādisammissehevā**”tiādi. Tassa tassa kālassa anurūpehi yāgu...pe... pānakādīhīti sambandho. **Sappiādīnanti** sappiādīhi.

346. Paṭisāmetabbato, attano attano santakabhāvato **ca saṃ** nāma dhanam vuccati, tassa paṭīti **sapati** niggahitalopena, dhanavā, diṭṭhadhammikasamparāyikahitāvahattā tassa hitanti **sāpateyyam**, tadeva dhanam. Tenāha “**pahūtaṃ dhana**”nti. **Akkhayadhamamevāti** akhayasabhāvameva. **Gāmbhāgenāti** saṃkittanavasena gāme vā gahetabbabhāgena, evaṃ ācariyena (dī. ni. ṭī. 1.346) vuttaṃ, paccekam sabhāgagāmakotṭhāsenātipi attho. Sesesupi eseva nayo.

347. Yaññāvāṭoti khaṇitāvāṭassa assamedhādiyaññayajanaṭṭhānassetam adhivacanam, tabbohārena pana idha dānasālāya eva, tāya ca puratthimanagaradvāre katāya puratthimabhāge evāti attham dasseti “**puratthimato nagaradvāre**”tiādinā. Tam pana ṭhānam rañño dānasālāya nātidūre evāti āha “**yathā**”tiādi. Yato tatha pātarāsam bhuñjitvā akilantarūpāyeva sāyanhe rañño dānasālam sampāpuṇanti. “**Dakkhiṇena yaññāvāṭassā**”tiādīsupi eseva nayo. **Yāguṃ pivitvāti** hi yāgusīsenā pātarāsabhojanamāha.

348. Madhuranti sādurasam. **Upari vattabbamatthanti** “apica me bho evaṃ hotī”tiādinā vuccamānamattham. **Parihārenāti** bhagavantam garuṃ katvā agāravaparihārena, ujukabhāvāpanayanena vā, ujukavuttiṃ pariharitvā vaṅkavuttiyāva yathācintitamattham pucchanto evamāhāti vuttaṃ hoti. Tenāha “**ujukameva pucchayamāno agāravo viya hotī**”ti.

Niccadānaanukulayaññavaṇṇanā

349. Uṭṭhāyāti dāne uṭṭhānavīriyamāha, **samuṭṭhāyāti** tassa sātaccakiriyaṃ. Kasivāñijjādīkammāni **akaronto** daliddiyādianatthāpattiyā **nassissatīti** adhippāyo. **Appasambhārataro ceva mahapphalataro cāti** saṅkhepato aṭṭhakathāyaṃ vutto pāliyaṃ pana “appatthataro ca appasamārambhataro ca mahapphalataro ca mahānisaṃsataro cā”ti pāṭho. Tatha **appasambhārataroti** ativiya parittasambhāro, asamārabbiyasambhāro. **Appatthataroti** pana ativiya appakicco, **attho** cettha kiccaṃ, ttha-kārassa ṭṭha-kāram katvā “**appaṭṭhataro**”tipi pāṭho. Sammā ārabhiyati yañño etenāti **samārambho**, sambhārasambharaṇavasena pavattasattapīlā, appo samārambho etassāti tathā, ayaṃ panātisayenāti **appasamārambhataro**. Vipākasaññitam mahantam sadisaṃ phalametassāti **mahapphalo**, ayaṃ panātisayenāti **mahapphalataro**. Udayasaññitam mahantam nissandādīphalametassāti **mahānisaṃso**, ayaṃ panātisayenāti **mahānisaṃsataro**. **Dhuvadānānīti** dhuvāni thirāni avicchinnāni katvā dātabbadānāni. **Niccabhāttānīti** ettha bhattasīsenā catupaccayaggahaṇam. **Anukulayaññānīti** anukulam kulānukkamaṃ upādāya dātabbadānāni. Tenāha “**ambhāka**”ntiādi. Yāni pavattetabbāni, tāni anukulayaññāni nāmāti yojetabbam. **Nibaddhadānānīti** nibandhetvā niyametvā pavenīvasena pavattitadānāni.

Hatthidantena katā **dantamayasalākā**, yattha dāyakānaṃ nāmaṃ anḅanti, iminā taṃ niccabhattaṃ salākadānavasenāti dasseti. **Taṃ kulanti** anāthapiṇḅikakulaṃ. **Dāliddiyenāti** daliddabhāvena. **“Ekasalākato uddhaṃ dātum nāsakkhī”**ti iminā ekenapi salākadānena nibaddhadānaṃ upacchinditumadatvā anurakkhaṇamāha. **Raññoti** setavāhanarañño.

Ādini vatvāti ettha ādisaddena “kasmā seno viya maṃsapesiṃ pakkhanditvā gaṇhāsī”ti evamādīnaṃ samasamadāne ussukkanavacanānaṃ saṅgho. **Galaggāhāti** galaggahaṇā. **“Kammacchedavasenā”**ti iminā attano attano kammokāsādānampi piḅāyevāti dasseti. **Samārambhasaddo** cettha piḅanattoti āha **“piḅasaṅkhāto samārambho”**ti. Pubbacetanāmuṅcacetanāaparacetanāsampattiyā dāyakavasena tīṇi aṅgāni, vītarāgatāvīdosatāvītamohatāpaḅipattiyā dakkhiṇeyyavasena ca tīṇi evaṃ **chalaṅgasamannāgatā** hoti **dakkhiṇā**, chalaṅguttare **nandamātāsuttaṅca** (a. ni. 6.37) tassatthassa sādhaḅaṃ. Aparāparaṃ uppajjanakacetanāvasena mahānadī viya, mahogho viya ca ito cito ca abhisanditvā pakkhanditvā pavattito puṅṅameva **puṅṅābhisando**. **Tathāvidhanti** pamāṇassa kātum asukarattamāha. Kāraṇamahattena phalamahattampi veditabbaṃ upari najjā vuṅṅhiyā mahogho viyāti vuttaṃ **“tasmā”**tiādi.

350. Navanavoti sabbadā abhinavo, divase divase dāyakassa byāpārāpajjanato kiccariyosānaṃ natthīti vuttaṃ **“ekenā”**tiādi. Yathāraddhassa āvāsassa katipayenāpi kālena parisamāpetabbato kiccariyosānaṃ atthīti āha **“paṇṅasāla”**ntiādi. Mahāvihārepi kiccariyosānassa atthitūpāyaṃ dassetuṃ **“ekavāraṃ dhanapariccāgaṃ katvā”**ti vuttaṃ. **Suttantapariyāyenāti sabbāsavasuttantādipāḅinayena**. **Navānisamsāti** sītaḅaḅiḅhātādayo ḅaḅisallānārāmapariyosānā yathāpaccavekkhaṇaṃ gaṇitā nava udayā, appamattatāya cete vuttā.

Yasmā pana āvāsaṃ dentena nāma sabbampi paccayajātaṃ dinnameva hoti. Yathāha **samyuttāgamavaralaṅchake** “so ca sabbadado hoti yo dadāti upassaya”nti (saṃ. ni. 1.42), sadā puṅṅapavaḅḅhanūpāyaṅca etaṃ. Vuttaṅhi tattheva “ye dadanti upassayaṃ, tesam divā ca ratto ca, sadā puṅṅaṃ pavaḅḅhati”ti (saṃ. ni. 1.47) tathā hi dve tayo gāme piṇḅāya caritvā kiṅci aladdhā āgatassāpi chāyūdakasampannaṃ ārāmaṃ pavisitvā nahāyitvā patissaye muhuttaṃ nipajjitvā uṅṅhāya nisinnassa kāye balaṃ āharitvā pakkhittaṃ viya hoti. Bahi vicarantassa ca kāye vaṅṅadhātu vātātapehi kilamati, patissayaṃ pavisitvā dvāraṃ pidhāya muhuttaṃ nipannassa visabhāgasantati vūpasammati, sabhāgasantati patiḅḅhāti, vaṅṅadhātu āharitvā pakkhittā viya hoti. Bahi vicarantassa ca pāde kaṅṅako vijjhati, khāṇu paharati, sarīsapāḅiparissayā ceva corabhayaṅca uppajjati, patissayaṃ pavisitvā dvāraṃ pidhāya nipannassa sabbe te parissayā na honti, sajjhāyantassa dhammapītisukhaṃ, kammaṅṅhānaṃ manasi karontassa upasamasukhaṅca uppajjati bahiddhā vikkhepābhāvato. Bahi vicarantassa ca kāye sedā muccanti akkhīni phandanti, senāsaṃ pavisanakkhaṇe maṅcapīḅhādīni na paṅṅāyanti, muhuttaṃ nipannassa pana akkhipasādo āharitvā pakkhitto viya hoti, dvāravāḅapānamaṅcapīḅhādīni paṅṅāyanti. Etasmiṅca āvāse vasantaṃ disvā manussā catūhi paccayehi sakkaccaṃ upaṅṅhanti. Tena vuttaṃ “āvāsaṃ dentena...pe... hoti”ti “sadā puṅṅapavaḅḅhanūpāyaṅca eta”nti ca, tasmā ete yathāvuttā sabbepi ānisamsā veditabbā.

Khandhakapariyāyenāti senāsanakkhandhake (cūḅava. 294) āgatavinayapāḅinayena. Tattha hi āgatā –

“Sītaṃ uṅṅhaṃ ḅaḅihanti, tato vāḅamigāni ca;
Sarīsape ca makase, sisire cāpi vuṅṅhiyo.

Tato vātāḅapo ghoro, saṅṅāto ḅaḅihaṅṅiati;
Leṅṅatthaṅca sukhatthaṅca, jhāyituṅca vipassitum.

Vihāradānaṃ saṅghassa, aggaṃ buddhena vaṅṅitaṃ;

Tasmā hi paṇḍito poso, sampassaṃ atthamattano.

Vihāre kāraye ramme, vāsayettha bahussute;
Tesaṃ annañca pānañca, vatthasenāsanāni ca.

Dadeyya ujubhūtesu, vipasannena cetasā;
Te tassa dhammaṃ desenti, sabbadukkhapanūdanaṃ;
Yaṃ so dhammaṃ idhaññāya, parinibbāti anāsavo”ti. –

Rājagahaseṭṭhādīnaṃ vihāradānena anumodanāgāthāyo peyyālavasena dassitā. Tattha **sītaṃ uṇhanti** utuvīsabhāgavasena vuttaṃ. **Sisire cāpi vuṭṭhiyoti** ettha **sisiroti** samphusitakavāto vuccati. **Vuṭṭhiyoti** ujukameghavuṭṭhiyo eva. Etāni sabbāni “paṭihantī”ti imināva padena yojetabbāni.

Paṭihaññatīti vihārena paṭihaññati. **Leṇatthanti** nilīyanatthaṃ. **Sukhatthanti** sītādiparissayābhāvena sukhavihāratthaṃ. “**Jhāyituñca vipassitu**”nti idampi padadvayaṃ “sukhatthañcā”ti imināva padena yojetabbaṃ. Idañhi vuttaṃ hoti – sukhattañca vihāradānaṃ, katamasukhatthaṃ? Jhāyituṃ, vipassituñca yaṃ sukhaṃ tadatthaṃ. Atha vā parapadenapi yojetabbaṃ – jhāyituñca vipassituñca vihāradānaṃ, “idha jhāyissati vipassissatī”ti dadato **vihāradānaṃ saṅghassa aggaṃ buddhena vaṇṇitaṃ**. Vuttañhettaṃ “so ca sabbadado hoti, yo dadāti upassaya”nti (saṃ. ni. 1.42).

Yasmā ca aggaṃ vaṇṇitaṃ, **tasmā hi paṇḍito posoti** gāthā. **Vāsayettha bahussuteti** ettha vihāre pariyaṭṭibahussute ca paṭivedhabahussute ca vāseyya. **Tesaṃ annañcāti** yaṃ tesaṃ anucchavikam annañca pānañca vatthāni ca mañcapīṭhādīsenāsanāni ca, taṃ sabbam tesu **ujubhūtesu** akuṭṭilacittesu. **Dadeyyāti** nidaheyya. Tañca kho **vipasannena cetasā**, na cittappasādaṃ virādheta. Evaṃ vipasannacittassa hi **te tassa dhammaṃ desenti...pe... parinibbāti anāsavoti** ayamettha aṭṭhakathānayo.

Ayaṃ pana **ācariyadhammapālatherena** (dī. ni. 1.350) ceva **ācariyasāriputtattherena** (sārattha. 1. 3.295) ca saṃvaṇṇito 1.350 – **sītanti** ajjhantaṃ dhātukkhobhavasena vā bahiddhā utuvipariṇāmasena vā uppajjanakasītaṃ. **Uṇhanti** aggisantāpaṃ, tassa vanaḍāhādīsu sambhavo daṭṭhabbo. **Paṭihantīti** paṭibādhati yathā tadubhayavasena kāyacittānaṃ bādhanam na hoti, evaṃ karoti. Sītuṇhabbhāhate hi sarīre vikkhittacitto bhikkhu yoniso padahituṃ na sakkoti, **vālamigānti** siṭṭhabyagghādicaṇḍamige. Guttasenāsanāñhi āraññakampi pavisitvā dvāraṃ pidhāya nisinnassa te parissayā na honti. **Sarīsapeti** ye keci sarante gacchante dīghajātike sappādike. **Makaseti** nidassanamattametam, taṃsādīnampi eteneva saṅgaho daṭṭhabbo. **Sisireti** sisirakālavasena, sattāhavaddalīkādivasena ca uppanne sisirasamphasse. **Vuṭṭhiyoti** yadā tadā uppannā vassavuṭṭhiyo paṭihantīti yojanā.

Vātātapo ghoroti rukkhagacchādīnaṃ ummūlabhañjanādivasena pavattiyā ghero sarajaarajādibhedo vāto ceva gimhaparīlāhasamayesu uppattiyā ghero sūriyātapo ca **paṭihaññati** paṭibāhīyati. **Leṇatthanti** nānārammaṇato cittaṃ nivattetvā paṭisallānārāmatthaṃ. **Sukhatthanti** vuttaparissayābhāvena phāsuvihāratthaṃ. **Jhāyituntī** aṭṭhatimāsāya ārammaṇesu yattha katthaci cittaṃ upanibandhitvā upanijjhāyituṃ. **Vipassituntī** aniccādito saṅkhāre sammāsituṃ.

Vihāreti patissaye. **Kārayeti** kārapeyya. **Rammeti** manorame nivāsasukhe. **Vāsayettha bahussuteti** kāretvā pana ettha vihāre bahussute silavante kalyāṇadhamme nivāseyya, te nivāsento pana tesaṃ bahussutānaṃ yathā paccayehi kilamatho na hoti, evaṃ **annañca pānañca vatthasenāsanāni ca dadeyya ujubhūtesu** ajjhāsayasampannesu kammakammaphalānaṃ, ratanattayaguṇānañca saddahanena **vipasannena cetasā**.

Idāni gahaṭṭhapabbajitānaṃ aññamaññūpakāritaṃ dassetuṃ “**te tassā**”ti gāthamāha. Tattha **te**ti bahussutā. **Tassā**ti upāsakassa. **Dhammaṃ desentī**ti sakalavattadukkhapanūdanaṃ saddhammaṃ desenti. **Yaṃ so dhammaṃ idhaññāyāti** so upāsako yaṃ saddhammaṃ imasmiṃ sāsane sammāpaṭipajjanena jānitvā aggamaggādhigamanena **anāsavo** hutvā **parinibbāti** ekādasaggivūpasamena sīti bhavatīti.

Sītaṭṭhādikā vipassanāvasānā terasa, annādīlabho, dhammassavanaṃ, dhammāvabodho, parinibbānanti evamettha **sattarasa ānisaṃsā vuttā**.

Paṭiggahaṇakānaṃ vihāravasena uppannaphalānurūpampi dāyakānaṃ vihāradānaphalaṃ veditabbaṃ. Yebhuyyena hi kammaṣikkhaphalaṃ labhantīti āha “**tasmā**”tiādi. “**Saṅghassa pana pariccattattā**”ti iminā saṅghikavihārameva padhānavasena vadati, saṅghikavihāro nāmesa cātuddisaṃ saṅghaṃ uddissa katavihāro, yaṃ sandhāya **padabhājaniyaṃ** vuttaṃ “saṅghiko nāma vihāro saṅghassa dinno hoti pariccatto”ti. Yattha hi cetiyaṃ paṭiṭṭhitaṃ hoti, dhammassavanaṃ karīyati, catūhi disāhi bhikkhū āgantvā appaṭipucchitvāyeva pāde dhovitvā kuṅcīkāya dvāraṃ vivaritvā senāsanaṃ paṭijaggitvā yathāphāsukaṃ gacchanti, so antamaso caturatanikāpi paṇṇasālā hotu, cātuddisaṃ saṅghaṃ uddissa katavihārotveva vuccati.

351. Lobhaṃ niggaṇhituṃ asakkontassa **duppariccajā**. “**Ekabhikkhussa vā**”tiādi upāsakānaṃ tathā samādāne āciṇṇaṃ, daḷhataṃ samādānaṃ dassetuṃ vuttaṃ, saraṇaṃ pana tesam sāmaṃ samādinnaṃ samādinnaṃ eva hoti”ti vadanti. Saṅghassa vā gaṇassa vā santiketī yojanā. **Tatthāti** yathāgahite saraṇe, “**tassā**”tipi pāṭho, yathāgahitasaraṇassāti attho. **Natthi punappunaṃ kattabbatāti** viññūjātike sandhāya vuttaṃ. Viññūjātikānameva hi saraṇādiatthakosallānaṃ suvaṇṇaghaṭe sīhavasā viya akuppaṃ saraṇagamaṇaṃ tiṭṭhati. “**Jīvitapariccāgamayaṃ puñña**”nti ca idaṃ “sace tvam yathāgahitaṃ saraṇaṃ na bhindissati, evāhaṃ taṃ māremī”ti kāmaṃ koci tiṇhena satthena jīvitā voropeyya, tathāpi “nevāhaṃ buddhaṃ ‘na buddho’ti, dhammaṃ ‘na dhammo’ti, saṅghaṃ ‘na saṅgho’ti vadāmi”ti daḷhataṃ katvā gahitasaraṇassa vasena vuttaṃ. “**Saggasampattim deti**”ti nidassanamattametam. Phalānisaṃsāni panassa saraṇagamaṇavaṇṇanāyaṃ (dī. ni. aṭṭha. 1.250 saraṇagamaṇakathā) vuttāneva.

352. Vakkhamānanayena verahetutāya **veraṃ** vuccati pāṇātipātādipāpadhammo, taṃ maṇati “mayi idha ṭhitāya kathamāgacchasi”ti tajjentī viya nivāretīti **veramaṇī**, tato vā pāpadhammato viramati eṭāyāti “viramaṇī”ti vattabbe niruttinayena i-kārassa e-kāraṃ katvā “**veramaṇī**”ti vuttaṃ. **Khuddakapāṭhaṭṭhakathāyaṃ** panāha “veramaṇisikkhāpadaṃ, viramaṇisikkhāpadanti dvidhāsajjhāyaṃ karontī”ti (khu. pā. aṭṭha. sādharāṇavibhāvanā) kusalacittasampayuttāvettha virati adhippetā, na phalasampayuttā yaññādhikaraṇato. Asamādinnaṣīlassa sampattato yathūpaṭṭhitavītikamitabbavattuto virati **sampattavirati**. Samādānavasena uppannā virati **samādānavirati**. **Setu** vuccati ariyamaggo, tappariyāpannā hutvā pāpadhammaṇaṃ samucchadavasena ghātanappavattā virati **setughātavirati**. Aññatra “samucchadavirati”tipi vuttā. Idāni tā sarūpato dassetuṃ “**tatthā**”tiādi vuttaṃ. **Jāti...pe... dīnī**ti apadisitabbajātigottakulādīni. **Ādisaddena** vayabāhusaccādīnaṃ saṅgho. **Pariharatī**ti avītikamavasena parivajjeti, sīhaḷadīpe cakkanaupāsakassa viya sampattavirati veditabbā.

“**Pāṇaṃ na hanāmi**”tiādīsu ādayatthena **iti**-saddena, vikappatthena vā-saddena vā “adinaṃ nādiyāmi, adinnādānā viramāmi, veramaṇiṃ samādiyāmi”ti evamādīnaṃ paccekamatthānaṃ saṅgho daṭṭhabbo. Evañca katvā “sikkhāpada” micceva avatvā “sikkhāpadāni”ti vuttaṃ. Pāṇātipātā veramaṇinti sambandho. **Samādiyāmi**ti sammā ādiyāmi, avītikamādhippāyena, akhaṇḍā’ chiddā’ kammāsā’ sabalakāritāya ca gaṇhāmīti vuttaṃ hoti. Uttaravaḍḍhamānapabbatavāsiupāsakassa (ma. ni. aṭṭha. 1.89 kusalakammaṭṭhavaṇṇanā; saṃ. ni. aṭṭha. 2.2.109-111; dha. sa. aṭṭha. kusalakammaṭṭhavaṇṇanā) viya samādānavirati veditabbā.

Maggasampayuttāti sammādiṭṭhiyādimaggasampayuttā. Idāni tathā tathāgatesu dhammato, koṭṭhāsato, ārammaṇato, vedanāto, mūlato, ādānato, bhedatotiādīnā anekadhā vinicchayesu saṅkhepeneva ārammaṇato vinicchayaṃ dassetuṃ “**tathā**”tiādi vuttaṃ. **Purimā dveti** sampattasamādānaviratiyo. “**Jīvitindriyādivatthū**”ti paramatthato paṇo vutto, paññattito pana “sattādivatthū”ti vattabbaṃ, evaṃhi “satteyeva ārabhitvā paṇātipātā, abrahmacariyā ca viramatī”ti (khu. pā. aṭṭha. ekatānānatādivinicchaya) **khuddakāgamaṭṭhakathāvacanena** saṃsandati sametīti. **Ādisaddena** cettha sattasaṅkhāravasena adinnavatthu, tathā phoṭṭhabbavatthu, vitathavatthu, saṅkhāravaseneva surāmerayavatthūti etesaṃ saṅgaho daṭṭhabbo. **Taṃ ārammaṇaṃ katvā pavattantīti** yathāvuttaṃ vītikkamavatthum ālambitvā vītikkamanacetanāsaṅkhātaviramitabbavatthuto viramaṇavasena pavattanti. **Pacchimāti** setughātavirati. **Nibbānārammaṇāva** tathāpi kiccāsādhanaṭo. Iminā pana tattheva āgatesu tīsu ācariyavādesu dve paṭibāhitvā ekassevānujānaṃ veditabbaṃ.

“Sampattavirati, hi samādānavirati ca yadeva pajahati, taṃ attano paṇātipātādiakusalamevārammaṇaṃ katvā pavattati”ti keci vadanti. “Samādānavirati yato viramati, taṃ attano vā paresaṃ vā paṇātipātādiakusalamevālambaṇaṃ katvā pavattati. Sampattavirati pana yato viramati, tesam paṇātipātādīnaṃ ālambaṇāneva ārammaṇaṃ katvā pavattati”ti apare. “Dvayampi cetam yato paṇātipātādiakusalato viramati, tesamārammaṇabhūtaṃ vītikkamitabbavatthumevālambaṇaṃ katvā pavattati. Purimapurimapadatthaṃhi vītikkamavatthumālambaṇaṃ katvā pacchimapacchimadatthato viramitabbavatthuto viramatī”ti aññe. Paṭhamavādo cettha ayuttoyeva. Kasmā? Tassa attano paṇātipātādiakusalassa paccuppannābhāvato, abahiddhābhāvato ca. Sikkhāpadavibhaṅge hi pañcannaṃ sikkhāpadānaṃ paccuppannārammaṇatā, bahiddhārammaṇatā ca vuttā. Tathā dutiyavādo pi ayuttoyeva. Kasmā? Purimavādena sammissattā, paresaṃ paṇātipātādiakusalārammaṇabhāve ca anekanti kattā, dvinnaṃ ālambaṇappabhedavacanato ca. Tatiyavādo pana yutto sabbabhāṇakānamabhimato, tasmā tadeva anujānātīti daṭṭhabbaṃ. Tena vuttaṃ “tīsu ācariyavādesu dve paṭibāhitvā ekassevānujānaṃ veditabba”nti.

Etthāha – yajjetaṃ viratidvayaṃ jīvitindriyādivītikkamitabbavatthumevālambaṇaṃ katvā pavatteyya, evaṃ sati aññaṃ cintento aññaṃ kareyya, yañca pajahati, taṃ na jāneyyāti ayaṃ manadhippeto attho āpajjati? Vuccate – na hi kiccāsādhana vasena pavattento “aññaṃ cintento aññaṃ karoti”ti vā “yañca pajahati, taṃ na jānāti”ti vā vuccati. Yathā pana ariyamaggo nibbānārammaṇova kilese pajahati, evaṃ jīvitindriyādivatthārammaṇampetaṃ viratidvayaṃ paṇātipātādīni dussīlyāni pajahati. Tenāhu porāṇa –

“Ārabhitvāna amataṃ, jahanto sabbapāpake;
Nidassanañcetta bhava, maggaṭṭhoriyapuggalo”ti. (khu. pā. aṭṭha. ekatānānatāvinicchaya);

Idāni saṅkhepeneva ādānato, bhedato vā vinicchayaṃ dassetuṃ “**etthā**”tiādi vuttaṃ. “Pañcaṅgasamannāgataṃ sīlaṃ samādiyāmī”tiādīnā **ekato** ekajjhaṃ gaṇhāti. Evampi hi kiccavasena etāsaṃ pañcavidhatā viññāyati. **Sabbānīpi bhinnāni honti** ekajjhaṃ samādinattā. Na hi tadā pañcaṅgikattaṃ sīlassa sampajjati. Yaṃ tu vītikkantaṃ, teneva kammabaddho. “Paṇātipātā veramaṇisikkhāpadaṃ samādiyāmī”tiādīnā **ekekaṃ** visuṃ visuṃ gaṇhāti. “**Veramaṇisikkhāpada**”nti ca idaṃ samāsabhāvena **khuddakapāṭhaṭṭhakathāyaṃ** (khu. pā. aṭṭha. sādharānavibhāvanā) vuttaṃ, pāḷipottakesu pana “veramaṇi”nti niggahitameva byāsabhāvena dissati. Gahaṭṭhavasena cetam vuttaṃ. Sāmaṇeraṇaṃ pana yathā tathā vā samādāne ekasmiṃ bhinne sabbānīpi bhinnāni honti pārājikāpattito. Iti ekajjhaṃ, paccekañca samādāne viseso idha vutto, **khuddakāgamaṭṭhakathāyaṃ** pana “ekajjhaṃ samādiyato ekāyeva virati ekāva cetanā hoti, kiccavasena panetāsaṃ pañcavidhattaṃ viññāyati. Paccekaṃ samādiyato pana pañceva viratiyo, pañca ca cetanā honti”ti (khu. pā. aṭṭha. ekatānānatādivinicchaya) ayaṃ viseso vutto. Bhedepi “yathā tathā vā samādiyantu, sāmaṇeraṇaṃ ekasmiṃ bhinne sabbānīpi bhinnāni honti. Pārājikaṭṭhānīyāni hi tāni tesam. Yaṃ tu vītikkantaṃ hoti, teneva kammabaddho. Gahaṭṭhānaṃ pana ekasmiṃ bhinne ekameva bhinnaṃ hoti, yato tesam taṃsamādānēneva puna pañcaṅgikattaṃ sīlassa sampajjati”ti vuttaṃ. Yathāvuttopi dīghabhāṇakānaṃ

vādo aparevādo nāma tattha kato.

Setughātaviratiyā pana bhedo nāma natthi paṭipakkhasamucchindanena akuppasabhāvattā. Tadevattham dassentena “**bhavantarepi**”tiādi vuttam. Tattha “**bhavantarepi**”ti iminā attano ariyabhāvaṃ aṅānantopīti attham viññāpeti. **Jīvitahetupi**, pageva aññahetu. “**Neva pāṇam hanati, na suram pivati**”ti idaṃ majjhepeyyālaniddiṭṭham, migapadavaḷaṅjananayena vā vuttam. **Suranti** ca nidassanamattam. Sabbampi hi surāmerayamajjapamādaṭṭhānānuyogaṃ na karoti. “Majjanti tadeva ubhayaṃ, yaṃ vā panaññampi surāsavavinimuttam madanīya”nti (saṃ. nī. aṭṭha. 3.5.1134) **saṃyuttamahāvaggaṭṭhakathāyaṃ** vuttam. **Khuddakapāṭṭhakathāyaṃ** “tadubhayameva madanīyaṭṭhena majjam, yaṃ vā panaññampi kiñci atthi madanīyaṃ, yena pītena matto hoti pamatto, idaṃ vuccati majja”nti (khu. pā. aṭṭha. purimapañcasikkhāpadavaṇṇanā) “**sace pissā**”tiādinā tattheva visesadassanam, aṅānantassapi **khīrameva** mukham **pavisati, na surā**, pageva jānantassa. **Koñcasakuṇānanti** kuntasakuṇānam. Sacepi mukhe khīramissake udake pakkhipantīti yojetabbaṃ. “Na cettha upamopameyyānam sambaddhatā siyā koñcasakuṇānam yonisiddhattā”ti koci vadeyyāti āha “**ida**”ntiādi. **Yonisiddhanti** manussatiracchānānam uddham tiriyaeva dīghatā viya, bakānam megasaddena, kukkuṭīnam vātena gabbhaggahaṇam viya ca **jātisiddham**, iti koci vadeyya ceti attho. “Cevā”tipi paṭham vatvā samuccayatthamicchanti keci. **Dhammatāsiddhanti** bodhisatte kucchigate bodhisattamātu sīlam viya, vijāte tassā divaṅgamanam viya ca sabhāvena siddham, maggadhammatāya vā ariyamaggānubhāvena siddhanti veditabbanti vissajjeyyāti attho.

Diṭṭhijukaraṇam nāma bhāriyam dukkaram, tasmā saraṇagamanam sikkhāpadasamādānato mahaṭṭhatarameva, na appaṭṭhataranti adhippāyo. **Etanti** sikkhāpadam. **Yathā vā tathā vā gaṇhantassāpīti** ādaram gāravamakavā samādiyantassāpi. **Sādhukam gaṇhantassāpīti** sakkaccaṃ sīlāni samādiyantassāpi **appaṭṭhatarameva, appasamārambhatarāṇca**, na diguṇam ussāho karaṇīyoti vuttam hoti. Sīlam idha abhayadānatāya **dānam**, anavasesam vā sattanikāyam dayati rakkhatīti **dānam**. Ayamettha aṭṭhakathāmuttakanayo – saraṇam upagatena kāyavācācittēhi sakkaccaṃ vatthuttayapūjā kātabbā, tattha ca saṃkilesa sādhukam pariharitabbo, sikkhāpadāni pana samādānamattam, sampattavatthuto viramaṇamattañcāti saraṇagamanato sīlassa appaṭṭhataratā, appasamārambhataratā ca veditabbā. Sabbesam sattānam jīvitadānādinā daṇḍanidhānato, sakalalokiyalokuttara guṇādhiṭṭhānato cassa **mahapphalataratā, mahānisamsataratā** ca daṭṭhabbātī.

Tamattham pāḷiyā sādheṇto “**vuttañheta**”ntiādimāha. Tattha “aggānī”ti nātattā **aggaññāni**. Cirarattatāya nātattā **rattaññāni**. “Ariyānam sādhuṇam vaṃsānī”ti nātattā **vaṃsaññāni**. Purimakānam ādipurisānam etānīti **porāṇāni**. Sabbaso kenacipi pakārena sādhuhi na kiṇṇāni na chaḍḍitānīti **asaṃkiṇṇāni**. Ayañca nayo nesam yathā atīte, evaṃ etarahi, anāgate cāti āha “**asaṃkiṇṇapubbānī**”tiādi. Atīte hi kāle asaṃkiṇṇabhāvassa “asaṃkiṇṇapubbānī”ti nidassanam, paccuppanne “na saṅkiyantī”ti, anāgate “na saṅkiyissantī”ti. Atoyeva **appaṭikuṭṭhāni** na paṭikkhittāni. Na hi kadācipi viññū samaṇabrāhmaṇā hiṃsādīpāpadhammaṃ anujānanti. **Aparimāṇānam sattānam abhayam detīti** sabbesu bhūtesu nihitadaṇḍatā sakalassapi sattanikāyassa bhayābhāvaṃ deti. Na hi ariyasāvakato kassaci bhayaṃ hoti. **Averanti** verābhāvaṃ. **Abyāpajjhanti** niddukkhataṃ. “**Aparimāṇānam sattānam abhayam datvā**”tiādi ānisamsadassanam, hetumpi cettha **tvā**-saddo yathā “mātaram saritvā rodātī”ti.

Yaṃ kiñci cajanalakkhaṇam, sabbaṃ taṃ yaññoti āha “**idañca panā**”tiādi. Na nu ca pañcasīlam sabbakālikam. Abuddhuppādakālepi hi viññū taṃ samādiyanti, na ca ekantato vimuttāyatanam bāhirakānampi samādinattā. Saraṇagamanam pana buddhuppādahetukam, ekantato ca vimuttāyatanam, katham tattha saraṇagamanato pañcasīlassa mahapphalatāti āha “**kiñcāpī**”tiādi. **Jeṭṭhakanti** mahapphalabhāvena uttamam. “**Saraṇagamaneyeva patitṭhāyā**”ti iminā tassa sīlassa saraṇagamanena abhisāṅkhatatā tato mahapphalatam, tathā anabhisāṅkhatassa ca sīlassa apphalatam dasseti.

353. Īdisamevāti evaṃ saṃkilesapaṭipakkhameva hutvā. Nanu ca paṭhamajjhānādiyaññāyeva

desetabbā, kasmā buddhuppādato paṭṭhāya desanamārabhatīti anuyogaṃ pariharitum **“tividha... pe... dassetukāmo”**ti vuttaṃ. Tividhasīlapāripūriyaṃ ṭhitassa hi nesam yaññānaṃ appaṭṭhataratā, mahapphalataratā ca hoti, tasmā taṃ dassetukāmatā buddhuppādato paṭṭhāya desanaṃ ārabhatīti vuttaṃ hoti. Tenāha **“tatthā”**tiādi. **Heṭṭhā vuttehi guṇehīti** ettha **“so taṃ dhammaṃ sutvā tathāgate saddhaṃ paṭilabhati”**tiādinā (dī. ni. 1.191) heṭṭhā vuttā saraṇagamanam, silasampadā, indriyesu guttadvāratāti evamādayo guṇā veditabbā. Paṭhamam jhānaṃ nibbattento na kilamatīti yojanā. **Tānīti** paṭhamajjhānādīni. **“Paṭhamam jhāna”**ntiādinā pāḷiyam paṇītānameva jhānānaṃ ukkaṭṭhaniddeso katoti mantavā **“ekam kappam, attha kappe”**tiādi vuttaṃ, mahākappavasena cettha attho. Hīnam pana paṭhamam jhānaṃ asaṅkhyeyyakappassa tatiyabhāgaṃ āyūṃ deti. Majjhimam upaḍḍhakappam. Hīnam dutiyam jhānaṃ dve kappāni, majjhimam cattārītiādinā attho netabbo. Apica yasmā paṇītāniyevettha jhānāni adhippetāni mahapphalatarabhāvadassanaparattā desanāya, tasmā **“paṭhamam jhānaṃ ekam kappam”**ntiādinā paṇītāneva jhānāni niddiṭṭhānīti datṭhabbam.

Tadevāti catutthajjhānameva. Catukkanayena hi desanā āgatā. Yadi evam katham āruppatāti āha **“ākāsānañcāyatanādisamāpattivasena bhāvita”**nti, tathā bhāvitattā catutthajjhānameva āruppam hutvā vīsaticappasahassādīni āyūṃ detīti adhippāyo. Ayaṃ ācariyassa matī. Atha vā **tadevāti** āruppasāṅkhātāṃ catutthajjhānameva, taṃ pana kasmā vīsaticappasahassādīni āyūṃ detīti vuttaṃ **“ākāsānañcāyatanādisamāpattivasena bhāvita”**nti, tathā bhāvitattā evam detīti adhippāyo. Aparo nayo **“tadevā”**ti vutte rūpāvacaracatutthajjhānamevāti attho āpajjeyyāti taṃ nivattetum **“ākāsānañcāyatanādisamāpattivasena bhāvita”**nti āha, tathā bhāvitam āngasamatāya catutthajjhānasāṅkhātāṃ āruppajjhānamevādhippetanti vuttaṃ hoti.

Sammadeva niccasaññādiṭṭhapaṭipakkhavidhamanavasena pavattamānā pubbabhāgiye eva bodhipakkiyadhamme samānentī vipassanā vipassakapuggalassa anappakam pītisomanassam samāvahatīti vuttaṃ **“vipassanāsukhasadisassa pana sukhassa abhāvā mahapphala”**nti. Yathāha dhammarājā **dhammapade** –

“Yato yato sammasati, khandhānaṃ udayabbayaṃ;
Labhati pītipāmojjaṃ, amataṃ taṃ vijānata”nti. (dha. pa. 374);

Yasmā panāyam desanā iminā anukkamena imāni ñāṇāni nibbattentassa vasena pavattitā, tasmā **“vipassanāñāṇe paṭiṭṭhāyā”**tiādinā heṭṭhimam heṭṭhimam uparimassa uparimassa paṭiṭṭhābhūtam katvā vuttaṃ. Samānarūpanimmānaṃ nāma manomayiddhiyā aññehi asādhāraṇakiccanti āha **“attano... pe... mahapphalā”**ti. Hatthiassādivividharūpakaraṇam **vikubbanam**, tassa dassanasamatthātāya. **icchiticchitaṭṭhānam** nāma purimajātisu icchiticchito khandhapadeso. Arahattamaggeneva maggasukham niṭṭhitanti vuttaṃ **“ati...pe... mahapphala”**nti. **Samāpentoti** pariyoṣāpento.

Kūṭadantaupāsakattapaṭivedanādikathāvaṇṇanā

354-8. “Abhikkantaṃ bho gotamā”tiādi desanāya pasādavacanam, **“esāham bhavanta”**ntiādi pana saraṇagamanavacananti tadubhayasambandham dassento **“desanāyā”**tiādimāha. **Tanūti** mando kāyikacetāsikasukhasamupabyūhato. **Sabbe te pāṇayoti** **“satta ca usabhasatāni”**tiādinā vutte sabbe te pāṇino. **Tam pavattinti** tesam pāṇinaṃ mocanākāram. **Ākulabhāvoti** bhagavato santike dhammassa sutattā pāṇisu anuddayaṃ upaṭṭhapetvā ṭhitassa **“kathāñhi nāma mayā tāva bahū pāṇino māraṇatthāya bandhāpitā”**ti citte paribyākulabhāvo, yasmā atthi, tasmā na desetīti yojanā, **“udapādi”**tipi pāṭho. **Sutvāti** **“muttā bho te pāṇayo”**ti ārocitavacanam sutvā. **Cittacāroti** cittappavatti. **“Kallacittam muducittam vinīvaraṇacittam udaggacittam pasannacitta”**nti idaṃ padapañcakaṃ sandhāya **“kallacittantiādi”**ti vuttaṃ. Tattha **“dānakatham sīlakatha”**ntiādinā vuttāya anupubbikathāya ānubhāvena. Kāmacchandavigamena **kallacittatā** arogacittatā, byāpādavigamena mettāvasena **muducittatā** akathinacittatā, uddhaccakukkucavigamena vikkhepābhāvato **vinīvaraṇacittatā** tehi amalīnacittatā, thinamiddhavigamena sampaggahaṇavasena **udaggacittatā** amalīnacittatā,

vicikicchāvīgamena sammāpaṭipattiyā avimuttatāya **pasannacittatā** anāvilacittatā ca hotīti āha “**anupubbikathānubhāvena vikkhambhitanīvaraṇataṃ sandhāya vutta**”nti. Yaṃ panettha atthato avibhattaṃ, taṃ suviññeyyameva.

Iti sumaṅgalavilāsiniyā dīghanikāyaṭṭhakathāya paramasukhumagambhīraduranubodhatthaparidīpanāya suvimalavipulapaññāveyyattiyajananāya sādhuvilāsiniyā nāma līnatthapakāsaniyā kūṭadantasuttavaṇṇanāya līnatthapakāsana.

Kūṭadantasuttavaṇṇanā niṭṭhitā.

6. Mahālisuttavaṇṇanā

Brāhmaṇadūtavattavaṇṇanā

359. Evaṃ kūṭadantasuttaṃ saṃvaṇṇetvā idāni mahālisuttaṃ saṃvaṇṇento yathānupubbaṃ saṃvaṇṇanokāsassa pattaḥhāvaṃ vibhāvetuṃ, kūṭadantasuttassānantaraṃ saṅgītassa suttassa mahālisuttabhāvaṃ vā pakāsetuṃ “**evaṃ me suttaṃ...pe... vesāliyanti mahālisutta**”nti āha. **Punappunaṃ visālabhāvūpagamanatoti** etthāyaṃ saṅkhepo – bārāṇasirañño kira aggamahesiyā maṃsapesigabbhena dve dārakā nibbattā dhītā ca putto ca, tesāṃ aññamaññaṃ vivāhena soḷasakkhattuṃ puttadhītuvasena dve dve dārakā vijātā. Tato tesāṃ dārakānaṃ yathākkamaṃ vaḍḍhentānaṃ paccekāṃ saparivārānaṃ āramuyyānanivāsattānāparivārasampattiṃ gahetuṃ appahonakatāya nagaraṃ tikkhattuṃ gāvutantarena gāvutantarena parikkhipiṃsu, evaṃ tassa punappunaṃ tipākāraparikkhepena visālabhāvumupagatatā “**vesāli**”tveva nāmaṃ jātā. Tena vuttaṃ “**punappunaṃ visālabhāvūpagamanato vesālīti laddhanāmake nagare**”ti. Vitthārakathā cettha mahāsīhanādasuttavaṇṇanāya, (ma. ni. aṭṭha. 1.146) ratanasuttavaṇṇanāya (khu. pā. aṭṭha. vesālivatthu; su. ni. aṭṭha. 1.ratanasuttavaṇṇanā) ca gahetabbā. **Bahinagareti** nagarato bahi, na ambapālivaṇṇaṃ viya antonagarasmim. **Sayaṃjātanti** sayameva jātā aropimaṃ. **Mahantabhāvenāti** rukkhagacchānaṃ, ṭhitokāsassa ca mahantabhāvena. Tenevāha “**himavantena saddhiṃ ekābaddhaṃ hutvā**”ti. Yaṃ pana venayikānaṃ matena **vinayaṭṭhakathāyaṃ** vuttaṃ –

“Tattha mahāvanaṃ nāma sayaṃjātā aropimaṃ saparicchedaṃ mahantaṃ vanaṃ. Kapilavattusāmantā pana mahāvanaṃ himavantena saha ekābaddhaṃ aparicchedaṃ hutvā mahāsamuddaṃ āhacca ṭhitaṃ, idaṃ tādīsaṃ na hotī”ti (pārā. aṭṭha. 2.162).

Taṃ majjhimabhāṇakasamyuttabhāṇakānampi samānakathā. **Majjhimatṭhakathāyañhi** (ma. ni. aṭṭha. 2.352) **samyuttatṭhakathāyañca** (saṃ. ni. aṭṭha. 1.37) tatheva vuttaṃ. Idha pana dīghabhāṇakānaṃ matena evaṃ vuttanti daṭṭhabbaṃ. Yadi ca “**ahutvā**”ti katthaci pāṭho dissati, evaṃ sati sabbesampi samānavādo siyāti. **Kūṭāgārasālāsāṅkhepenāti** haṃsamaṅḍalākārasāṅkhātahaṃsavaṭṭakacchannena kūṭāgārasālāniyāmena, tathā katattā pāsādoyeva “**kūṭāgārasālā**”ti vutto, tabbohārena pana sakalopi saṅghārāmoti vuttaṃ hoti. **Vinayaṭṭhakathāyaṃ** (pārā. aṭṭha. 2.162) tu evaṃ vuttaṃ –

“Kūṭāgārasālā pana mahāvanaṃ nissāya kate ārāme kūṭāgāraṃ antokatvā haṃsavaṭṭakacchadanena katā sabbākārasampannā buddhassa bhagavato gandhakuṭi veditabbā”ti.

Kosalesu jātā, bhavā, te vā nivāso etesanti **kosalakā**. Evaṃ **māgadhakā**. Janapadavācino hi pāyato pullīṅgaputhuvacanā. Yassa akaraṇe puggalo mahājāniyo hoti, taṃ karaṇaṃ arahatīti **karaṇīyanti** vuccati. Tenāha “**avassaṃ kattabbakammenā**”ti. **Akātumpi vaṭṭati** asati samavāye, tasmā samavāye sati kattabbato **taṃ kiccanti vuccatīti** adhippāyo.

360. Yā buddhānaṃ uppajjanārahā nānattasaññā, tāsāṃ vasena “**nānārammaṇacārato**”ti vuttaṃ, nānārammaṇappavattitoti attho. Sambhavantasseva hi paṭisedho, na asambhavantassa. **Paṭikkammā**ti nivattetvā tathā cittaṃ anuppādetvā. **Sallīnoti** jhānasamāpattiyā ekattārammaṇaṃ allīno. **Nilīnoti** tasseva vevacanaṃ. Tena vuttaṃ “**ekībhāva**”ntiādi. Saparivārattā anekopi tadā eko viya bhavatīti ekībhāvo, taṃ **ekībhāvaṃ**. Yenāyasmā nāgito, taṃ sandhāya “**tasmā ṭhānā**”ti vuttaṃ.

Oṭṭhaddhalicchavivatthuvaṇṇanā

361. **Addhoṭṭhatāyā**ti upaḍḍhoṭṭhatāya. Tassa kira uttarotṭhassa appakatāya tiriyaṃ phāletvā addhamapanītaṃ viya khāyati cattāro dante, dve ca dāṭhā na chādeti, tena naṃ “**oṭṭhaddho**”ti voharati. Keci pana “adho-saddena pāṭhaṃ parikappetvā heṭṭhā oṭṭhassa olambakatāya “**oṭṭhaddho**”ti atthaṃ vadanti, tadayuttameva tathā pāṭhassa adissanato, ācariyena (dī. ni. ṭī. 1.361) ca avaṇṇitattā. Ayaṃ kira uposathiko dāyako dānapati saddho pasanno buddhamāmako dhammasaṅghamāmako. Tenāha “**purebhatta**”ntiādi. Khandhake, (mahāva. 289) mahāparinibbānasutte (dī. ni. 2.161) ca āgatanayena “**nīlapītādi...pe... tāvatimsaparisisappaṭibhāgāyā**”ti vuttaṃ. Ayaṃ pana vesālī bhagavato kāle iddhā ceva vepullappattā ca ahosi. Tattha hi rājūnameva satta saḥassāni, satta satāni, satta ca rājāno ahesuṃ, tathā yuvarājasenāpati bhaṇḍāgārikapabhuṭīnampi, pāsādakūṭāgāraārāmapokkharāṇiādayopi tapparimāṇāyeva, bahujaṇā, ākiṇṇamanussā, subhikkhā ca. Tena vuttaṃ “**mahatiyā licchaviparisāyā**”ti. Tassa pana kulassa ādibhūtānaṃ yathāvuttānaṃ maṃsapesiyā nibbattadārakānaṃ tāpasena pāyitaṃ yaṃ khīraṃ udaraṃ pavisati, sabbaṃ taṃ maṇibhājanagataṃ viya dissati, carimakabhava bodhisatte kucchigate bodhisattamātu viya udaracchaviyā ativippasannatāya te nicchavī ahesuṃ. Apare panāhu “sibbetvā ṭhapitā viya nesaṃ aññamaññaṃ līnā chavī ahoṣī”ti. Evaṃ te nicchavitāya vā līnacchavitāya vā **licchavī**ti paññāyimsu, niruttinayena cettha padasiddhi, tabbaṃse uppannā sabbepe licchavayo nāma jātā. Tenāha “**licchaviparisāyā**”ti, licchavirājūnaṃ, licchavivaṃsabhūtāya vā parisāyāti attho. Mahantaṃ yasaṃ lāti gaṇhātīti **mahāli** yathā “bhaddālī”ti. **Mūlanā**manti mātāpitūhi katanāmaṃ.

362. **Sāsane yuttapayuttoti** bhāvanamanuyutto. Sabbattha sīhasamānavuttinopi bhagavato parisāya mahatte sati tadajjhāsayānurūpaṃ pavattiyamānāya dhammadesanāya viseso hotīti āha “**mahantena ussāhena dhammaṃ desessatī**”ti.

“Vissāsiko”ti vatvā tamassa vissāsikabhāvaṃ vibhāvetuṃ “**ayañhī**”tiādi vuttaṃ. **Thūlasarī**roti vaṭharasarīro. Therassa khīṇāsavabhāvato “ālasiyabhāvo appahīno”ti na vattabbo, vāsanālesuṃ pana upādāya “**īsakaṃ appahīno viya hotī**”ti vuttaṃ. Na hi sāvakanāṃ buddhānamiva savāsanā kilesā pahīyanti. Yathāvuttaṃ pāsādameva sandhāya “**kūṭāgāramahāgeḥā**”ti vuttaṃ. **Pācīnamukhā**ti pācīnapamukhā.

363. Vineyyajanānuparodhena buddhānaṃ bhagavantānaṃ paṭihāriyavijambhanaṃ hotīti āha “**atha kho**”tiādi. Gandhakuṭito nikkhamanavelāyañhi chabbaṇṇā buddharasmiyo āveḷāveḷā yamalā yamalā hutvā savisesaṃ pabhassarā viniccharimsu. Tāhi “bhagavā nikkhamatī”ti samārocitamiva nikkhamanaṃ sañjāniṃsu. Tena vuttaṃ “**samsūcitanikkhamano**”ti.

364. “Ajjā”ti vuttadivasato atītamanantaraṃ **hiyyodivasam purimaṃ nāma**, tathā “hiyyo”ti vuttadivasato paraṃ **purimataram** atisayena purimattā. Iti imesu dvīsu divasesu vavattitho yathākkamaṃ purimapurimatarabhāvo. Evaṃ santepi yadetha “purimatara”nti vuttaṃ, tato pabhuti yaṃ yaṃ oraṃ, taṃ taṃ purimaṃ. Yaṃ yaṃ paraṃ, taṃ taṃ purimataranti dassento “**tato paṭṭhāyā**”tiādimāha. Orapārabhāvassa viya, hi disāvīdisābhāvassa viya ca purimapurimatarabhāvassa apekkhāsiddhi. **Mūladivasatoti**ādivasato. **Aggeti** upayogathe bhummavacanaṃ, upayogavacanassa vā e-kārādesoti dasseti “**agga**”nti iminā, paṭhamanti attho. Taṃ panettha parā atītā koṭṭiyevāti āha “**parakoṭṭim katvā**”ti. **Yaṃ**-saddo paricchede nipāto, tappayogena cāyaṃ “viharāmī”ti vattamānapayogo, attho pana atītavasena veditabboti dassetuṃ “**yāva vihāsi**”nti vuttaṃ. **Tassā**ti

divasassa. Paṭhamavikappe “viharāmi”ti imassa “yadagge”ti iminā ujukaṃ tāva sambandhitvā pacchā “naciraṃ tīṇi vassāni”ti pamāṇavacanāṃ yojetabbaṃ. Dutiyavikappe pana “naciraṃ tīṇi vassāni”ti imehipi kuṭilaṃ sambandho kattabbo. **Naciranti** cetāṃ bhāvanapuṃsakāṃ, accantasaññoḃgaṃ vā. Tañhi pamāṇato visesetaṃ “**tīṇi vassāni**”ti vadati. Tenāha “**naciraṃ vihāsiṃ tīṇiyeva vassāni**”ti.

Ayanti sunakkhatto. **Piyajātikanīti** iṭṭhasabhāvāni. **Sātajātikanīti** madhurasabhāvāni. Madhurasadisatāya hi “**madhura**”nti manoramaṃ vuccati. Ārammaṇaṃ karontena kāmena upasaṃhitānīti **kāmūpasamhitāni**, kāmanīyāni. Tenāha “**kāmassādayuttāni**”ti, ārammaṇikena kāmasaṅkhātena assādena saññuttāni, kāmasaṅkhātassa vā assādassa yogyānīti attho. **Sarīrasaṅghāneti** sarīrabimbe, ādhāre cetāṃ bhumbaṃ. Tasmā **saddenāti** taṃ nissāya tato uppanna saddenāti attho. Apica vinā pāṭhasesaṃ **bhavitaḃbapadeneva** sambandhitabbaṃ. **Madhurenāti** iṭṭhena sātena. **Kaṇṇasakkhaliyanti** kaṇṇapaṭṭikāyaṃ.

Ettāvātāti dibbasotañāṇaparikkammaṃ akathanamattena. “Attanā ñātampi na katheti, kiṃ imassa sāsane adhiṭṭhānenā”ti kujjhanto **bhagavati āghātaṃ bandhitvā**, saha kujjhaneneva cesa jhānābhīṇṇā parihāyi. **Cintesīti** “kasmā nu kho so mayhaṃ taṃ parikkammaṃ na kathesi”ti parivārento ayoniso ummuḃjanavasena cintesi. **Anukkamenāti** pāthikasutte, (dī. ni. 3.3 ādayo) mahāsīhanādasutte (dī. ni. 1.381) ca āgatanayena taṃ taṃ ayuttameva cintento, bhāsanto, karonto ca anukkamena bhagavati baddhāghātātāya sāsane patiṭṭhaṃ alabhanto **gihibhāvaṃ patvā tamatthaṃ** katheti.

Ekamsabhāvitasamādhivaṇṇanā

366-371. Ekamsāyāti tadatthe catutthīvacanaṃ, ekamsatthanti attho. **Aṃsasaddo** cettha koṭṭhāsapariyāyo, so ca adhiḃkāro dibbarūpadassanadibbasaddasavanavasena veditabboti āha “**ekakoṭṭhāsāyā**”tiādi. **Vā-saddo** cettha vikappane ekamsassevādhippetattā. **Anudisāyāti** puratthimadakkhiṇādibhedāya catubbidhāya anudisāya. **Ubhayaḃkoṭṭhāsāyāti** dibbarūpadassanatthaṃ, dibbasaddasavanatthaṃca. **Bhāvīti** yathā dibbacakkuṇṇāṇaṃ, dibbasotañāṇaṃca samadhigataṃ hoti, evaṃ bhāvīti. Tayidaṃ viṣuṃ viṣuṃ parikkammaḃkaraṇena ijjhantīsu vattabbaṃ natthi, ekajjhaṃ ijjhantīsupi kameneva kiccasiddhi bhavati ekajjhaṃ kiccasiddhiyā asambhavato. Pāḃiyampi hi “dibbānaṃca rūpānaṃ dassanāya, dibbānaṃca saddānaṃ savanāyā”ti idaṃ ekassa ubhayasamatthātāsandassanameva, na ekajjhaṃ kiccasiddhisambhavasandassanaṃ. “**Ekamsabhāvīti samādhī hetū**”ti iminā sunakkhatto dibbacakkuṇṇāṇāya **eva** parikkammaṃ katattā vijjamaṃampi dibbasaddaṃ nāssosīti dasseti.

372. Dibbacakkuṇṇāṇato dibbasotañāṇameva seṭṭhanti maññamāno mahāli etamatthaṃ pucchati āha “**idaṃ dibbasotena...pe... maññe**”ti. **Apaṇṇakanti** aviraḃjjhanakaṃ, anavaḃjjaṃ vā. **Samādhīyeva** bhāvetabbaṭṭhena **samādhībhāvanā**. “Dibbasotañāṇaṃ seṭṭha”nti maññamānena ca tena dibbacakkuṇṇāṇampi dibbasoteneva saha gahetvā “etāsaṃ nūna bhante”tiādinā puthuvacanena pucchitanti dassetaṃ “**ubhayaṃsabhāvītanāṃ samādhīna**”nti vuttaṃ. **Bāhirā etā samādhībhāvanā** aniyānikattā. Tā hi ito bāhirakānampi ijjhanti. **Na ajjhantikā** bhagavatā sāmukkaṃsīkabhāvena appaveditattā. Na hi te saccāni viya sāmukkaṃsīkā. **Yadatthanti** yesaṃ atthāya, abhedepi bhedavacanametāṃ, yassa vā visesanabhūtassa atthāya. **Teti** ariyaphaladhamme. “Ta”ntipi adhunā pāṭho. Te hi sacchikātabbā, “atthi kho mahāli aññeva dhammā...pe... yesaṃ sacchikiriyāhetu bhikkhū mayi brahmacariyaṃ carantī”ti sacchikātabbadhammā ca idha vuttā.

Catuarīyaphalavaṇṇanā

373. Saṃyojenti bandhenti. **Tasmāti** yasmā vaṭṭadukkhabhaye saṃyojanato tattha satte saṃyojenti nāma, tasmā. Katthaci “vaṭṭadukkhamaye rathe”ti pāṭho, na porāṇo tathā ācariyena avaṇṇitattā. **Maggasotaṃ āpanno**, na pasādādisotaṃ. “Sototi bhikkhave ariyamaggasetaṃ adhivacana”nti hi vuttaṃ. **Āpannoti** ca ādīto pattoti attho ā-upasaggassa ādikammaṃ pavattanato, idaṃ

pana phalaṭṭhavasena vadati. Atītakālavacanañhetam, maggakkhaṇe pana maggasotam āpajjati nāma. Tenevāha **dakkhiṇavibhaṅge** “sotāpanne dānaṃ deti, sotāpattiphalasacchikiriyāya paṭipanne dānaṃ deti”ti (ma. ni. 3.379) **apatanadhammoti** anupapajjanasabhāvo. **Dhammaniyāmenāti** uparimaggadhammaniyāmena. Heṭṭhimantena sattamabhavato upari anupapajjanadhammatāya vā niyatoti aṭṭhakathāmuttakanayo. **Param ayanam** parāgati **assa** atthīti attho. **Anenāti** puna tatiyasamāsavacanam, vā-saddo cettha luttaniddiṭṭho.

Tanuttam nāma pavattiyā mandatā, viralatā cāti vuttam “**tanuttā**”tiādi. **Karahacīti** nipātamattam, pariyaavacanam vā. “Orena ce māso seso gimhānanti vassikasāṭhikacīvaram pariyeseyyā”tiādīsu (pārā. 627) viya **ora**-saddo na atirekatthoti āha “**heṭṭhābhāgiyāna**”nti, heṭṭhābhāgassa kāmabhavassa paccayabhāvena hitānanti attho. “**Suddhāvāsabhūmiya**”nti tesam upapattitṭhānadassanam. **Opapātikoti** upapātikoti upapātane sādhuṅkāri. Tenāha “**sesayonipaṭikkhepavacanametā**”nti **parinibbānadhammoti** anupādisesāya nibbānadhātuyā parinibbānasabhāvo. Vimuccatīti **vimutti**, cittameva vimutti **cetovimuttīti** vuttam “**cittavisuddhi**”ntiādi. Cittasīsenā cettha samādhi gahito “sīle patiṭṭhāya naro sapañño, cittam paññañca bhāvaya”ntiādīsu (saṃ. ni. 1.23, 192; peṭako. 22; mi. pa. 1.1.9) viya. **Paññāvimuttinti** etthāpi eseva nayo. Tenāha “**arahattaphalapaññāva paññāvimutti**”ti. **Sāmani** attanāva, aparappaccayenāti attho. “**Abhijānitvā**”ti iminā tvādipaccayakāriyassa ya-kārassa lopo dassito. “**Abhiññāyā**”ti iminā pana nā-vacanakāriyassāti daṭṭhabbam. **Sacchīti** paccakkhatthe nepātikam. **Paccakkhakarānam** nāma anussavākāraparivitakkādike muñcitvā sarūpato ārammaṇakarānam.

Ariyaatṭhaṅgikamaggavaṇṇanā

374-5. Uppatitvāti ākāsamaggena ḍetvā. Paṭipajjati ariyāsāvako nibbānam, ariyaphalañca etāyāti **paṭipadā**, sā ca tassa pubbhāgo evāti ariyamaggo pubbhāgapaṭipadānāmena idha vutto. Atatavitātādivasena **pañcaṅgikam**. Disāvidisāniviṭṭhapadesena **aṭṭhaṅgiko**. Aṭṭhaṅgato mutto añño koci aṭṭhaṅgiko nāma maggo natthīti āha “**aṭṭhaṅgamattoyevā**”tiādīnā. Na hi avayavavinimutto samudāyo nāma koci atthīti. Tasmā “aṭṭha aṅgāni assāti aññapadatthasamāsam akatvā ‘aṭṭha aṅgāni aṭṭhaṅgāni, tāni assa santīti **aṭṭhaṅgiko**’ti samāsagabbhataddhitavasena padasiddhi kātabbā”ti (dī. ni. ṭī. 1.374, 375) ācariyena vuttam, adhippāyo cettha cintetabbo. Aññapadatthasamāse hi kate na sakkā aṭṭhaṅgaatṭhaṅgikānam bhedo aññamaññam vipariyāyam katvāpi niyametum byāse ubhayapadatthaparabhāvena saheva saṅkhyāparicchedena atthāpattito. Samāsagabbhe pana taddhite kate sakkā eva tesam bhedo aññamaññam vipariyāyam katvā niyametum samāse uttarapadatthaparabhāvena vināva saṅkhyāparicchedena atthāpattito. Ekatthibhāvalakkhaṇo hi samāsoti. **Dhammadāyādasuttantaṭikāyam** pana ācariyeneva evam vuttam “yasmā maggaṅgasamudāye maggavohāro hoti, samudāyo ca samudāyīhi samannāgato, tasmā attano avayavabhūtāni aṭṭha aṅgāni etassa santīti aṭṭhaṅgiko”ti. Paṭhamanaye cettha aṅginā aṅgassa aṭṭhaṅgikabhāvo vutto, dutiyanaye pana aṅgena aṅginoti ayametesam viseso.

Idāni aṭṭhaṅgikamagge lakkhaṇato, kiccakhaṇārammaṇabhedakamato ca vinicchayam dassento “**tatthā**”tiādīmāha. **Sammā dassanalakkhaṇāti** aviparītam yāthāvato catunnamariyasaccānam paccakkhameva dassanasabhāvā. **Sammā abhiniropanalakkhaṇoti** nibbānārammaṇe cittassa aviparītamabhiniropanasabhāvo. **Sammā pariggahaṇalakkhaṇāti** caturaṅgasamannāgatā vācā jane saṅgaṇhātīti tabbipakkhato viratisabhāvā sammāvācā bhedakaramicchāvācappahānena jane, sampayuttadhamme ca pariggaṇhanakiccavāti hoti, evam aviparītam pariggahaṇasabhāvā. **Sammā samuṭṭhāpanalakkhaṇoti** yathā cīvarakammādiko kammanto ekaṃ kātabbam samuṭṭhāpeti, tamtamkiriyānipphādako vā cetanāsāṅkhāto kammanto hatthapādacalanādikaṃ kiriyam samuṭṭhāpeti, evam sāvajjakattabbakiriyāsamuṭṭhāpakamicchākammantappahānena sammākammanto niravajjasamuṭṭhāpanakiccavā hoti, sampayutte ca samuṭṭhāpentō eva pavattatīti aviparītam samuṭṭhāpanasabhāvo. **Sammā vodāpanalakkhaṇoti** kāyavācānam, khandhasantānassa ca saṃkilesabhūtamicchājīvappahānena aviparītam vodāpanasabhāvo. **Sammā paggaḥalakkhaṇoti**

sasampayuttadhammassa cittassa saṃkilesapakkhe patitumadatvā aviparītaṃ paggahaṇasabhāvo. **Sammā upaṭṭhānalakkhaṇāti** tādibhāvalakkhaṇena aviparītaṃ tattha upaṭṭhānasabhāvo. **Sammā samādhānalakkhaṇoti** vikkhepavidhamsanena aviparītaṃ cittassa samādahanasabhāvo.

Sahajekatṭhatāya diṭṭhekatṭhā avijjādayo micchādiṭṭhito aññe **attano paccanīkakilesā** nāma. **Passatīti** pakāseti kiccapaṭivedhena paṭivijjhati. Tenāha “**tappaṭi...pe... asammoḥato**”ti. Idañhi tassā passanākāradassanaṃ. Teneva hi sammādiṭṭhisāṅkhātena aṅgena tattha paccavekkhaṇā pavattati. Purimāni dve kiccāni sabbesameva sādharmaṇāni āha “**sammāsaṅkappādayopi**”tiādi. “**Tathevā**”ti iminā “attano paccanīkalesehi saddhi”nti idamanukaḍḍhati.

Pubbabhāgeti upacāraṅkhaṇe. Upacārabhāvanāvasena anekavāraṃ pavattacittakkhaṇikattā **nānalakkhaṇā**. Aniccādilakkhaṇavīsayattā **nānarammaṇā**. Maggassa ekacittakkhaṇikattā **ekakkhaṇā**. Nibbānarammaṇattā **ekārammaṇā**. **Kiccatoti** pubbabhāge dukkhādiññāṇehi kattabbena idha sātīsayamaṃ nibbattena kiccena, imasseva vā ñāṇassa dukkhādiṭṭhikāsanakiccena. **Cattāri nāmāni labhati** catūsu saccesu kātabbakkicca nibbattito. **Tīṇi nāmāni labhati** kāmasaṅkappādiṭṭhānanibbattito. **Sikkhāpadavibhaṅge** “viraticetanā, sabbe sampayuttadhammā ca sikkhāpadāni”ti (vibha. 704) vuccanti. Tattha pana padhānaṃ viraticetanāṃ vasena “**viratiyopi honti cetanāyopi**”ti vuttaṃ, musāvādādihi viramaṇakāle vā viratiyo, subhāsītādivācābhāsanādikāle cetanāyo hontīti yojetabbā. Cetanānaṃ amaggaṅgattā “**maggakkhaṇe pana viratiyovā**”ti āha. Ekasseva ñāṇassa dukkhādiññāṇatā viya, ekāyeva viratiyā musāvādādiviratibhāvo viya ca ekāya eva cetanāya sammāvācādikiccattayasādhanāsambhavena sammāvācādiṭṭhivāsiddhito, taṃsiddhiyaṅca aṅgattayattāsiddhito ca evamaṃ vuttanti paṭṭhabbaṃ. Iminā cetasaṃ duvidhataṃ, abhedataṅca dasseti. **Sammappadhānasatipaṭṭhānavasena**ti catusammappadhānacatusatipaṭṭhānabhāvavasena.

Yadipi samādhīupakāraṅkaṇaṃ abhiniropanā numajjanasampiyāyanu pabrūhanasantānaṃ vitakkavīcārapītī sukhopekkaṇaṃ vasena catūhi jhānehi sammāsamādhi vibhatto, tathāpi vāyāmo viya anuppannākusalānuppādanādicatuvāyāmakiccaṃ, sati viya ca asubhāsukhānīcānattabhūtesu kāyādiṣu subhādisaññāpahānacatusatikiccaṃ ekova samādhi catukkajjhānasamādhikiccaṃ na sādheti. Tasmā pubbabhāgepi paṭhamajjhānasamādhi paṭhamajjhānasamādhi eva. Tathā maggakkhaṇepi pubbabhāgepi dutiyajjhānasamādhi dutiyajjhānasamādhi eva. Tathā maggakkhaṇepi pubbabhāgepi tatiyajjhānasamādhi tatiyajjhānasamādhi eva. Tathā maggakkhaṇepi pubbabhāgepi catutthajjhānasamādhi catutthajjhānasamādhi eva. Tathā maggakkhaṇepīti āha “**pubbabhāgepi maggakkhaṇepi sammāsamādhiyevā**”ti.

Tasmāti paññāpajjotattā **avijjāndhakāraṃ vidhamitvā** paññāsattattā **kilesaṅcore ghātentoti** yathārahaṃ yojetabbā. Yasmā pana anādimatī saṃsāre iminā yoginā kadācīpi asamugghāṭitapubbo kilesaṅgaṇo, tassa samugghāṭako ca ariyamaggo. Ayañcetta sammādiṭṭhi pariññābhīsamayādivasena pavattiyā pubbaṅgamā hoti bahūpakārā, tasmā. Tadeva bahūpakāratamaṃ kāraṇabhāvena dassetaṃ “**yogino bahūpakārattā**”ti vuttaṃ.

Tassāti sammādiṭṭhiyā. “Bahūpakāro”ti vatvā taṃ bahūpakāratamaṃ upamāya vibhāvento “**yathā hi**”tiādimāha. Ayaṃ tambakamaṣādimayattā **kūṭo**. Taṃpariharaṇato mahāsāratāya **cheko**. **Evanti** yathā heraññīkassa cakkhunā disvā kahāpaṇavibhāgajānane kiriyāsādhakatamabhāvena kāraṇantaram bahukāraṃ yadidaṃ hattho, evamaṃ yogino paññāya oloketvā dhammavibhāgajānane pubbacārībhāvena dhammantaram bahukāraṃ yadidaṃ vitakko vitakketvā paññāya tadavabodhato. Tasmā sammāsaṅkappo sammādiṭṭhiyā bahukāroti adhippāyo. Dutiyāupamāyamaṃ **evanti** yathā tacchako parena parivattetvā parivattetvā dinnamaṃ dabbasambhāraṃ vāsiyā tacchetvā gehādikaraṇakamma upaneti, evamaṃ yogī vitakkena lakkhaṇādito vitakketvā dinnadhamme yāthāvato paricchinditvā pariññābhīsamayādikamma upanetiyojanā. Vacībhedassa upakārako vitakko sāvajjānavajjavacībhede nivattanapavattanakarāya sammāvācāyapi upakārakovāti āha “**svāya**”ntiādi. “**Yathāhā**”tiādinā dhammadinnāya bhikkhuniyā visākhassa nāma gahapatino vuttaṃ **cūḷavedallasuttapadaṃ** (ma. ni.

1.464) sādhakabhāvena dasseti. **Bhindatī**ti nicchāreti.

Vacībhedanīyāmikā vācā kāyikakiriyāniyāmakassa kammantassa upakārikāti tadattham lokato pākāṭam kātuṃ “**yasmā panā**”tiādi vuttaṃ. **Ubhayaṃ sucaritanti** kāyasucaritaṃ, vacīsucaritañca. Ājīvaṭṭhamakāsīlam nāma catubbidhavacīsucaritatividhakāyasucaritehi saddhiṃ sammāājīvaṃ atthamaṃ katvā vuttaṃ ādibrahmacariyakāsīlam. Yañhi sandhāya vuttaṃ “pubbeva kho panassa kāyakammaṃ vacīkammaṃ ājīvo suparisuddho hoti”ti. **Tadubhayānantaranti** ducaritadvayappahāyakassa sucaritadvayapāripūrihetubhūtaṃ sammāvācāsammākammantadvayassa anantaraṃ. **Suttapamattenā**ti apposukkaṃ suttena, pamattena ca. **Idaṃ vīriyanti** catubbidham sammappadhānavīriyaṃ. **Kāyādīsū**ti kāyavedanācittadhammesu. Indriyasamatādayo samādhissa upakārakā. Tabbidhurā dhammā anupakārakā. **Gatīyoti** nipphattiyo, kiccādisabhāve vā. **Samanvesitvāti** upadhāretvā, hetumhi cāyaṃ tvāpaccayo.

Dvepabbajitavattuvaṇṇanā

376-7. Kasmā āradhanti anusandhikāraṇaṃ pucchitvā taṃ vissajjetuṃ “**ayaṃ kirā**”tiādi vuttaṃ tena ajjhāsayaṇusandhivasenāyaṃ upari desanā pavattāti dasseti. **Tenā**ti tathāladhikkatā. **Assāti** licchavirañño. **Desanāyanti** saṅhasukhumāya suññatapaṭisaññuttāya yathādesitadesanāya. **Nādhimuccatī**ti na saddahati na pasīdati. **Tantidhammaṃ nāma kathentoti** yesaṃ atthāya dhammo kathīyati, tattha tesam asatipi maggapaṭivedhe kevalaṃ sāsane pavēṇibhūtaṃ, pariyattibhūtaṃ vā tantidhammaṃ katvā kathento, tena tadā tesam maggapaṭivedhābhāvaṃ dasseti. **Evarūpassāti** sammāsambuddhattā aviparītadesanāya evampākāṭadhammakāyassa satthuno. **Assāti** paṭhamajjhānādisamadhigamena samāhitacittassa kulaputtassa etaṃ “taṃ jīva”ntiādinā ucchedādigahaṇaṃ api nu yuttanti pucchati, laddhiyā pana jhānādhigamamattena na tāva vivecitattā “yuttamasseta”nti tehi vutte jhānalābhinopetaṃ gahaṇaṃ ayuttamevāti taṃ ucchedavādaṃ, sassatavādaṃ vā “ahaṃ kho...pe... na vadāmi”tiādinā paṭikkhipitvāti sādhippāyattho. **Etanti** paṭhamajjhānādikam. **Evanti** yathāvuttanayena. **Atha ca panāti** evaṃ jānanato, passanato ca. Kāmaṃ vipassakādidassanampi pāḷiyaṃ kataṃ, arahattakūṭena pana desanā niṭṭhāpitāti dassetuṃ “**uttari khīṇāsavaṃ dassetvā**”ti vuttaṃ. Te hi dve pabbajitā vipassakato paṭṭhāya “na kallaṃ tassetam vacanāyā”ti avocuṃ. **Imassāti** khīṇāsavassa. Kiñcāpi “attamanā ahesu”nti pāḷiyaṃ na vuttaṃ, “na kalla”ntiādinā pana vissajjanāvacaneneva tesam attamanatā veditabbāti āha “**te mamā**”tiādi. Tattha yasmā khīṇāsavo vigatasammoho tiṇṇavicikiccho, tasmā tassa tathā vattumayuttanti uppannicchayatāya taṃ mama vacanaṃ sutvā attamanā ahesunti attho. Sopi kho licchavi rājā te viya tathāsañjātanicchayatā attamano ahoṣi. Tenāha “**evaṃ vutte sopi attamano ahoṣi**”ti. Yaṃ panettha atthato avibhattaṃ, taṃ suviññeyyameva.

Iti sumaṅgalavilāsiniyā dīghanikāyaṭṭhakathāya paramasukhumagambhīraduranubodhatthaparidīpanāya suvimlavipulapaññāveyyattiyajananāya sādhuvilāsiniyā nāma līnatthapakāsaniyā mahālisuttavaṇṇanāya līnatthapakāsana.

Mahālisuttavaṇṇanā niṭṭhitā.

7. Jāliyasuttavaṇṇanā

Dvepabbajitavattuvaṇṇanā

378. Evaṃ mahālisuttaṃ saṃvaṇṇetvā idāni jāliyasuttaṃ saṃvaṇṇento yathānupubbaṃ saṃvaṇṇanokāsassa pattabhāvaṃ vibhāvetuṃ, mahālisuttassānantaraṃ saṅgītassa suttassa jāliyasuttabhāvaṃ vā pakāsetuṃ “**evaṃ me suttaṃ...pe... kosambiyanti jāliyasutta**”nti āha. “**Ghositenā**”tiādinā majjhelopasamāsaṃ dasseti, ghoṣitassa āramotipi vattabbaṃ. Evampi hi

“anāthapiṇḍikassa ārāme”tiādīsu (pārā. 234) viya dāyakakittanaṃ hoti, evaṃ pana kittento āyasmā ānando aññepi tassa diṭṭhānugatiāpajjane niyojetīti aññattha vuttaṃ. Tattha koyam ghositasetṭhi nāma, kathañcānena ārāmo kārīto, kathaṃ pana tattha bhagavā vihāsīti pucchāya sabbaṃ taṃ vissajjanaṃ samudāgamato paṭṭhāya saṅkhepatova dassento “**pubbe kirā**”tiādīmāha. **Allakapparaṭṭhanti** bahūsu potthakesu dissati, katthaci pana “**addilaraṭṭha**”nti ca “**damīlaraṭṭha**”nti ca likhitam. **Tatoti** allakapparaṭṭhato. “**Puttaṃ...pe... agamāsī**”ti idampi “tassetam kamma”nti nāpetum vuttaṃ. **Tadāti** tesam gāmaṃ pavitṭhadivase. **Balavapāyāsanti** garutaram bahupāyāsaṃ. **Jīrapetunti** samavepākiniyā gahaṇiyā pakkāpetum. **Asannihiteti** gehato bahi aññaṃ gate. **Bhussatīti** nadati, “bhubhu”iti sunakhasaddam karotīti attho. Idampissa ekaṃ kammaṃ. Paccekabuddhe pana cīvarakammattāyā aññaṃ thānaṃ gate sunakhasa hadayaṃ phālitaṃ. Tiracchānā nāmete ujujātikā honti akuṭilā, manussā pana aññaṃ hadayena cinteti, aññaṃ mukhena kathenti. Tenevāha “gahanañhetam bhante yadidaṃ manussā, uttānakañhetam bhante yadidaṃ pasavo”ti (ma. ni. 2.3).

Iti so tāya paccekabuddhe sinehasena ujudiṭṭhitāya akuṭilatāya kālaṅkatvā tāvatimsabhavane nibbatto. Taṃ sandhāyāha “**so...pe... nibbattī**”ti. Tassa pana kaṇṇamūle kathentassa saddo soḷasayojanatṭhānaṃ pharati, pakatikathāsaddo pana sakalam dasayojanasahassaṃ devanagaram, evaṃ saraghosāsampattiyā “**ghosakadevaputto**” **tveva nāmaṃ ahosi**. Ayamassa paccekabuddhe sinehena bhukkaraṇassa nissando. **Cavitvāti** āhārakkhayena cavitvā. Devalokato hi devaputtā āyukkhayena, puññakkhayena, āhārakkhayena, kopenāti catūhi kāraṇehi cavanti. Imassa pana kāmaguṇe paribhuñjato muṭṭhassatissa āhārakkhayena cavanaṃ hoti. So kosambiyam nagarasobhiniyā kucchismim paṭisandhim gaṇhi. Nagarasobhiniyo kira dhītaram paṭijagganti, na puttaṃ. Dhītaro hi tāsam pavemim ghaṭayanti, tasmā sāpi taṃ saṅkarakūṭe chaḍḍāpeti. Ayamassa pubbe puttachaḍḍanakamma nissando. Pāpakammañhi nāmetam “appaka”nti nāvamaññitabbaṃ. Tameko manusso kākasunakhaparivāritam dīsvā “putto me laddho”ti geham nesi, tassa pana hatthato kosambakasetṭhi kahāpaṇasahassaṃ datvā aggahesi, tamattham sandhāya “**kosambiyam ekassa kulassa ghare nibbattī**”tiādi vuttaṃ. Sattakkhattum ghātāpanattham upakkamakaraṇampi puttachaḍḍanakammasseva nissando. **Setṭhidhītāyāti** janapadasetṭhino dhītāya. **Veyyattiyenāti** paññāveyyattiyena. Sā hi tassa pitarā pesitam mārāpanapaṇṇam phāletvā vivāhapaṇṇam bandhitvā jīvitalābham karoti. Tāyeva sarasampattiyā **ghositasetṭhi nāma jāto**.

Sarīrasantappanatthanti himavanteva mūlaphalāhārātāya kilantasarīrassa loṇambilasevanena pīnanattham. **Tasitāti** pipāsītā. **Kilantāti** parissantakāyā. **Vaṭarukkanti** mahānigrodharukkham. Te kira taṃ patvā tassa mūle nisīdimsu. Atha jeṭṭhakatāpaso nigrodharukkhasa sobhāsampattim passitvā “mahānubhāvo maññe ettha adhivutthā devatā. Sādhu vatāyam devatā isigaṇassa pānīyādidānena addhānaparissamaṃ vinodeyyā”ti cintesi. Devatāpi tathā cintitam utvā isigaṇassa pānīyanhānakabhojanāni adāsi. Tenāha “**tatthā**”tiādi. Jeṭṭhakatāpasassa pana tathā cintanam avisesato sabbattha āropetvā “**saṅgaham paccāsiantā**”ti vuttaṃ. “**Hattham pasāretvā**”ti iminā hatthappasāraṇamattena tassā yathicchitanipphattim dasseti. **Devatā āhāti** sā attano puññassa parittakattā lajjāya kathetum avisahantīpi punappunam nippīḷiyamānā evamāha. **Soti** anāthapiṇḍiko gahapati. **Bhatakānanti** bhatiyā veyyāvaccam karontānam dāsapesakammakarānam. **Pakatibhattavetanamevāti** pakatiyā dātābbabhattavetanameva. Tadā uposathikattā kammaṃ akarontānampi kammakaraṇadivase dātābbabhattavetanameva, na tato ūnanti attho. **Dhammapadaṭṭhakathāyam** khuddakabhāṇakānam matena “sāyamāsattāyā āgato”ti (dha. pa. aṭṭha. 1.2.sāmāvatīvattu) vuttaṃ, idha pana dīghabhāṇakānam matena “**majjhanhike pātarāsattāyā āgato**”ti. **Kaṅcīti** kaṅcīpi bhatakam, kiṅcīpi bhatakakammanti vā sambandho. Majjhanhikakālattā “**upaḍḍhadivaso gato**”ti āha, tena upaḍḍhadivasameva samādinattā “upaḍḍhūposatho”ti taṃ voharantīti dasseti. **Dhammapadaṭṭhakathāyam** (dha. pa. aṭṭha. 1.2 sāmāvatīvattu) rattibhāgena upaḍḍhūposatho vutto, idha pana majjhanhikato paṭṭhāya divasabhāgeneva, tadavasesadivasarattibhāgena vā. Asamepi hi bhāge upaḍḍhasaddo pavattati. **Tadahevāti** aruṇuggamanakālam sandhāya vuttaṃ.

“Ghosopi kho dullabho lokasmiṃ yadidaṃ buddho”ti **sañjātapītipāmojjo. Tadahevāti** kosambim pattadivasato dutiyadivaseyeva. **Turitātthāti** turitā attha, sīghayāyino bhavathāti attho. Ehibhikkhupabbajjāṃ sandhāya “**pabbajitvā**”ti vuttaṃ. **Arahattanti** catuṇṇasambhidāsamalaṅkatāṃ arahantabhāvaṃ. **Tepi seṭṭhino** sotāpattiphale patiṭṭhāya aḍḍhamāsamattāṃ dānāni datvā **paccāgama tayo vihāre kāresuṃ**. Bhagavā pana devasikaṃ ekekasmim vihāre vasati. Yassa ca vihāre vuttho, tasseva ghare piṇḍāya carati, tadā pana ghoṣitassa vihāre viharati. Tena vuttaṃ “kosambiyāṃ viharati ghoṣitārāme”ti.

Bāhiraṣamāyāmatteṇa **upajjhāyo**, na sāsane viya upajjhāyalakkhaṇeṇa. Upecca parassa vācāya ārambhaṇaṃ bādhaṇaṃ **upārambho**, dosadassanavasena ghaṭṭananti attho. Tenāha “**vādaṃ āropetukāmā hutvā**”ti. Vadanti nindāvasena kathenti etenāti hi **vādo**, doso, tamāropetukāmā upari patiṭṭhapetukāmā hutvāti attho. Kathamāropetukāmāti āha “**iti kirā**”tiādi. **Taṃ jīvaṃ taṃ sarīraṃ** taṃ vattu jīvasaññitaṃ, tadeva sarīrasaññitaṃ. Idañhi “rūpaṃ attato samanupassati”ti vuttavādaṃ gahetvā vadanti. Rūpaṅca attānaṅca advayaṃ ekibhāvaṃ katvā samanupassanavasena, “satto”ti vā bāhiraṣaparikkappaṇaṃ attānaṃ sandhāya vadanti. Tathā hi vuttaṃ “**idheva satto bhijjati**”ti. **Assāti** samaṇassa gotamassa. **Bhijjati** nirudayaṇīyavasena vinassati. **Tena** jīvitasarīraṇaṃ anaññattānujānanato, sarīrasa ca bhedaḍḍassanato. Na hettha yathā diṭṭhabhedavatā sarīrato anaññattā adīṭṭhopi jīvassa bhedo vutto, evaṃ adīṭṭhabhedavatā jīvato anaññattā sarīrasāpi abhedoti sakkā vattum tassa bhedassa paccakkhasiddhattā, bhūtopādāyarūpavinimuttassa ca sarīrasa abhāvatoṭi iminā adhippāyenāha “**ucchedavādo hoti**”ti.

Aññaṃ jīvaṃ aññaṃ sarīraṃ aññadeva vattu jīvasaññitaṃ, aññaṃ sarīrasaññitaṃ. Idañhi “rūpavantaṃ attānaṃ samanupassati”tiādinayappavattavādaṃ gahetvā vadanti. Rūpabhedasseva diṭṭhattā, attani ca tadabhāvato “attā nicco”ti ayamatto āpanno vāti iminā adhippāyenāha “**satto sassato āpajjati**”ti.

379-380. Tayidaṃ nesaṃ vañjhāputtassa dīgharassatādīparikkappanasadisāṃ, tasmāyaṃ pañho ṭhapanīyo. Na hesa atthanissito, na dhammanissito, nāḍibrahmacariyako, na nibbidādiatthāya saṃvattati. **Poṭṭhapādasutta**ñcettaṃ nidassanaṃ. Taṃ tatha rājanimīlanaṃ katvā “tena hāvusosuñāthā”tiādinā satthā nesaṃ upari dhammadesanāmarabhīti āha “**atha bhagavā**”tiādi. Sassatucchedadīṭṭhiyo **dve antā**. Ariyamaggo **majjhimā paṭipadā. Tassāyeva paṭipadāyāti** micchāpaṭipadāya eva.

Saddhāpabbajitassāti saddhāya pabbajitassa “evamaṃ ito vaṭṭadukkhato nissarissāmi”ti pabbajjamupagatassa, tadanurūpaṅca sīlaṃ pūretvā paṭhamajjhānena samāhitacittassa. **Etanti** kilesavaṭṭaparivuddhidīpanaṃ “taṃ jīvaṃ taṃ sarīra”ntiādikaṃ diṭṭhisāṃkilesanissitavacanaṃ. **Nibbīkiccho na hotīti** dhammesu tiṇṇavicikiccho na hoti, tatha tatha āsappanaparissappanavasena pavattatīti attho.

Etamevaṃ jānāmīti yena so bhikkhu paṭhamaṃ jhānaṃ upasampajja viharati, etaṃ sasampayuttaṃ dhammaṃ “mahaggatacitta”nti evaṃ jānāmi. Tathā hi vuttaṃ “mahaggatacittametanti saññaṃ ṭhapesi”nti. **No ca evaṃ vadāmīti** yathā diṭṭhigatikā taṃ dhammajātaṃ sanissayaṃ abhedato gaṇhantā “taṃ jīvaṃ taṃ sarīra”nti, tadubhayaṃ vā bhedato gaṇhantā “aññaṃ jīvaṃ añña sarīra”nti attano micchāgāhaṃ pvedaṇti, evamaṃ na vadāmi tassa dhammassa supariññatattā. Tenāha “**atha kho**”tiādi. Bāhirakā yebhuyyena kaṣiṇajjhānāni eva nibbattenti vuttaṃ “**kaṣiṇaparikkammaṃ bhāventassā**”ti. Yasmā bhāvanānubhāvena jhānādhiḡamo, bhāvanā ca pathavīkaṣiṇādisañjānanamukhena hotīti katvā saññāsīseṇa niddisīyati, tasmā “**saññābalena uppanna**”nti āha. Tena vuttaṃ “pathavīkaṣiṇameko sañjānāti”tiādi. Yasmā pana bhagavatā tatha tatha vāre “atha ca paṇāhaṃ na vadāmi”ti vuttaṃ, tasmā bhagavato vacanamupadesaṃ katvā na vattabbaṃ kiretaṃ kevalinā uttamapurisenāti adhippāyena “**na kallaṃ tasseta**”nti āhaṃsu, na sayāṃ paṭibhānenāti dassetuṃ “**maññaṃ mānā vadanti**”ti vuttaṃ. Sesāṃ anantarasutte vuttanayattā, pākaṭattā ca suviññeyyameva.

Iti sumaṅgalavilāsiniyā dīghanikāyaṭṭhakathāya
paramasukhumagambhīraduranubodhatthaparidīpanāya suvimalavipulapaññāveyyattiyajananāya
sādhuvilāsiniyā nāma līnatthapakāsaniyā jāliyasuttavaṇṇanāya līnatthapakāsanā.

Jāliyasuttavaṇṇanā niṭṭhitā.

8. Mahāsīhanādasuttavaṇṇanā

Acelakassapavattuvaṇṇanā

381. Evaṃ jāliyasuttaṃ saṃvaṇṇetvā idāni mahāsīhanādasuttaṃ saṃvaṇṇento yathānupubbaṃ saṃvaṇṇanokāsassa pattabhāvaṃ vibhāvetuṃ, jāliyasuttassānantaraṃ saṅgītassa suttassa mahāsīhanādasuttabhāvaṃ vā pakāsetuṃ “**evaṃ me suttaṃ...pe... uruññāyaṃ viharatīti mahāsīhanādasutta**”nti āha. **Etadeva nāma**nti yasmaṃ raṭṭhe taṃ nagaraṃ, tassa raṭṭhassapi yasmaṃ nagare bhagavā vihāsi, tassa nagarassapi “uruññā”tveva nāmaṃ, tasmā **uruññāyanti** uruññānāmajanapade uruññānāmanagareti āvuttiādinayena attho veditabbo. Iminā imamatthaṃ dasseti – na sabbattha niyatapullīṅgaputhuvacanāva janapadavācī saddā, katthaci aniyatapullīṅgaputhuvacanāpi yathā “āḷaviyaṃ viharatī”ti (pāci. 84, 89) keci janapadamevatthaṃ vadanti, taṃ apānetuṃ “**bhagavā hī**”tiādi vuttaṃ. **Ramaṇīyoti** manoharabhūmibhāgatāya, chāyūdakasampattiyā, janavivittatāya ca manoramo. Migānaṃ abhayaṃ deti etthāti **migadāyo**. Tenāha “so”tiādi. **Celaṃ** vatthaṃ, taṃ natthi assāti **aceloti** vuttaṃ “**naggaparibbājako**”ti. **Nāma**nti gottanāmaṃ. Tapanāṃ santapanāṃ kāyassa khedanāṃ **tapo**, so etassa atthīti **tapassī**. Yasmā tathābhūto tapaṃ nissito, tapo ca taṃ nissito hoti, tasmā “**tapanissitaka**”nti āha. **Muttācārādīti** ettha ādisaddena parato **pāḷiya** (dī. ni. 1.397) māgatā hatthāpalekhanādayo saṅgahitā. Lūkhaṃ pharusāṃ sādhusammatācāravirahato apasādanīyaṃ ājīvati vattatīti **lūkhājīvīti** aṭṭhakathāmuttakanayo. **Uppaṇḍetīti** uhasanavasena paribhāsati. **Upavadatīti** avaññāpubbakaṃ apavadati. Tena vuttaṃ “**hīleti vambheti**”ti. “Hetumhi ñāṇaṃ dhammapaṭisambhidā”tiādīsu viya **dhammasaddo** hetupariyāyoti āha “**kāraṇassa anukāraṇa**”nti. Tathāvuttasaddatthoyevettha kāraṇasaddassa hetubhāvato. Atthavasā payutto hi saddapayogo. Soyeva ca saddattho parehi vuccamāno anukāraṇaṃ tadanurūpaṃ tassadisāṃ vā tato pacchā vā vuttakāraṇabhāvato. **Parehīti** yesaṃ tumhehi idaṃ vuttaṃ, tehi parehi. **Vuttakāraṇenāti** yathā tehi vuttaṃ, tathā ce tumhehi na vuttaṃ, evaṃ sati tehi vuttakāraṇena sakāraṇo hutvā tumhākaṃ vādo vā tato paraṃ tassa anuvādo vā koci appamattakopi viññūhi garahitabbaṃ kāraṇaṃ ṭhānaṃ nāgaccheyya, kimevaṃ nāgacchatīti yojanā. “**Idaṃ vuttaṃ hotī**”tiādinā tadevatthaṃ saṅkhepato dasseti.

382. Idāni yaṃ vibhajjavādaṃ sandhāya bhagavatā “na mete vuttavādino”ti saṅkhepena vatvā taṃ vibhajitvā dassetuṃ “idhāhaṃ kassapā”tiādi vuttaṃ, taṃ vibhāgena dassento “**idhekacco**”tiādimāha. Bhagavā hi niratthakaṃ anupasamasamvattanikaṃ kāyakilamathaṃ “attakilamathānuyogo dukkho anariyo anattasamhito”tiādinā (saṃ. ni. 5.1081; mahāva. 13). Garahati, sātthakaṃ pana upasamasamvattanikaṃ kāyakilamathaṃ “āraññiko hoti, paṃsukūliko hoti”tiādinā (a. ni. 5.181, 182; pari. 325) vaṇṇeti. **Appapuññatāyāti** apuññatāya. Appasaddo cettha “dvattichadanassa pariyāyaṃ appaharite ṭhitena adhiṭṭhātabba”ntiādīsu (pāci. 135) viya abhāvatto. Micchādīṭṭhibhāvato kammaphalaṃ paṭikkhipantena “natthi dinna”ntiādinā (dī. ni. 1.171; ma. ni. 1.445; 2.94, 225; 3.91, 116, 136; saṃ. ni. 3.210; a. ni. 3.118; 10.176; dha. sa. 1221; vibha. 907) micchādīṭṭhiṃ purakkhatvā jīvitavuttihetu tathā tathā duccharitapūraṇaṃ sandhāya “**ṭīpi duccharitāni pūretvā**”ti vuttaṃ.

Bhiyyosomattāyāti mattato atirekaṃ. “**Bhiyyoso**”ti hi idaṃ bhiyyosaddena samānatthaṃ nepātikaṃ. **Anesanavasena**nti kohaññe ṭhatvā asantaṅgasambhāvanicchāya yathā tathā tapaṃ katvā anesitabbamesanāvasena micchājīvenāti attho. Yathāvuttanayena jīvitavuttihetu **ṭīpi duccharitāni pūretvā**. **Ime dve**ti “appapuñño, puññavā”ti ca vutte duccharitakārino dve puggale.

Dutiyānaye ime dvēti “appapuñño, puññavā”ti ca vutte sucaritakārino dve puggale.

Paṭhamadutiyānāyēsu vuttanāyēnēva tatiyacatutthānāyēsupi yathākkamaṃ attho veditabbo. Paṭhamatatiyānāyēsu cēthā ahetukaakiriyavādino. Dutiyācatutthānāyēsu pana kammakiriyavādinoti daṭṭhabbaṃ. **Appadukkhavihārī**ti appakaṃ dukkhena vihārī. **Bāhirakācārayuttoti** sāsānācārato bāhirakena titthiyācārena yutto. **Attānaṃ sukhētvāti** adhammikenā anesānāya laddhapaccāyanimittēna sukhēna attānaṃ sukhētvā sukhaṃ katvā, “**sukhe ṭhapētvā**”ti adhunā pāṭho.

“**Na dāni mayā sadiso atthī**”tiādīnā taṇhāmānadiṭṭhisaṅkhātānaṃ tissannaṃ maññānānaṃ vasēna duccharitapūraṇamāha. Lābhasakkāraṃ vā uppādentō tīṇi duccharitāni puretvāti sambandho. **Micchādiṭṭhivasenāti** “natthi kāmesu doso”ti evaṃ pavattamicchādiṭṭhivasēna. **Paribbājikāyāti** bāhirapabbajjamupagatāya tāpasadārikāya, channaparibbājikāya ca. “Aparo”ti etthāpi hi “tāpaso vā channaparibbājako vā”ti adhikāro. **Daharāyāti** taruṇāya. **Mudukāyāti** sukhumālāya. **Lomasāyāti** tanutambalomatāya appalomavatiyā. Lomaṃ etissā atthīti **lomasā**. Lingattayēpi hi sa-paccāyēna padasiddhimicchānti saddavidū. **Kāmesūti** vatthukāmesu. **Pātabbatanti** paribhuñjitabbaṃ. Paribhogattho hetthā **pā**-saddo, tabbasaddo ca bhāvasādhano. Tā-saddo pana sakatthē yathā “devatā”ti, **pātabbatanti** vā paribhuñjanakataṃ, kattusādhano cēthā tabbasaddo yathā uparipaṇṇāsake **pañcattayasutte** “ye hi keci bhikkhave samaṇā vā brāhmaṇā vā diṭṭhasutamutaviññātabbasāṅkhāramattēna etassa āyatanassa upasampadaṃ paññāpentī”ti (ma. ni. 3.24) tathā hi **tadaṭṭhakathāyaṃ** vuttaṃ “vijānātīti **viññātabbaṃ**, diṭṭhasutamutaviññātamattēna pañcadvārikasāññāpavattimattēnāti ayañhi etthā attho”ti, (ma. ni. aṭṭha. 3.24) **taṭṭhikāyaṅca** “yathā niyyantīti niyyānikāti bahulaṃ vacanato kattusādhano niyyānikasaddo, evaṃ idha viññātabbasaddoti āha ‘vijānātīti viññātabba’nti,” tā-saddo pana bhāve. Assādiyamānapakkhe ṭhito kilesakāmopi vatthukāmapariyāpannoyēva, tasmā tesu yathārucci paribhuñjantoti attho.

Idanti nayācatukkavasēna vuttaṃ atthappabhedavibhājanāṃ. “**Titthiyavasēna āgataṃ** atṭhakathāyaṃ tathā vibhattatā”ti (dī. ni. ṭī. 1.382) ācariyēna vuttaṃ, tathāyēva pana pāḷiyampi vibhattanti veditabbaṃ. **Sāsānepīti** imasmim sāsānepi.

Kathaṃ labbhatīti āha “**ekacco hī**”tiādi. Yasmā na labhati, tasmā anesānaṃ katvātiādīnā yojetabbaṃ. **Arahattaṃ vā** attāni asantaṃ “atthi me”ti yathārutāṃ **paṭijānitvā**. Sāmāntajappānapaccāyapaṭisevanairiyāpathasānissitasāṅkhātāni **tīṇi vā kuhanavatthūni paṭisevitvā**.

Tādisovāti dhutaṅga (visuddhi. 1.22; theragā. aṭṭha. 2.844 ādayo) samādānavasēna lūkhājīvī eva. **Anesānavasēnāti** nidassanāmatṭaṃ. “Arahattapaṭijānanēnā”tiādīpi hi vattabbaṃ.

Dullabhasukho bhavissāmi duggatīsu upapattiyāti adhippāyo. **Asakkontoti** etthā antasaddo bhāvalakkhaṇē, asakkuṇamānē satīti attho.

383. Asukaṭṭhānatoti asukabhavato. **Āgatāti** upapattivasēna idhāgatā. **Idāni gantabbaṭṭhānāncāti** upapattivasēnēva āyatim gamitabbabhavaṅca. **Tatoti** atītabhavato. **Puna upapattinti** āyatim anantarabhavē puna upapattim, tato anantarabhavēpi puna upapattinti punappunaṃ nibbatim. **Kena kāraṇēna garahissāmīti** etthā yathābhūtamajānanto icchādosavasēna yaṃ kiñci garaheyya, na tathā cāhaṃ, ahaṃ pana yathābhūtaṃ jānanto sabbampetaṃ kena kāraṇēna garahissāmi, sabbassapētassa tapassa garahāya kāraṇaṃ natthīti imamadhippāyaṃ dassento “**garahitabbamevā**”tiādīmāha. **Bhaṇḍikanti** puṭabhaṇḍikaṃ. Upamāpakkhe parisuddhatāya dhotāṃ, tathā adhotāṅca, upameyyapakkhe pana pasāmsitabbaguṇatāya dhotāṃ parisuddhaṃ, tathā adhotāṅcāti attho. **Tamatthanti** garahitabbassa ceva garahaṇaṃ, pasāmsitabbassa ca pasāmsanaṃ.

384. Diṭṭhadhammikassa, samparāyikassa ca atthassa sādhanavasēna pavattiyā garukattā **na koci na sādhitī vadati. Pañcavidhaṃ veranti** paṇātipātādipañcavidhaverāṃ. Tañhi pañcavidhassa sīlassa

paṭipakkhabhāvato, sattānaṃ verahetutāya ca “**vera**”nti vuccati, tato eva ca taṃ **na koci** “**sādhū**”ti vadati tathā diṭṭhadhammikādiatthānamasādhanaṃ, sattānaṃ sādhubhāvassa dūsanato ca. **Na nirundhitabbanti** rūpaggaḥaṇe na nivāretabbaṃ. Dassanīyadassanattho hi cakkhupaṭilābhoti tesamadhīpāyo. Ayameva nayo sotādisupī. Yadaggena tesam pañcadvāre asaṃvaro sādhu, tadaggena tattha saṃvaro na sādhuṃti adhippāyo hotīti āha “**puna...pe... asaṃvara**”nti.

Ayamettha aṭṭhakathāto aparō nayo – **yaṃ te ekaccaṃ vadanti** “**sādhū**”ti te “eke samaṇabrāhmaṇā”ti vuttā titthiyā yaṃ attakilamathānuyogādīṃ “sādhū”ti vadanti, taṃ mayāṃ na “sādhū”ti vadāma. **Yaṃ te...pe... “na sādhū”ti** yaṃ pana te anavajjapaccayaparibhogāṃ, sunivatthasupārūtādisammāpaṭipattiṇca “na sādhū”ti vadanti, taṃ mayāṃ “sādhū”ti vadāmāti.

Iti yaṃ paravādamūlakaṃ catukkaṃ dassitaṃ, tadeva puna sakavādamūlakaṃ catukkaṃ katvā dassitanti viññāpetuṃ “**eva**”ntiādi vuttaṃ. Yañhi kiñci kenaci samānaṃ, tenapi taṃ samānameva. Yañca kiñci kenaci asamānaṃ, tenapi taṃ asamānamevāti āha “**samānāsamānata**”nti. Ettha ca **samānatanti** samānatāmattaṃ. Anavasesato hi pahātabbadhammānaṃ pahānaṃ, upasampādetabbadhammānaṃ upasampādanañca sakavādeva dissati, na paravāde. Tena vuttaṃ “tyāhaṃ upasaṅkamitvā evaṃ vadāmī”tiādi. Sakavādaparavādānurūpaṃ vuttanayena **pañcasīlādivaseneva attho veditabbo**.

Samanuyuñjāpanakathāvaṇṇanā

385. Antamiti āṇattiyāṃ pañcamāttanopadaṃ. **Laddhiṃ pucchantoti** “kiṃ samaṇo gotamo saṃkilesadhamme anavasesaṃ pahāya vattatī, udāhu pare gaṇācariyā, ettha tāva attano laddhiṃ vadehī”ti evaṃ paṭiññātaṃ siddhantaṃ pucchanto. **Kāraṇaṃ pucchantoti** “samaṇova gotamo saṃkilesadhamme anavasesaṃ pahāya vattatī”ti vutte “kāraṇenapi etamatthaṃ gāhayā”ti evaṃ hetuṃ pucchanto. **Ubhayaṃ pucchantoti** “idaṃ nāmettha kāraṇa”nti kāraṇaṃ vatvā paṭiññāte atthe sādhiyamāne anvayato, byatirekato ca kāraṇaṃ samatthetuṃ sadisāsadisappabhedāṃ upamodāharaṇadvayaṃ pucchanto. Apica hetupamodāharaṇavasena tilakkhaṇasampattiyā yathāpaṭiññāte atthe sādhiṃte sammadeva anu pacchā bhāsanto nigamentopi **samanubhāsati nāmāti** veditabbaṃ. “**Upasaṃharitvā**”ti pāṭhaseso. “**Kiṃ te**”tiādi upasaṃharaṇākāradassanaṃ. **Dutiyapadepī** “saṅghena vā saṅgha”nti padepī. Vacanasesaṃ, upasaṃharaṇākārañca sandhāya “**eseva nayo**”ti vuttaṃ.

Tamatthanti taṃ pahātabbadhammānaṃ anavasesaṃ pahāya vattanasāṅkhātaṃ, samādātabbadhammānaṃ anavasesaṃ samādāya vattanasāṅkhātañca atthaṃ. **Yojetvāti** akusalā dipadehi yojetvā. Akosallasambhūtādiatthena **akusalā ceva** tatoyeva **akusalāti ca saṅkhātā, saṅkhātasaddo** cettha ñātatho, koṭṭhāsatho ca yujjati āha “**ñātā, koṭṭhāsaṃ vā katvā ṭhapitā**”ti, purimena cettha padena ekantākusale vadati, pacchimena taṃ saḥagata, tappaṭipakkhiye ca. Evañhi koṭṭhāsakaraṇena ṭhapanāṃ upapannaṃ hoti. Akusalapakkhikabhāvena hi vavatthāpanaṃ koṭṭhāsakaraṇaṃ. **Avajjasaddo** dosatho gārayhapariyāyattā, a-saddassa ca tabbhāvavuttitoti āha “**sadosā**”ti. **Ariyā** nāma niddosā. Ime pana akusalā kathañcipi niddosā na hontīti **niddosaṭṭhena ariyā bhavituṃ nālaṃ asamatthā**.

386-392. “Ya”nti etaṃ kāraṇe paccattavacananti dasseti “**yenā**”ti iminā. **Yaṃ vā panāti** asamabhāvanāvacanametāṃ, yaṃ vā pana kiñcīti attho. **Pahāya vattantīti** ca atthavasā puthuvacanavipariñāmoti vuttaṃ “**yaṃ vā taṃ vā appamattakaṃ pahāya vattantī**”ti. **Gaṇācariyā** cettha pūraṇamakhalīdayo. Satthupabhavattā saṅghassa saṅghasampattiyāpi satthusampatti vibhāvīyatīti āha “**saṅgha...pe... siddhito**”ti, sā pana pasamsā pasādahetukāti pasādamukhena taṃ dassetuṃ “**pasīdamānāpi**”tiādi vuttaṃ. Tattha sampiṇḍanathena **pi**-saddena appasīdamānāpi evameva na pasīdantīti sampiṇḍeti. Yathā hi anvayato satthusampattiyā sāvakesu, sāvakasampattiyā ca satthari pasādo samuccīyati, evaṃ byatirekato satthuvipattiyā sāvakesu, sāvakavipattiyā ca satthariappasādoti daṭṭhabbaṃ. “**Tathā hī**”tiādi tabbivaraṇaṃ. **Sarīrasampattinti** rūpasampattiṃ, rūpakāyapāripūrinti

attho. Rūpappamāṇe satte sandhāya idaṃ vuttaṃ, “**dhammadesanaṃ vā sutvā**”ti idantu ghosappamāṇe, dhammappamāṇe ca, “**bhikkhūnaṃ panācāragocara**”ntiādiṃ pana dhammappamāṇe, lūkhappamāṇe ca. Ācāragocarādīhi dhammo, sammāpaṭipattiyā lūkho ca hoti. Tasmā “bhavanti vattāro”ti paṭhamapade rūpappamāṇā, ghosappamāṇā, dhammappamāṇā ca, dutiyapade dhammappamāṇāva yojetabbā. **Kīvarūpoti** kittakajātiko. Yā saṅghassa pasamsāti ānetvā sambandho, ayameva vā pātho.

Tattha yā buddhānaṃ, buddhasāvakanāmeva ca pāsamsatā, aññesañca tadabhāvo jotito, taṃ viratippahānasamvaruddesavasena nīharitvā dassento “**ayamadhippāyo**”tiādimāha. Tattha setughātaviratiyā ariyamaggasampayuttatā “**sabbena sabbam natthi**”ti vuttaṃ. Aṭṭhasamāpattivasena vikkhambhanappahānamattaṃ, vipassanāmettavasena tadaṅgappahānamattanti yathālābham yojetabbaṃ. **Vipassanāmettavasenāti** ca “anicca”nti vā “dukkha”nti vā vividham dassanamettavasena, na pana nāmarūpavavattānapaccayapariggaṇhanapubbakam lakkhaṇattayam āropetvā saṅkhārānaṃ sammasanavasena. Nāmarūpaparicchedo, hi anattānupassanā ca bāhirakānaṃ natthi. **Itarāni** samucchedaṭṭippassaddhinissaraṇappahānāni **tīṇi sabbena sabbam natthi** maggaphalanibbānattā. Lokiyapañcasīlato añño sabbopi **sīlasamvaro**, “khamo hoti sītassa uṇhassā”tiādinā (ma. ni. 1.24; 3.159; a. ni. 4.114) vutto superisuddho **khantisamvaro**, “paññāyete pīdhiyyare”tiādinā (su. ni. 1041; cūḷani. 60) vutto kilesānaṃ samucchedako maggaññasaṅkhāto **ñāṇasamvaro**, manacchaṭṭhānaṃ indriyānaṃ pīdhanavasena pavatto superisuddho **indriyasamvaro**, “anuppanānaṃ pāpakānaṃ akusalānaṃ dhammānaṃ anuppādāyā”tiādinā (dī. ni. 2.403; ma. ni. 1.135; saṃ. ni. 5.8; vibha. 205) vutto sammappadhānasaṅkhāto **vīriyasamvaroti** imaṃ samvarapañcakam sandhāya “**sesam sabbena sabbam natthi**”ti vuttaṃ.

“**Pañca kho panime pātimokkhuddesā**”tiādinā yathāvuttasīlasseva puna gahaṇaṃ sāsane sīlassa bahubhāvaṃ dassetvā tadekadese eva paresaṃ avaṭṭhānadassanattaṃ. “**Uposathuddesā**”ti adhunā pātho. **Paññāyatīti** paṭiṭṭhitabhāvena pākaṭo hoti, tasmā mayā hi...pe... natthīti yojetabbaṃ. **Sīhanādanti** seṭṭhanādaṃ, abhītanādaṃ kenaci appaṭivattiyavādaṃ. Yaṃ pana vadanti –

“Uttarasmīṃ pade byaggha-puṅgavosabhakuñjara;
Sīhasaddūlanāgādyā, pume seṭṭhatthagocara”ti.

Taṃ yebhuyyavasenaṅti datṭhabbaṃ.

Ariyaatṭhaṅgikamaggavaṇṇanā

393. “Ayaṃ pana yathāvutto mama vādo aviparītova, tassevaṃ aviparītabhāvo imaṃ maggaṃ paṭipajjitvā aparappaccayato jānitabbo”ti evaṃ **aviparītabhāvāvabodhanattaṃ**. Pāḷiyaṃ “**atthi kassapā**”tiādisu ayaṃ yojanā – yaṃ maggaṃ paṭipanno sāmaṃyeva attapaccakkhato evaṃ ñassati dakkhati “samaṇo gotamo vadanto yuttapattakāle tathabhāvato bhūtaṃ, ekaṃsena hitāvahabhāvato atthaṃ, dhammato anapetattā dhammaṃ, vinayaṃyogato, paresaṃca vinayanato vinayaṃ vadatī”ti, so mayā sayam abhiññā sacchikatvā pavedito sakalavaṭṭadukkhanissaraṇabhūto atthi kassapa maggo, tassa ca adhigamūpāyabhūtā pubbabhāgaṭṭipadāti, tena “samaṇo gotamo ime dhamme anavasesaṃ pahāya vattatī”tiādi nayappavatto vādo kenaci asampakampito yathābhūta sīhanādoti dasseti. **Dakkhatīti** cettha ssati-saddena padasiddhi “yatra hi nāma sāvako evarūpaṃ ñassatī vā dakkhati vā sakkhiṃ karissatī”tiādisu viya.

“Evametam yathābhūtaṃ sammappaññāya passatī”tiādi suttapadesu (a. ni. 3.134) viya ca **maggañca paṭipadañca ekato katvā dassento**. “**Ayamevā**”ti sāvadhāraṇavacanaṃ maggassa puthubhāvapaṭikkhepatthaṃ, sabbaariyasādhāraṇabhāvavadassanattaṃ, sāsane pākaṭabhāvavadassanattañca. Tenāha “ekāyano ayaṃ bhikkhave maggo sattānaṃ visuddhiyā”ti (dī. ni. 2.373; ma. ni. 1.106; saṃ. ni. 5.367, 384).

“Eseva maggo natthañño, dassanassa visuddhiyā”ti, (dha. pa. 274) –

“Ekāyaṇaṃ jātikhayantadassī,
Maggamaṃ pajānāti hitānukampī;
Etena maggena atariṃ su pubbe,
Tarissanti ye ca taranti ogha”nti. (saṃ. ni. 5.384, 409; cūḷani. 107, 211; netti. 170) ca –

Sabbesu ceva suttapadesesu, abhidhammapadesesu (vibha. 355) ca ekovāyaṃ maggo pākaṭoti.

Tapopakkamakathāvaṇṇanā

394. Tapoyeva upakkamitabbato, ārabhitabbato **tapopakkamāti** āha “**tapārambhā**”ti, ārambhanañcetta tapakaraṇamevāti dasseti “**tapokammānī**”ti iminā. **Samaṇakammasaṅkhātā** samaṇehi kattabbakammasaṅhātā. **Brāhmaṇakammasaṅkhātā** etthāpi eseva nayo. **Niccoloti** nissaṭṭhacolo sabbena sabbaṃ paṭikkhittacolo. Celaṃ, coloti ca pariyāyavacanamaṃ. Koci chinnabhinnapaṭapilotikadharopi dasantayuttassa vatthassa abhāvato “niccolo”ti vattabbataṃ labheyyāti taṃ nivattetuṃ “**naggo**”ti vuttaṃ, naggiyavatasamādānena sabbathā naggoti attho. Lokiyakulaputtācāravirahitatāva vissaṭṭhācārātāti dasseti “**uccārakammādīsū**”tiādīnā. Kathaṃ virahitoti āha “**ṭhitakovā**”tiādi, idaṅca nidassanamattaṃ vamtivā mukhavikkhālanādiācārassapi tena vissaṭṭhattā. **Apalikhatī**ti udakena adhovanato apalihati. So kira daṇḍakaṃ “satto”ti paññapeti, tasmā taṃ paṭipadaṃ pūrento evaṃ karotīti vuttaṃ “**uccāraṃ vā**”tiādi. Tattha **apalikhatī**ti apakasati.

“Ehi bhaddanto”ti vutte upagamanasaṅkhāto vidhi **ehibhaddanto**, taṃ caratīti **ehibhaddantiko**, ruḷhisaddena cettha taddhitasiddhi yathā “ehipassiko”ti, (ma. ni. 1.74) tappaṭikkhepena **naehibhaddantiko**, tadevatthaṃ dasseti “**bhikkhāgahaṇattha**”ntiādīnā. **Na etī**ti na āgacchati. Evaṃ **natiṭṭhabhaddantiko**ti etthāpi. Samaṇena nāma sayamvacanakareneva bhavitabbaṃ, na paravacanakarenāti adhippāyena **tadubhayampi...pe... na karoti**. **Puretaranti** taṃ ṭhānaṃ attanā upagamanato paṭhamataraṃ, taṃ kira so “bhikkhunā nāma yādicchakā eva bhikkhā gahetabbā”ti adhippāyena na gaṇhāti. **Uddissakataṃ** pana “mama nimittabhāvena bahū khuddakā pāṇā saṅghāṭamāpādītā”ti adhippāyena nādhivāseti. **Nimantanampi** “evaṃ tesamaṃ vacanaṃ kataṃ bhavissati”ti adhippāyena na sādiyati. **Kumbhī**ti pakkabhikkhāpakkhittakumbho. **Ukkhalī**ti bhikkhāpacanakumbho. **Pacchī**ti bhikkhāpakkhittapaṭikaṃ. **Tatopī**ti kumbhīkaḷopitopi. **Kumbhī**ādīsopi so sattasaññīti āha “**kumbhīkaḷopiyo**”tiādi. “**Ayaṃ ma**”ntiādīsopi eseva nayo. **Antaranti** ubhinnamantarāḷaṃ.

Kabalaṅtarāyoti ālopassa antarāyo. Etthāpi so sattasaññī. **Purisanataragātāyāti** purisasamīpagatāya. **Ratiantarāyoti** kāmaratīyā antarāyo. Gāmasabhāgādivasena saṅgama kittenti etissāti **saṃkittī**. Tathā saṃhaṭataṇḍulādīsañcayo tena katabhattamidhādhippetanti vuttaṃ “**saṃkittetvā katabhattesū**”ti. Majjhimanikāye **mahāsīhanādasuttantaṭikāyaṃ** pana ācariyeneva evaṃ vuttaṃ “saṃkittayanti etāyāti **saṃkittī**, gāmaṃvāsīhi samudāyavasena kiriyamānakiriyā, ettha pana bhattasaṃkittī adhippetāti āha ‘saṃkittetvā katabhattesū’ti”. Idaṃ pana tassa ukkaṭṭhapaṭipadāti dasseti “**ukkaṭṭho**”tiādīnā. Yathā cettha, evaṃ “naehibhaddantiko”tiādīsopi ukkaṭṭhapaṭipadādassanaṃ veditabbaṃ. **Sāsaddo** sunakhapariyāyo. **Tassāti** sunakhasa. **Tatthāti** tasmīṃ ṭhāne. **Samūhasamūhacārīnī**ti saṅghasaṅghacārīnī. **Manussāti** veyyāvaccakaramanussā.

Sovīrakanti kañjikamaṃ. “Loṇasovīraka”nti keci, tadayuttameva, “sabbasassasambhārehi kata”nti vuttattā. Loṇasovīrakañhi sabbamacchamaṃsapupphaphalādīsambhārakataṃ. **Surāpānamevāti** majjalakkhaṇappattāya surāya pānameva. Merayampettha saṅghataṃ lakkhaṇāhārena, ekasesanayena vā. **Sabbesupī**ti sāvajjānavajjesupi kañjikasurādīsū. Ekāgārameva bhikkhācariyāya upagacchatīti **ekāgāriko**. **Nivattatī**ti paccāgacchati, sati bhikkhālabhe taduttari na gacchatīti vuttaṃ hoti. Ekālopaneva vattatīti **ekālopiko**. Dīyati etāyāti **datti**, dvattiālopaṃmattaḅhāhi khuddakaṃ bhikkhādānabhājanamaṃ.

Tenāha “**khuddakapāṭī**”ti. **Aggabhikkhanti** anāmaṭṭhabhikkhaṃ, samābhisaṅkhatatāya vā uttamabhikkhaṃ. Abhuñjanavasena eko ho etassāti **ekāhiko**, āhāro, taṃ āhāraṃ āhāretīti attho. So pana atthato ekadivasalaṅghakoti vuttaṃ “**ekadivasantarika**”nti. Esa nayo “**dvāhika**”ntiādisupi. Apica ekāhaṃ abhuñjitvā ekāhaṃ bhuñjanaṃ, ekāhavāro vā **ekāhikaṃ**. Dvīhaṃ abhuñjitvā dvīhaṃ bhuñjanaṃ, dvīhavāro vā **dvāhikaṃ**. Sesadvayepi ayaṃ nayo. Ukkatṭho hi pariyāyabhattabhojaniko dvīhaṃ abhuñjitvā ekāhameva bhuñjati. Evaṃ sesadvayepi. **Majjhimāgamaṭṭhikāyaṃ** pana “ekāhaṃ antarabhūtaṃ etassa atthīti ekāhikaṃ. Sesapadesupi esa nayo”ti vuttaṃ. “Therā bhikkhū bhikkhuniyo ovadanti pariyāyenā”tiādisu viya vārattho **pariyāya** saddo. **Ekāhavārenāti** ekāhikavārena. “Ekāhika”ntiādinā vuttavidhimeva paṭipāṭiyā pavattabhāvena dassetuṃ pāḷiyāṃ “iti evarūpa”ntiādi vuttanti daṭṭhabbaṃ.

395. Sāmāko nāma godhumo. **Sayaṃjātā vīhijātīti** aropimavīhijāti. Yadeva “vīhī”ti vadanti. **Likhivāti** kasitvā. **Silesopīti** kaṇikārādirukkhanīyāsopi. **Kuṇḍakanti** tanutaraṃ taṇḍulasakalaṃ, taṇḍulakhaṇḍakanti attho. Odenena kataṃ kañjiyaṃ **odanakañjiyaṃ**. “Vāsitakena piñṇākena nahāyeyyā”tiādisu (pāci. 1203) viya **piñṇāka** saddo tilapiṭṭhapariyāyo. Yathāha “piñṇākaṃ nāma tilapiṭṭhaṃ vuccatī”ti. “Tarūnakadalikkhandhameva piñṇāka”nti keci, na gahetabbametaṃ katthacipi tathā avacanato.

396. Saṇehi saṇavākehi nibbattitāni **sāṇāni**, aññehi missakāni sāṇāni eva **masāṇāni** niruttinayena, na chacīvarapariyāpannāni bhaṅgāni. Keci pana “masāṇāni nāma coḷavisesānīti parikkappetvā massakacoḷānī”ti paṭhanti, tadayuttameva porāṇehi tathā avuttattā. **Erakatiṇādinīti** ettha **ādisaddena** akkamakacikadalivākādīnaṃ saṅgaho, erakādīhi katāni hi chavāni lāmakāni dussānīti vattabbataṃ labhanti. **Chavasaddo** hettha hīnavācako, purimavikappe pana matasarīravācako. **Chaḍḍitanantakānīti** chaḍḍitapilotikāni. Ajinassedanti **ajinaṃ**, pakatiājinaṃigacammaṃ, tadeva majjhe phālītakañce, ajinassa khipaṃ phālītamupadḍhanti **ajinakkhipaṃ**. “Sakhurakantipi vadanti”ti (ma. ni. aṭṭha. 1.155) **papañcasūdaniyaṃ** vuttaṃ, dvinnaṃ tiṇṇaṃ vā samuditañce, ajinakkhipanti tesamadhippāyo. **Vinayasamvaṇṇanāsu** pana “ajinameva abhedato **ajinakkhipa**”nti vuttaṃ. **Kanditvāti** ujjavujjavena kanditvā. “**Ganthetvā**”tipi pāṭho, vaṭṭetvā bandhitvāti attho. Evañhi phalakacīre nidassanaṃ upapannaṃ hoti. **Yaṃ sandhāya vuttanti** ajitavādassa paṭikiṭṭhatarabhāve upamādasanattamaṃ yadeva kesakambalaṃ sandhāya **aṅguttarāgame** (a. ni. 3.138) vuttaṃ.

Tantāvutānīti tantaṃ pasāretvā vītāni. **Paṭikiṭṭhoti** hīno. Kasmāti vuttaṃ “**kesakambalo**”tiādi. Pāḷiyāṃ **ubbhaṭṭhako**”ti etassa “uddhaṃ ṭhitako”ti attho **majjhimāgamaṭṭhakathāyaṃ mahāsīhanādasuttavaṇṇanāyaṃ** (ma. ni. aṭṭha. 1.215) vutto. **Ubbhasaddo** hi upariatthe nepātiko yathā “ubbhajāṇumaṇḍala”nti. Anekaparimāṇā, hi nipātā, anekatthā ca.

Micchāvāyāmasaseneva ukkuṭikavatānuyogoti āha “**ukkuṭikavīriyaṃ anuyutto**”ti. Na kevalaṃ nisinnoyeva ukkuṭiko, atha kho **gacchantopi...pe... gacchati**. **Ayakaṇṭaketi** ayomayakaṇṭake. **Pakatiṇṭaketi** salākakaṇṭake. Uccabhūmiyaṃ **thaṇḍilasaddoti** vuttaṃ “**ucce bhūmiṭṭhāne**”ti. Ayaṃ aṭṭhakathāto aparo nayo – **thaṇḍilanti** samāpakatibhūmi vuccati “patthaṇḍile pāturahosī”tiādisu viya. Amarakosepi hi **nighaṇṭusatthe** vuttaṃ “vedī parikkhatā bhūmi, same thaṇḍilaṃ cātura”ti (sattarasamavagge 18 gāthāyaṃ) tasmā thaṇḍile anantarahitāya pakatibhūmiyaṃ seyyampi kappetīti attho. Yaṃ sandhāya tattheva **nighaṇṭusatthe** vuttaṃ “yo thaṇḍile vata vasā, sete thaṇḍilasāyī so”ti (sattarasamavagge 44 gāthāyaṃ) rajo eva jallaṃ malīnaṃ **rajojallaṃ**. Tena vuttaṃ “**sarīra**”ntiādi. **Laddhaṃ āsananti** nisīdituṃ yathāladdhamāsanāṃ. **Akopetvāti** aññattha anupagantvā. Tathā cāha “**tattheva nisīdanasīlo**”ti. Evaṃ nisīdanto hi taṃ akopento nāma hoti. Catūsu mahāvikaṭesu gūthamevidhādhippetanti vuttaṃ “**gūthaṃ vuccatī**”ti. Tañhi āsayavasena virūpaṃ kaṭattā “**vikaṭa**”nti vuccati. **Sāyaṃ tatiyanti** sāyanhasamayasaṅkhātamaṃ tatiyasamayaṃ. **Assāti** udakorohanānuyogassa. Pātopadamiva sāyampadaṃ nepātikaṃ. Anusāralopena pana “**sāyatatiyaka**”ntipi pāṭho dissati.

Ettha ca “acelako hotī”tiādinī yāva “thusodakaṃ pivatī”ti etāni vatapadāni ekavārāni, “ekāgārīko

vā hotī”tiādīni pana nānāvārāni, nānākālikāni vā. Tathā “sākabhakkho vā hotī”tiādīni, “sāṇānīpi dhāreti, masāṇānīpi dhāreti”tiādīni ca. Tathā hettha vā-saddaggaṇaṃ, pi-saddaggaṇaṇca katam. Pi-saddopi idha vikappattho eva daṭṭhabbo. Purimesu pana vatapadesu tadubhayampi na katam, evaṇca katvā “acelako hotī”ti vatvā “sāṇānīpi dhāreti”tiādivacanassa, “rajojalladharopi hotī”ti vatvā “udakorohanānuyogamanuyutto viharatī”ti vacanassa ca avirodho siddho hoti. Atha vā kimettha avirodhacintāya. Ummattakapacchisadiso hi titthiyavādo. Apica “acelako hotī”ti ārabhitvā tappasaṅgena sabbampi aññamaññavirodhameva attakilamathānuyogaṃ dassentena tena acelakassapena “sāṇānīpi dhāreti”tiādi vuttanti daṭṭhabbaṃ.

Tapopakkamaniratthakatāvaṇṇanā

397. Sīlasampadādīhīti sīlasampadā, samādhisampadā, paññāsampadāti imāhi lokuttarāhi sampadāhi. **Vināti** virahitattā, vinā vā tāhi na kadācīpi sāmāññaṃ vā brahmaññaṃ vā sambhavati, tasmā tesam tapopakkamānaṃ niratthakataṃ dassentoti sapāṭhasesayojanā. **Dosaveravirahitanti** dosasaṅkhātaverato virahitaṃ. Idañhi dosassa mettāya ujupaṭipakkhato vuttaṃ. Yaṃ pana ācariyena vuttaṃ “dosaggaṇena vā sabbepi jhānapaṭipakkhā saṃkilesadhammā gahitā. Veraggaṇena paccatthikabhūtā sattā. Yadaggena hi dosarahaṃ, tadaggena verarahaṃ”nti (dī. ni. ṭī. 1.397), tadetaṃ pāliyaṃ verasaddasseva vijjānāntā, aṭṭhakathāyaṇca tadatthameva dassetuṃ dosasaddassa vuttattā vicāretabbaṃ.

398. Ettakamattanti naggacariyādimattaṃ. Pākāṭabhāvena kāyati atthaṃ gametīti **pakati**, lokasiddhavādo. Tenāha “**pakatikathā esā**”ti. “Mattā sukhapariccāgā”tiādīsu (dha. pa. 290) viya mattāsaddo appattaṃ antonītaṃ katvā pamāṇavācakoti āha “**iminā**”tiādi. Tena pana pamāṇena pahātabbo eva paṭipattikkamo pakaraṇappatto. Iminā “tapopakkamenā”ti saddantarena vā adhigatoti dasseti “**paṭipattikkamenā**”ti iminā. **Tatoti** tasmā sāmāññabrahmaññassa appamattakeneva paṭipattikkamena sudukkarabhāvato. Imaṃ hetusambandhaṃ sandhāya “**padasambandhena saddhi**”nti vuttaṃ. **Sabbatthāti** sabbavāresu.

399. Aññathāti yadi acelakabhāvādinā sāmāññaṃ vā brahmaññaṃ vā abhavissa, evaṃ sati suvijānova samaṇo, suvijāno brāhmaṇo. Yasmā pana tumhe ito aññathāva sāmāññaṃ, aññathā brahmaññaṃ vadatha, tasmā dujjānova samaṇo dujjāno brāhmaṇoti attho. Tenāha “**idaṃ sandhāyāhā**”ti. **Taṃ pakativādaṃ paṭikkhipitvāti** yaṃ pubbe pākatikaṃ sāmāññaṃ, brahmaññaṇca hadaye ṭhapetvā tena acelakassapena “dukkaraṃ sudukkara”nti vuttaṃ, bhagavatā ca tameva sandhāya “pakati kho esā”tiādi bhāsitaṃ, tameva idha pākatikasāmāññabrahmaññavisayaṃ kathaṃ paṭisaṃharitvā. **Sabhāvatova** paramatthato eva samaṇassa, brāhmaṇassa ca **dujjānabhāvaṃ āvikaronto punapi “pakati kho”tiādimāha. Tatrāpīti** samaṇabrāhmaṇavādepi. **Padasambandhanti** hetupadena saddhiṃ pubbāparavākyasambandhaṃ.

Sīlasamādhipaññāsampadāvaṇṇanā

400-1. Paṇḍitoti hetusampattisiddhena paṇḍiccena samannāgato. **Kathaṃ uggahesīti** paripakkaññāntā ghaṭe padīpena viya abbhantare samujjalantena paññāveyyattiyena tattha tattha bhagavatā desitamattaṃ pariggaṇhanto taṃ desanaṃ upadhāresi. Yasmā uggahesi, tasmā...pe... viditvāti sambandho. **Tassa cetī** yo acelako hoti, yāva udakorohanānuyogamanuyutto viharati, tassa ca. Tassa ceti vā padacchedo, abhāvitā asacchikatā hoti ceti yojanā. **Tā sampattiyo pucchāmi**, yāhi samaṇo ca brāhmaṇo ca hotīti adhippāyo. **Sīlasampadādivijānanatthanti** sīlasampadādivijānanahetu. “Kasmā pucchati”ti hi vuttaṃ. **Atha-saddo** cettha kāraṇe. Evamīdisesu. **Sīlasampadāyāti** ettha itisaddo ādiattho, upalakkhaṇaniddeso vāyaṃ, tena “cittasampadāya, paññāsampadāyā”ti padadvayaṃ saṅgaṇhāti. Tenāha “sīlacittapaññāsampadāhi aññā”ti. Imehi ca asekkhasīlādikkhandhattayaṃ saṅgahitanti vuttaṃ “**arahattaphalamevā**”ti. Tattha kāraṇaṃ dasseti “**arahattaphalapariyosāna**”ntiādinā. Idañhi kākolokanamiva ubhayāpekkhavacanāṃ.

Sīhanādakathāvaṇṇanā

402. Anuttaranti anaññasādhāraṇatāya, anaññasādhāraṇatthavisayatāya ca anuttaraṃ.

Mahāsīhanādanti mahantaṃ buddhasīhanādaṃ. Ativiya accantavisuddhatāya **paramavisuddhaṃ**. “**Paramanti** ukkaṭṭhaṃ. Tenāha ‘uttama’nti” ācariyena vuttaṃ, ukkaṭṭhāpariyāyo ca **paramasaddo** atthīti tassādhippāyo. **Slamevā**ti lokiyasīlamattattā sīlasāmaññaṃeva. Yathā anaññasādhāraṇaṃ bhagavato lokuttarasīlaṃ savāsanapaṭipakkhadhammaviddhaṃsanato, evaṃ lokiyasīlampi anaññasādhāraṇaṃeva tadanucchavikabhāvena pavattattā. Evañhi “nāhaṃ tatthā”ti pālīvacanaṃ upapannaṃ hoti. “Yāvata kassapa ariyaṃ paramaṃ sīla”nti idaṃ “sīlassa vaṇṇaṃ bhāsanti”ti ettha ākāradassanaṃ. “Yadidaṃ adhisīla”nti idaṃ pana “tatthā”ti padadvaye aniyamavacanaṃ. “**Yadidaṃ adhisīla**”nti ca lokiyalokuttaravasena duvidhampi buddhasīlaṃ ekajjhaṃ katvā vuttaṃ, tasmā ta-saddenapi ubhayasseva parāmasananti dassetuṃ “**tattha sīlepi paramasīlepi**”tiādīmāha. **Samasamanti** samena viśesanabhūtena sīlena samanti atthaṃ viññāpetuṃ “**mama sīlasamena sīlena mayā sama**”nti vuttaṃ. **Tasmiṃ sīleti** duvidhepi sīle. **Iti imanti** evaṃ imaṃ sīlavisaṃyaṃ. **Paṭhamanti** uppattikkamato paṭhamaṃ pavattattā paṭhamabhūtaṃ.

Tapatīti kilese santappati, vidhamatīti attho. “**Tadevā**”ti iminā tulyādhikaraṇasamāsamāha.

Jigucchātīti hīleti lāmakato ṭhāpeti. Ārakā kilesehīti katvā **niddosattā ariyā**. **Ārambhavatthuvasenā**ti atṭhārambhavatthuvaseṇa. **Vipassanāvīriyasāṅkhātī**ti vipassanāsampayuttavīriyasāṅkhātā. Lokiyamattattā **tapojigucchāva**. Maggaphalasampayuttā vīriyasāṅkhātā tapojigucchātī adhikāravaseṇa sambandho. Sabbukkaṭṭhabhāvato **paramā nāma**. Yathā yuvino bhāvo yobbanāṃ, evaṃ jigucchino bhāvo **jegucchāṃ**. **Yadidaṃ adhijegucchanti** sīle viya lokiyalokuttaravasena duvidhampi buddhajegucchāṃ. **Tatthāti** jegucchepi adhijegucchepi. **Kammassakatāpaññāti** “atthi dinnāṃ, atthi yiṭṭha”ntiādi (ma. ni. 1.441; vibha. 793) nayappavattaṃ ñāṇaṃ. Yathāha **vibhaṅge** –

“Tattha kataraṃ kammassakatāñāṇaṃ, atthi dinnāṃ, atthi yiṭṭhaṃ, atthi hutāṃ, atthi sukaṭṭadukkaṭāṇaṃ kammānaṃ phalaṃ vipāko...pe... ṭhāpetvā saccānulomikaṃ ñāṇaṃ sabbāpi sāsavā kusalā paññā kammassakatāñāṇa”nti (vibha. 793).

Sabbampi hi akusalaṃ attano vā hotu, parassa vā, na sakaṃ nāma. Kasmā? Atthabhañjanato, anattahajananato ca. Tathā sabbampi kusalaṃ sakaṃ nāma. Kasmā? Anattabhañjanato, atthajananato ca. Evaṃ kammassakabhāve pavattā paññā kammassakatāpaññā nāma. **Vipassanāpaññāti** maggasaccassa, paramatthasaccassa ca anulomanato saccānulomikasaññitā vipassanāpaññā, lokiyamattato paññāva. Itthilingassa napuṃsakalingavipariyāyo idha **liṅgavipallāso**. **Yāyaṃ adhipaññāti** sīle viya lokiyalokuttaravasena duvidhāpi buddhapaññā. **Tatthāti** paññāyapi adhipaññāyapi. Yathārahaṃ parittamahaggatabhāvato **vimuttiyeva nāma**. Maggaphalavasena kilesānaṃ samucchindanapaṭippassambhanāni **samucchedapaṭippassaddhivimuttiyo**. Atha vā sammāvācādiviraṭṭānaṃ adhisīlaggahaṇena, sammāvāyāmassa adhijegucchaggahaṇena, sammādiṭṭhiyā adhipaññāggahaṇena gahitattā aggahitaggahaṇena sammāsankappasatisamādhayo maggaphalāpariyāpannā **samucchedapaṭippassaddhivimuttiyo** daṭṭhabbā. **Nissaraṇavimutti** pana nibbānameva. **Yā ayaṃ adhivimuttīti** sīle vuttanayena duvidhāpi adhivimutti. **Tatthāti** vimuttiyāpi adhivimuttiyāpi.

403. Yaṃ kiñci janavivittaṭṭhānaṃ **suññāgāra**midhādhippetāṃ. Tattha nadantena vinā añño jano natthīti dassetuṃ “**ekakovā**”tiādi vuttaṃ. **Aṭṭhasu parisāsūti** khattiyāparisā, brāhmaṇagahapatisamaṇacātumahārājikatāvatiṃsamārabrahmaparisāti imāsu aṭṭhasu parisāsu.

Tadatthaṃ **majjhimāgamavare mahāsīhanādasuttapadena** (ma. ni. 1.150) sādheṇto “**cattārimānī**”tiādīmāha. Tattha **vesārajjanīti** visāradabhāvā, ñāṇappahānaantarāyikanīyānikadhammadesanānimittaṃ kutocipi asantassanabhāvā nibbhayabhāvāti attho. “Vesārajja”nti hi catūsu ṭhānesu sārājjaḥbhāvāṃ paccavekkhantassa

uppannasomanassamayaññassetam nāmaṃ. Aññehi pana asādhāraṇataṃ dassetuṃ “**tathāgatassa tathāgatavesārajjānī**”ti vuttam. “Yathā vā pubbabuddhānaṃ vesārajjānī puññussayasampattiyā āgatāni, tathā āgatavesārajjānī”ti vā dutiyassa tathāgatasaddassa tulyādhikaraṇattā evaṃ vuttam. Ayam aṭṭhakathānayo. Neruttikā pana vadanti “samāse siddhe sāmāññattā, saññāsaddattā ca tathā vutta”nti. **Āsabhaṃ ṭhānanti** seṭṭhaṭṭhānaṃ uttamaṭṭhānaṃ. Sabbaññutaṃ paṭijānavasena abhimukhaṃ gacchanti, aṭṭhapaṛisaṃ upasaṅkamantīti vā **āsabhā**, buddhā, tesam ṭhānantipi attho.

Apica tayo puṅgavā – gavasatajeṭṭhako **usabho**, gavasahassajeṭṭhako **vasabho**. Vajasatajeṭṭhako vā **usabho**, vajasahassajeṭṭhako **vasabho**. Ekagāmakhette vā jeṭṭho **usabho**, dvīsu gāmakhettesu jeṭṭho **vasabho**, sabbagavaseṭṭho sabbattha jeṭṭho sabbapaṛissayasaho seto pāsādiko mahābhāravaho asanisatasaddehipi akampaṇīyo **nisabhoti**. Nisabhova idha “usabho”ti adhippeto. Idampi hi tassa paṛiyāyavacanāṃ. Usabhassa idanti **āsabhaṃ**, idaṃ pana āsabhaṃ viyāti **āsabhaṃ**. Yatheva hi nisabhasaṅkhāto usabho usabhabalena samannāgato catūhi pādehi pathaviṃ uppīletvā acalaṭṭhānena tiṭṭhati, evaṃ tathāgatopi dasatathāgatabalena samannāgato catūhi vesārajjapādehi aṭṭhapaṛisāpathaviṃ uppīletvā sadevake loke kenaci paccatthikena paccāmittena akampiyo acalaṭṭhānena tiṭṭhati. Evaṃ tiṭṭhamānova taṃ āsabhaṃ ṭhānaṃ paṭivijānāti upagacchati na paccakkhāti attani āropeti. Tena vuttam “āsabhaṃ ṭhānaṃ paṭijānāti”ti.

Sīhanādaṃ nadatīti “seṭṭhanādaṃ abhītanādaṃ nadatī”ti vuttovāyamatto. Atha vā sīhanādasadisam nādaṃ nadati. Ayamatto khandhavaggaṣaṃyutte āgatena **sīhanādasuttena** (saṃ. ni. 3.78) dīpetabbo. Yathā vā sīho migarājā paṛissayānaṃ sahanato, goṇamahim samattavāraṇādīnaṃ hananato ca “sīho”ti vuccati, evaṃ tathāgato munirājā lokadhammānaṃ sahanato, parappavādānaṃ hananato ca “sīho”ti vuccati. Evaṃ vuttassa sīhassa nādaṃ nadati. Tattha yathā migasīho sīhabalena samannāgato sabbattha visārado vigatalomahaṃso sīhanādaṃ nadati, evaṃ tathāgatasīho dasatathāgatabalena samannāgato aṭṭhasu paṛisāsu visārado vigatalomahaṃso “iti rūpa”ntiādīnā (saṃ. ni. 3.78; a. ni. 8.2) nayena nānāvīdhadesanāvīlāsasampannaṃ sīhanādaṃ nadati. Tena vuttam “paṛisāsu sīhanādaṃ nadatī”ti.

Pañhaṃ abhisāṅkharitvāti ñātumicchitaṃ atthaṃ attano ñāṇabalānurūpaṃ abhisāṅkharitvā. **Taṅkhaṇaṅnevāti** pucchitakkhaṇeyeva ṭhānuppattikapaṭibhānena **vissajjeti**. Ajjhāsayanurūpaṃ, atthadhammānurūpaṇca vissajjanato **cittaṃ paritoseṭṭiyeva**. Assāti samaṇassa gotamassa. **Sotabbaṃ maññantīti** aṭṭhakhaṇavajjitena navamena khaṇena labbhamānattā “yaṃ no sathā sāsati, taṃ mayam sossāmā”ti ādarabhāvajātā **mahanteneva ussāhena** sotabbaṃ sampaṭicchitabbaṃ maññati. **Kallacittā muducittāti** pasādābhivuddhiyā vigatupakkilesatāya kallacittā muducittā honti. **Muddhappasannāti** tucchappasannā niratthakappasannā. **Pasannākāro** nāma pasanhehi kātabbasakkāro, so duvidho dhammāmisapūjāvasena, tattha āmisapūjaṃ dassento “**paṇitānī**”tiādīmāha. Dhammapūjā pana pāliyaeva “tathattāya paṭipajjantī”ti iminā dassitā. **Tathābhāvāyāti** yathābhāvāya yassa vaṭṭadukkhaniṣṣaraṇassa atthāya dhammo desito, tathābhāvāya. Tadevatthaṃ dassetuṃ “**dhammānudhammapaṭipattipūraṇatthāyā**”ti vuttam. Dhammānudhammapaṭipatti hi vaṭṭadukkhaniṣṣaraṇapaṛiyosānā, sā ca dhammānudhammapaṭipatti yāya anupubbiyā paṭipajjitabbā, paṭipajjantānaṇca satī ajjhattikaṅgasamavāye ekamsikā tassā paṛipūrītī taṃ anupubbiṃ dassento “**keci saraṇesu**”tiādīmāha. Yathā pūrentā pūretuṃ sakkoti nāma, tathā pūraṇaṃ dassetuṃ “**sabbākārena pana pūrentī**”ti vuttam.

Imasmiṃ panokāseti “paṭipannā ca ārādhentī”ti sīhanādakiccapāripūriṭṭhapane pālipadese. **Samodhānetabbāti** saṅkalayitabbā. **Ekaccaṃ...pe... passāmīti bhagavato eko sīhanādo** asādhāraṇo aññehi appaṭivattīyo seṭṭhanādo abhītanādoti katvā. Esa nayo sesesupi. Aparam tapassinti adhikāro. **Purimānaṃ dasannanti** “ekaccaṃ tapassim niraye nibbattaṃ passāmī”ti vuttasīhanādato paṭṭhāya yāva “vimuttiyā mayhaṃ sadiso natthī”ti vuttasīhanādā purimakānaṃ dasannaṃ sīhanādānaṃ, niddhāraṇe cetam sāmivacanāṃ. Tenāha “**ekekassā**”ti. “**Paṛisāsu ca nadatī**”ti ādayo “paṭipannā ca maṃ ārādhentī”ti paṛiyosānā **dasa dasa** sīhanādā **parivārā**. “Ekaccaṃ tapassim niraye nibbattaṃ

passāmī”ti hi sīhanādaṃ nadanto bhagavā parisāsu nadati visārado hutvā nadati, tattha ca pañhaṃ pucchanti, pañhaṃ vissajjeti, vissajjanena parassa cittaṃ ārādheti, sutvā sotabbaṃ maññanti, sutvā ca bhagavato pasīdanti, pasannā ca pasannākāraṃ karonti, yaṃ paṭipattiṃ deseti, tathattāya paṭipajjanti, paṭipannā ca maṃ ārādhentīti evaṃ parivāretvā atthayojanā sambhavati. Ayameva nayo sesesupi navasu.

“**Eva**”ntiādinā yathāvuttānaṃ sīhanādānaṃ saṅkalayitvā dassanaṃ. **Te dasāti** “parisāsu ca nadatī”ti ādayo dasa sīhanādā. **Purimānaṃ dasannanti** yathāvuttānaṃ mūlabhūtānaṃ purimakānaṃ dasasīhanādānaṃ. **Parivāravasenāti** mūliṃ katvā paccekaṃ parivāravasena yojiyamānā **satam** sīhanādā. **Purimā ca dasāti** mūlamūliyo katvā parivāravasena ayojiyamānā purimakā ca dasāti evaṃ **dasādhikaṃ sīhanādasatam hoti. Aññasmim pana sutteti majjhimāgamacūlasīhanādasuttādīmhi** (ma. ni. 1.193) **tenāti** saṅkhyāmahattena. Mahāsīhanādattā **idaṃ suttaṃ “mahāsīhanāda”nti vuccati**, na pana **majjhimānikāye** mahāsīhanādasuttamiva cūlasīhanādasuttamupādāyāti adhippāyo.

Titthiyaparivāsakathāvaṇṇanā

404. Paṭisedhetvāti tathā bhāvābhāvadassanena paṭikkhipitvā. Yaṃ bhagavā pāthikavagge **udumbarikasutte** (dī. ni. 3.57) “idha nigrodha tapassī”tiādinā upakkilesavibhāgaṃ, pārisuddhivibhāgañca dassento sapaṭisassa nigrodhaparibbājakassa purato sīhanādaṃ nadati, taṃ dassetuṃ “**idānī**”tiādi vuttaṃ. **Naditapubbanti** udumbarikasutte āgatanayena pubbe nigrodhaparibbājakassa naditaṃ. **Tapabrahmacārīti** uttamatapacārī, tapena vā vīriyena brahmacārī. **Idanti** “rājagahe...pe... pañhaṃ apucchī”ti pāliyaṃ āgatavacanaṃ. Ācariyena (dī. ni. 1.403) pana yathāvuttaṃ aṭṭhakathāvacanameva paccāmaṭṭhaṃ. Ettha ca kāmaṃ yadā nigrodho pañhamapucchi, bhagavā cassa vissajjesi, na tadā bhagavā gijjhakūṭe pabbate viharati, rājagahasamīpeyeva udumbarikāya deviyā uyyāne viharati tattheva tathā pucchitattā, vissajjitattā ca, tathāpi gijjhakūṭe pabbate bhagavato vihāro na tāva vicchinno, tasmā pāliyaṃ “tatra ma”ntiādivacanaṃ, aṭṭhakathāyañca “tatra rājagahe gijjhakūṭe pabbate viharantaṃ ma”ntiādivacanaṃ vuttanti imamatthampi “**yaṃ taṃ bhagavā**”tiādinā viññāpetūti daṭṭhabbaṃ. “Gijjhakūṭe pabbate”ti idaṃ tattha katavihāraṃ sandhāya vuttanti dasseti “**gijjhakūṭe mahāvihāre**”ti iminā. **Udumbarikāyāti** tannāmikāya. **Uyyāneti** tattha kataparibbājakārāmaṃ sandhāya vadati. **Nigrodho** nāma channaparibbājako. **Sandhāno** nāma pañcaupāsakasataparivāro anāgāmiupāsako. **Kathāsallāpanti** “yagghe gahapati jāneyyāsi, kena samaṇo gotamo saddhiṃ sallapati”tiādinā (dī. ni. 3.53) sallāpakathaṃ. **Paranti** atisayatthe nipāto. **Viyāti** padapūraṇamatte yathā taṃ “ativiyā”ti. **Andhabālanti** paññācakkhunā andhaṃ bālaṇaṃ. **Yogeti** naye, dukkhanissaraṇupāyeyeti attho.

405. Anenāti bhagavatā. **Khandhake**ti **mahāvagge** pabbajjakhandhake (mahāva. 96) yaṃ parivāsaṃ parivasatīti yojanā. “Pubbe aññatitthiyo bhūtoti **aññatitthiyapubbo**”ti (sārattha. 1. 76) **ācariyasāriputtattherena** vuttaṃ. Paṭhamaṃ pabbajjaṃ gahetvāva parivasatīti āha “**sāmaṇerabhūmiyaṃ ̐hito**”ti. **Tanti** dvīhi ākārehi vuttaṃ parivāsaṃ. **Pabbajjanti** “ākaṅkhati pabbajjaṃ, ākaṅkhati upasampada”nti ettha vuttaṃ pabbajjaggahaṇaṃ. “Uttaridirattatirattaṃ sahaseyyaṃ kappeyyā”ti (pāci. 51) ettha dirattaggahaṇaṃ viya **vacanasiliṭṭhatāvaseneva vuttaṃ**. Yasmā pana sāmaṇerabhūmiyaṃ ̐hiteneva parivasitabbaṃ, na gihibhūtena, tasmā **aparivasitvāyeva pabbajjaṃ labhati**. **Na gāmappavesanādīnīti** ettha **ādisaddena** navesiyāvidhavāthullakumārīkapaṇḍakabhikkhunigocaratā, sabrahmacārīnaṃ kiṃ karaṇīyesu dakkhānalasādītā, uddesaparipucchādīsu tibbacchandatā, yassa titthāyatanato idhāgato, tassa avaṇṇabhaṇane attamanatā, buddhādīnaṃ avaṇṇabhaṇane anattamanatā, yassa titthāyatanato idhāgato, tassa vaṇṇabhaṇane anattamanatā, buddhādīnaṃ vaṇṇabhaṇane attamanatāti imesaṃ sattavattānaṃ saṅgaho veditabbo. **Pūrentena parivasitabbanti** yadā parivasati, tadā pūramānena parivasitabbaṃ. **Aṭṭhavattapūraṇenāti** yathāvuttānaṃ aṭṭhannaṃ vattānaṃ pūraṇena. **Etthāti** parivāse, upasampadāya vā. **Ghaṃsitvā koṭṭetvāti** ajjhāsaya vimāṃsanavasena suvaṇṇaṃ viya ghaṃsitvā koṭṭetvā. **Pabbajjāyāti** nidassanamattaṃ. Upasampadāpi hi tena saṅgayhati.

“**Gaṇamajjhe nisīditvā**ti upasampadākammassa gaṇappahonakānaṃ bhikkhūnaṃ majjhe saṅghatthero viya tassa anuggahatthaṃ nisīditvā”ti (dī. ni. ṭi. 1.405) ācariyena vuttaṃ, idāni pana bahūsipi potthakesu “**taṃ nisīdāpetvā**”ti kārivasena pāṭho dissati. Aciramupasampannaassa assāti **acirūpasampanno**, atthamattaṃ pana dassetuṃ “**upasampanno hutvā naciramevā**”ti āha. Kāyacittavivekāva idhādhippetā upadhivivekatthaṃ paṭipajjanādhikārattāti vuttaṃ “**kāyena ceva cittena cā**”ti. **Vūpakaṭṭhoti** vivitto. Tādisassa silavisodhane appamādo avuttasiddhoti kammaṭṭhāne appamādameva dasseti. **Pesitacittoti** nibbānaṃ pati pesitacitto, tanninno tappono tappabbhāroti vuttaṃ hoti, evaṃbhūto ca tathā anapekkhatāya vissajjitakāyo nāmāti adhippāyamāvīkātum “**vissaṭṭhaattabhāvo**”ti vuttaṃ. **Attāti** cettha cittaṃ vuccati rūpakāyassa avisayattā. **Yassāti** arahattaphalassa. Jātikulaputtāpi ācārasampannā eva arahattādhigamāya pabbajjāpekkhā hontīti tepi jātikulaputte teheva ācārakulaputtehi ekasaṅgahe karonto “**ācārakulaputtā**”ti āha. Iminā hi ācārasampannā jātikulaputtāpi saṅgahitā honti. Ācārasampannānevādhippetabhāvo ca “**sammadevā**”ti saddantarena viññāyati. “**Otiṇṇomhi jātiyā**”tiādinā nayena hi saṃvegapubbikaṃ yathānusiṭṭhaṃ pabbajjaṃ sandhāya “**sammadevā**”ti vuttaṃ. Tenāha “**hetunāva kāraṇenevā**”ti. Tatha **hetunāti** nayena upāyena. **Kāraṇenevāti** tabbivaraṇavacanaṃ. **Tanti** arahattaphalaṃ. Tadeva hi “**anuttaraṃ brahmacariyapariyosāna**”nti vattumarahati aññesaṃ tathā abhāvato. “**Yaṃtamsaddā niccasambandhā**”ti saddanayenapi tadatthaṃ dasseti “**tassa hī**”tiādinā. “**Yassatthāya...pe... pabbajjantī**”ti pubbe vuttassa **tassa** arahattaphalassa **atthāya kulaputtā pabbajanti**, tasmā arahattaphalamidhādhippetanti viññāyatīti adhippāyo. Natthi paro jano tathā sacchikaraṇe paccayo yassāti **aparappaccayo**, taṃ. Upa-saddo viya **saṃ**-saddopi dhātusaddānuvattakoti vuttaṃ “**pāpunitvā**”ti, patvā adhigantvāti attho. **Upa**-saddo vā dhātusaddānuvattako, **saṃ**-saddo pana dhātuvisesakoti āha “**sampādetvā**”ti, asekkhā silāsamādhipaññāyo nipphādetvā, paripūretvāvāti attho.

Niṭṭhāpetunti nigamanavasena pariyoṣāpetuṃ. “**Brahmacariyapariyosānaṃ...pe... vihāsī**”ti iminā eva hi arahattanikūṭena desanā pariyoṣāpitā, taṃ pana nigametum “**aññataro...pe... ahoṣī**”ti dhammasaṅgāhakehi **vuttaṃ**. Ekatova idha **aññataro**, na pana nāmagottādīhi apākaṭato. **Arahantānanti** ubbāhane cetam sāmivacanaṃ. Tathā ubbāhitattā ca tesamabbhantaroti attho āpannoti adhippāyaṃ dassento “**bhagavato**”tiādimāha. Keci pana evaṃ vadanti – **arahantānanti** cetam sambandheveva sāmivacanaṃ, ato cettha saha pāṭhasesena adhippāyamatthaṃ dassetuṃ “**bhagavato**”tiādi vuttanti. Yaṃ panettha atthato na vibhattaṃ, taṃ suviññeyyameva.

Iti sumaṅgalavilāsiniyā dīghanikāyaṭṭhakathāya paramasukhumagambhīraduranubodhatthaparidīpanāya suvimalavipulapaññāveyyattiyajananāya sādhuvilāsiniyā nāma līnatthappakāsaniyā mahāsīhanādasuttavaṇṇanāya līnatthapakāsanaṃ.

Mahāsīhanādasuttavaṇṇanā niṭṭhitā.

9. Poṭṭhapādasuttavaṇṇanā

Poṭṭhapādaparibbājakavatthuvaṇṇanā

406. Evaṃ mahāsīhanādasuttaṃ saṃvaṇṇetvā idāni poṭṭhapādasuttaṃ saṃvaṇṇento yathānupubbaṃ saṃvaṇṇanokāsassa pattabhāvaṃ vibhāvetuṃ, mahāsīhanādasuttassānantaraṃ saṅgītassa suttassa poṭṭhapādasuttabhāvaṃ vā pakāsetuṃ “**evaṃ me suttaṃ...pe... sāvatthiyanti poṭṭhapādasutta**”nti āha. “**Sāvatthiya**”nti idaṃ samīpatthe bhumanti dassetuṃ “**sāvatthiṃ upanissāyā**”ti vuttaṃ, cīvarādipaccayaṭṭhāyā upanissayaṃ katvāti attho. **Jeto** nāma rājakumāro, tena ropitattā saṃvaḍḍhitattā paripālittā jetassa vanaṃ upavananti atthamāha “**jetassa kumārassa vane**”ti. Sudatto nāma gahapati anāthānaṃ piṇḍassa dāyakattā **anāthapiṇḍiko**. Tena jetassa hatthato aṭṭhārasahiraññakoṭīsantharaṇena taṃ kiṇitvā aṭṭhārasahiraññakoṭītheva senāsanam kārāpetvā aṭṭhārasahiraññakoṭītheva vihāramahaṃ niṭṭhāpetvā evaṃ catupaññāsahiraññakoṭīpariccāgena so āraṃo

buddhappamukhassa bhikkhusaṅghassa niyyātito. Tenāha “**anāthapiṇḍikena gahapatinā ārāmo kārito**”ti. Puppaphalapallavādiguṇasampattiyā, pāṇino nivāsaphāsutādinā vā visesena pabbajitā tato tato āgamma ramanti anukkaṅḥhitā hutvā nivasanti etthāti **ārāmo**. Atha vā yathāvuttaguṇasampattiyā tatha tatha gatepi attano abbhantare ānetvā rameṭīti **ārāmo**.

Phoṭo yassa pādesu jātoti **poṭṭhapādo**. Phoṭo poṭṭhoti hi pariyāyo. Paribbājako duvidho channaparibbājako, acchannaparibbājako ca. Tatha acchannaparibbājakopi acelako ājīvako duvidho. Tesu acelako sabbena sabbam naggo, ājīvako pana upari ekameva vattham upakacchakantare pavesetvā pariharati, heṭṭhā naggo. Ayam pana duvidhopesa na hotīti vuttam “**channaparibbājako**”ti, vatthacchāyāchādanapabbajjūpagatattā channaparibbājakasaṅkhyam gatoti attho. **Brāhmaṇamahāsāloti** mahāvibhavatāya mahāsāratam patto brāhmaṇo. **Gaṇācariyoti** sāpekkhatāya samāso. **Samayanti** sāmāññaniddeso, ekasesaniddeso vā, tam tam samayanti attho. **Pavadantīti** pakārato vadanti, attanā attanā uggahitanīyāmena yathā tathā samayam vadantīti attho. **Tārukkhoti** tassa nāmam. **Pabhuṭi** saddena todeyyajāṇuṣoṇiṣoṇadaṇḍakūṭadantādike saṅgaṇhāti, **ādisaddena** pana channaparibbājakādike. **Tinduko** nāma kālakhandharukkho. **Cīranti** panti. Tindukā cīram ettha santīti **tindukacīro**. Tathā ekā sālā etthāti **ekasālako**. Bhūtapubbagatiyā tamattham vitthārato dassento “**yasmā**”tiādimāha. **Iti katvāti** iminā kāraṇena. “**Tasmi**”ntiādinā yathāpāṭham vibhatyantadassanam.

Anekākārānavasesasaṇeyyatthavibhāgato, aparāparuppattito ca bhagavato ñānam loke patthamiva hotīti vuttam “**sabbaññutaññanam pattharivā**”ti, yato tassa ñāñajālatā vuccati. Veneyyānam tadantogadhabhāvo heṭṭhā vuttova. Veneyyasattapariggaṇhanattham samannāhāre kate paṭhamam nesam veneyyabhāveneva upaṭṭhānam hoti, atha saraṇagamanādivasena kiccanipphatti vīmaṃsīyatīti āha “**kinnu kho bhavissatīti upaparikkhanto**”ti. **Nirodhanti** saññānirodham. **Nirodhā vuṭṭhānanti** tato nirodhato vuṭṭhānam saññupattim. **Sabbabuddhānam ñāṇena saṃsanditvāti** yathā te nirodham, nirodhato vuṭṭhānaṇca byākariṃsu, byākariṃsanti ca, tathā byākaraṇavasena saṃsanditvā. **Katipāhaccayenāti** dvīhatīhaccayena. Pāḷiyameva hi imamattham vakkhati. **Saraṇam gamissatīti** “saraṇa”miti gamissati. “**Hatthisāriputtoti** hatthisārino putto”ti (dī. ni. ṭī. 1.406) ācariyena vuttam. Adhunā pana “**citto hatthisāriputto**” tveva pāṭho dissati, citto nāma hatthācariyassa puttoti attho.

Surattadupaṭṭanti rajanena sammā rattam diguṇam antaravāsakam parivattanavasena **nivāsetvā**. “**Yugandharapabbatam parikkhipivā**”ti idam parikappavacanam “tādiso atthi ce, tam viyā”ti. **Meghavaṇṇanti** rattameghavaṇṇam, sañjhāpabhānurañjītameghasaṅkāsaṅgati attho. Paṭhamena cettha saṅghānasampattim dasseti, dutiyena vaṇṇasampattim. **Ekamsavaragatanti** vāmaṃsavarappavattam. Tathā hi **suttanipātaṭṭhakathāyam vaṅgīsasuttavaṇṇanāyam** vuttam “ekamsanti ca vāmaṃsam pārupitvā ṭhitassetam adhivacanam. Yato yathā vāmaṃsam pārupitvā ṭhitam hoti, tathā cīvaram katvāti evamassattho veditabbo”ti [su. ni. aṭṭha. nigrodhakappasutta (vaṅgīsasutta) vaṇṇanā] tatha **etanti** “ekamsam cīvaram katvā”ti vacanam. **Yatoti** yathāvuttavacanassa pārupitvā ṭhitasseva adhivacanattā evamassa attho veditabboti sambandho. **Paccagghanti** ekam katvā anadhiṭṭhitakāle pāṭekkam mahaggham, **paccaggham** vā abhinavam, abbhunḥe taṅkhaṇe nibbantanti attho. Purimañcettha atthavikappam keci na icchati. Tathā hi ācariyeneva **udānaṭṭhakathāyam** vuttam “paccaggheti abhinave, paccekam mahagghatāya paccaggheti keci, tam na sundaram. Na hi buddhā bhagavanto mahaggham paṭiggaṇhanti, paribhuñjanti cā”ti, idhāpi tena pacchimoyeva atthavikappo gahito. Abhinavatāya “paccaggha”nti ca idam ādito tathā laddhavohārena, anaññaparibhogatāya ca vuttam, tathā vā satthu adhiṭṭhānena tam pattam sabbakālam “paccaggha”ntveva vuccati. **Selamayapattanti** muggavaṇṇasilāmayam catumahārājadattiyam pattam. Ayameva hi bhagavatā niccaparibhutto patto **samacittasuttavaṇṇanādisupī** (a. ni. aṭṭha. 2.2.37) tathā vuttattā.

407. Attano rucivasena ajjhāsaya vasena, na parehi ussāhitoti adhippāyo. “**Atippagabhāvameva divvā**”ti ca idam bhūtakathanam na tāva bhikkhācāraṇavelā sampattāti dassanattham. Bhagavā hi tadā kālasseva vihārato nikkhanto “vāsanābhāgiyāya dhammadesanāya poṭṭhapādam anuggaṇhissāmī”ti. Pāḷiyam **atippago khoti** ettha “**pago**”ti idam **kaccāyanamatena** pa-iccupasaggato o-kāraga-

kārāgamane siddham. Pa-saddoyeva pātoattham vadati. Aññesaṃ pana saddavidūnaṃ matena pātopadamiva nepātikam. Teneva tattha tattha **aṭṭhakathāsu** (dī. ni. aṭṭha. 3.1) vuttam “atippago khoti ativiya pāto”ti. Apica paṭhamam gacchati divasabhāvena pavattatīti **pagoti** nibbacaṇam iminā dassitam. Duvidho khalusaddo viya hi pagoti saddo nāmanipātopasaggavasena tividho. Evañhi idha “atippagabhāvameva disvā”ti vacanam upapannam hoti.

Yaṃnūnāti esa nipāto aññattha saṃsayaparidīpano, idha pana saṃsayapatirūpakaparidīpanova. Kasmā “saṃsayaparidīpane”ti vuttam, nanu buddhānaṃ saṃsayo natthīti āha “**buddhānañcā**”tiādi. **Saṃsayo nāma natthi** bodhimūle eva tassa samugghāṭitattā. **Parivittakapubbabhāgoti** adhippetakiccassa pubbhāge pavattaparivittakko. **Esāti** “karissāma, na karissāmā”tiādiko esa cittācāro **sabbabuddhānaṃ labbhati** sambhavati vicāraṇavaseneva pavattanato, na pana saṃsayavasena. **Tenāhāti** yenesa sabbabuddhānaṃ labbhati, tena bhagavā evamāhāti imameva pāḷim imassa atthassa sādham karoti. Ayam **aṭṭhakathāto** aparo nayo – **yaṃnūnāti** parikappane nipāto. “Upasaṅkameyya”nti kiriyāpadena vuccamānoyeva hi attho anena jotiyati. Tasmā aham yaṃnūna yadi pana upasaṅkameyyam sādhu vatāti yojanā. “Yadi panā”ti idampi tena samānatthanti vuttam “**yadi panāhanti attho**”ti.

408. Assāti paribbājakaparisāya. **Uddhamgamanavasenāti** unnatabahulatāya uggantvā uggantvā pavattanavasena. **Disāsu patthaṭṭavasenāti** vipulabhāvena bhūtaparamparāya sabbadisāsu pattharaṇavasena. Ettha ca pāḷiyam yathā unnatapāyo saddo unnādo, evam vipulabhāvena uparūpari pavattopi unnādoyevāti tadubhayam ekajjham katvā “**unnādinīyā**”ti vuttam, puna tadubhayameva vibhāgam katvā “**uccāsaddamahāsaddāyā**”ti. Ato pāḷinayānurūpameva attham vivaratīti datṭhabbam. Idāni paribbājakaparisāya uccāsaddamahāsaddatākāraṇam, tassa ca pavattiākāram dassento “**tesaṅhi**”tiādimāha. **Bālātapeti** abhinavuggatasūriyātape. **Kāmassādo** nāma kāmaguṇassādo. **Bhavassādo** nāma kāmarāgādisahagato bhavesu assādo.

Sūriyuggamane khajjopanamiva nippabhatam sandhāya vuttam “**khajjopanakūpamā jātā**”ti. **Lābhasakkāropi no parihīnoti** attho **bāverujātakena** (jā. 1.4.154) dīpetabbo. **Parisadosoti** parisāya pavattadoso.

409. Saṅghapesīti saññamanavasena sammadeva ṭhapesi. Saṅghapanañcetta tiracchānakathāya aññamaññasmim agāravassa cajāpanavasena ācārasikkhāpanam, yathāvuttadosassa nigūhanañca hotīti āha “**sikkhāpesi**”tiādi. Nanti parisam. **Appasaddanti** nissaddam uccāsaddamahāsaddābhāvam. “**Eko nisīdatī**”tiādi atthāpattidassanam. **Vuddhinti** lābhaguṇavuddhim. **Patthayamānoti** patthayanahetu. Mānante hi lakkhaṇe, hetumhi ca icchanti saddavidū. Idāni tamattham vitthāretum “**paribbājakā kirā**”tiādi āradham. **Aparaddhanti** aparajjhitaṃ. **Nappamajjantīti** pamādam na āpajjanti, na agāravam karontīti vuttam hoti.

410. No āgate ānandoti ambhākam bhagavati āgate ānando pīti hoti. “Cirassam kho bhante bhagavā imam pariyaṃmakāsī”ti vacanam pubbepi tattha āgatapubbattā vuttavacanamiva hotīti codanam samuṭṭhāpetvā pariharanto “**kasmā āhā**”tiādimāha. **Piyasamudācārāti** piyālāpā. **Tasmāti** tathā piyasamudācārassa pavattanato. Na kevalam ayameva, atha kho aññepi pabbajitā yebhuyyena bhagavato apacitīm karontevāti tadaññesampi bāhullakammena tadattham sādhetum “**bhagavantañhi**”tiādi vuttam. Tattha kāraṇamāha “**uccākulīnatāyā**”ti, mahāsammatarājato paṭṭhāya asambhinnakhattiyakulatāyāti attho. Tathā hi soṇadaṇḍena vuttam “samaṇo khalu bho gotamo uccākulā pabbajito asambhinnakhattiyakulā”ti, (dī. ni. 1.304) tena sāsane appasannānampi kulagāravena bhagavati apacitīm dasseti. **Etasmim antare kā nāma kathāti** yathāvuttaparicchedabbhantare kīdisā nāma kathā. **Vippakatāti** āradhā hutvā apariyosītā. “Kā kathā vippakatā”ti pana vadanto atthato tassā pariyoṣāpanam paṭijānāti nāma. Kā kathāti ca avisesacodanā, tasmā yassā tassā sabbassāpi kathāya pariyoṣāpanam paṭiññātam hoti, tañca paṭijānanam padesaññuno avisaṃyanti āha “**yāva...pe... sabbāññupavāraṇam pavāresi**”ti. **Esāti** paribbājakaparisāya kathitā rājakathādikā. **Nissārāti**

niratthakabhāvena sārarahitā.

Abhisāññānirodhakathāvaṇṇanā

411. “Tiṭṭhatesā”ti etassa āpannamattham dassento “**sace**”tiādīmāha. **Sukāraṇanti** sundaram atthāvaham hitāvaham kāraṇam. **Yatthāti** aññatarissam sālāyam. Nānātitthasaṅkhātāsu laddhīsu niyuttāti **nānātitthiyā**ṇiyasaddena. Nīkasaddena vā ka-kārassa ya-kāram katvā yathā “antiyo”ti. “Ayaṃ kiṃ vadati ayaṃ kiṃ vadatī”ti kutūhalam kolāhalamettha atthīti **kotūhalā**, sā eva sālā **kotūhalasālā**ti āha “**kotūhaluppattiṭṭhānato**”ti. **Upasaggamattam** dhātvatthānuvattanato. Saññāsīsēnāyam desanā, tasmā saññāsahagatā sabbepe dhammā gayhanti, tattha pana cittaṃ padhānanti vuttaṃ “**cittanirodhe**”ti. Pahānavasena pana accantanirodhassa tehi anadhippetattā, avisayattā ca “**khaṇikanirodhe**”ti āha. Kāmaṃ sopi tesam avisayova, atthato pana nirodhakathā vuccamānā tattheva tiṭṭhati, tasmā atthāpattimattam pati tathā vuttanti veditabbam. **Tassāti** abhisāññānirodhakathāya. “**Kittighoso**”ti ‘aho buddhānubhāvo, bhavantarapaṭicchannampi kāraṇam evam hatthāmalakam viya paccakkhato dasseti, sāvake ca edise samvarasamādāne patiṭṭhāpetī”ti thutighoso yāva bhavaggā **pattharatī**ti. Ācariyena vuttaṃ. Idāni pana “sakalajambudīpe bhagavato kathākittighoso pattharatī”ti pāṭho dissati. **Paṭibhāgakiriyanti** paḷāsavasena paṭibhāgabhūtam payogaṃ. **Bhavantarasamayanti** tatra tatra vuṭṭhānasamayam abhūtaparikappitam kiñci ussāriyavatthum attano समयam katvā kathenti. **Kiñcideva sikkhāpadanti** “ekamūlakena bhavitabbam, ettakam velam ekasmiṃyeva ṭhāne nisīditabba”nti evamādikam kiñcideva kāraṇam sikkhakoṭṭhāsam katvā **paññapenti**. **Nirodhakathanti** nirodhasamāpattikatham.

Tesūti kotūhalasālāyam sannipatitesu nānātitthiyasamaṇabrāhmaṇesu. **Ekacceti** eke. **Purimoti** “ahetū appaccayā purisassa saññā uppajjantipi nirujjhantipi”tiādīnā vuttavādī. **Etthāti** catūsu vādīsu. Yvāyam idha uppajjatīti sambandho. **Samāpattinti** asaññībhavāvaham vāyokasiṇaparikkammaṃ, ākāsakasiṇaparikkammaṃ vā rūpāvacaracattutthajjhānasamāpattim, pañcamajjhānasamāpattim vā. **Nirodheti** heṭṭhā vuttanayena saññānirodhe. **Hetum apassantoti** yena hetunā asaññībhavē saññāya nirodho sabbaso anuppādo, yena ca tato cutassa idha pañcavokārabhave saññāya uppādo, tadubhayampi hetum avisayatāya apassanto.

Dutiyoti “saññā hi bho purisassa attā”tiādīnā vuttavādī. **Nanti** paṭhamavādīm. **Nisedhetvāti** “na kho pana metam bho evam bhavissatī”ti evam paṭikkhipitvā. **Migasiṅgātāpasassāti** evamnamakatāpasassa. Tassa kira matthake migasiṅgākārena dve cūḷā utṭhahimsu, “isisiṅgo”tipi tassa nāmaṃ. **Asaññakabhāvanti** muñchāpattiyā kiriyāmayasaññāvasena vigatasaññībhāvaṃ. Vakkhati hi “visaññī hutvā”ti. Cattālīsanipāte āgatanayena **migasiṅgātāpasavatthum** saṅkhepato dassetum “**migasiṅgātāpaso kirā**”tiādi vuttaṃ. Vikkhambhanavasena kilesānam santāpanato **attantapo**. Dukkaratapatāya **ghoratapo** tibbatapo. Nibbisevanabhāvāpādanena sabbaso milāpitacakkhādittikkhindriyatāya **paramadhitindriyo**. **Sakkavimānanti** paṇḍukambalasilāsanam sandhāyāha. Tañhi tathārūpapaccayā kadāci uṇham, kadāci thaddham, kadāci calitam hoti. “**Sakka... pe... pattheti**”ti ayoniso cintetvā **pesesi**. **Bhaggoti** bhaññitakusalajjhāsayo, adhunā pana “laggo”ti pāṭham likhanti. **Tena dibbaphassenāti** hatthaggahaṇamattadibbaphassena. **Tanti** tathā saññāpaṭilābham. **Evamāhāti** evam “saññā hi bho purisassa attā”tiādīnā ākārena saññānirodhamāha. Imināva nayena ito paresupi dvīsu ṭhānesu pāḷimāharitvā yojanā veditabbā.

Tatīyoti “santi hi bho samaṇabrāhmaṇā”tiādīnā vuttavādī. **Āthabbaṇapayoganti** āthabbaṇavedavīhitam āthabbaṇikānam visaññībhāvāpādanappayogaṃ. **Upakaḍḍhanam** āharaṇam. **Apakaḍḍhanam** apaharaṇam. **Āthabbaṇam payojetvāti** āthabbaṇavede āgataṃ aggijuhanapubbakam mantapadam payojetvā sīsacchinnatādīdassanena saññānirodhamāha. **Tassāti** yassa sīsacchinnatādi dassitam, tassa.

Catutthoti “santi hi bho devatā mahiddhikā”tiādīnā vuttavādī. **Yakkhadāsīnanti** devadāsīnam, yā

“yogavatiyo” tipi vuccanti, yoginiyotipi pākaṭā. **Madaniddanti** surāmadanimittakaṃ supanaṃ. **Devatūpahāranti** naccanagāyanādinā devatānaṃ pūjaṃ. **Surāpātinti** pātipuṇṇaṃ suraṃ. **Divāti** atidivā, ussūreti attho. **Tanti** tathā supitvā vuṭṭhahanaṃ. **Suttakāle** devatānaṃ saññāpakadḍhanavasena **nirodhaṃ samāpannā, pabuddhakāle** saññāpakadḍhanavasena **nirodhā vuṭṭhitāti maññamānoti** adhippāyo.

Ēlamūgakathā viyāti imesaṃ paṇḍitamānīnaṃ kathā andhabālakathāsadisī. **Cattāro nirodheti** aññamaññavidhure cattāropi nirodhe. **Ekena bhavitabbanti** ekasabhāveneva bhavitabbaṃ. **Na bahunāti** na ca aññamaññaviruddhena bahavidhena nānāsabhāvena bhavitabbaṃ. **Tenāpi ekenāti** ekasabhāvabhūtena tenāpi nirodhena. **Aññenevāti** tehi vuttākārato aññākārenea **bhavitabbaṃ**. Soti ekasabhāvabhūto nirodho. **Aññatra sabbaññunāti** sabbaññubuddhaṃ ṭhapetvā. **Idhāti** kotūhalasālāyaṃ. **Ayaṃ nirodho ayaṃ nirodhoti** dvikkhattuṃ byāpanicchāvacaṇaṃ satthā attano desanāvīlāsena anekākāravokāraṃ nirodhaṃ vibhāvesatīti dassanattaṃ kataṃ. **Aho nūnāti** ettha **ahoti** acchariye nipāto, **nūnāti** anussaraṇe. Tasmā **aho nūna bhagavāti** anaññasādhāraṇadesanattā bhagavā nirodhampi aho acchariyaṃ katvā ārādheyya maññeti adhippāyo. **Aho nūna sugatoti** etthāpi eseva nayo. Acchariyavibhāvanato eva cettha dvikkhattuṃ āmedītavacaṇaṃ. Acchariyatthopi hesa **ahosaddo** anussaraṇamukheneva poṭṭhapādena gahito. Tasmā vuttaṃ “**anussaraṇatthe nipātadvaya**”nti. **Tenāti** anussaraṇatthamukhena pavattanato. “Aho...pe... sugato”ti vacanena etadahosīti yojanā. “Yaṃtaṃsaddā niccasambandhā”ti sādhippāyaṃ yojanaṃ dassetuṃ “**yo etesa**”ntiādimāha. Kālaḍesapuggalādivibhāgena bahubhedattā **imesaṃ nirodhadhammānanti** bahutte sāmivacaṇaṃ, kusalasaddayoge cetāṃ bhummatthe daṭṭhabbaṃ. **Kusalo nipuṇo chekoṭi** pariyaṇavacaṇametāṃ. **Aho nūna katheyyāti** acchariyaṃ katvā katheyya maññe. So sugatoti sambandho. **Ciṇṇavasitāyāti** nirodhasamāpattiyaṃ ciṇṇavasibhāvattā. **Sabhāvaṃ jānāti** nirodhasabhāvaṃ yāthāvato jānāti.

Ahetukasaññūppādanirodhakathāvaṇṇanā

412. Gharamajjheyeva pakkhalitāti yathā gharato bahi gantukāmā purisā maggaṃ anotaritvā gharavivare samatale vivaṭaṅgaṇe eva pakkhalanaṃ pattā, evaṃsampadamidanti attho. Asādhāraṇo **hetu**, sādāraṇo **paccayoti** evamādivibhāgo aññatra vutto, idha pana tena vibhāgena payojanaṃ natthi saññāya akāraṇabhāvapaṭikkheparattā codanāyāti vuttaṃ “**kāraṇasseva nāma**”nti. Yaṃ pana pāliyaṃ vuttaṃ “sahetū hi poṭṭhapāda sappaccayā purisassa saññā uppajjantipi nirujjhantipi”ti, tattha sahetū sappaccayā uppajjanti, uppannā pana nirujjhantiyeva, na tiṭṭhantīti dassanattaṃ “nirujjhantipi”ti vacanaṃ, na tu nirodhassa sahetusapaccayatādassanattaṃ. Uppādoyeva hi sahetuko, na nirodho. Yadi hi nirodhopi sahetuko siyā, tassapi puna nirodhena bhavitabbaṃ ankurādīnaṃ puna ankurādīnā viya, na ca tassa puna nirodho atthi, tasmā vuttanayeneva pāliya attho vedītabbo. Ayañca nayo khaṇanirodhavasena vutto. Yo pana yathāparicchinnaḍavasena sabbaso anuppādanirodho, so “sahetuko”ti vedītabbo tathārūpāya paṭipattiyā vinā abhāvato. Tenāha bhagavā “sikkhā ekā saññā uppajjati, sikkhā ekā saññā nirujjhatī”ti (dī. ni. 1.412) tato eva ca **aṭṭhakathāyampi** (dī. ni. aṭṭha. 1.413) vuttaṃ “saññāya sahetukaṃ uppādanirodhaṃ dīpetu”nti. Etañhi pālivacaṇaṃ, aṭṭhakathāvacaṇaṃ anuppādanirodhaṃ sandhāya vuttanti daṭṭhabbaṃ. **Sikkhāti** hetvatthe paccattavacaṇaṃ, ya-kāralopo vā “saṅkhyāpi tamhā vanapattā pakkamītabba”ntiādisu (ma. ni. 1.192) viya. Hetubhāvo cassā upari āvi bhavissati. **Ekasaddo** ca aññāpariyāyo, na saṅkhyāvācī “ittheke sato sattassā”tiādisu (dī. ni. 1.85-91, 94-98; ma. ni. 3.21) viyāti āha “**sikkhāya ekaccā saññā jāyantī**”ti. Sesapadesupi eseva nayo.

413. Vitthāretukamyatāti vitthāretukāmatāya. **Pucchāvasenāti** kathetukamyatāpucchāvasena, **vitthāretukamyatāpucchāvasenāti** vā samāso. “Poṭṭhapādassevāyaṃ pucchā”ti āsaṅkāya “bhagavā avocā”ti pāliyaṃ vuttaṃ. Saññāya...pe... dīpetuṃ tā dassentoti yojetabbaṃ. **Tatthāti** tassaṃ upari vakkhamānāya desanāya. **Tatīyāti** adhipaññāsikkhā āgatāti sambandho. “**Ayaṃ...pe... desitoti ettha sammādiṭṭhisammāsaṅkappavasena āgatā**. Kasmāti ce? **Pariyāpannattā**, sabhāvato, upakārato ca yathārahaṃ paññākkhandhe avarodhattā saṅgahitattāti adhippāyo. Tathā hi **cūḷavedallasutte** vuttaṃ “yā cāvuso visākha sammādiṭṭhi, yo ca sammāsaṅkappo, ime dhammā paññākkhandhe saṅgahitā”ti (ma. ni.

1.462) kāmañcetta vuttanayena tissopi sikkhā āgatā, tathāpi adhicittasikkhāya eva abhisaññānirodho dassito. Itarā pana tassā sambhārabhāvena ānītāti ayamatto pālīvasena veditabbo.

Pañcakāmaguṇikarāgoti pañca kāmakoṭṭhāse ārabba uppajjanakarāgo.

Asamuppannakāmacāroti vattamānuppannatāvasena nasamuppanno yo koci kāmacāro, yā kāci lobhuppatti. Adhunā pana “asamuppannakāmarāgo”ti pāṭho, so ayuttova atthato viruddhattā. Kāmarāgo cettha visayavasena niyमितattā kāmaguṇārammaṇova lobho daṭṭhabbo, kāmacāro pana jhānanikantibhavarāgādippabhedo sabbopi lobhacāro. Kāmanatṭhena, kāmesu pavattanatṭhena ca **kāmacāro**. Sabbepi hi tebhūmakadhammā kāmanīyatṭhena kāmā. Yasmā ubhayesampi saharāṇāyena kāmasaññābhāvo hoti, tasmā “kāmasaññā”ti paduddhāraṃ katvā tadubhayameva niddiṭṭhanti veditabbaṃ. “**Tatthā**”tiādi asamuppannakāmacārato pañcakāmaguṇikarāgassa visesadassanaṃ, asamuppannakāmacārasseva vā idhādhippetabhāvadassanaṃ. Kāmaṃ pañcakāmaguṇikarāgopi asamuppanno eva anāgāmimaggena samugghāṭiyati, tasmīṃ pana samugghāṭitepi na sabbo rāgo samugghāṭaṃ gacchati tassa aggamaggena samugghāṭitattā. Tasmā pañcakāmaguṇikarāgaggahaṇena itarassa sabbassa gahaṇaṃ na hotīti ubhayatṭhasādhāraṇena pariyāyena ubhayameva saṅgahetvā pālīyaṃ kāmasaññāggahaṇaṃ kataṃ, ato tadubhayaṃ sarūpato, visesato ca dassetvā sabbasaṅgāhikabhāvato “**asamuppannakāmacāro pana imasmīṃ ṭhāne vaṭṭati**”ti vuttaṃ. **Tasmāti** asamuppannakāmacārasseva idha vaṭṭanato ayamatto veditabboti yojanā. **Tassāti** paṭhamajjhānasamaṅgino puggalassa. **Sadisattāti** kāmasaññādhāraṇena samānattā, etena pālīyaṃ “purimā”ti idaṃ sadisakappanāvasena vuttanti dasseti. Anāgatā hi idha “nirujjhatī”ti vuttā anuppādassa adhippetattā. Tasmā anāgatameva dassetum “**anuppannāva nuppajjati**”ti vuttaṃ.

Vivekajapītisukhasaṅkhātāti vivekajapītisukhehi saha akkhātā, na vivekajapītisukhānīti akkhātā. Taṃsampayuttā hi saññāyeva idhādhippetā, na vivekajapītisukhāni. Atha vā vivekajapītisukhakoṭṭhāsikāti attho. **Saṅkhātāsaddo** hettha koṭṭhāsatto “adinnaṃ theyyasāṅkhātāṃ ādiyeyyā”tiādīsu (pārā. 89, 91) viya. Kāmacchandādiolārikaṅgappahānavasena nānatṭhasaññāpaṭiṅghasaññāhi nipuṇatāya **sukhumā**. Bhūtātāya **saccā**. Tadevatthaṃ dasseti “**bhūtā**”ti iminā. Sukhumabhāvena, paramatṭhabhāvena ca aviparītasabhāvāti attho. Evaṃ byāsavasena yathāpāṭhamatthaṃ dassetvā samāsavasena yathāpāṭhameva dassento “**atha vā**”tiādīmāha. Samāsabyāsavasena hi dvidhā pāṭho dissati. “**Kāmacchandādiolārikaṅgappahānavasena**”ti iminā sampayuttadhammānaṃ bhāvanānubhāvasiddhā, saññāya saṅhasukhumatā nīvaraṇavikkhambhanavasena viññāyatīti dasseti. **Bhūtātāyāti** sukhumabhāvena, paramatṭhabhāvena ca aviparītatāya, vijjānātāya vā. **Vivekajehīti** nīvaraṇavivekato jātehi. Idāni jhānasamaṅgīvasena vuttassa dutiyapadassa atthaṃ dassetum “**sā assā**”tiādi vuttaṃ. **Sabbatthāti** sabbavāresu.

Samāpajjanādhiṭṭhānaṃ viya vuṭṭhānampijhāne pariyāpannaṃ hoti yathā taṃ dhammānaṃ bhaṅgakkhaṇo dhammesu, āvajjanapaccavekkhaṇāni pana na jhānapariyāpannāni, tasmā jhānapariyāpannameva vasīkaraṇaṃ gahetvā “**samāpajjanto, adhiṭṭhanto, vuṭṭhanto ca sikkhati**”ti vuttaṃ. **Tanti** paṭhamajjhānaṃ. **Tena...pe... jhānenāti** idampi “sikkhā”ti etassa saṃvaṇṇanāpadaṃ. **Tenāti** ca hetumhi karaṇavacanaṃ, paṭhamajjhānena hetunāti attho. Hetubhāvo cettha jhānassa vivekajapītisukhasukhumasaccasaññāya uppattiyā sahaṅgātipaccayabhāvo. Kāmasaññāya pana nirodhassa upanissayapaccayabhāvova. So ca kho suttantapariyāyena. Tathā ceva heṭṭhā saṃvaṇṇitaṃ “tathārūpāya paṭipattiyā vinā abhāvato”ti **etenupāyenāti** yvāyaṃ paṭhamajjhānatappaṭipakkhasaññāvasena “sikkhā ekā saññā uppajjati, sikkhā ekā saññā nirujjhatī”ti ettha nayo vutto, etena nayena. **Sabbatthāti** sabbavāresu.

414. Idāni ākiñcaññāyatanaparamāya eva saññāya dassane kāraṇaṃ vibhāvento “**yasmā panā**”tiādīmāha. Yasmā idaṅca...pe... uddhaṭanti sambandho. Kesam panidaṃ aṅgato sammasananti vuttaṃ “**aṭṭhasamāpattiyā**”tiādi. **Aṅgoti** jhānaṅgato. Idañhi anupadadhammavipassanāya lakkhaṇavacanaṃ. Anupadadhammavipassanañhi karonto samāpattim patvā aṅgotova sammasaṇaṃ karoti, na ca saññā samāpattiyā kiñci aṅgaṃ hoti. Atha ca panetaṃ vuttaṃ “**idaṅca saññā saññāti**

evaṃ aṅgato sammasaṇaṃ uddhaṭṭa’nti, tasmā lakkhaṇavacanametam. **Aṅgototi** vā avayavatoti attho, anupadadhammatoti vuttam hoti. **Kalāpatoti** samūhato. Yasmā panettha samāpattivaseṇa taṃtaṃsaññānaṃ uppādanirodhe vuccamāne aṅgavasena so vutto hoti, tasmā “idañcā”tiādinā aṅgotova sammasaṇaṃ dasseti veditabbaṃ. **Tasmāti** saññāvaseneva aṅgato sammasaṇassa uddhaṭṭatā. **Tadevāti** ākiñcaññāyatanameva, na nevasaññānāsaññāyatanam tattha paṭusaññābhāvato.

“Yo”ti vattabbe “yato”ti vuttanti āha “**yo nāmā**”ti yathā “ādīmhi”ti vattabbe “ādito”ti vuccati atthe pariggayhamāne yathāyuttavibhattiyāva to-saddassa labbhanato. **Nāma**-saddo cettha kho-saddo viya vācāsiliṭṭhatāmattam. Sassedanti **sakaṃ**, attanā adhigatajāhānaṃ, tasmim saññā **sakasaññā**, sā etassatthi **sakasaññīti** vuttam “**attano paṭhamajjhānasaññāya saññavā**”ti. Īkāro cettha upari vuccamānanirodhapādakatāya sātisayāya jhānasaññāya atthibhāvajotako daṭṭhabbo. Tenevāha “**anupubbena saññaggam phusati**”tiādi. Tasmā tattha tattha sakasaññitaggahaṇena tasmim tasmim jāhāne sabbaso suciṇṇavasābhāvo dīpitoti veditabbaṃ.

Lokiyānanti niddhāraṇe sāmivacanam, sāmīatthe eva vā. Yadaggena hi taṃ tesu seṭṭham, tadaggena tesampi seṭṭhanti. Vibhattāvadhiatthe vā sāmivacanam. Ettha pana “lokiyāna”nti visesaṇam lokuttarasamāpattīhi tassa aseṭṭhabhāvato kataṃ. Sesam “**kiccakāraṇasamāpattīna**”nti pana visesaṇam akiccakāraṇasamāpattito tassa aseṭṭhabhāvato daṭṭhabbaṃ. Akiccakāratā cassā “yatheva hi tattha saññā, evam phassādayopi”ti, “yadaggena hi tattha dhammā saṅkhārāvasesabhāvappattiyā pakativipassakānaṃ sammāsituṃ asakkuṇeyyarūpena ṭhitā, tadaggena heṭṭhimasamāpattidhammā viya paṭukiccakaraṇasamatthāpi na honti”ti ca **aṭṭhakathāsu** (visuddhi. 1.287) paṭusaññākiccābhāvavacanato viññāyati. Svāyamatto **paramatthamañjūsāya** nāma **visuddhimaggaṭikāya** āruppakathāyaṃ (visuddhi. ṭi. 1.286) ācariyena savisesam vutto, tasmā tattha vuttanayeneva veditabbo. Keci pana “yathā heṭṭhimā heṭṭhimā samāpattiyō uparimānaṃ uparimānaṃ samāpattīnaṃ adhiṭṭhānakiccaṃ sādheti, na evam nevasaññānāsaññāyatanasamāpatti kassacipi adhiṭṭhānaṃ sādheti, tasmā sā akiccakārikā itarā kiccakārikā”ti vadanti, tadayuttam tassāpi vipassanācittaparidamanādīnaṃ adhiṭṭhānakiccāsādhanaṃ, tasmā purimoyeva attho yutto. Kasmā cetam tesamagganti āha “**ākiñcaññāyatanasamāpattiya**”ntiādi. “Iti”ti vatvā “**lokiyānaṃ...pe... aggattā**”ti tassattho vutto, “aggattā”ti ettha vā nidassanametaṃ.

Pakappetiti saṃvidahati. Jhānaṃ samāpajjanto hi jhānasukhaṃ attani saṃvidahati nāma. **Abhisāṅkharotīti** āyūhati sampiṇḍeti. Sampiṇḍanatto hi samudāyattho. Yasmā pana nikantivasena cetanākiccassa matthakappatti, tasmā phalūpacāreṇa kāraṇam dassento “**nikantiṃ...pe... nāmā**”ti vuttam. **Imā ākiñcaññāyatanasaññāti** idāni labbhamānā ākiñcaññāyatanasaññā. Taṃsamatikkameneva uparijhānatthāya cetanābhisāṅkharāṇasambhavato **nirujjheyum**. **Aññāti** ākiñcaññāyatanasaññāhi aññā. **Oḷārikāti** tato thūlataṛā. Kā pana tāti āha “**bhavaṅgasaññā**”ti. Ākiñcaññāyatanato vuṭṭhāya eva hi uparijhānatthāya cetanābhisāṅkharāṇāni bhaveyyum, evañca ākiñcaññāyatanasaññā nirujjheyum, vuṭṭhānañca bhavaṅgavasena hoti, tato parampi yāva uparijhānasamāpajjanaṃ, tāva antarantarā bhavaṅgasaññā uppajjeyum, tā ca ākiñcaññāyatanasaññāhi oḷārikāti adhippāyo.

Cetentovāti nevasaññānāsaññāyatanajjhānaṃ ekaṃ dve cittavārepi samāpajjanavasena pakappento eva. **Na ceteti**ti tathā heṭṭhimajhānesu viya vā pubbābhogābhāvato na pakappeti nāma. Pubbābhogavasena hi jhānaṃ pakappento idha “ceteti”ti vutto. **Abhisāṅkharontovāti** tattha appahīnanikantikāvasena āyūhanto eva. **Nābhisāṅkharotīti** tathā heṭṭhimajhānesu viya vā pubbābhogābhāvato nāyūhati nāma. “Ahametaṃ jhānaṃ nibbattemi upasampādemi samāpajjāmī”ti hi evam abhisāṅkharāṇam tattha sālāyasseva hoti, na anālayassa, tasmā ekadvicittakkhaṇikampi jhānaṃ pavattento tattha appahīnanikantikāyā “abhisāṅkharonto evā”ti vutto. Yasmā panassa tathā heṭṭhimajhānesu viya vā tattha pubbābhogo natthi, tasmā “na abhisāṅkharoti”ti vuttam. “**Imassa bhikkhuno**”tiādi vuttassevatthassa vivaraṇam. Tattha yasmā imassa...pe... atthi, tasmā “na ceteti, nābhisāṅkharoti”ti ca vuttanti adhippāyo. **Ābhogasamannāhāroti** ābhogasaṅkhāto, ābhogavasena vā cittassa ārammaṇābhimukhaṃ, ārammaṇassa vā cittābhimukhaṃ anvāhāro. “**Svāyamatto**”tiādinā tadevattham upamāya paṭipādeti. **Puttagharācikkhaṇenāti** puttagharassa ārocanaṇayena.

Gantvā ādāya āgatanti sambandho. **Pacchābhāgeti** āsanasālāya pacchimadisāyaṃ t̥hitassa pitugharassa pacchābhāge. **Tatoti** puttagarato. **Laddhagharamevāti** yatonena bhikkhā laddhā, tameva gharam puttagehameva. **Āsanasālā viya ākiñcaññāyatanasamāpatti** tato pitugharaputtagarat̥hāniyānaṃ nevasaññānāsaññāyatananirodhasamāpattīnaṃ upagantabbato. **Pitugehaṃ viya nevasaññānāsaññāyatanasamāpatti** amanasikātabbato, majjhe t̥hitattā ca. **Puttagehaṃ viya nirodhasamāpatti** manasikātabbato, pariyaṅte t̥hitattā ca. **Pitugharam amanasikarivāti** pavisitvā samatikkantampi pitugharam amanasikarivā. Puttagarasseva ācikkhaṇaṃ viya ekaṃ dve cittavāre samāpajjitabbampi nevasaññānāsaññāyatanam amanasikarivā parato nirodhasamāpattat̥hāya eva manasikāro daṭṭhabbo. Evaṃ amanasikārasāmaññena, manasikārasāmaññena ca upamopameyyatā vuttā ācikkhaṇenapi manasikārasseva jotanato. Na hi manasikārena vinā ācikkhaṇaṃ sambhavati.

Tā jhānasaññāti ekaṃ dve cittavāre pavattā nevasaññānāsaññāyatanajhānasaññā. Nirodhasamāpattiyāñhi yathārahaṃ catutthārūppakusalakiriyajavanaṃ dvikkhattumeva javati, na taduttari. **Nirujjhantī** sarasavaseneva nirujjhanti, pubbābhisañkhārabalena pana upari anuppādo. Yathā ca jhānasaññānaṃ, evaṃ itarasaññānampī āha “**aññā cā**”tiādi. **Nuppajjanti** yathāparicchinakālanti adhippāyo. **So evaṃ paṭipanno bhikkhūti** yathāvutte saññagge t̥hitabhāvena paṭipanno bhikkhu, so ca kho anāgāmī vā arahā vā dvīhi phalehi samannāgamo, tiṇṇaṃ sañkhārānaṃ paṭippassaddhi, soḷasavidhā ñānacariyā, navavidhā samādhicariyāti imesaṃ vasena nirodhapaṭipādanapaṭipattiṃ paṭipannoti attho. Anupubbanirodhavasena cittacetāsikānaṃ appavattiyeva saññāvedanāsīsena “**saññāvedayitanirodha**”nti vuttā. **Phusatī** ettha **phusanaṃ** nāma vindanaṃ paṭiladdhīti dasseti “**vindati paṭilabhati**”ti iminā. Atthato pana vuttanayena yathāparicchinakālaṃ cittacetāsikānaṃ sabbaso appavattiyeva.

Niratthakatāya **upasaggamattaṃ**, tasmā saññā icceva attho. Nirodhapadena anantarikaṃ katvā samāpattipade vattabbe tesam dvinnamantare sampajānapadaṃ t̥hapitanti āha “**nirodhapadena antarikaṃ katvā vutta**”nti. Tena vuttaṃ “**anu...pe... attho**”ti, tena ayuttasamāsoyaṃ yathārutapāṭhoti dasseti. **Tatrāpīti** tasmim yathāpadamanupubbīṭhapanepi ayaṃ visesat̥hoti yojanā. **Sampajānantassāti** taṃ taṃ samāpattiṃ samāpajjitvā vuṭṭhāya tattha tattha sañkhārānaṃ sammasanavasena pajānantassa puggalassa. **Anteti** yathāvuttāya nirodhapaṭipādanapaṭipattiyā pariyoṣāne. Dutiyavikappe **sampajānantassāti** sampajānakārino, iminā nirodhasamāpattisamāpajjanakassa bhikkhuno ādito paṭṭhāya sabbapāṭihārikapaññāya saddhiṃ atthasādhikā paññā kiccatō dassitā hoti. Tenāha “**paṇḍitassa bhikkhuno**”ti. Vacanasesāpekkhā napekkhatā dvinnaṃ vikappānaṃ viseso.

Samvaṇṇanokāsānuppattito **nirodhasamāpattikathā kathetabbā. Sabbākārenāti** nirodhasamāpattiyā sarūpaviseso, samāpajjanako, samāpajjanaṭṭhānaṃ, samāpajjanakāraṇaṃ, samāpajjanākāroti evamādinā sabbappakārena. **Tatthāti** visuddhimagge (visuddhi. 1.307) **kathitativāti** kathitaṭṭhānato eva, tevīsatiaparicchedatoti attho, na idha taṃ vadāma punaruttibhāvato, ganthagarakabhāvato cāti adhippāyo.

Pāḷiyaṃ **evaṃ kho ahanti** ettha ākāratho **evaṃ**-saddo uggahitākāradassananti katvā. **Evaṃ pot̥thapādāti** ettha pana sampācchanattho tatheva anujānananti katvā. Tenāha “**suuggatitaṃ tayā’ti anujānanto**”ti.

415. Saññā aggā etthāti **saññaggaṃ**, ākiñcaññāyatanam. **Avasesasamāpattisupi saññaggaṃ atthīti** ettha pana saññaggabhāvo “**saññagga**”nti vutto, saññāyeva agganti tulyādhikaraṇasamāso vā. “**Puthū**”ti ayaṃ līngavipallāso, nikāralopo vāti vuttaṃ “**bahūnī**”ti. “**Yathā**”ti iminā karaṇappakārasaṅkhāto pakāraviseso gahito, na pakārasāmaññanti dasseti “**pathavīkasiṇādīsū**”tiādinā. “**Idaṃ vuttaṃ hotī**”tiādi tabbivaraṇam. Jhānānaṃ tāva yutto karaṇabhāvo saññānirodhaphusanassa sādhatamabhāvato, kasiṇānaṃ pana kathanti? Tesampi so yutto eva. Yadaggena hi jhānānaṃ

nirodhaphusanassa sādhakatamabhāvo, tadaggena kasiṇānampi tadavinābhāvato. Anekakaraṇāpi ca kiriyā hotiyeva yathā “aññena maggena yānena dīpikāya gacchatī”ti.

Ekavāranti sakim. **Purimasaññānirodhanti** kāmasaññānirodham, na pana nirodhasamāpattisaññītaṃ saññānirodham. **Ekaṃ saññagganti** ekaṃ saññābhūtaṃ aggaṃ, eko saññaggabhāvo vā heṭṭhimāya saññāya ukkaṭṭhabhāvato. Saññā ca sā aggañcāti hi **saññaggam**, na saññāsu agganti. Yathā pana saññā aggo etthāti **saññaggam**, ākiñcaññāyatanaṃ, evaṃ sesajhānampi. Yena ca nimittena jhānaṃ “saññagga”nti vuttaṃ, tadeva saññāsankhātaṃ nimittaṃ bhāvalopena, bhāvappadhānena vā idhāhippetam. **Dve vāreti** dvikkhattuṃ. **Satasahassam saññaggānīti** migapadavaḷaṅjananiddeso. **Sesakasiṇesūti** kasiṇānameva gahaṇaṃ nirodhakathāya adhikatattā, tato eva cettha jhānaggahaṇenapi kasiṇajjhānāni eva gahitānīti veditabbaṃ. Yathā “pathavīkasiṇena karaṇabhūtenā”ti tadārammaṇikaṃ jhānaṃ anāmasitvā vuttaṃ, evaṃ “**paṭhamajjhānena karaṇabhūtenā**”ti tadārammaṇaṃ anāmasitvā vadati. “**Iti**”tiādinā tadevatthaṃ saṅgahetvā nigamaṇaṃ karoti. **Sabbampīti** ekavāraṃ samāpannajjhānasaññānampi. **Saṅgahetvāti** sañjānanalakkhaṇena taṃsabhāvānavattanato saṅgahaṃ katvā, samāpajjanavasena, sañjānanalakkhaṇena ca ekatāti vuttaṃ hoti. **Aparāparanti** punappunaṃ. **Bahūni** saññaggāni honti.

416. Paṭhamanaye jhānapadaṭṭhānaṃ vipassanaṃ vaḍḍhentassa puggalassa vasena saññāñāṇāni dassitāni. Dutīyanaye pana yasmā vipassanaṃ ussukkāpetvā maggena ghaṭentassa maggañāṇaṃ uppajjati, tasmā vipassanāmaggavasena saññāñāṇāni dassitāni. Tatiyanaye ca yasmā paṭhamanayo oḷāriko, dutīyanayopi missakoṭi tadubhayaṃ asambhāvetvā accantasukhumagambhīraṃ nibbattitalokuttarameva dassetuṃ maggaphalavasena saññāñāṇāni dassitāni. Tayopete nayā maggasodhanavasena dassitā.

“Ayaṃ panettha sāro”ti vibhāvetuṃ tipīṭakamahāsivattheravādo ābhato. Tathā hi “arahattaphalasaññāya uppādā”tiādinā (dī. ni. aṭṭha. 1.416) theravādānukūlameva upari attho saṃvaṇṇitoti. **Ime bhikkhūti** purimavādino bhikkhū. Tadā **dīghanikāyatantiṃ** parivattante imaṃ ṭhānaṃ patvā yathāvuttapaṭipāṭiyā tayo naye kathente bhikkhū sandhāya evaṃ thero vadati. Nirodhaṃ pucchitvā tasmim kathite tadanantaraṃ saññāñāṇuppattiṃ pucchanto atthato nirodhā vuṭṭhānaṃ pucchati nāma. Nirodhato ca vuṭṭhānaṃ arahattaphaluppattiyā vā siyā, anāgāmiphalluppattiyā vā, tathā saññā padhānā, tadanantaraṃ paccavekkhaṇaṇānti tadubhayaṃ niddhārento thero “**poṭṭhapādo heṭṭhā**”tiādimāha. Tathā **bhagavāti** ālapanavacanāṃ.

Yathā maggavīthiyaṃ maggaphalañāṇesu uppannesu niyamato maggaphalapaccavekkhaṇaṇāṇāni honti, evaṃ phalasaṃpattivīthiyaṃ phalapaccavekkhaṇaṇāṇānti vuttaṃ “**pacchā paccavekkhaṇaṇā**”nti. “**Idaṃ arahattaphala**”nti paccavekkhaṇaṇāssa uppattiākāradassanaṃ. Ayameva paccayo **idappaccayo** ma-kārassa da-kāraṃ katvā. Da-kārenapi pakatipadamicchanti keci saddavidū. So pana theravāde na phalasaṃmādhisaññā evāti āha “**phalasaṃmādhisaññāpaccayā**”ti, arahattaphalasaṃmādhisaṃhagatasaññāpaccayāti attho. **Kirāti** anussaraṇatthe nipāto. Yathādhiḡatadhammānussaraṇapakkiyā hi paccavekkhaṇā. Saṃmādhisīsenā cettha sabbaṃ arahattaphalaṃ gahitaṃ saḡacaraṇāyena, tasmim asati paccavekkhaṇāya asambhavoti pāliyaṃ “idappaccayā”ti vuttaṃ. Evamidha dīghabhāṇakānaṃ matena phalapaccavekkhaṇāya ekantikāṭā dassitā. **Cūḷadukkhaḡhandhasuttaṭṭhakathāyaṃ** pana evaṃ vuttaṃ “sā pana na sabbesaṃ paripuṇṇā hoti. Eko hi pahīnakilesameva paccavekkhati, eko avasiṭṭhakilesameva, eko maggameva, eko phalameva, eko nibbānameva. Imāsu pana pañcasu paccavekkhaṇāsu ekaṃ vā dve vā no laddhuṃ na vaṭṭantī”ti (ma. ni. aṭṭha. 1.175), tadetaṃ **majjhimabhāṇakānaṃ** matena vuttaṃ. **Ābhidhammikā** pana vadanti –

“Maggam phalañca nibbānaṃ, paccavekkhati paṇḍito;
Hīne kilese sese ca, paccavekkhati vā na vā”ti. (abhidhammatthasaṅgahaṭṭhakathāyaṃ kammaṭṭhānasaṅgahavibhāge visuddhibhede);

Saññāattakathāvaṇṇanā

417. “**Gāmasūkarō**”ti iminā vanasūkaramapaneti. Evañhi upamāvacaṇaṃ sūpapannaṃ hotīti. Desanāya saṅghabhāvena sārāmbhamakkhaissādimalavisodhanato sutamayaññaṃ nhāpitaṃ viya, sukhumabhāvena anuvilittaṃ viya, tilakkhaṇabbhāhatatāya kuṇḍalādyālaṅkāravibhūsitāṃ viya ca hoti. Tadanupavisato ñāṇassa, tathābhāvā taṃsamaṅgino ca puggalassa tathābhāvāpatti, nirodhakathāya nivedanañcassa sirisayane pavesanasadisanti āha “**saṅhasukhuma...pe... ārāpitopī**”ti. **Tatthāti** tissaṃ nirodhakathāyaṃ. Mandabuddhitāya **sukhaṃ na vindanto** alabhanto, ajānanto vā. Malavidūsitatāya **gūthaṭṭhānasadisam**. **Attano laddhinti** attadiṭṭhiṃ. **Anumatim gahetvāti** anuññaṃ gahetvā “**edisō me attā**”ti anujānāpetvā, attano laddhiyaṃ paṭiṭṭhāpetvāti vuttaṃ hoti.

Pāliyaṃ **kaṃ panāti** oḷāriko, manomayo, arūpīti tiṇṇaṃ attavādānaṃ vasena tividhesu attānesu kataraṃ attānaṃ pacesīti attho. “**Desanāya sukusalo**”ti iminā “**avassaṃ me bhagavā laddhiṃ viddhamssesati**”ti tassa manasikāraṃ dasseti. **Pariharantoti** viddhamsanato apanento, arūpī attāti attano laddhiṃ nigūhantoti adhippāyo. Pāliyaṃ “**oḷārikaṃ kho**”tiādimhi paribbājakaṃ ayamaḍhippāyo – yasmā catusantatirūpappabandhaṃ ekattavasena gahetvā rūpībhāvato “**oḷāriko attā**”ti pacceṭi attavādī, annapānopaṭṭhānatañcassa parikappetvā “**sassato**”ti maññāti, rūpībhāvato eva ca saññāya aññattaṃ ñāyāgatameva, yaṃ vedavādino “**annamayo, pānamayo**”ti ca dvidhā voharanti, tasmā paribbājako taṃ attavādimaṭṭaṃ attānaṃ sandhāya “**oḷārikaṃ kho**”tiādimāhāti.

“**Oḷāriko ca hi te poṭṭhapāda attā abhavissā**”tiādimhi bhagavato vacane cāyamadhippāyo – yadī attā rūpī bhaveyya, evaṃ sati rūpaṃ attā siyā, na ca saññī saññāya arūpabhāvato, rūpadhammānañca asaññānanasabhāvattā. Rūpī ca samāno yadī tava matena nicco, saññā ca aparāparaṃ pavattanato tattha tattha bhijjati bhedasabbhāvato aniccā, evampi “**aññā saññā, añño attā**”ti saññāya abhāvato acetanova attā hoti, tasmā esa attā na kammaṃ kārako, na ca phalassa upabhuñjanakoti āpannamevāti imaṃ dosaṃ dassento bhagavā “**oḷāriko cā**”tiādimāhāti. **Tatthāti** “**rūpī attā**”ti vāde. **Paccāgacchatoti** sesakiriyaṃ kammāya kammattheyeva upayogavacaṇaṃ, **paccāgacchatoti** ca paccāgacchantassa, jānantassa, paṭicca vādena pavattassāti vā attho. “**Aññā ca saññā uppajjati, aññā ca saññā nirujjhanti**”ti kasmā vuttaṃ, nanu uppādapubbako nirodho, na ca uppannaṃ anirujjhanakaṃ nāma atthīti codanaṃ sodhetuṃ “**catunnaṃ khandhāna**”ntiādi vuttaṃ. Satipi nesaṃ ekāmbaṇavattukabhāve uppādanirodhādhikārattā ekuppādanirodhabhāvova vutto. **Aparāparanti** poñkhānupoñkha.

418-420. Pāliyaṃ **manomayanti** jhānāmanaso vasena manomayaṃ. Yo hi bāhirapaccayanirapekkho, so manasāva nibbattoti manomayo. Rūpaloke nibbattasarīraṃ sandhāya vadati. Yaṃ **vedavādino** “**ānandamayo, viññānamayo**”ti ca dvidhā voharanti. **Tatrāpīti** “**manomayo attā**”ti vādepi. **Dose dinneti** “**aññāva saññā bhavissati**”tiādinā dose dinne attano laddhiṃyeva vadanto “**arūpiṃ kho**”tiādimāhāti sambandho. Idhāpi purimavāde vuttanayena “**yadī attā manomayo sabbaṅgapaccāṅgī ahīndriyo bhaveyya, evaṃ sati rūpaṃ attā siyā, na ca saññī saññāya arūpabhāvato**”tiādi sabbaṃ dosadassanaṃ veditabbaṃ. Tamatthañhi dassento bhagavā “**manomayo ca hi te poṭṭhapāda**”tiādimavoca. Kasmā panāyaṃ paribbājako paṭhamaṃ oḷārikaṃ attānaṃ paṭijānitvā taṃ laddhiṃ vissajjetvā puna manomayaṃ attānaṃ paṭijānāti? Tampi vissajjitvā puna arūpiṃ attānaṃ paṭijānāti? Kāmañcetta kāraṇaṃ “**tato so arūpī attāti evamladdhiko samānopi...pe... ādimāhā**”ti heṭṭhā vuttameva, tathāpi ime titthiyā nāma anavaṭṭhitacittā thusarāsimhi nikhātakhāṇuko viya cañcalāti kāraṇantarampi dassetuṃ “**yathā nāmā**”tiādi vuttaṃ. **Saññā nappatiṭṭhāti** ārammaṇe saññānavasena saññā na paṭiṭṭhāti, ārammaṇe saññaṃ na karotīti vuttaṃ hoti. **Saññāpaṭiṭṭhānakāleti** etthāpi ayaṃ nayo.

Tatrāpīti “**arūpī attā**”ti vādepi. **Saññāyāti** pakatisaññāya, evaṃ **bhadantadhammapālattherena** (dī. ni. ṭī. 1.418-420) vuttaṃ. Aññasmim titthāyatane uppādanirodhanti hi sambandho. Tena **vedikānaṃ** matena nānakkhaṇe uppannāya nānārammaṇāya saññāya uppādanirodhamicchatīti dasseti. Keci pana “**ācariyasaññāyā**”ti paṭhanti, tadayuttaṃ atthassa viruddhattā, therena ca anuddhaṭṭā. Aparāparaṃ

pavattāya saññāya uppādavayadassanato **uppādanirodham icchati**. Tathāpi “saññā saññā”ti pavattasamaññaṃ “attā”ti gahetvā tassa avicchedaṃ parikkappento sassataṃ maññati. Tenāha “**attānaṃ pana sassataṃ maññati**”ti. **Tasmāti** aparāparaṃ pavattasaññāya nāmamattena sassataṃ maññanato. Saññāya uppādanirodhamatte aṭṭhatvā taduttari sassataggāhassa gahaṇato dosaṃ dasseti adhippāyo. **Tathevāti** yathā “rūpī attā, manomayo attā”ti ca vādadvaye attano asaññatā, evañcassa “acetanatā”tiādidosappasaṅgo dunnivāro, theveva imasmim vādepīti attho. **Micchādassanenāti** attadiṭṭhisankhātena micchābhinivesena. **Abhibhūtattāti** anādikālabhāvitabhāvena ajjhotthattā, nivāritāñānacārattāti vuttaṃ hoti. Yena santatighanena, samūhaghanena ca vañcito bālo pabandhavasena pavattamānaṃ dhammasamūhaṃ micchāgāhavasena “attā”ti ca “nicco”ti ca abhinivissa voharati, taṃ ekattasaññitaṃ santatighanaṃ, samūhaghanañca vinibhujja yāthāvato jānanaṃ ghanavinibbhogo, so ca sabbena sabbaṃ tiṭṭhiyānaṃ natthi. Tasmā ayampi paribbājako tādisassa ñāṇaparipākassa abhāvato vuccamānampi nānattaṃ nāññāsīti āha “**taṃ nānattaṃ ajānanto**”ti. Saññā nāmāyaṃ nānārammaṇā nānākkhaṇe uppajjati, veti cāti vedikānaṃ mataṃ. **Saññāya uppādanirodham passantopi saññāmayaṃ** saññābhūtaṃ **attānaṃ** parikkappetvā yathāvuttaghanavinibbhogābhāvato **niccomeva** katvā diṭṭhimaññānāya **maññati**. Tathābhūtassa ca tassa saṅhasukhumaparamagambhīradhammatā na ñāyatevāti idaṃ kāraṇaṃ passantena bhagavatā “**dujjānaṃ kho**”tiādi vuttanti dassento “**athassa bhagavā**”tiādimāha.

Diṭṭhiādīsu “evameta”nti dassanaṃ abhinivisaṇaṃ **diṭṭhi**. Tassā eva pubbabhāgabhūtaṃ “evameta”nti nijjhānavasena khamanaṃ **khanti**. Tathā rocaṇaṃ **ruci**. “**Aññathāyeva**”tiādi tesam diṭṭhiādīnaṃ vibhajja dassanaṃ. Tatha **aññathāyevāti** yathā ariyavinaye antadvayaṃ anupagamma majjhimaṇḍapaḍāvasena dassanaṃ hoti, tato aññathāyeva. **Aññadevāti** yaṃ paramatthato vijjati khandhāyatanādi, tassa cāpi aniccatādi, tato aññadeva paramatthato avijjamānaṃ attasassatādikaṃ tayā khamate ceva rucate cāti attho. Ābhuso yuñjanaṃ **āyogo**. Tena vuttaṃ “**yuttapayuttatā**”ti. **Paṭipattiyāti** paramattacintanādi paribbājakapaṭipattiyā. Ācariyassa bhāvo **ācariyakam**, yathā tathā ovādānusāsanaṃ, tadassatthīti **ācariyako** yathā “saddho”ti āha “**aññatthā**”tiādi. Aññasmim tiṭṭhāyatane tava ācariyabhāvo atthīti yojanā. “**Tenā**”tiādi saha yojanāya yathāvākyāṃ dassanaṃ. “Ayaṃ paramattho, ayaṃ sammuti”ti imassa vibhāgassa dubbibhāgattā **dujjānaṃ etaṃ** nānattaṃ. “Yajjetaṃ dujjānaṃ tāva tiṭṭhatu, aññaṃ panatthaṃ bhagavantaṃ pucchāmī”ti cintetvā tathā paṭipannataṃ dassetaṃ “**atha paribbājako**”tiādi vuttaṃ. **Añño vā saññātoti** saññāsabhāvato aññasabhāvo vā attā hotūti attho. Adhunā pana “**aññā vā saññā**”ti pāṭho dissati. **Assāti** attano.

Lokīyati dissati, paṭiṭṭhahati vā ettha puññapāpaṃ, tabbipāko cāti **loko**, attā. So hissa kārako, vedako cāti icchito. **Diṭṭhigatanti** “sassato attā ca loko cā”tiādi (dī. ni. 1.31; udā. 55) nayapavattaṃ diṭṭhigataṃ. Na hesa diṭṭhābhiniveso diṭṭhadhammikādiatthanissito tadasaṃvattanato. Yo hi taṃ saṃvattanako, so “taṃ nissito”ti vattabbaṃ labheyya yathā taṃ puññañāṇasambhāro. Eteneva nayena na dhammanissitatāpi saṃvaṇṇetabbā. Brahmācariyassa ādi **ādibrahmacariyaṃ**, tadeva **ādibrahmacariyakam** yathā “vinayo eva venayiko”ti (pārā. aṭṭha. 8). Tenāha “**sikkhattayasaṅkhātassā**”tiādi. Sabbampi vākyāṃ antogadhāvadhāraṇaṃ tassa avadhāraṇaphalattāti vuttaṃ “**ādimitta**”nti. Tadidha adhisīlasikkhāva. Sā hi sikkhattayasaṅgahite sāsana brahmācariye ādibhūtā, na aññattha viya ājīvaṭṭhamakādi ādibrahmacariyakanti dasseti “**adhisīlasikkhāmatta**”nti iminā. **Nibbindanattāyāti** ukkaṇṭhitabhāvāya. “**Abhijānanāyāti** ñātapariññāvasena abhijānanattāya. **Sambujjanattāyāti** tīraṇapahānapariññāvasena sambodhanattāyā”ti vadanti. Apica **abhijānanāyāti** abhiññāpaññāvasena jānanāya. Taṃ pana vaṭṭassa paccakkhakarāṇameva hotīti āha “**paccakkhākiriyāyā**”ti. **Sambujjanattāyāti** pariññābhisamayavasena paṭivedhattāya. Diṭṭhābhinivesassa saṃsāraṇaṃ nibbidāvirāganīrodhupasaṃsaṃvattanaṃ vaṭṭantogadhattā, tassa vaṭṭasambandhanato ca. Tathā abhiññāsambodhanibbānāsaṃvattanañca daṭṭhabbaṃ.

Kāmaṃ taṇhāpi dukkhasabhāvā eva, tassā pana samudayabhāvena visuṃ gahitattā “**taṇhaṃ ṭhapetvā**”ti vuttaṃ. **Pabhāvanatoti** uppādanato. Dukkhaṃ pabhāventīpi taṇhā avijjādīpaccayantarasaṅgahitā eva pabhāveti, na kevalāti āha “**sappaccayā**”ti. **Appavattīti**

appavattinimittam. Na pavattanti ettha dukkhasamudayā, etasmiṃ vā adhigateti hi **appavatti**. Dukkhanirodham nibbānaṃ gacchati, tadatthañca sā paṭipajjitabbāti **dukkhanirodhagāminipaṭipadā**. **Maggapātubhāvoti** maggasamuppādo. **Phalasadchikiriyāti** phalassādhigamavasena paccakkhakarāṇaṃ. **Taṃ ākāranti** taṃ tuṅhībhāvasaṅkhātaṃ gamanaliṅga **āroceto viya**, na pana abhimukhaṃ āroceti.

421. Samantato niggaṇhanavasena todanaṃ vijjhaṇaṃ **sannitodakaṃ**. Manogaṇādīnaṃ viśesanassa napuṃsakaliṅgena niddiṭṭhattā “**vācāya sannitodakenā**”ti vuttaṃ. Tenāha “**vacanapatodakenā**”ti. Atha vā “**vācāyā**”ti idaṃ “**sannitodakenā**”ti ettha karaṇavacanāṃ daṭṭhabbaṃ. “**Vacanapatodakenā**”ti hi vacanena patodakenāti attho, “**vācāyā**”ti vā sambandhe sāmivacanāṃ. Vācāya sannitodanākiriyāya sajjhabbharitamakaṃsūti yojetabbam. “**Sajjhabbharita**”nti etassa “**saṃ adhi abhi aribha**”nti padacchedo, samantato bhusaṃ aritanti attho, satamattehi tuttakehi viya vividhehi paribbājakavācātodanehi tudim sūti vuttaṃ hoti. Tathā hi vuttaṃ “**upari vijjhimsū**”ti. **Sabhāvato vijjamānanti** paramatthasabhāvato upalabbhamānaṃ, na pakatiādi viya anupalabbhamānaṃ. **Tacchanti** saccam. **Tathanti** aviparītaṃ. Atthato vevacanameva taṃ padattayaṃ. **Navalokuttaradhammesūti** visaye bhumbaṃ, te dhamme visayaṃ katvā. **Ṭhitasabhāvanti** avatṭhitasabhāvaṃ, taduppādakanti attho. **Lokuttaradhammaniyāmaniyatanti** lokuttaradhammasampāpananīyāmena niyataṃ. Idāni pana “**lokuttaradhammaniyāmata**”nti pāṭho, so na porāṇo ācariyena anuddhaṭṭā. Kasmā panesā paṭipadā dhammaṭṭhitatā dhammaniyāmatāti āha “**buddhānañhī**”tiādi. **Sāti** paṭipadā. **Edisāti** “**dhammaṭṭhitata**”ntiādinā vuttappakārā.

Cittahatthisāriputtapaṭṭhapādavatthuvaṇṇanā

422. Hatthiṃ sāreti dameṭīti **hatthisārī**, hatthācariyo. **Sukhumesu atthantaresūti** khandhāyatanādīsū sukhumañāṇagocaresū dhammesu. Abhidhammiko kiresa. **Kusaloti** pubbepi buddhasāsane kataparicayatāya cheko. **Tādise citteti** gihībāvacitte. Itaro pana taṃ sutvāva na vibbhāmi, **pabbajjāyameva abhiraṃti** adhippāyo. **Gihībāve ānisaṃsakathāya kathitattāti** ettha sīlavantassa bhikkhuno tathā kathanena vibbhamane niyojittatā idāni sayampi sīlavā eva hutvā cha vāre vibbhamīti adhippāyo gahetabbo. Kammasarikkhakena hi kammaphalena bhavitabbam. **Kathentānanti** anādare sāmivacanāṃ. **Mahāsāvaka** **kathiteti** mahāsāvaka bhūtena mahākoṭṭhikattherena apasādanavasena kathite, kathananimittam paṭiṭṭham laddhum asakkontoti attho. “**Vibbhamitvā gihī jāto**”ti idaṃ sattamavāramiva vuttaṃ. **Dhammapadaṭṭhakathāyaṃ** (dha. pa. aṭṭha. 1.3 cittahatthatheravatthu) pana **kudālapaṇḍitajātaka** (jā. aṭṭha. 1.1.7 kuddālaṇḍitakavaṇṇanā) ca chakkhattumeva vibbhamanavāro vutto. **Gihisahāyakoti** gihikāle sahāyako. **Apasakkantopi nāmāti** api nāma apasakkanto, gārayhavacanametam. **Pabbajitum vaṭṭatīti** pabbajjā vaṭṭati.

423. **Paññācakkhuno natthitāyāti** suvuttaduruttasamavisamadassanasamatthassa paññācakkhuno abhāvena. Yādisena cakkhunā so “**cakkhumā**”ti vutto, taṃ dassetuṃ “**subhāsītā**”tiādi vuttaṃ. Ayaṃ aṭṭhakathāto aparo nayo – **ekaṃsikāti** ekantikā, nibbānavahabhāvena nicchitāti vuttaṃ hoti. **Paññattāti** vavattthapitā. **Na ekaṃsikāti** na ekantikā nibbānavahabhāvena nicchitā vaṭṭantogadhabhāvato adhippāyo. Ayamatto hi “**kasmā cete paṭṭhapāda mayā ekaṃsikā dhammā desitā paññattā, ete paṭṭhapāda atthasamhitā...pe... nibbānāya samvattanti**”tiādisuttapadehi saṃsandati sametīti.

Ekaṃsivadhammavaṇṇanā

425. “**Kasmā ārabhī**”ti karaṇaṃ pucchitvā “**aniyyānikabhāvadassanattha**”nti payojanaṃ viśajjitaṃ. Phale hi siddhe hetupī siddho hotīti, ayaṃ ācariyamati (dī. ni. ṭī. 1.425) apare pana “**edisesu** atthasaddo karaṇe vattati, hetvatthe ca paccattavacanāṃ, tasmā **aniyyānikabhāvadassananti** ettha aniyyānikabhāvadassanakāraṇā”ti atthamicchanti. **Paññāpitaniṭṭhāyāti** paveditavimuttimaggassa. Vaṭṭadukkhapariyosānaṃ gacchati etāyāti **niṭṭhāti** hi vimutti vuttā “**gotṭhā paṭṭhitagāvo**”ti (ma. ni. 1.156) **mahāsīhanādasuttapade** viya ṭhā-saddassa gatiatthe pavattanato. Niṭṭhāmaggo ca idha

uttarapadalopena “niṭṭhā”ti adhippeto. Tasseva hi niyyānikatā, aniyyānikatā ca vuccati, na niṭṭhāya. Niyyātīti **niyyānikā** ya-kārassa ka-kāraṃ katvā. Anīyasaddo hi bahulaṃ kattutthābhīdhāyako, na niyyānikā **aniyyānikā**, tassā bhāvo tathā. **Niyyānaṃ** vā niggaṃanaṃ nissaraṇaṃ, vaṭṭadukkhassa vūpasamoti attho, niyyānameva **niyyānikaṃ**, na niyyānikaṃ **aniyyānikaṃ**, so eva bhāvo sabhāvo **aniyyānikabhāvo**, tassa dassanattanti yojettabbaṃ.

“**Sabbe hī**”tiādi tadatthavivaraṇaṃ. Amataṃ nibbānaṃ niṭṭhamiti paññapeti yathāti sambandho. **Lokathūpikādivasena niṭṭhaṃ paññapenti** “nibbānaṃ nibbāna”nti vacanasāmaññaṃmattaṃ gahetvā tathā paññapenti. **Lokathūpikā** nāma brahmabhūmi vuccati lokassa thūpikasadisatāparikkappanena. Keci pana “nevasaññānāsaññāyatanabhūmiṃ lokathūpikā”ti vadanti, tadayuttaṃ **aṭṭhakathāsu** tathā avacanato. **Ādisaddena** cettha “añña puriso, añña pakati”ti pakatipurisantarāvabodho mokkko, buddhiādiguṇavinimuttassa attano asakattani avaṭṭhānaṃ mokkko, kāyavipattikati jātibandhānaṃ apavajjanavasena appavatto mokkko, parena purisena palokatā mokkko, taṃsamīpatā mokkko, taṃsamāyogo mokkhoti evamādīnaṃ saṅgaho daṭṭhabbo. Tasmīṃ tasmīñhi samaye niṭṭhaṃ apaññapento nāma natthi. Brāhmaṇānaṃ paṭhamajjhānabrahmaloko niṭṭhā. Tattha hi nesam niccābhīniveso yathā taṃ bakassa brahmuno, (ma. ni. 1.501) vekhanasāditāpasānaṃ ābhassarā, sañcayādi paribbājakaṇaṃ subhakiṇhā, ājīvakaṇaṃ “anantamānaso”ti parikkappito asaññībhavo. Imasmīṃ pana sāsane arahattaṃ niṭṭhā, sabbepi cete diṭṭhivasena brahmalokādīni arahattamaññaṃnāya “nibbānaṃ nibbāna”nti vacanasāmaññaṃmattaṃ gahetvā tathā paññapenti, na pana paramatthato nesamāsamaye nibbānapaññaṃpanassa labbhanatoti āha “**sā ca na niyyānikā**”tiādi. **Yathāpaññattāti** yena yena pakārena paññattā, paññattappakārā hutvāti attho. **Na niyyātīti** “yenākārena niṭṭhā pāpuṇīyati”ti tehi paveditā, tenākārena tassā apattabbatāya na niyyāti. **Paṇḍitehi paṭikkhittāti** “nāyaṃ niṭṭhā paṭipadā vaṭṭassa anatikkamanato”ti buddhādīhi paṇḍitehi paṭikkhittā. **Nivattatīti** paṭikkhepakāraṇavacanāṃ, yasmā tehi paññattā niṭṭhā paṭipadā na niyyāti na gacchati, aññaattho taṃsamaṅgināṃ puggalaṃ saṃsāre eva paribbhamāpentī nivattati, tasmā paṇḍitehi paṭikkhittāti attho. **Tanti** aniyyānikabhāvaṃ.

Jānaṃ, passanti ca puthuvacanavipariyāyoti āha “**jānantā passantā**”ti. Gacchantādisaddānañhi “yā pana bhikkhunī jānaṃ sabhikkhukaṃ ārāmaṃ anāpucchā paviseyyā”tiādīsu (pāci. 1024) līngavasena vipariyāyo, jānantīti attho. “Yācaṃ adadamappiyo”tiādīsu (pārā. 346; jā. 1.7.55) vibhattivāsena, yācantassāti attho. Idha pana puthuvacanavāsenaṃti veditabbaṃ. Padhānaṃ jānaṃ nāma paccakkhato jānaṃ tassa jeṭṭhabhāvato, dassanaṃmappadhānaṃ tassa saṃsayānubandhattāti ayaṃ kamo vutto “**jānaṃ passa**”nti. Tenettha jānanena dassanaṃ viseseti. Evañhi **diṭṭhapubbāni kho tasmīṃ loke manussānaṃ sarīrasaṅṭhānādīni**ti ekato adhippāyadassanaṃ sūpapannaṃ hoti. Ayañhetthādhīppāyo “kiṃ tumhākaṃ ekantasukhe loke paccakkhato ñānadassanaṃ atthi”ti. **Jānanti** vā tassa lokassa anumānavisayataṃ vuccati, **passanti** paccakkhato visayataṃ. Idaṃ vuttaṃ hoti “api tumhākaṃ loko paccakkhato ñāto, udāhu anumānato”ti.

Yasmā pana loke paccakkhabhūto attho indriyagocarabhāvena pākato, tasmā pākateṃna atthena adhippāyaṃ dassetaṃ “**diṭṭhapubbāni**”tiādi vuttaṃ. Diṭṭhapadena vā dassanaṃ, tadanugatañca jānaṃ gahetvā tadubhayeneva atthena adhippāyaṃ vibhāvetuṃ evaṃ vuttantipi daṭṭhabbaṃ. **Diṭṭhapubbāni**ti hi dassanena, tadanugateṃna ca ñāneṃna gahitapubbāni attho. Evañca katvā “**sarīrasaṅṭhānādīni**”ti samariyādavacanāṃ samatthitaṃ hoti. “**Appāṭihīrakata**”nti ayaṃ anunāsikalopaniḍḍesoti āha “**appāṭihīrakam ta**”nti. Taṃ vacanaṃ appāṭihīrakam sampajjatīti sambandho. Appāṭihīrapade anunāsikalopo, “kata”nti ca ekaṃ padanti keci, tadayuttaṃ samāsasambhavato, anunāsikalopassa ca avattabbatā. Evamettha vaṇṇayanti – paṭipakkhaharaṇato paṭihāriyaṃ, tadeva **pāṭihāriyaṃ**. Attanā uttaravirahitavacanāṃ. Pāṭihāriyamevettha “**pāṭihīraka**”nti vuttaṃ parehi vuccamānauṭtarehi sauttarattā, na pāṭihīrakanti **appāṭihīrakam**. Virahattho cettha **a-**saddo. Tenāha “**paṭiharaṇavirahita**”nti. Sauttarañhi vacanaṃ tena uttaravacanena paṭihāriyati viparivattīyati, tasmā uttaravacanāṃ paṭiharaṇaṃ nāma, tato virahitanti attho. Tasmā eva niyyānassa paṭiharaṇaṃmagassa abhāvato “aniyyānika”nti vattabbataṃ labhati. Tena vuttaṃ “**aniyyānika**”nti.

426. Vilāso itthilīlā, yo “singārabhāvajā kiriyā”tipi vuccati. **Ākappo** kesabandhavatthaggaṇādiākāraviseso, vesasaṃvidhānaṃ vā. **Ādisaddena** hāvādīnaṃ saṅgaho. **Hāvāti** hi cāturiyaṃ vuccati.

Tayoattapaṭilābhavaṇṇanā

428. Āhito ahaṃmāno etthāti **attā**, attabhāvoti āha “**attabhāvapaṭilābho**”ti. Kathaṃ dassetīti vuttaṃ “**oḷārikattabhāvapaṭilābhenā**”tiādi. **Kāmabhavaṃ dasseti** itarabhavadvayattabhāvato oḷārikattā. **Rūpabhavaṃ dasseti** jhānāmanena nibbattaṃ hutvā rūpībhāvena upalabbhanato. **Arūpabhavaṃ dasseti** arūpībhāvena upalabbhanato. **Samkilesikā dhammā nāma dvādasa akusalacittuppādā** tadabhāve kassaci saṃkilesassa asambhavato. **Vodāniyā dhammā nāma samathavipassanā** tāsāṃ vasena sabbaso cittavodānassa sijjhanato.

429. Paṭipakkhadhammānaṃ asamucchede sati na kadācipi anavajjadhammānaṃ vā pāripūrī, vepullaṃ vā sambhavati, samucchede pana sati sambhavatīti maggaphalapaññānameva gahaṇaṃ daṭṭhabbaṃ, tā hi sakim̐ paripuṇṇāpi aparihīnadhammattā paripuṇṇā eva bhavanti. **Taruṇapīṭīti** uppannamattā aladdhāsevanā dubbalapīti. **Balavatuṭṭhīti** punappunaṃ uppattiyā laddhāsevanā uparivisesādhigamassa paccayabhūtā thiratarā pīti. Idāni saṅkhepato piṇḍatthaṃ dassento “**kim vutta**”ntiādimāha. Tattha yaṃ vihāraṃ sayaṃ...pe... viharissatīti avocumhāti sambandho. Idaṃ vuttaṃ hoti – yaṃ vihāraṃ “saṃkilesikavodāniyadhammānaṃ pahānābhivuddhiniṭṭhaṃ paññāya pāripūrivepullabhūtaṃ imasmim̐yeva attabhāve aparappaccayena ñāṇena paccakkhato sampādetvā viharissatī”ti kathayimhāti. **Tatthāti** tasmim̐ vihāre. **Tassāti** ovādakarassa bhikkhuno. **Evaṃ viharatoti** vuttappakārena viharāṇahetu, viharantassa vā. Tannimittaṃ **pāmojjaṃ**, pamodappabhavā **pīti**, tappaccayabhūtaṃ **passaddhidvayaṃ**, tathā sūpaṭṭhitā **sati**, ukkaṃsagatatāya **uttamañāṇaṃ**. **Sukho ca vihāro** bhavissatīti yojanā. Kāyacittapassaddhī hi “passaddhī”ti vuttā, ayameva vā pāṭho. “Nāmakāyapassaddhī”tipi paṭhanti, tadayuttameva passaddhidvayassa avinābhāvato. Kasmā panesa sukho vihāroti āha “**sabbavihāresū**”tiādi, sabbesupi iriyāpathavihārādīsu santapaṇītātāya imasseva sukhattā “sukho vihāro”ti vattabbaṃ arahatīti vuttaṃ hoti. Kathaṃ sukhoti vuttaṃ “**upasanto paramamadhuro**”ti.

Paṭhamajjhāne paṭiladdhamatte hīnabhāvato pīti dubbalā pāmojjapakkhikā, subhāvite pana tasmim̐ paguṇe sā paṇītā balavabhāvato paripuṇṇakiccā pīṭīti vuttaṃ “**paṭhamajjhāne pāmojjādayo chapi dhammā labbhanti**”ti. **Pāmojjaṃ nivattatīti** dubbalapītisaṅkhātāṃ pāmojjaṃ chasu dhammesu nivattati hāyati. Vitakkavicārakkhobhavirahitena hi catukkanayavibhatte dutiyajjhāne sabbadā pīti balavatī eva hoti, na paṭhamajjhāne viya kadāci dubbalāti evaṃ vuttaṃ. **Pīti nivattati** tappahāneneva tatiyajjhānassa labbhanato. “Sukho vihāro”ti iminā samādhi gahitoti āha “**tathā catutthe**”ti. Ye pana “sukho vihāro”ti etena sukhaṃ gahita”nti vadanti, tesāṃ matena santavuttitāya upekkhāpi catutthajjhāne “sukha”micceva bhāsītāti (vibha. aṭṭha. 232; visuddhi. 2.644; mahāni. aṭṭha. 27; paṭi. ma. aṭṭha. 105) katvā tathā vuttanti daṭṭhabbaṃ. Imasmim̐yeva **dīghanikāye** (dī. ni. 1.432; 3.166, 358) āgataṃ anekadhā desanāyāmuddharitvā idha desitanayaṃ niyametum̐ “**imesū**”tiādi vuttaṃ. **Suddha...pe... kathitanti** uparimaggāṃ akathetvā kevalaṃ vipassanāpādakameva jhānaṃ kathitaṃ. **Catūhi...pe... kathitāti** vipassanāpādakabhāvena jhānāni kathetvā tato paraṃ vipassanāpubbakā cattāropi maggā kathitā. **Catutthajjhānikaphalasaṃpatti kathitāti** paṭhamajjhānikādikā phalasaṃpattiyo akathetvā catutthajjhānikā eva phalasaṃpatti kathitā. **Pītivevacanameva katvāti** dvinnāṃ pīṭīnaṃ ekasmim̐ cittuppāde anuppajjanato pāmojjaṃ pītivevacanameva katvā, tadubhayaṃ abhedato katvāti vuttaṃ hoti. Pītisukhānaṃ apariccattattā, “sukho vihāro”ti ca sātisayassa sukhavihārassa gahitattā “**dutiyajjhānikaphalasaṃpatti nāma kathitā**”ti vuttaṃ. Kāmaṃ paṭhamajjhānepi pītisukhāni labbhanti, tāni pana vitakkavicārāparikkhobhena na tattha santapaṇītāni, idha ca santapaṇītāneva adhippetāni, tasmā dutiyajjhānikā eva phalasaṃpatti gahitā, na paṭhamajjhānikāti daṭṭhabbaṃ.

432-437. Vibhāvanattho pakāsanattho sarūpato nirūpanattho “na samaṇo gotamo brāhmaṇe jīṇṇe ...pe... abhivādeti vā paccuṭṭheti vā āsanena vā nimanteti” tiādīsu (a. ni. 8.11; pārā. 2) viya. Tenāha “**ayaṃ so**” tiādi. “**Ayaṃ attapaṭilābho so evā**” ti evaṃ sarūpato vibhāvetvā pakāsetvā. **Ayanti** hi bhagavatā pubbe vuttaṃ attapaṭilābhaṃ āsannapaccakkhabhāvena paccāmasati, **soti** pana parehi pucchiyamānaṃ parammukhabhāvena. **Na naṃ evaṃ vadāmāti** ettha **nanti** oḷārikamattapaṭilābhaṃ. **Sappāṭihīrakatanti** ettha pubbe vuttanayena attho veditabbo. Parehi coditavacanapaṭihīrakam sauttaravacanam sappāṭihīrakanti hi ayameva viseso. **Tucchoti** musā abhūto. **Soti** manomayo, arūpo vā attapaṭilābho. **Svevāti** so eva oḷāriko attapaṭilābho. **Tasmim samaye sacco hotīti** tasmim paccuppannasamaye vijjamāno hoti. **Attapaṭilābhotveva niyyātesīti** attapaṭilābhasaddena tathā eva pariyoṣepesi, na pana naṃ “attapaṭilābho” ti saṅkhyam gacchatīti paññattim sarūpato nīharitvā dassesīti adhippāyo. **Rūpādayo cettha dhammāti** rūpavedanādayo eva ettha loke sabhāvadhammā. **Nāmamattametanti** rūpādike pañcakkhandhe upādāya nāmapaññattimattametam “**attapaṭilābho**” ti. **Evarūpā vohārāti** “oḷāriko attapaṭilābho” tiādivohārā. **Nāmapaññattivasenāti** nāmabhūtapaññattimattavasena. “Attapaṭilābho” ti saṅkhyam gacchatī” ti **niyyātanattham**.

438. Evañca pana vatvāti rūpādike upādāya paññattimattametam attapaṭilābhoti imamattam “yasmim citta samaye” tiādinā vatvā. **Paṭipucchitvāti** yathā pare puccheyyū, tathā kālavibhāgato paṭipadāni pucchitvā. **Vinayanatthanti** yathāpucchitassa atthassa nīpanavasena vinayanatthāya. **Ye te atītā dhammāti** atītasamaye atītattapaṭilābhassa upādānabhūtā rūpādayo dhammā. **Te etarahi natthi** niruddhattā. Tato eva “**ahesu**” **nti saṅkhyam gatā**. **Tasmāti** upādānassa atītasamimyeva samaye labbhanato. **Sopīti** tadupādāno **me attapaṭilābhopi**. **Tasmimyeva samayeti** atīte eva samaye. **Sacco ahoṣīti** bhūto vijjamāno viya ahoṣi. **Anāgatapaccuppannānantī** anāgatānañcevapaccuppannānañca rūpādiddhammānaṃ upādānabhūtānaṃ. **Tadā abhāvāti** tasmim atītasamaye abhāvā avijjamānattā. Tadupādānabhūto **anāgato, paccuppanno** ca attapaṭilābho **tasmim atīta** samaye **mogho** tuccho musā natthīti attho. **Atthatoti** paññattiatthato. **Nāmamattamevāti** samaññāmattameva. Paramatthato anupalabbhamānattā **attapaṭilābham paṭijānāti**.

“**Eseva nayo**” ti iminā ye te anāgatā dhammā, te etarahi natthi, “bhavissanti” ti pana saṅkhyam gatā, tasmā sopi me attapaṭilābho tasmimyeva samaye sacco bhavissati. Atītapaccuppannānaṃ pana dhammānaṃ tadā abhāvā tasmim samaye “mogho atīto, mogho paccuppanno” ti evaṃ atthato nāmamattameva attapaṭilābham paṭijānāti. Ye ime paccuppannā dhammā, te etarahi “atthi” ti saṅkhyam gatā, tasmā yvāyam me attapaṭilābho, so idāni sacco hoti. Atītānāgatānaṃ pana dhammānaṃ adhunā abhāvā etarahi “mogho atīto, mogho anāgato” ti evaṃ atthato nāmamattameva attapaṭilābham paṭijānātīti imamattam atidisati.

439-443. Saṃsanditunti samānetuṃ. **Gavāti** gāvito. **Tatthāti** khīrādīsu pañcagorasesu. **Yasmim samaye khīraṃ hotīti** yasmim kāle bhūtopādāyasaññitam upādānavisesam upādāya khīrapaññatti hoti. **Na tasmim...pe... gacchati** khīrapaññattiupādānassa bhūtopādāyarūpassa dadhiādipaññattiyā anupādānato. Paṭinīyatavatthukā hi etā lokasamaññā. Tenāha “**ye dhamme upādāyā**” tiādi. Saṅkhāyati kathīyati etāyati **saṅkhā**. Attam nīharitvā uccanti vadanti etāyati **nirutti**. Tam tadattham namanti sattā etenāti **nāmam**, tathā voharanti etenāti **vohāro**, paññattiyeva. “Yasmim samaye” tiādinā khīre vuttanayam dadhiādīsipi “**esa nayo sabbatthā**” ti atidisati.

Samanujānanamattakānīti “idaṃ khīraṃ, idaṃ dadhī” tiādinā tādisesu bhūtopādāyarūpavisesesu loke paramparāgataṃ paññattim appaṭikkhipitvā samanujānaṃ viya paccayavisesavisiṭṭham rūpādikkhandhasamūham upādāya “oḷāriko attapaṭilābho” ti ca “manomayo attapaṭilābho” ti ca “arūpo attapaṭilābho” ti ca tathā tathā samanujānanamattakānī, na ca tabbinimutto upādānato añño koci paramatthato atthīti vuttaṃ hoti. **Niruttimattakānīti** saddaniruttiyā gahaṇūpāyamattakānī. “Satto phasso” tiādinā hi saddagahaṇuttarakālam tadanuviddhapaṇṇattiggahaṇamukheneva tadatthāvabodho. Tathā cāhu –

“Paṭhamam saddam sotena, tītam dutiyacetasā;
Nāmam tatiyacittena, attham catutthacetasā”ti. (maṇisāramañjusāṭīkāyam
paccayaśaṅgahavibhāgepi);

Vacanapathamattakānīti tasseva vevacanam. Niruttiyeva hi aññesampi
diṭṭhānugatimāpajantānam kāraṇaṭṭhena **vacanapatho**. **Vohāramattakānī**ti tathā tathā
vohāramattakāni. **Nāmapaṇṇattimattakānī**ti tasseva pariyāyo, taṃtaṃnāmapaññāpanamattakānīti
attho. **Sabbametanti** “attapaṭilābho”ti vā “satto”ti vā “poso”ti vā sabbametam **vohāramattakam**.
Kasmāti ce, paramatthato anupalabbhanatoti dassetuṃ “**yasmā**”tiādi vuttaṃ. **Suññoti** paramatthato
vivitto.

Yajjevam kasmā cesā buddhehipi vuccatīti codanam sodhento “**buddhānam panā**”tiādimāha.
Sammutiyā vohārassa kathanam **sammutikathā**. Paramatthassa sabhāvadhammassa kathanam
paramatthakathā. Paramatthasannisitakathābhāvato aniccādikathāpi “**paramatthakathā**”ti vuttā.
Paramatthadhammoyeva hi “anicco, dukkho”ti ca vuccati, na sammutidhammo.

“Aniccā sabbe saṅkhārā, dukkhānattā ca saṅkhatā;
Nibbānañceva paññatti, anattā iti nicchayā” ti. (pari. 257) –

Vacanato panesa “anattā”ti vuccati, khandhādīpaññatti pana tajjāpaññatti viya
paramatthasannissayā, āsannatārā ca, puggalapaññattiādayo viya na dūre, tasmā khandhādikathāpi
“**paramatthakathā**”ti vuttā, khandhādisīsenā vā tadupādānasabhāvadhammā eva gahitāti daṭṭhabbam.
Nanu ca sabhāvadhammāpi sammutimukheneva desanamārohanti, na paramatthamukhena, tasmā
sabbāpi desanā sammutikathāva siyāti? Nayidamevam kathetabbadhammavibhāgena kathāvibhāgassa
adhippetattā, na ca saddo kenaci pavattinimittena vinā attham pakāsetīti.

Kasmā cevaṃ dubbidhā buddhānam kathā pavattatīti anuyogaṃ kāraṇavibhāvanena pariharitum
“**tattha yo**”tiādi vuttaṃ. Attham **vijānitum** catusaccaṃ **paṭivijjhitum** vaṭṭato **niyyātum**
arahattasaṅkhātāṃ **jayaggāham gahetum sakkoti**. Yasmā paramatthakathāya eva saccasampañvedho,
ariyasaccakathā ca sikhāpattā desanā, tasmā vineyyapuggalavasena ādito sammutikatham kathentopi
bhagavā parato paramatthakathamyeva kathetīti āha “**tassā**”tiādi. “Āditova sammutikatham kathetī”ti
hi vadanto parato paramatthakathampi kathetīti dīpeti, itarattha pana “āditova kathetī”ti avadanto
sabbatthapīti. “**Tathā**”tiādinā kathādvayakathane pariyāyantaram vibhāveti. **Bodhetvāti**
veneyyajjhāsayanurūpaṃ tathā tathā desetabbamattham jānāpetvā, iminā pana imamattham dasseti –
katthaci sammutikathāpubbikā paramatthakathā hoti puggalajjhāsayavasena, katthaci
paramatthakathāpubbikā sammutikathā, iti vineyyadamkusalassa satthu veneyyajjhāsayavasena tathā
tathā desanā pavattatīti. Sabbattha pana bhagavā dhammatam avijahanto eva sammutimanuvattati,
sammutim apariccajantoyeva dhammatam vibhāveti, nam tattha abhinivesatidhāvanāni. Vuttañhetam
bhagavatā “janapadaniruttim nābhiniviseyya, samaññam nātidhāveyyā”ti (dī. ni. 1.439-443).

Paṭhamam sammutikathākathanam pana veneyyavasena yebhuyyena buddhānamāciṇṇanti tam
kāraṇena saddhim dassento “**pakatiyā panā**”tiādimāha. **Lūkhākārāti**
veneyyānamanabhisambujjhanavasena lūkhasadisā. Nanu ca sammuti nāma paramatthato avijjamānattā
abhūtā, tam katham buddhā kathentīti vuttaṃ “**sammutikatham kathentāpi**”tiādi. **Saccamevāti**
tathameva. **Sabhāvamevāti** sammutibhāvena taṃsabhāvameva. Tenāha “**amusāvā**”ti. Paramatthassa
pana saccādhāve vattabbameva natthi.

Ko panimesam sammutiparamatthadhammānam visesoti? Yasmiṃ bhinne, buddhiyā vā
avayavavinibbhoge kate na taṃsaññā, so ghaṭapaṭāḍippabhedo sammuti, tabbipariyāyato paramattho. Na
hi kakkhaḷaphusanādisabhāve ayam nayo labbhati. Evam santepi vuttanayena sammuti ca saccasabhāvā
evāti āha “**duve saccāni akkhāsī**”tiādi. Tattha **duve saccāni akkhāsī**ti nānādesabhāsākusalato tiṇṇam

vedānamatthasaṃvaṇṇanako ācariyo viya nānāvīdhasammutiparamatthakusalo bhagavā veneyyajjhāsayanurūpaṃ duveyeva saccāni akkhāsīti attho. Taṃ sarūpato, parimāṇato ca dasseti “**sammutiṃ paramatthañca, tatiyaṃ nūpalabbhati**”ti iminā. **Vadatam varoti** sabbesaṃ vadantānaṃ varo. Lokasaṅketamattasiddhā **sammuti**. Paramo uttamo aviparīto yathābhūtasabhāvo **paramattho**.

Idāni nesaṃ saccasabhāvaṃ saha kāraṇena dassetuṃ “**saṅketavacana**”nti gāthā vuttā. Yasmā lokasammutikāraṇaṃ, tasmā saṅketavacanaṃ saccam, yasmā ca dhammānaṃ bhūtalakkhaṇaṃ, tasmā paramatthavacanaṃ saccanti yojanā. **Lokasammutikāraṇanti** hi saṅketavacanassa saccabhāve kāraṇadassanaṃ, lokasiddhā sammuti saṅketavacanassa avisaṃvādanatāya kāraṇanti attho, visaṃvādanābhāvato saṅketavacanaṃ saccanti vuttaṃ hoti. **Dhammānaṃ bhūtalakkhaṇanti** ca paramatthavacanassa saccabhāve kāraṇadassanaṃ. Sabhāvadhammānaṃ yo bhūto aviparīto sabhāvo, tassa lakkhaṇaṃ aṅganaṃ ṅāpananti attho, yāthāvato avisaṃvādanavasena pavattanato paramatthavacanaṃ saccanti adhippāyo. **Anaṅgaṇasuttaṭṭikāyaṃ** pana ācariyeneva nissakkavacanena padamullīngetvā “**lokasammutikāraṇāti** lokasamaññaṃ nissāya pavattanato. **Dhammānanti** sabhāvadhammānaṃ. **Bhūtakāraṇāti** yathābhūtasabhāvaṃ nissāya pavattanato”ti vuttaṃ.

Aññattha pana –

“Tasmā voharakusalassa, lokanāthassa satthuno;
Sammutiṃ voharantassa, musāvādo na jāyatī”ti. (ma. ni. aṭṭha. 1.57; a. ni. aṭṭha. 1.170; itivu. aṭṭha. 24) –

Ayampi guṇaparidīpanī gāthā dissati. Tattha **tasmāti** saccassa duvidhattā, saṅketavacanassa vā saccabhāvato. **Sammutiṃ voharantassāti** “puggalo satto”tiādinā lokasamaññaṃ kathentassa **musāvādo** nāma **na jāyatīti** attho. Apica “aṭṭhahi kāraṇehi bhagavā puggala kathaṃ katheti hīrottappadīpanatthaṃ, kammassakatādīpanatthaṃ, paccattapurisakāradīpanatthaṃ, ānantariyadīpanatthaṃ, brahmavihāradīpanatthaṃ, pubbenivāsadīpanatthaṃ, dakkhiṇāvisuddhidīpanatthaṃ, lokasammutiyaṃ appahānatthañcā”tiādinā (ma. ni. aṭṭha. 1.57; a. ni. aṭṭha. 1.170; itivu. aṭṭha. 24; kathā. anuṭṭi. 1) tattha tattha vuttakāraṇampi āharitvā idha vattabbaṃ.

Yadi tathāgato paramatthasaccaṃ sammadeva abhisambujjhivā ṭhitopi lokasamaññābhūtaṃ sammutisaccaṃ gahetvāva vadati, evañcetha ko lokiyamahājanehi visesoti vuttaṃ “**yāhi**”tiādi, ayaṃ pāliyaṃ sambandho. Idaṃ vuttaṃ hoti – lokiyamahājano appahīnaparāmāsattā “etaṃ mamā”tiādinā parāmasanto voharati. Tathāgato pana sabbaso pahīnaparāmāsattā aparāmasantova yasmā lokasamaññāhi vinā lokiyo attho lokena dubbhiṇṇeyyo, tasmā tāhi taṃ voharati. Tathā voharanto ca attano desanāvilāsena veneyyasatte paramatthasacce patiṭṭhāpetīti. **Desanaṃ vinivattetvāti** heṭṭhā vuttāya diṭṭhābhinivesapaṭisaññuttāya vaṭṭakathāya vinivattetvā vivecetvā. **Arahattanikūṭena niṭṭhāpesīti** “aparāmasa”nti iminā padena taṅhāmānaparāmāsappahānakittanena tappahāyakaarahattasaṅkhātanikūṭena desanaṃ pariyoṣepesi. Yaṃ panettha atthato na vibhattaṃ, taṃ suviññeyyameva.

Iti sumaṅgalavilāsiniyā dīghanikāyaṭṭhakathāya paramasukhumagambhīraduranubodhatthaparidīpanāya suvimalavipulapaññāveyyattiyajananāya sādhuvilāsiniyā nāma līnatthapakāsaniyā poṭṭhapādasuttavaṇṇanāya līnatthapakāsanaṃ.

Poṭṭhapādasuttavaṇṇanā niṭṭhitā.

10. Subhasuttavaṇṇanā

Subhamāṇavakavattuvaṇṇanā

444. Evaṃ poṭṭhapādasuttaṃ saṃvaṇṇetvā idāni subhasuttaṃ saṃvaṇṇento yathānupubbam saṃvaṇṇanokāsassa pattabhāvaṃ vibhāvetuṃ, poṭṭhapādasuttassānantaraṃ saṅgītassa suttassa subhasuttabhāvaṃ vā pakāsetuṃ “**evaṃ me sutam...pe... sāvattiyanti subhasutta**”nti āha. Anunāsikalopena “acira parinibbute”ti vuttanti dasseti “**aciraṃ parinibbute**”ti iminā yathā poṭṭhapādasutte “appāṭihīraka taṃ bhāsitaṃ sampajjati”ti, aciraṃ parinibbutassa assāti vā **aciraparinibbuto** yathā “acirapakkanto, māsaṃjāto”ti. Atthamattaṃ pana dassetuṃ evaṃ vuttaṃ. **Aciraparinibbuteti** ca satthu parinibbutabhāvassa cirakālatāpaṭikkhepena āsannatāmatam dassitaṃ, kālaparicchedo pana na dassitoti taṃ dassento “**parinibbānato**”tiādīmāha. Visākhapuṇṇamito uddham yāva jeṭṭhapuṇṇamī, tāva kālaṃ sandhāya “**māsamate**”ti vuttaṃ. **Mattasaddena** pana tassa kālassa kiñci asampuṇṇataṃ joteti. Tudisaññito gāmo nivāso etassāti **todeyyo**. Taṃ panesa yasmā soṇadaṇḍo (dī. ni. 1.300) viya campam, kūṭadanto (dī. ni. 1.323) viya ca khānumataṃ ajjhāvasati, tasmā vuttaṃ “**tassa adhipatitā**”ti, issarabhāvatoti attho. Ayampi hi rañño pasenadikosalassa purohitabrāhmaṇo. **Puttampi āhāti** subham māṇavampi ovaḍanto āha.

Añjanānanti akkhiañjanatthāya ghaṃsitaañjanānaṃ. **Vammikānanti** kimisamāhaṭavammikānaṃ sañcayam disvāti sambandho. **Madhūnanti** makkhikamadhūnaṃ. **Samāhāranti** makarandasannicayaṃ. **Paṇḍito gharamāvaseti** yasmā appatarappatarepi gayhamāne bhogā khīyanti, appatarappatarepi ca sañciyamāne vaḍḍhanti, tasmā yathāvuttamupamattayaṃ paññāya disvā viññujātiko kiñcipi vayamakavā āyameva uppādentō gharevase gharāvāsamanutiṭṭheyāti lobhādesitapaṭipattiṃ upadisati.

Adānameva sikkhāpetvā sikkhāpanahetu lobhābhībhūtātāya **tasmimyeva ghare sunakho hutvā** nibbatti. Lobhavasikassa hi duggati paṭikañkhā, “janavasabho nāma yakkho hutvā nibbatti”ti (dī. ni. aṭṭha. 1.150) ettha vuttanayena attho veditabbo. Pubbaparicayena **ativiya piyāyati**. Vuttañhi “pubbeva sannivāsenā”tiādi (jā. 1.2.174). **Nikkhanteti** kenacideva karaṇīyena bahi niggate. Subham māṇavaṃ anuggaṇhitukāmo ekakova **bhagavā piṇḍāya pāvisi**. **Bhukkāranti** “bhu bhū”ti sunakhasaddakaraṇam. “**Bho bho**”ti brāhmaṇasamudācārena **paribhavitvā** paribhavanahetu. “Bhovādi nāma so hoti, sace hoti sakiñcano”ti (dha. pa. 396; su. ni. 625) hi vuttaṃ. Nanu ca heṭṭhā “adānameva sikkhāpetvā sunakho hutvā nibbatto”ti āha, kasmā panettha “pubbepi maṃ ‘bho bho’ti paribhavitvā sunakho jāto”ti vadatīti? Tathā nibbattiyā tadubhayasādhāraṇaphalattā. Ānisaṃsaphalañhi sādharāṇakammenapi jātam, na vipākaphalam viya ekakammenevāti daṭṭhabbam. **Avicim gamissasi** katokāsassa kammassa paṭibāhitumasakkuṇeyyabhāvato. “Jānāti maṃ samaṇo gotamo”ti **vippaṭisārī hutvā**. **Uddhanantareti** cullikantare. **Nanti** sunakham.

Taṃ pavattinti bhagavatā yathāvuttakāraṇam. Brāhmaṇacārittassa aparihāpitataṃ sandhāya, tathā pitaraṃ ukkaṃsento “**brahmaloke nibbatto**”ti āha. **Mukhāruḥanti** sayamapaṭibhānavasena mukhamāruḥam. **Taṃ pavattiṃ pucchīti** “sutametaṃ bho gotama mayham pitā sunakho hutvā nibbatto”ti tumhehi vuttaṃ, “kimidaṃ saccam vā asaccam vā”ti pucchi. **Tatheva vatvāti** yathā pubbe sunakhasa vuttaṃ, tatheva vatvā. **Avisaṃvādanatthanti** saccāpanattham, “todeyyabrāhmaṇo sunakho hutvā nibbatto”ti vacanassa avisaṃvādanena attano avisaṃvādībhāvadassanatthanti vuttaṃ hoti. **Appodakanti** appakena udakena sampāditaṃ. **Madhupāyāsanti** sādurasam, madhuyojitam vā pāyāsam. **Tathā akāsi**, yathā bhagavatā vuttaṃ. “**Sabbaṃ dassesīti** buddhānubhāvena so sunakho taṃ sabbaṃ netvā dassesi, na jātissaratāya. Bhagavantaṃ disvā bhukkaraṇam pana purimajātisiddhavāsanāvāsenā”ti (dī. ni. ṭī. 1.444) evaṃ ācariyena vuttaṃ. Uparipaṇṇāsake pana **cūlakammavibhaṅgasuttaṭṭhakathāyaṃ** “sunakho ‘ñātomhi iminā’ti roditvā ‘huṃ hu’nti karonto dhananidhānaṭṭhānaṃ gantvā pādena pathaviṃ khaṇitvā saññaṃ adāsī”ti (ma. ni. aṭṭha. 3.289) jātissarākāramāha, vīmaṃsitvā gahetabbam.

“Bhavapaṭicchannaṃ nāma evarūpaṃ sunakhapaṭisandhiantaraṃ pākataṃ samaṇassa gotamassa, addhā esa sabbaññū”ti **bhagavati pasannacitto**. Aṅgavijjāpāṭhako kiresa. Tenassa etadahosi “imaṃ dhammapaṇṇākāraṃ katvā samaṇam gotamaṃ pañham pucchissāmī”ti, tato so cuddasa pañhe abhisankharitvā bhagavantaṃ pucchi. Tena vuttaṃ “**cuddasa pañhe pucchitvā**”ti. Tatha **cuddasa**

pañheti “dissanti hi bho gotama manussā appāyukā, dissanti dīghāyukā. Dissanti bavhābādā, appābādā. Dubbaṇṇā, vaṇṇavanto. Appesakkhā, mahesakkhā. Appabhogā, mahābhogā. Nīcakulīnā, uccākulīnā. Dissanti duppaññā, dissanti paññavanto. Ko nu kho bho gotama hetu ko paccayo, yena manussānaṃyeva sataṃ manussabhūtānaṃ dissanti hīnapaññatā”ti (ma. ni. 3.289) ime **cūlakammavibhaṅgasutte** āgate cuddasa pañhe. “Kammassakā māṇava sattā kammadāyādā”tiādīnā (ma. ni. 3.289) saṅkhepato, vitthārato ca **vissajjanapariyosāne bhagavantam saraṇam gato**. Aṅgasubhatāya “**subho**” tissa nāmaṃ. **Māṇavoti** pana mahallakakālepi taruṇavohārena naṃ voharati. **Attano bhogāmatoti** tudigāmato **āgantvā** taṅkhaṇikaṃ **vasati**. Teneva pāḷiyam “kenacideva karaṇīyena”ti vuttaṃ.

445. “Ekā ca me kaṅkhā atthī”ti iminā upari pucchiyamānassa pañhassa pageva tena abhisāṅkhatābhāvaṃ dasseti. **Māṇavakanti** khuddakamāṇavaṃ “ekaputtako, (ma. ni. 2.296, 353; pārā. 26) piyaputtako”tiādīsu viya ka-saddassa khuddakathe pavattanato. **Visabhāgavedanāti** dukkhavedanā. Sā hi kusalakammanibbatte attabhāve uppajjanakasukhavedanāpaṭipakkhabhāvato “visabhāgavedanā”ti ca kāyaṃ gāḷhā hutvā bādhanato pīlanato “ābādho”ti ca vuccati. Kīdisā pana sāti āha “**yā ekadese**”tiādi. **Ekadese uppajjivāti** sarīrekadese utthahitvāpi aparivattibhāvakaraṇato **ayapaṭṭena ābandhitvā viya gaṇhāti**, iminā balavarogo **ābādho** nāmāti dasseti. **Kicchajīvitakaroti** asukhajīvitāvaho, iminā dubbalo appamattako rogo **ātāṅko** nāmāti dasseti. **Uṭṭhānanti** sayananisajjādito utthāhanaṃ, tena yathā tathā aparāparaṃ sarīrassa parivattanaṃ vadati. **Garukanti** bhāriyaṃ akiccasiddhikaṃ. Gilānasseva kāye balaṃ na hotīti sambandho. Lahuṭṭhānena cettha gelaññābhāvo pucchito. Heṭṭhā catūhi padehi aphāsuvihārābhāvaṃ pucchitvāpi idāni puna phāsuvihārābhāvaṃ pucchati, tena saviseso ettha phāsuvihāro pucchitoti viññāyati. Asatipi hi atisayatthajotane sadde atthāpattito atisayattho labbhateva yathā “abhirūpassa kaññā dātabbā”ti. Tenāha “**gamaṇaṭṭhānā**”tiādi. Purimaṃ āṇāpanavacanaṃ, idaṃ pana pucchitabbākāradassananti ayamimesaṃ visesoti dasseti “**athassā**”tiādīnā.

447. Kālo nāma upasaṅkamanassa yuttapattakālo, **samayo** nāma tasseva paccayasāmaggī, atthato panesa tajjaṃ sarīrabalañceva tappaccayaparissayābhāvo ca. **Upādānaṃ** nāma ñāṇena tesam gahaṇaṃ sallakkhaṇanti āha “**paññāyā**”tiādi. “**Sve gamanakālo bhavissati**”ti iminā kālaṃ, “**kāye**”tiādīnā samayañca sarūpato dasseti. **Pharissatīti** pharaṇavasena ṭhassati.

448. Cetiyaraṭṭheti cetiraṭṭhe. Ya-kārena hi padaṃ vaḍḍhetvā evaṃ vuttaṃ. “Cetiraṭṭhato aññaṃ visuṃyevakaṃ raṭṭha”ntipi vadanti. “Yasmā maraṇaṃ nāma tādisānaṃ dasabalānaṃ rogavaseneva hoti, tasmā yena rogena taṃ jātaṃ, tassa sarūpapucchā, kāraṇapucchā, maraṇahetukacittasantāpapucchā, tassa ca santāpassa sabbalokasādhāraṇatā, tathā maraṇassa ca appaṭikaraṇatā”ti evamādinā maraṇapaṭisaññuttaṃ sammodanīyaṃ kathaṃ kathesīti dassetuṃ “**bho ānandā**”tiādi vuttaṃ. “**Ko nāmā**”tiādīnā hi rogaṃ pucchati, “**kiṃ bhagavā paribhuñjī**”ti iminā kāraṇaṃ, “**apicā**”tiādīnā cittasantāpaṃ, “**sattā nāmā**”tiādīnā tassa sabbalokasādhāraṇataṃ, “**ekā dānī**”tiādīnā maraṇassa appaṭikaraṇataṃ dassetīti daṭṭhabbaṃ. **Mahājānīti** mahāhāni. **Yatrāti** yena kāraṇena parinibbuto, tena ko dāni añño maraṇā muccissatītiādīnā yojetabbaṃ. **Idānīti** ca attano manasikāraṃ pati vohāramattena vuttaṃ. **Lajjissatīti** lajjā viya bhavissati, vijjissatīti attho. Pītabhesajjānurūpaṃ āhārabhojanaṃ porāṇāciṇṇanti āha “**pīta...pe... datvā**”ti.

Hutvāti pāṭhaseso santikāvacarabhāvassa visesanato. Māro pāpimā viya **na randhagavesī**, uttaramāṇavo viya ca **na vīmaṃsanādhippāyo**, api tu khalu **upaṭṭhāko hutvā santikāvacaroti** hi viseseti. **Na randhagavesīti** na chiddagavesī. **Yesu dhammesūti** vimokkhupāyesu niyyānikadhammesu. **Dharantīti** adhunā tiṭṭhanti, pavattantīti attho.

449. Atthato payuttatāya saddapayogassa saddapabandhalakkhaṇāni tīṇi piṭakāni tadatthabhūtehi silādīhi tīhi dhammakhandhehi saṅgayhantīti vuttaṃ “**tīṇi piṭakāni tīhi khandhehi saṅgahetvā**”ti. **Saṅkhittena kathitanti** “tiṇṇaṃ kho māṇava khandhāna”nti evaṃ gaṇanato, sāmāññato ca

sankhepeneva kathitaṃ. “**Katamesaṃ tiṇṇa**”nti ayaṃ adiṭṭhajotanāpucchāyeva, na kathetukamyatāpucchā. Mānavasseva hi ayaṃ pucchā, na therassāti āha “**māṇavo**”tiādi. Aññattha pana īdisesu ṭhānesu kathetukamyatāpucchāyeva dissati, na adiṭṭhajotanāpucchā. Idha pana **aṭṭhakathāyaṃ** evaṃ vuttaṃ, tadetaṃ aṭṭhakathāpamāṇato paccetabbaṃ. Tada pavattamānañhi paccakkhaṃ katvā aṭṭhakathampi saṅgahamāropiṃsu. Kathetukamyatāpucchābhāve panassa therasseva vacanatā siyā.

Silakkhandhavaṇṇanā

450-453. Silakkhandhassāti ettha padatthavipallāsakārī itisaddo lutto, atthaniddeso viya saddaniddeso vā, yathāruto ca itisaddo ādyattho, pakārattho vā, tena “ariyassa samādhikkhandhassa... pe... patiṭṭhapesī”ti ayaṃ pāṭho gahitoti daṭṭhabbaṃ. Tena vuttaṃ “**tesu dassitesū**”ti, tesu tīsu khandhesu uddesavasena dassitesūti attho. **Bhagavatā vuttanayenevāti** sāmāññaphalādīsu (dī. ni. 1.194) desitanayeneva, tena imassa suttassa buddhabhāsita bhāvaṃ dassetīti veditabbaṃ. **Sāsane na silameva sāroti** ariyamaggasāre bhagavato sāsane yathādassitaṃ sīlaṃ sāro eva na hoti sāravato mahato rukkhassa papaṭikaṭṭhānikattā. Aṭṭhānapayutto hi evasaddo yathāṭhāne na yojetabbo. Yajjevam kasmā tamidha gahitanti āha “**kevala**”ntiādi. Jhānādiuttarimanussadhamme adhigantukāmassa adhiṭṭhānamattaṃ tattha appatiṭṭhitassa tesamasambhavato. Vuttañhi “sīle patiṭṭhāya naro sapañño”tiādi (saṃ. ni. 1.23, 192; peṭako. 22) atha vā **sāsane na silameva sāroti** kāmañcetta sāsane maggaphalasīlasāṅkhātaṃ lokuttarasīlampi sārameva, tathāpi na silakkhandho eva sāro hoti, atha kho samādhikkhandhopi paññākkhandhopi sāro evāti evampetta yathāpayuttana evasaddena attho veditabbo, purimoyeva panattho yuttataro. Tathā hi vuttaṃ “**ito uttari**”tiādi. **Aññampi kattabbanti** sesakhandhadvayaṃ.

Samādhikkhandhavaṇṇanā

454. Kasmā panettha thero samādhikkhandhaṃ puṭṭhopi indriyaṣaṃvarādike vissajjesi, nanu evaṃ sante aññaṃ puṭṭho aññaṃ byākaronto ambaṃ puṭṭho labujaṃ byākaronto viya hotīti īdisī codanā idha anokāsāti dassento “**kathaṅca...pe... ārabhī**”ti āha, tenettha indriyaṣaṃvarādayopi samādhiupakāratataṃ upādāya samādhikkhandhapakkhikabhāvena uddiṭṭhāti dasseti. Ye te indriyaṣaṃvarādayoti sambandho. Rūpāvacaracatutthajjhānadesanānantaraṃ abhiññādesanāya avasaroti katvā **rūpajjhānāneva āgatāni, na arūpajjhānāni**. Rūpāvacaracatutthajjhānapādikā hi sapaṇibhaṇḍā chapi abhiññāyo. Yasmā pana lokiyābhiññāyo ijjhamānā aṭṭhasu samāpattīsu cuddasavidhena cittaparidamanena vinā na ijjhanti, tasmā abhiññāsu desiyamānāsu arūpajjhānānipi desitāneva honti nānantarikabhāvato. Tenāha “**ānetvā pana dīpetabbāni**”ti, vuttanayena desitāneva katvā saṃvaṇṇakehi pakāsetabbānīti attho. **Aṭṭhakathāyaṃ** pana “catutthajjhānaṃ upasampajja viharatī”ti imināva arūpajjhānampi saṅgahitanti dassetuṃ “**catutthajjhānena hī**”tiādi vuttaṃ. Catutthajjhānameva hi rūpavirāgabhāvanāvasena pavattaṃ “arūpajjhāna”nti vuccati.

471-480. Na cittekaggatāmattakenevāti ettha heṭṭhā vuttanayānusāreṇa ṭhānāṭṭhānapayuttassa evasaddassānurūpamattho veditabbo. Lokiyasamādhikkhandhassa pana adhippetattā “**na cittekaggatā...pe... atthī**”ti vuttaṃ. **Ariyo samādhikkhandhoti** ettha hi ariyasaddo suddhamattapariyāyova, na lokuttarapariyāyo. Yathā cettha, tathā **ariyo silakkhandhoti** etthāpi. **Itoti** paññākkhandhato, so ca ukkaṭṭhato arahattaphalapariyāpanno evāti āha “**arahattapariyosāna**”ntiādi. Lokiyābhiññāpaṭisambhidāhi vināpi hi arahatte adhigate “nattheva uttarikaraṇīya”nti sakkā vattum yadatthaṃ bhagavati brahmacariyaṃ vussati, tassa siddhattā. Idha pana lokiyābhiññāyopi āgatāyeva. Sesamettha suviññeyyaṃ.

Iti sumaṅgalavilāsiniyā dīghanikāyaṭṭhakathāya
paramasukhumagambhīraduranubodhatthaparidīpanāya suvimalavipulapaññāveyyattiyajananāya
sādhuvilāsiniyā nāma līnatthapakāsaniyā subhasuttavaṇṇanāya līnatthapakāsana.

Subhasuttavaṇṇanā niṭṭhitā.

11. Kevaṭṭasuttavaṇṇanā

Kevaṭṭagahapatiputtavatthuvaṇṇanā

481. Evaṃ subhasuttaṃ saṃvaṇṇetvā idāni kevaṭṭasuttaṃ saṃvaṇṇento yathānupubbaṃ saṃvaṇṇanokāsassa pattaḥāvaṃ vibhāvetuṃ, subhasuttassānantaraṃ saṅgītassa suttassa kevaṭṭasuttabhāvaṃ vā pakāsetuṃ “**evaṃ me suttaṃ...pe... nāḷandāyanti kevaṭṭasutta**”nti āha. **Pāvārikassāti** evaṃnāmakassa seṭṭhino. **Ambavaneti** ambarukkhahule upavane. Taṃ kira so seṭṭhi bhagavato anucchavikaṃ gandhakuṭiṃ, bhikkhusaṅghassa ca rattiṭṭhānadivāṭṭhānakūṭimaṇḍapādāni sampādetvā pākāraparikkhitaṃ dvārakoṭṭhakasampannaṃ katvā buddhappamukhassa saṅghassa niyyātesī, purimavohārena panesa vihāro “pāvārikambavana”ntveva vuccati. “**Kevaṭṭo**” **tidaṃ** nāmamattaṃ. “Kevaṭṭehi saṃrakkhittā, tesāṃ vā santike sambuddhattā”ti keci. **Gahapatiputtassāti** ettha kāmāñesa tadā gahapatiṭṭhāne ṭhito, pitu panassa acirakālakatātāya purimasamaññāya “gahapatiputto”tveva voharīyati. Tenāha “**gahapatimahāsālo**”ti, mahāvibhavatāya mahāsāro gahapatīti attho, ra-kārassa pana la-kāraṃ katvā “**mahāsālo**”ti vuttaṃ yathā “palibuddho”ti (cūḷani. 15; mi. pa. 6.3.7; jā. aṭṭha. 2.3.102) **saddho pasannoti** pothujjanikasaddhāvasena ratanattayasaddhāya samannāgato, tatoyeva ratanattayappasanno. Kammakammaphalasaddhāya vā **saddho**, ratanattayappasādabahulatāya **pasanno**. **Saddhādhikattāyevāti** tathācintāya hetuvacanaṃ, saddhādhiko hi ummādapatto viya hoti.

Samiddhāti sammadeva iddhā, vibhavasampattiyā vepullappattā sampuñṇā, ākiñṇā bahū manussā etthāti atthaṃ sandhāya “**amsakūṭenā**”tiādi vuttaṃ. “Ehi tvaṃ bhikkhu anvaddhamāsaṃ, anumāsaṃ, anusaṃvaccharaṃ vā manussānaṃ pasādāya iddhipāṭihāriyaṃ karohī”ti ekassa bhikkhuno āṇāpanameva samādīsaṃ, taṃ pana tasmīṃ ṭhāne ṭhapanāṃ nāmāti āha “**ṭhānantare ṭhapatū**”ti. **Uttarimanussānanti** pakatimanussehi uttaritarānaṃ uttamapurisānaṃ buddhādīnaṃ jhāyīnaṃ, ariyānañca. **Dhammatoti** adhigamadhammato, jhānābhīñṇāmaggaphaladhammatoti attho, niddhāraṇe cetāṃ nissakkavacanaṃ. Tato hi iddhipāṭihāriyaṃ niddhāreti. Evaṃ uttarisaddaṃ manussasaddena ekapadaṃ katvā idāni pāṭihāriyasaddena sambajjhitaḥṭṭhaṃ visumeva padaṃ karonto “**dasakusalasaṅkhātato vā**”tiādimāha. **Manussadhammatoti** pakatimanussadhammato. **Pajjalitapadīpoti** pajjalantapadīpo. **Telasnehanti** telasecanaṃ. **Rājagahasetṭhivatthusminti** rājagahasetṭhino candanapattadānavatthumhi (cūḷava. 252). **Sikkhāpadaṃ paññāpesīti** “na bhikkhave gihīnaṃ uttarimanussadhammaṃ iddhipāṭihāriyaṃ dassetabbaṃ. Yo dasseyya, āpatti dukkaṭṭassa”ti (cūḷava. 252) vikubbaniddhipāṭikkhepakāṃ idaṃ sikkhāpadaṃ paññāpesi.

482. Guṇasampattito acāvanaṃ sandhāya etaṃ vuttanti dasseti “**na guṇavināsanenā**”ti iminā. Tenāha “**sīlabheda**”ntiādi. **Visahanto nāma natthīti** nivāritaṭṭhāne ussahanto nāma natthī. Evampi iminā kāraṇantarenāyaṃ ussahantoti dassetuṃ “**ayaṃ panā**”tiādi vuttaṃ. Yasmā vissāsiko, tasmā vissāsaṃ vaḍḍhetvāti yojanā. **Vaḍḍhetvāti** ca brūhetvā, vibhūtaṃ pākaṭaṃ katvāti attho.

Iddhipāṭihāriyavaṇṇanā

483-4. **Ādīnavanti** dosaṃ. Kathaṃ tena katā, kattha vā uppannāti āha “**tattha kirā**”tiādi. **Ekenāti** gandhārena nāma isināva. Evañhi pubbenāparaṃ saṃsandatīti. Gandhārī nāmesā vijjā cūḷagandhārī, mahāgandhārīti duvidhā hoti. Tattha **cūḷagandhārī** nāma tivassato oraṃ matasattānaṃ upannaṭṭhānājanā vijjā. Vaṅgīsavatthu (saṃ. ni. aṭṭha. 1.1.220; a. ni. aṭṭha. 1.1.212) cettha sādhaṃ. **Mahāgandhārī** nāma tassa ceva jānanā, taduttari ca iddhividhañāṇakammaṃ sādhaṃ vijjā. Yebhuyyena hesā iddhividhañāṇakiccaṃ sādheti. Tassā kira vijjāya sādhaṃ puggalo tādise dese, kāle ca mantāṃ parijappetvā bahudhāpi attānaṃ dasseti, hatthiādīnīpi dasseti, adassanīyopi hoti,

aggithambhampi karoti, jalathambhampi karoti, ākāsepi attānaṃ dasseti, sabbaṃ indajālasadisam daṭṭhabbaṃ. **Aṭṭoti** dukkhito bādhitto. Tenāha “**pīlito**”ti.

Ādesanāpāṭihāriyavaṇṇanā

485. Kāmaṃ “**cetasika**”nti idaṃ ye cetasi niyuttā cittena sampayuttā, tesam sādharmaṇavacanam, sādharmaṇe pana gahite cittaviseso dassito nāma hoti. Sāmaññajotanā ca visese avatiṭṭhati, tasmā cetasikapadassa yathādhippetaṃ dassento “**somanassadomanassam adhippeta**”nti āha. **Somanassaggahaṇena** cettha tadekaṭṭhā rāgādayo, saddhādayo ca dhammā dassitā honti, **domanassaggahaṇena** dosādayo. Vitakkavicārā pana sarūpeneva dassitā. Pi-saddassa vattabbasampiṇḍanattho suviññeyyoti āha “**evaṃ tava mano**”ti, iminā pakārena tava mano pavattoti attho. Kena pakārenāti vuttaṃ “**somanassito vā**”tiādi. “**Evampi te mano**”ti idaṃ somanassitatādimattadassanaṃ, na pana yena somanassito vā domanassito vā, taṃ dassananti taṃ cittaṃ dassetuṃ pāliyaṃ “**itipi te citta**”nti vuttaṃ. Itisaddo cettha nidassanattho “atthīti kho kaccāna ayameko anto”tiādīsu (sam. ni. 2.15; 3.90) viya. Tenāha “**idañcidañca attha**”nti. **Pi**-saddo idhāpi vuttasampiṇḍanattho. Parassa cintaṃ manati jānāti etāyāti **cintāmaṇi** na-kārassa ṇa-kāraṃ katvā, sā eva pubbapadamantarena **maṇikā**. Cintā nāma na cittena vinā bhavati āha “**paesaṃ cittaṃ jānāti**”ti. “Tassā kira vijjāya sādhaṃko puggalo tādisse dese, kāle ca mantam pariappitvā yassa cittaṃ jānitukāmo, tassa diṭṭhasutādivisesasañjānanamukhena cittācāram anuminanto katheti”ti keci. “Vācam niccharāpetvā tattha akkharasallakkaṇavasena katheti”ti apare. Sā pana vijjā padakusalajātakena (jā. 1.9.49 ādayo) dīpetabbā.

Anusāsanīpāṭihāriyavaṇṇanā

486. Pavattentāti pavattanakā hutvā, pavattanavasena vitakkethāti vuttaṃ hoti. **Evanti** hi yathānusiṭṭhāya anusāsanīyā vidhivasena, paṭisedhavasena ca pavattiākāraparāmasanaṃ, sā ca anusāsanī sammāvītakkaṇam, micchāvītakkaṇaṃca pavattiākāradassanavasena tattha ānisaṃsassa, ādīnavassa ca vibhāvanattham pavattati. **Aniccasañña**eva, na niccasaññaṃ. Paṭiyogīnivattanatthañhi eva-kāraggaṇam. Idhāpi **evaṃ**-saddassa attho, payojanaṃca vuttanayeneva veditabbam. **Idam**-gahaṇepi eseva nayo. **Pañcakāmaguṇikarāganti** nidassanamattaṃ tadaññarāgassa ceva dosādīnaṃca pahānassa icchitattā, tappahānassa ca tadaññarāgādīkhepanassa upāyabhāvato duṭṭhalohitavimocanassa pubbaduṭṭhamamsakhepanūpāyatā viya. **Lokuttaradhammamevāti** avadhāraṇam paṭipakkabhāvato sāvajjadhammanivattanaparam daṭṭhabbam tassādhiḡamūpāyānisaṃsabhūtānaṃ tadaññesaṃ anavajjadhammānaṃ nānantarīkabhāvato. **Iddhividham iddhipāṭihāriyanti dasseti** iddhiyeva pāṭihāriyanti katvā. Sesapadadvayepi eseva nayo.

Pāṭihāriyapadassa pana vacanattham (udā. aṭṭha. paṭhamabodhisuttavaṇṇanā; itivu. aṭṭha. nidānavāṇṇanā) “paṭipakkhaharaṇato, rāgādīkilesāpanayanato pāṭihāriya”nti vadanti, bhagavato pana paṭipakkhā rāgādayo na santi ye haritabbā. Puthujjanānampi vigatupakkīlese aṭṭhaṅgagūnasamannāgate citte hatapaṭipakkhe iddhiividham pavattati, tasmā tattha pavattavohārena ca na sakkā idha “pāṭihāriya”nti vattum. Sace pana mahākāruṇikassa bhagavato veneyyagatā ca kilesā paṭipakkhā, tesam haraṇato “**pāṭihāriya**”nti vuttaṃ, evaṃ sati yuttametam. Atha vā bhagavato ceva sāsanaṃca paṭipakkhā titthiyā, tesam haraṇato **pāṭihāriyam**. Te hi diṭṭhiharaṇavasena, diṭṭhippakāsane asamatthabhāvena ca iddhiādesanānusāsaniṃ haritā apanītā hontīti. “**Paṭi**”ti vā ayaṃ saddo “pacchā”ti etassa attham bodheti “tasmim paṭipaviṭṭhamhi, añño āgañchi brāhmaṇo”ti (su. ni. 985; cūḷani. 4) **pārāyanasuttapade** viya, tasmā samāhite citte vigatupakkīlese ca katakiccena pacchā haritabbam pavattetabbanti pāṭihāriyam, attano vā upakkīlesesu catutthajjhānamaggehi haritesu pacchā haraṇam pāṭihāriyam, iddhiādesanānusāsaniyo ca vigatupakkīlesena katakiccena ca sattahitattham puna pavattetabbā, haritesu ca attano upakkīlesesu parasattānaṃ upakkīlesaharaṇāni hontīti pāṭihāriyāni nāma bhavanti, pāṭihāriyameva **pāṭihāriyam**. Pāṭihāriye vā iddhiādesanānusāsaniyamudāye bhavaṃ ekekaṃ “**pāṭihāriya**”nti vuccati. Pāṭihāriyam vā catutthajjhānam, maggo ca paṭipakkhaharaṇato, tattha jātam,

tasmiṃ vā nimittabhūte, tato vā āgatanti **pāṭihāriyaṃ**, iddhiādesanānusāsanihi vā parasantāne pasādādīnaṃ paṭipakkhassa kilesassa haraṇato vuttanayena **pāṭihāriyaṃ**. **Satataṃ dhammadesanāti** sabbakālaṃ desetabbadhammadesanā.

Iddhipāṭihāriyenāti sahādiyoge karaṇavacanaṃ, tena saddhiṃ āciṇṇanti attho. Itarattāpi esa nayo. Dhammasenāpatissa āciṇṇanti yojetabbaṃ. Tamatthaṃ khandhakavattunā sādiento “**devadatte**”tiādīmāha. **Gayāsīseti** gayāgāmassa avidūre gayāsīsanāmako hatthikumbhasadiso piṭṭhipāsāṇo atthi, yatha bhikkhusahassasapi okāso hoti, tasmiṃ piṭṭhipāsāṇe. “**Cittācāraṃ ṇatvā**”ti iminā ādesanāpāṭihāriyaṃ dasseti, “**dhammaṃ desesī**”ti iminā anusāsanīpāṭihāriyaṃ, “**vikubbanam dassetvā**”ti iminā iddhipāṭihāriyaṃ. **Mahānāgāti** mahākhīṇāsavā arahanto. “Nāgo”ti hi arahato adhivacanaṃ natthi āgu pāpametassāti katvā. Yathāha **sabhiyasutte** –

“Āguṃ na karoti kiñci loke,
Sabbasaṃyoge visajja bandhanāni;
Sabbattha na sajjatī vimutto,
Nāgo tādi pavuccate tathattā”ti. (su. ni. 527; mahāni. 80; cūḷani. 27, 139);

Aṭṭhakathāyaṃ panettha “dhammasenāpatissa dhammadesanaṃ sutvā pañcasatā bhikkhū sotāpattiphale paṭiṭṭhahimsu. Mahāmoggallānassa dhammadesanaṃ sutvā arahattaphale”ti (dī. ni. aṭṭha. 1.486) vuttaṃ. **Sanḅhabhedakakkhandhakapāliyaṃ** pana “atha kho tesam bhikkhūnaṃ āyasmatā sārīputtena ādesanāpāṭihāriyānusāsaniyā, āyasmatā ca mahāmoggallānena iddhipāṭihāriyānusāsaniyā ovadiyamānānaṃ anusāsīyamānānaṃ virajaṃ vītamalaṃ dhammacakkhuṃ udapādi ‘yaṃ kiñci samudayadhammaṃ, sabbaṃ taṃ nirodhadhamma’nti” (cūḷava. 345) ubhinnaṃpi therānaṃ dhammadesanāya tesam dhammacakkhupaṭilābhova dassito, tayidaṃ visadisavacanaṃ dīghabhāṇakānaṃ, khandhakabhāṇakānaṃca matibhedenāti daṭṭhabbaṃ. Saṅgāhakabhāsītā hi ayaṃ pāḷi, aṭṭhakathā ca teheva saṅgahamāropitā, apica pāliyaṃ uparimaggaphalampi saṅgahetvā “dhammacakkhuṃ udapādī”ti vuttaṃ yathā taṃ brahmāyusutte, (ma. ni. 2.343) cūḷarāhulovādasutte (ma. ni. 3.416) cāti veditabbaṃ.

“**Anusāsanīpāṭihāriyaṃ pana buddhānaṃ satataṃ dhammadesanā**”ti sātisayatāya vuttaṃ. **Saupārambhāni** yathāvuttana patirūpakena upārambhitabbato. **Sadosāni** parāropitadosasamucchindanassa anupāyabhāvato. Sadosattā eva **addhānaṃ na tiṭṭhanti** cirakālaṭṭhāyīni na honti. **Addhānaṃ atīṭṭhanato na niyyantīti** phalena hetuno anumānaṃ. Aniyānikatāya hi tāni anaddhaniyāni. **Anusāsanīpāṭihāriyaṃ anupārambhaṃ** visuddhippabhavato, visuddhinissayato ca. Tatoyeva **niddosaṃ**. Na hi tattha pubbāparavīrodhādidosasambhavo atthi. Niddosattā eva **addhānaṃ tiṭṭhati** parappavādavātehi, kilesavātehi ca anupahantabbato. **Addhānaṃ tiṭṭhanato niyyātīti** idhāpi phalena hetuno anumānaṃ. Niyyānikatāya hi taṃ addhaniyaṃ. **Tasmāti** yathāvuttakāraṇato, tena ca upārambhādiṃ, anupārambhādiñcāti ubhayaṃ yathākkamaṃ ubhayattha gārayhapāsamsabhāvānaṃ hetubhāvena paccāmasati.

Bhūtanīrodhesakavattuvaṇṇanā

487. Aniyānikabhāvadassanattanti yasmā mahābhūtapariyesako bhikkhu purimesu dvīsu pāṭihāriyesu vasippatto sukusalopī samāno mahābhūtaṃ aparisesanīrodhasaṅkhātaṃ nibbānaṃ nāvabujjhi, tasmā tadubhayāni niyyānāvahattābhāvato aniyānikānīti tesam aniyānikabhāvadassanattam. **Niyyānikabhāvadassanattanti** anusāsanīpāṭihāriyaṃ takkarassa ekantato niyyānāvahanti tasseva niyyānikabhāvadassanattam.

Evam etissā desanāya mukhyapayojanaṃ dassetvā idāni anusāngikapayojanaṃ dassetuṃ “**apicā**”tiādi āradhama. Niyyānameva hi etissā desanāya mukhyapayojanaṃ tassa tadatthabhāvato. **Buddhānaṃ** pana **mahantabhāvo** anusāngikapayojanaṃ atthāpattiyāva gantabbato. Kīdiso nāmesa

bhikkhūti āha “**yo mahābhūte**”tiādi. **Pariyesantoti** apariyesaṃ nirujjhanavasena mahābhūte gavesanto, tesam anavasesanirodham vīmaṃsantoti vuttaṃ hoti. **Vicaritvāti** dhammatāya codiyamāno paricaritvā. Dhammatāsiddham kiretaṃ, yadidaṃ tassa bhikkhuno tathā vicaraṇaṃ yathā abhijātiyaṃ mahāpathavikampādi. **Vissajjokāsanti** vissajjaṭṭhānaṃ, “**vissajjakara**”ntipi pāṭho, vissajjakanti attho. **Tasmāti** buddhameva pucchitvā nikkāṅkhattā, tasseva vissajjituṃ samatthatāyāti vuttaṃ hoti. **Mahantabhāvappakāsanatthanti** sadevake loke anaññasādhāraṇassa buddhānaṃ mahantabhāvassa mahānubhāvātāya dīpanattham. **Idaṅca kāraṇanti** “sabbesampi buddhānaṃ sāsane ediso eko bhikkhu tadānubhāvappakāsako hoti”ti imampi kāraṇaṃ.

Katthāti nimitte bhummaṃ, kasmim̃ ṭhāne kāraṇabhūtetī atthaṃ dassetuṃ “**kiṃ āgammā**”ti vuttaṃ, kiṃ āramaṇaṃ paccayabhūtaṃ adhigantvā adhigamanahetūti attho. Tenāha “**kiṃ pattassā**”ti. Kimāramaṇaṃ pattassa puggalassa nirujjantīti sambandho, hetugabbhavesesanametam. **Teti** mahābhūtā. **Appavattivāsenāti** puna anuppajjanavasena. **Sabbākārenāti** vacanattalakkhaṇarasapaccupaṭṭhānapadaṭṭhāna-samuṭṭhānalāpacuṇṇanānattekattavinibbhogāvinibbhogasabhāga-visabhāgaajjhātikabāhiraṅgahapaccayasamannāhārapaccayavibhāgākārato, sasambhārasaṅkhepasasambhāravibhattisalakkaṇasaṅkhepasalakkaṇavibhattiākārato cāti sabbena ākārena.

488. Dibbanti ettha pañcahi kāmagaṇehi samaṅgībhūtā hutvā vicaranti, kīḷanti, jotenti cāti **devā**, devalokā. Te yanti upagacchanti etenāti **devayāniyo** yathā “niyyānikā”ti (dha. sa. dukamātikā 97) ettha anīyasaddo katvatthe, tathā idha karaṇattheti daṭṭhabbaṃ. Tathā hi vuttaṃ “**tena hesā**”tiādi. **Vasaṃ vattentoti** ettha **vasavattanaṃ** nāma yathicchitaṭṭhānagamaṇaṃ. **Tanti** iddhividhaññaṃ. Cattāro mahārājāno etesaṃ issarāti **cātumahārājikā**. Kasmā panesa samīpe ṭhitaṃ sadevakalokapajjotaṃ bhagavantaṃ apucchitvā dūre deve upasaṅkamīti codanamapaneti “**samīpe ṭhita**”ntiādinā. “Ye devā maggaphalalābhino, tepi tamatthaṃ ekadesena jāneyyumaṃ, buddhavisayo pañyaṃ pañho pucchito”ti cintetvā “na jānāmā”ti āhaṃsu. Tenāha “**buddhavisaye**”tiādi. **Na labbhāti** na sakkā, ajjhottharaṇaṃ nāmettha pucchāya nibbādananti vuttaṃ “**punappunaṃ pucchati**”ti. “**Hatthato mocessāmā**”ti vohārasena vuttaṃ, handa naṃ dūramapanessāmāti vuttaṃ hoti. **Abhikkantatarāti** ettha **abhisaddo** atisaddatthoti āha “**atikkantatarā**”ti, rūpasampattiyā ceva paññāpaṭibhānādiguṇehi ca amhe abhibhuyya paresaṃ kāmanīyatarāti attho. **Pañitatarāti** uḷāratarā. Tena vuttaṃ “**uttamatarā**”ti.

491-493. Sahassakkho pana sakko abhisametāvī āgataphalo viññātasāsano, so kasmā taṃ bhikkhumaṃ upāyena niyyojesīti anuyogamaṇeti “**ayaṃ pana viseso**”tiādinā.

Khajjopanakanti rattiṃ jalantaṃ khuddakakimiṃ. **Dhamanto viyāti** mukhavātaṃ dento viya. **Atthi cevāti** ediso mahābhūtapariyesako **puggalo nāma** vijjamaṇo eva bhavēyya, mayā apesitoyeva pacchā jānissatīti adhippāyo. **Tatoti** tathā cintanato paraṃ. Iddhividhaññaṃseva adhippetattā **devayāniasadisova**. “**Devayāniyamaggoti vā...pe... abhiññāññaṇanti vā sabbametam iddhividhaññaṃseva nāma**”nti idaṃ pāḷiyaṃ, aṭṭhakathāsu ca tattha tattha āgataruḷhināmavasena vuttaṃ. Sabbāsūpi hi abhiññāsu devayāniyamaggādiekacittakkhaṇikaappaṇādināmaṃ yathārahaṃ sambhavati.

494. **Āgamanapubbabhāge nimittanti** brahmuno āgamaṇassa pubbabhāge uppajjanakanimittaṃ. Udayato pubbabhāgeti ānetvā sambandho. **Imeti** brahmakāyikā. **Veyyākaraṇenāti** byākaraṇena. **Anāraddhacittoti** anārādhacitto atuṭṭhacitto. **Vādanti** dosaṃ. **Vikkhepanti** vācāya vividhā khepanaṃ.

495. **Kuhakattāti** vuttanayena abhūtato aññesaṃ vimhāpetukāmattā. “**Guhakattā**”ti paṭhitvā guyhitukāmattāti atthampi vadanti keci.

Tīradassīsakuṇūpamāvaṇṇanā

497. Padesenāti ekadesena, upādinnakena sattasantānapariyāpannenāti attho. **Anupādinna**kepīti anindriyabaddhepi. **Nippadesatoti** anavasesato. **Tasmāti** tathā pucchitattā, pucchāya ayuttabhāvato ti adhippāyo. **Pucchāmūlhassāti** pucchitumajānanato pucchāya sammūlhassa. Vitathapañho hi “pucchāmūlho”ti vuccati yathā “maggamūlho”ti. **Pucchāya dosam dassetvāti** tena katapucchāya pucchitākāre dosam vibhāvetvā. **Pucchāvissajjananti** tathā sikkhāpitāya avitathapucchāya vissajjanam. Yasmā vissajjanam nāma pucchānurūpaṃ, pucchāsabhāgena vissajjetabbato, na ca tathāgatā virajjhivā katapucchānurūpaṃ virajjhivāva vissajjenti, atthasabhāgatāya ca vissajjanassa pucchakā tadattham anavabujjhantā sammuyhanti, tasmā puccham sikkhāpetvā avitathapucchāya vissajjanam buddhānamāciññanti veditabbaṃ. Tenāha “**kasmā**”tiādi. **Duviññāpayoti** yathāvuttakāraṇena duviññāpetabbo.

498. Na patiṭṭhāti paccayaṃ katvā na patiṭṭhahati. “Katthā”ti idaṃ nimitte bhumanti āha “**kiṃ āgammā**”ti. **Appatiṭṭhāti** appaccayā, sabbena sabbaṃ samucchinnakāraṇāti attho. **Upādinnaṃyevāti** indriyabaddhameva. Yasmā ekadisābhimukhaṃ santānavasena bahudhā saṅghite rūpappabandhe dīghasaññā, tamupādāya tato appakaṃ saṅghite rassasaññā, tadubhayañca visesato rūpaggaṇanamukhena gayhati, tasmā “**saṅghānavasena**”tiādi vuttaṃ. Appaparimāṇe rūpasānghāte aṇusaññā, tadupādāya tato mahati thūlasaññā, idampi dvayaṃ visesato rūpaggaṇanamukhena gayhatīti āha “**imināpi**”tiādi. “**Pi**-saddena cettha ‘saṅghānavasena upādārūpaṃ vutta’nti etthāpi vaṇṇamattameva kathitanti imamattam samuccināti”ti vadanti. Vaṇṇasaddo hettha rūpāyatanapariyāyova. **Subhanti** sundaram, iṭṭhanti attho. **Asubhanti** asundaram, aniṭṭhanti attho. Tenāha “**iṭṭhāniṭṭhārammaṇam panevaṃ kathita**”nti. Dīgham rassaṃ aṇuṃ thūlam subhāsubhanti tīsupi ṭhānesu rūpāyatanamukhena upādārūpasseva gahaṇam bhūtarūpānaṃ visuṃ gahitattāti daṭṭhabbaṃ. “Kattha āpo ca pathavī, tejo vāyo na gādhati”ti hi bhūtarūpāni visuṃ gayhanti. **Nāmanti** vedanādikkhandhacatukkaṃ. Tañhi ārammaṇābhimukhaṃ namanato, nāmakaraṇato ca “nāma”nti vuccati. Heṭṭhā “dīgham rassa”ntiādinā vuttameva idha ruppanaṭṭhena rūpasāññāya gahitanti dasseti “**dīghādibheda**”nti iminā. **Ādisaddena** āpādānañca saṅgaho. Yasmā vā dīghādisamaññā na rūpāyatanavatthukāva, atha kho bhūtarūpavatthukāpi. Tathā hi saṅghānaṃ phusanamukhenapi gayhati, tasmā dīgharassādiggahaṇena bhūtarūpampi gayhatevāti imamattam viññāpetum “dīghādibhedam rūpa” micceva vuttaṃ. **Kiṃ āgammāti** kiṃ adhigantvā kissa adhigamanahetu. “Uparujjhati”ti idaṃ anuppādanirodham sandhāya vuttaṃ, na khaṇanirodhanti āha “**asesametaṃ nappavattati**”ti.

499. Tatra veyyākaraṇam bhavāti anusandhivacanamattam cuṇṇiyapāṭham vatvā veyyākaraṇavacanabhūtam **viññāṇantiādīm** silokamāhāti adhippāyo. **Viññātabbanti** visiṭṭhena ñāṇena ñātabbaṃ, sabbañāṇuttamena ariyamaggañāṇena paccakkhato jānitabbanti attho. Tenāha “**nibbānassetam nāma**”nti. Nidassīyateti **nidassanam**, cakkhuvīññeyyam, na nidassanam **anidassanam**, acakkhuvīññeyyanti attham vadanti. **Nidassanam** vā upamā, tadetassa natthīti **anidassanam**. Na hi nibbānassa niccassa ekabhūtassa accantapaṇītasabhāvassa sadisaṃ nidassanam kutoci labbhatīti. Yam ahutvā sambhoti, hutvā paṭiveti, tam saṅkhatam udayavayantehi saantaṃ, asaṅkhatassa pana nibbānassa niccassa te ubhoṇi antā na santi, tato eva navabhāvāpagamasāṅkhātā jaratāpi tassa natthīti vuttaṃ “**uppādanto vā**”tiādi. Tattha **uppādantoti** uppādāvattā. **Vayantoti** bhaṅgāvattā. **Ṭhitassa aññathattantoti** jaratā vuttā. Avasesaggahaṇena ṭhitāvattā anuññātā hoti. **Titthassāti** pānatitthassa. Tattha nibbacaṇam dasseti “**tañhi**”tiādinā. **Papantīti** pakārena pivanti. Tathā hi ācariyena vuttaṃ “papanti etthāti papanti vuttaṃ. Ettha hi papanti pānatittha”nti (dī. ni. ṭī. 1.499) niruttinayena, yathārutalakkhaṇena vā **pa-kārassa bha-kāro kato**. **Sabbatoti** sabbakammaṭṭhānamukhato. Tenāha “**aṭṭhatimsāya kammaṭṭhānesu yena yena mukhenā**”ti. Ayam aṭṭhakathāto aparo nayo – pakārena bhāsanam jotanam **pabhā**, sabbato pabhā assāti **sabbatopabham**, kenaci anupakkiliṭṭhatāya samantato pabhassaram visuddhanti attho. **Ettha nibbāneti** nimitte bhummaṃ dasseti “**idaṃ nibbānam āgammā**”ti iminā. Yena nibbānamadhigataṃ, tam santatipariyāpannānaṃyeva idha anuppādanirodho adhippetoti vuttaṃ “**upādinna**kadhammajātam **nirujjhati, appavattam hotī**”ti.

Tatthāti yadetam “viññāṇassa nirodhenā”ti padaṃ vuttaṃ, tasmim. Viññāṇaṃ uddharati tassa vibhajjitabbattā. **Carimakaviññāṇanti** arahato cuticittasaṅkhātaṃ parinibbānacittaṃ. **Abhisāṅkhāraviññāṇanti** puññādiabhisāṅkhāraccittaṃ. **Etthetaṃ uparujjhatī**ti etasmim nibbāne etaṃ nāmarūpaṃ anupādisesāya nibbānadhātuyā nirujjhati. Tenāha “**vijjhāta...pe... bhāvaṃ yātī**”ti. **Vijjhātadīpasikhā viyāti** nibbutadīpasikhā viya. “**Abhisāṅkhāraviññāṇassāpī**”tiādina saupādisesanibbānadhātumukhena anupādisesanibbānadhātumeva vadati nāmarūpassa anavasesato uparujjhanassa adhippetattā. Tena vuttaṃ “**anuppādavaseṇa uparujjhatī**”ti. **Sotāpattimaggañāṇenāti** kattari, karaṇe vā karaṇavacanam, **nirodhenāti** pana hetumhi. **Etthāti** nibbāne. Sesam sabbattha uttānatthameva.

Iti sumaṅgalavilāsiniyā dīghanikāyatthakathāya
paramasukhumagambhīraduranubodhatthaparidīpanāya suvimalavipulapaññāveyyattiyajananāya
sādhuvilāsiniyā nāma līnatthapakāsaniyā kevaṭṭasuttavaṇṇanāya līnatthapakāsana.

Kevaṭṭasuttavaṇṇanā niṭṭhitā.

12. Lohiccasuttavaṇṇanā

Lohiccabrāhmaṇavatthuvaṇṇanā

501. Evaṃ kevaṭṭasuttaṃ samvaṇṇetvā idāni lohiccasuttaṃ samvaṇṇento yathānupubbam samvaṇṇanokāsassa pattabhāvaṃ vibhāvetum, kevaṭṭasuttassānantaraṃ saṅgītassa suttassa lohiccasuttabhāvaṃ vā pakāsetum “**evaṃ me sutam...pe... kosalesūti lohiccasutta**”nti āha. **Sālavatikāti** karaṇamantarena itthilingavasena **tassa gāmassa nāmaṃ**. Gāmaṇikābhāvenāti keci. **Vatīyāti** kaṅṭhakasākhādivatīyā. **Lohito** nāma tassa kule pubbapuriso, tabbamsavasena lohitassa apaccaṃ **lohiccoti** brāhmaṇassa gottato āgatanāmaṃ.

502. “Kiñhi paro parassa karissatī”ti **parānukampā virahitattā lāmakaṃ**. Na tu ucchedasassatānaṃ aññatarassāti āha “**na panā**”tiādi. Diṭṭhigatanti hi laddhimattaṃ adhippetam, aññathā ucchedasassataggāhavinimutto koci diṭṭhiggāho nāma natthīti tesamaññataraṃ siyā. “Uppannaṃ hotī”ti idaṃ manasi, vacasi ca uppannatāsādhāraṇavacananti dasseti “**na kevalañcā**”tiādina. **So kira...pe... bhāsatiyevāti** ca tassā laddhiyā loke pākaṭabhāvaṃ vadati. Yasmā pana attato añño paro hoti, tasmā yathā anusāsakato anusāsitabbo paro, evaṃ anusāsitabbatopi anusāsakoti dassetuṃ “**paro**”tiādi vuttaṃ. **Kim**-saddāpekkhāya cettha “**karissatī**”ti anāgatakālavacanam, anāgatepi vā tena tassa kātabbam natthīti dassanattham. **Kusalam dhammanti** anavajjadhammaṃ nikkilesadhammaṃ, vimokkhadhammanti attho. “Paresam dhammaṃ kathessāmī”ti tehi attānaṃ parivārāpetvā vicaraṇam kimatthiyam, āsayavuddhassapi anurodhena vinā tam na hoti, tasmā **attanā...pe... vihātabbanti vadati**. Tenāha “evaṃsampadamidaṃ pāpakaṃ lobhadhammaṃ vadāmī”ti.

504. “**Itthilingavasena**”ti iminā pullingikassapi atthassa itthilingasamaññāti dasseti. **Soti** lohiccabrāhmaṇo. **Bhāroti** bhagavato parisabāhullattā, attano ca bahukiccakaraṇīyattā garu dukkaraṃ.

508. **Kathāphāsukatthanti** kathāsukhattham, sukkena katham kathetuñceva sotuñcāti attho. **Ayam upāsakoti** rosikanhāpitaṃ āha. **Appeva nāma siyāti** ettha pītivasena āmedītam daṭṭhabbam. Tathā hi tam “buddhagajjita”nti vuccati. Bhagavā hi īdisesu ṭhānesu visesato pītisomanassajāto hoti, tasmā pītivasena paṭhamam gajjati, dutiyampi anugajjati. Kim visesam gajjanamanugajjananti vuttaṃ “**aya**”ntiādi. Ādo bhāsanaṃ **allāpo**, saññoge pare rasso. Taduttari saha bhāsanaṃ **sallāpo**.

Lohiccabrāhmaṇānuyogaṇṇanā

509. Samudayasañjātīti āyuppādoti āha “**bhoguppādo**”ti. **Tatoti** sālavatikāya. **Lābhanārāyakaroti** dhanadhaññalābhassa antarāyakaro. Anupubbo kapi-saddo ākañhanatthoti dasseti “**icchati**”ti iminā. Ayaṃ aṭṭhakathāto aparo nayo – sātisayena hitena anukampako anuggaṇhanako **hitānukampīti**. **Sampajjatīti** āsevanalābhena nippajjati, balavati hoti avaggahāti attho. Tena vuttaṃ “**niyatā hoti**”ti.

510-511. Dutiyam upapattinti “nanu rājā pasenadikosalo”tiadinā vuttaṃ dutiyam upapattim ṭhānaṃ yuttim. Kāraṇaṇhi bhagavā upamāmukhena dasseti, imāya ca upapattiyā tumhe ceva aññe cāti lohiccampi antokatvā samvejanaṃ kataṃ hoti. Ye ca ime kulaputtā dibbā gabbhā paripācentīti yojanā. Upanissayasampattiyā, ñāṇaparipākassa vā abhāvena **asakkontā**. Kammapadena atulyādhikaraṇattā paripācenti kiriyāya vibhattivipallāsena **upayogatthe paccattavacanaṃ**. Ye pana “paripaccanti”ti kammarūpena paṭhanti, tesam mate vibhattivipallāsena payojanaṃ natthi kammakattubhāvato, attho panassa dutiyavikappe vuttanayena dānādipuññaviseso veditabbo. Ahitānukampādītā ca tassa taṃsamaṅgīsattavasena hoti. Divi bhavāti **dibbā**. Gabbhenti paripaccanavasena attani pabandhentīti **gabbhā**, devalokā. “**Channaṃ devalokāna**”nti nidassanavacanametam. Brahmlokassāpi hi dibbagabbhabhāvo labbhateva dibbavihārahetukattā. Evañca katvā “bhāvanaṃ bhāvayamānā”ti idampi vacanaṃ samatthitaṃ hoti. “Devalokagāminim paṭipadaṃ pūrayamānā”ti vatvā taṃ paṭipadaṃ sarūpato dassetuṃ “**dānaṃ dadamānā**”tiadi vuttaṃ. Bhavanti ettha yathārucci sukhasamappitāti **bhavā**, vimānāni. Devabhāvavahattā **dibbā**. Vuttanayeneva **gabbhā**. **Dānādayo** devalokasamvattanika **puññavisesā**. **Dibbā bhavāti** idha devalokapariyāpannā upapattibhavā adhippetā. Tadāvaho hi kammabhavo pubbe gahitoti āha “**devaloke vipākakkhandhā**”ti.

Tayocodanārahavaṇṇanā

513. Aniyāmitenevāti aniyamiteneva, “tvaṃ evaṃ diṭṭhiko, evaṃ sattānaṃ anattassa kārako”ti evaṃ anuddesikeneva. Sabbalokapattatāyā laddhiyā samuppajjanato **yāva bhavaggā uggataṃ**. **Mānanti** “ahametaṃ jānāmi, ahametaṃ passāmi”ti evaṃ pavattaṃ paṇḍitamānaṃ. **Bhinditvāti** vidhametvā, jahāpetvāti attho. **Tayo sathhāreti** asampāditaattahito anovādakarasāvako ca asampāditaattahito ovādakarasāvako ca sampāditaattahito anovādakarasāvako ceti ime tayo sathhāre. Catuttho pana sammāsambuddho na codanāraho, tasmā “taṃ tena pucchito eva kathessāmī”ti codanāraheva tayo sathhāre paṭhamaṃ dasseti, pacchā catutthaṃ sathhāraṃ. Kāmañcettha catuttho sathhā eko adutiyo anaññasādhāraṇo, tathāpi so yesaṃ uttarimanussadhammānaṃ vasena “dhammamayo kāyo”ti vuccati, tesam samudāyabhūtopi te guṇāvayave sattuṭṭhāniye katvā dassento bhagavā “ayampi kho lohicca sathhā”ti abhāsi.

Aññāti ya-kāralopaniddeso “sayam abhiññā”tiādīsu (dī. ni. 1.28, 37; ma. ni. 1.154, 444) viya, tadatthe cetam sampadānavacananti dasseti “**aññāyā**”tiadinā. Sāvakattaṃ paṭijānitvā ṭhitattā ekadesenassa sāsanaṃ karontīti āha “**nirantaraṃ tassa sāsanaṃ akatvā**”ti. **Ukkamitvā ukkamitvāti** kadāci tathā karaṇaṃ, kadāci tathā akaraṇaṇca sandhāya vicchāvacanaṃ, yadicchitaṃ karontīti adhippāyo. **Paṭikkamantiyāti** anabhiratiyā agāravena apagacchantiyā. Tena vuttaṃ “**anicchantiyā**”tiadi. **Ekāyāti** adutiya itthiyā, **sampayoganti** methunadhammasamāyogaṃ. **Eko iccheyyāti** adutiyo puriso sampayogaṃ iccheyyāti ānetvā sambandho. Osakkanādīmukhena itthipurisasambandhanidassanaṃ gehassitāgehassitaapekkhavasena tassa sathhuno sāvakesu paṭipattidassanatthaṃ. Ativirattabhāvato **datṭhumpi anicchamaṇaṃ parammukhiṃ ṭhitaṃ** itthim. **Lobhenāti** parivāraṃ nissāya uppajjanakalābhasakkāralobhena. **Īdisoti** evaṃsabhāvo sathhā. **Yenāti** lobhadhammena. **Tattha sampādehīti** tasmim paṭipattidhamme patiṭṭhitaṃ katvā sampādehi. Kāyavānkādivigamena **ujum karohi**.

514. Sassarūpakāni tiṇānīti sassasadisāni nīvārāditiṇāni.

515. Evaṃ codanaṃ arahatīti vuttanayena sāvakesu appossukabhāvāpādane niyojanavasena

codanaṃ arahatī, na paṭhamo viya “evarūpo tava lobhadhammo”tiādinā, na ca dutiyo viya “attānameva tāva tatta sampādehī”tiādinā. Kasmā? Sampāditaattahitatāya tatiyassa.

Nacodanārahasatthuvaṇṇanā

516. Na codanārahoti ettha yasmā codanārahatā nāma satthuvippaṭṭipattiyā vā sāvaka vippaṭṭipattiyā vā ubhayavippaṭṭipattiyā vā hoti, tayidaṃ sabbampi imasmiṃ satthari natthi, tasmā na codanārahoti imamatthaṃ dassetuṃ “**ayañhī**”tiādi vuttaṃ. **Assavāti** paṭṭissavā.

517. Mayā gahitāya diṭṭhiyāti sabbaso anavajje anupavajje sammāpaṭipanne, paresaṅca sammadeva sammāpaṭipattiṃ dassente satthari abhūtaḍḍāropanavasena micchāgahitāya niraya gāminiyā pāpadiṭṭhiyā. **Narakapapātanti** narakasaṅkhātāṃ mahāpapātāṃ. Papatanti etthāti hi **papāto**. **Dhammadesanāhatthenāti** dhammadesanāsaṅkhātena hatthena. **Saggamaggathaleti** saggagāmi maggabhūte puññadhammathale, cātumahārājikādisaggasotāpattiādimaggasaṅkhāte vā thale. Sesāṃ suviññeyyameva.

Iti sumaṅgalavilāsiniyā dīghanikāyatṭhakathāya paramasukhumagambhīraduranubodhatthaparidīpanāya suvimalavipulapaññāveyyattiyajananāya sādhuvilāsiniyā nāma līnatthapakāsaniyā lohicca suttavaṇṇanāya līnatthapakāsānā.

Lohicca suttavaṇṇanā niṭṭhitā.

13. Tevijjasuttavaṇṇanā

518. Evaṃ lohicca suttam samvaṇṇetvā idāni tevijjasuttam samvaṇṇento yathānupubbaṃ samvaṇṇanokāsassa patta bhāvaṃ vibhāvetuṃ, lohicca suttassānantaram saṅgītassa suttassa tevijjasuttabhāvaṃ vā pakāsetuṃ “**evaṃ me sutam...pe... kosalesūti tevijjasutta**”nti āha. **Nāmanti** nāmamattaṃ. Disāvācīsaddato payujjamaṇo **enasaddo** aduratthe icchito, tappayogena ca pañcamiyatthe sāmivacanaṃ, tasmā “uttarenā”ti padena adūratthajotanaṃ, pañcamiyatthe ca sāmivacanaṃ dassetuṃ “**manasākaṭato avidūre uttarapasse**”ti vuttaṃ. “Disāvācīsaddato pañcamīvacanassa adūratthajotanato adūratthaṃ dassetuṃ enasaddena evaṃ vutta”nti keci, sattamiyatthe cetāṃ tatiyāvacaṇaṃ “pubbena gāmaṃ ramaṇīya”ntiādisu viya. “Akkharacintakā pana ena-saddayoge avadhivācīni pade upayogavacanaṃ icchanti, attho pana sāmivaseneva icchito, tasmā idha sāmivacanaseneva vutta”nti (dī. ni. tī. 1.518) ayaṃ ācariyamati. **Taruṇambarukkkhasaṇḍeti** taruṇambarukkkhasamūhe. Rukkhasamudāyassa hi vanasamaññā.

519. Kulacārittādisampattiyāti ettha ādisaddena mantajjhenābhirūpatādisampattiṃ saṅgaṇhāti. **Tattha tatthāti** tasmīṃ tasmīṃ dese, kule vā. Te nivāsaṭṭhānena visesento “**tatthā**”tiādimāha. **Mantasajjhāyakaraṇatthanti** āthabbaṇamantānaṃ sajjhāyakaraṇatthaṃ. Tena vuttaṃ “aññesaṃ bahūnaṃ pavesanaṃ nivāretvā”ti. **Nadīṭireti** aciravatiyā nadiyā tīre.

Maggāmaggakathāvaṇṇanā

520. Jaṅghacāranti caṅkamaṇa, ito cito ca vicaraṇaṃ. So hi jaṅghāsu kilamathavinodanattaṃ caraṇato “jaṅghavihāro, jaṅghacāro”ti ca vutto. Tenāha pāḷiyaṃ “anucaṅkamantānaṃ anuvicāraṇāna”nti. Cuṇṇamattikādi **nhānīyasambhāro**. **Tena vuttanti** ubhosupi anucaṅkamaṇānuvicāraṇānaṃ labbhanato evaṃ vuttaṃ. Maggo cettha brahmalokagamaṇūpāyapaṭipadābhūto ujumaggo. Icchitaṭṭhānaṃ ujukaṃ maggati upagacchati etenāti hi **maggo**, tadañño **amaggo**, a-saddo vā vuddhiattho daṭṭhabbo. Tathā hi “**katamaṃ nu kho**”tiādinā maggameva dasseti. **Paṭipadanti** brahmalokagāmi maggassa pubbabhāgapaṭipadaṃ.

Añjasāyanoti ujumaggassa vevacanam pariyāyadvayassa atirekatthadīpanato yathā “padatthāna”nti. Dutiyaavikappe añjasasaddo ujukapariyāyo. Niyyātīti niyyāniyo, so eva **niyyānikoti** dasseti “**niyyāyanto**”ti iminā. **Niyyāniko niyyātīti** ca ekantaniyyānaṃ vuttaṃ, **gacchanto** hutvā **gacchatīti attho**. Kasmā maggo “niyyātī”ti vutto, nanvesa gamane abyāpāroti? Saccam. Yasmā panassa niyyātu-puggalavasena niyyānabhāvo labbhati, tasmā niyyāyantapuggalassa yoniso paṭipajjanavasena **niyyāyanto** maggo “**niyyātī**”ti vutto. **Karotīti** attano santāne uppādeti. Tathā uppādentoyeva hi taṃ paṭipajjati nāma. Saha byeti vattatīti **sahabyo**, sahavattanako, tassa bhāvo **sahabyatāti** vuttaṃ “**sahabhāvāyā**”ti. **Sahabhāvoti** ca salokatā, samīpatā vā veditabbā. Tathā cāha “**ekaṭṭhāne pātubhāvāyā**”ti. **Sakamevāti** attano ācariyena pokkharasātīnā kathitameva. **Thometvāti** “ayameva ujumaggo ayamañjasāyano”tiādīnā pasamsivā. Tathā **paggaṇhitvā**. Bhāradvājopi sakameva attano ācariyena tārukkena kathitameva ācariyavādaṃ thometvā paggaṇhitvā vicaratīti yojanā. **Tena vuttanti** yathā tathā vā abhinivīṭṭhabhāvena pāliyaṃ vuttaṃ.

521-522. Aniyānikāvāti appāṭihārikāva, aññamaññassa vāde dosaṃ dassetvā aviparītatthadassanattaṃ uttararahitā evāti attho. **Tulanti** mānapatthatulama. Aññamaññāvādassa āditova viruddhaggahaṇaṃ **viggaho**, sveva vivadanavasena aparāparaṃ uppanno **vivādoti** āha “**pubbuppattiko**”tiādi. **Duvidhopi esoti** viggaho, vivādoti dvidhā vuttopi eso virodho. **Nānācariyānaṃ vādatoti** nānārucikānaṃ ācariyānaṃ vādabhāvato. **Nānāvādo** nānāvidho vādoti katvā, adhunā pana “nānācariyānaṃ vādo nānāvādo”ti pāṭho.

523. Ekassāpīti tumhesu dvīsu ekassāpi. **Ekasminti** sakavādaparavādesu ekasmimpi. **Saṃsayo natthīti** “maggo nu kho, na maggo”ti vicikicchā natthi, añjasānañjasābhāve pana saṃsayo. Tena vuttaṃ “esa kirā”tiādi **evaṃ satīti** yadi sabbattha maggasaññino, evaṃ sati “**kismiṃ vo viggaho**”ti bhagavā **pucchati**. Itisaddena cetha ādyatthena vivādo, nānāvādo ca saṅgahito.

524. “Icchitaṭṭhānaṃ ujukaṃ maggati upagacchati etenāti maggo, ujumaggo. Tadañño amaggo, a-saddo vā vuddhiattho daṭṭhabbo”ti heṭṭhā vuttovāyamattho. **Anujumaggeti** etthāpi a-saddo vuddhiattho ca yujjati. **Tameva vatthunti** sabbesampi brāhmaṇānaṃ maggassa maggabhāvasaṅkhātāṃ, sakamaggassa ujumaggabhāvasaṅkhātāṃca vatthum. **Sabbe teti** sabbe te nānācariyehi vuttamaggā, ye pāliyaṃ “addhāriyā brāhmaṇā”tiādīnā vuttā. Ayamettha pāliattho – **addharo** nāma yaññaviseso, tadupayogibhāvato **addhāriyāni** vuccanti yajūni, tāni sajjhāyantīti **addhāriyā**, yajuvedino. Tittirinā nāma isinā katā mantāti **tittirā**, te sajjhāyantīti **tittiriyā**, yajuvedino eva. Yajuvedasākhā hesā, yadidaṃ tittiranti. **Chando** vuccati visesato sāmavedo, taṃ sarena kāyantīti **chandokā**, sāmavedino. “**Chandogā**”tipi tatiyakkharena paṭhanti, so evattho. Bahavo iriyo thomanā etthāti **bavhāri**, iruvedo, taṃ adhīyantīti **bavhārijjhā**.

Bahūnti etthāyaṃ upamāsaṃsandānā – yathā te nānāmaggā ekaṃsato tassa gāmassa vā nigamassa vā pavesāya honti, evaṃ brāhmaṇehi paññāpiyamānāpi nānāmaggā ekaṃsato brahmalokūpagamanāya brahmunā sahabyatāya hontīti.

525. Paṭijānitvā pacchā niggayhamānā avajānantīti pubbe niddosataṃ sallakkhamānā paṭijānitvā pacchā sadosabhāvena niggayhamānā “netam mama vacana”nti avajānanti, na paṭijānantīti attho.

527-529. Te tevijjāti tevijjakā te brāhmaṇā. Evasaddena ñāpīto attho idha natthīti va-kāro gahito, so ca anattakovāti dasseti “**āgamasandhimatta**”nti iminā, vaṇṇāgamena padantarāsandhimattaṃ katanti attho. **Andhapaveṇīti** andhapanti. “**Paṇṇāsasatthi andhā**”ti idaṃ tassā andhapaveṇiyā mahato gacchagumbassa anuparigamanayogyatādassanaṃ. Evañhi te “suciraṃ velaṃ mayaṃ maggaṃ gacchāmā”ti saññino honti. Andhānaṃ paramparasamsattavacanena yaṭṭhigāhakavirahatā dassitīti vuttaṃ “**yaṭṭhigāhakenā**”tiādi. Tadudāharaṇaṃ dassentena “**eko kirā**”tiādi āraddham. **Anuparigantvāti** kañci kālaṃ anukkamena samantato gantvā. **Kacchanti** kacchabandhadussakaṇṇaṃ.

“Kacchaṃ bandhantī” tiādīsu (cūḷava. aṭṭha. 280; vi. saṅga. aṭṭha. 34.42) viya hi kacchasaddo nibbasanavisesapariyāyo. Apica **kacchanti** upakacchakaṭṭhānaṃ. “Sambādho nāma ubho upakacchakā muttakaraṇa” ntiādīsu (pāci. 800) viya hi kāyekadesavācako kacchasaddo. **Cakkhumāti** yaṭṭhigāhakaṃ vadati. “**Purimo**” tiādī yathāvuttakkamena veditabbo. **Nāmakaññevāti** atthābhāvato nāmamattameva, taṃ pana bhāsitaṃ tehi sārasaññitampi nāmamattatāya asārabhāvato nihīnamevāti atthamattaṃ dasseti “**lāmakamyevā**” ti iminā.

530. Yoti brahmaloko. Yatoti bhummatthe nissakkavacanaṃ. Sāmaññajotanāya visese avatiṭṭhanato visesaparāmasanaṃ dassetuṃ “**yasmiṃ kāle**” ti vuttaṃ. “**Uggamanakāle**” tiādīnā pakaraṇādhigatamāha. **Āyācantīti** uggamanaṃ patthenti. Kasmā? Lokassa bahukārabhāvato. Tathā thomanādīsu. **Sommati** sītalo. Ayaṃ kira brāhmaṇānaṃ laddhi “pubbebrāhmaṇānamāyācanāya candimasūriyā” gantvā loke obhāsaṃ karontī” ti.

532. Idha pana kiṃ vattabbanti imasmiṃ pana appaccakkhabhūtassa brahmuno sahabyatāya maggadesane tevijjānaṃ brāhmaṇānaṃ kiṃ vattabbaṃ atthi, ye paccakkhabhūtānampi candimasūriyānaṃ sahabyatāya maggaṃ desetūṃ na sakkontīti adhippāyo. “**Yatthā**” ti iminā “idhā” ti vuttamevatthaṃ paccāmasati.

Aciravatīnadiupamākathāvaṇṇanā

542. Samabharitāti sampuñṇā. Tato eva **kākapeyyā. Pārāti** pārimatīra, ālapanametanti dassetuṃ “**ambho**” ti vuttaṃ. **Apāranti** orimatīraṃ. **Ehīti** āgacchāhi. **Vatāti** ekaṃsena. Atha gamissasi, evaṃ sati ehīti yojanā. “**Atthime**” tiādī avhānakāraṇaṃ.

544. Pañcasīla...pe... veditabbā yamaniyamādibrāhmaṇadhammānaṃ tadantogadhabhāvato. **Tabbiparītāti** pañcasīlādiviparītā pañcaverādayo. **Indanti** indanāmakam devaputtaṃ, sakkam vā. “**Aciravatiyā tīre nisinno**” ti iminā yassā tīre nisinno, tadeva upamaṃ katvā āharati dhammarājā dhammadhātuyā suppaṭividdhattāti dasseti. “Punapī” ti vatvā “**aparampī**” ti vacanaṃ itarāyapi nadīupamāya saṅgaṇhanatthaṃ.

546. Kāmayitabbaṭṭhenāti kāmanīyabhāvena. **Bandhanaṭṭhenāti** kāmayitabbato sattānaṃ cittassa ābandhanabhāvena. Kāmañcāyaṃ guṇasaddo atthantaresupi diṭṭhapayogo, tesam panettha asambhavato pārisesañāyena bandhanaṭṭhoyeva yuttoti dassetuṃ ayamatthuddhāro āraddho. **Ahatānanti** adhotānaṃ abhinavānaṃ. **Etthāti** khandhakapālipade **paṭalaṭṭhoti** paṭalasaddassa, paṭalasaṅkhāto vā attho. **Guṇaṭṭhoti** guṇasaddassa attho nāma. Esa nayo sesesupi. **Accentīti** atikkamma pavattanti. **Etthāti** somanassajātakapālipade. **Dakkhiṇāti** tiracchānagate dānacetanā. **Etthāti** dakkhiṇavibhaṅgasuttapade (ma. ni. 3.379) **mālāguṇeti** mālādāme. **Etthāti satipaṭṭhāna-** (dī. ni. 2.378; ma. ni. 1.109) **dhammapadapālipadesu**, (dha. pa. 53) nidassanamattañcetam koṭṭhāsāpadhānasīlādisukkādisampadājiyāsupi pavattanato. Hoti cettha –

“Guṇo paṭalarāsānisamaṃse koṭṭhāsabandhane;
Sīlasukkādyapadhāne, sampadāya jiyāya cā” ti.

Esevāti bandhanaṭṭho eva. Na hi rūpādīnaṃ kāmetabbabhāve vuccamāne paṭalaṭṭho yujjati tathā kāmetabbatāya anadhippetattā. Rāsaṭṭhādīsupi eseva nayo. Pārisesato pana bandhanaṭṭhova yujjati. Yadaggena hi nesam kāmetabbatā, tadaggena bandhanabhāvoti.

Koṭṭhāsaṭṭhopi cettha yujjateva cakkhuviññeyyādikoṭṭhāsabhāvena nesam kāmetabbato. Koṭṭhāse ca guṇasaddo dissati “diguṇam vaḍḍhetabba” ntiādīsu viya.

“Asaṅkhyeyyāni nāmāni, saṅṅena mahesino;

Guṇena nāmamuddheyyaṃ, api nāmasahassato’’ti. (dha. sa. aṭṭha. 1313; udā. aṭṭha. 53; paṭi. ma. aṭṭha. 1.1.76) –

Ādisu pana sampadāṭṭho guṇasaddo, sopi idha na yujjatīti anuddhaṭo.

Dassanameva idha vijānananti āha “**passitabbā**’’ti. “Sotaviññāṇena sotabbā’’tiādiattham “**etenupāyenā**’’ti atidisati. Gavesitāpi “**iṭṭhā**’’ti vuccanti, te idha nādhippetāti dassetuṃ “**pariyiṭṭhā vā hontu mā vā**’’ti vuttaṃ. Icchitā eva hi idha **iṭṭhā**, tenāha “**iṭṭhārammaṇabhūtā**’’ti, sukhārammaṇabhūtāti attho. **Kāmaṇiyāti** kāmetabbā. Iṭṭhabhāvena maṇaṃ appayanti vadḍhentīti **manāpā**. **Piyajātikāti** piyasabhāvā. **Ārammaṇaṃ katvāti** attānamārammaṇaṃ katvā. Kammabhūte ārammaṇe sati rāgo uppajjatīti taṃ kāraṇabhāvena nidassento “**rāgupattikāraṇabhūtā**’’ti āha.

Gedhenāti lobhena. Abhibhūtā hutvā pañca kāmagaṇe paribhuñjantīti yojanā. **Mucchākāranti** mohanākāraṃ. **Adhiosannāti** adhigayha ajjhosāya avasannā. Tena vuttaṃ “**ogālhā**’’ti. **Sānanti** avasānaṃ. **Pariniṭṭhānappattāti** gilivā pariniṭṭhāpanavasena pariniṭṭhānaṃ uyyātā. **Ādīnavanti** kāmaparibhoge sampati, āyatiñca dosaṃ **apassantā**. Ghāsacchādanādisambhoganimittasaṃkilesato nissaranti apagacchanti etenāti **nissaraṇaṃ**, yoniso paccavekkhitvā tesam paribhogapaññā. Tadabhāvato **anissaraṇapaññāti** atthaṃ dassento “**idametthā**’’tiādimāha. **Paccavekkhaṇaparibhogavirahitāti** yathāvuttapaccavekkhaṇāñāṇena paribhogato virahitā.

548-9. Āvarantīti kusaladhammuppattiṃ ādito vārenti. **Nivārentīti** niravasesato vārayanti. **Onandhantīti** ogāhantā viya chādentī. **Pariyonandhantīti** sabbaso chādentī. **Āvaraṇādīnaṃ vassenāti** yathāvuttānaṃ āvaraṇādiatthānaṃ vasena. Te hi āsevanabalavatāya purimapurimehi pacchimapacchimā dalḥataratamādibhāvappattā.

Saṃsandanakathāvaṇṇanā

550. Itthipariggahe sati purisassa pañcakāmaguṇapariggaho paripuṇṇo eva hotīti vuttaṃ “**itthipariggahena sapariggaho**’’ti. “**Itthipariggahena apariggaho**’’ti ca idaṃ tevijjabrāhmaṇesu dissamānapariggahānaṃ duṭṭhullatamapariggahābhāvadassanaṃ. Evaṃ bhūtānaṃ tevijjānaṃ brāhmaṇānaṃ kā brahmunā saṃsandana, brahmā pana sabbena sabbaṃ apariggahoti. **Veracittena avero**, kuto etassa verapayogoti adhippāyo. **Cittagelaññasaṅkhātenāti** cittuppādagelaññasaññitena, iminā tassa rūpakāyagelaññabhāvo vutto hoti. **Byāpajjenāti** dukkhena. **Uddhaccakukkuccādīhīti** ettha **ādisaddena** tadekaṭṭhā saṃkilesadhama saṅgayhanti. Atoyevettha “**uddhaccakukkuccābhāvato**’’ti tadubhayābhāvamattahetuvacanaṃ samatthitaṃ hoti. Appaṭipattihetubhūtāya vicikicchāya sati na kadāci cittaṃ purisassa vase vattati, pahīnāya pana tāya siyā cittaṃ purisavase vattananti āha “**vicikicchāyā**’’tiādi. **Cittagatikāti** cittavasikā. Tena vuttaṃ “**cittassa vase vattanti**’’ti. **Na tādisoti** brāhmaṇā viya na cittavasiko hoti, atha kho vasībhūtājhānābhīñātāya cittaṃ attano vase vattetīti **vasavattī**.

552. Brahmālokamaggeti brahmālokagāmimagge paṭipajjitabbe, paññāpetabbe vā, taṃ paññāpentāti adhippāyo. **Upagantvāti** micchāpaṭipattiyā upasaṅkamitvā, paṭijānitvā vā. **Samatalanti saññāyāti** matthake ekaṅgulaṃ vā upaḍḍhaṅgulaṃ vā sukkhatāya samatalanti saññāya. **Pañkaṃ otiṇṇā viyāti** anekaporisaṃ mahāpañkaṃ otiṇṇā viya. **Anuppavisantīti** apāyamaggaṃ brahmālokamaggasaññāya ogāhanti. Tato eva **saṃsīditvā visādaṃ pāpuṇanti**. **Evanti** “samatala’’ntiādinā vuttanayena. **Saṃsīditvāti** nimujjitvā. **Marīcikāyāti** migataṇhikāya kattubhūtāya. **Vañcētvāti** nadīsadisam pakāsanena vañcētvā. **Vāyamānāti** vāyamamānā, ayameva vā pāṭho. **Sukkhatarāṇaṃ maññe tarantīti** sukkhanadītarāṇaṃ taranti maññe. Abhinnepi bhedavacanametam. **Tasmāti** yasmā tevijjā amaggameva “maggo’’ti upagantvā saṃsīdanti, tasmā. **Yathā teti** te “samatala’’nti saññāya pañkaṃ otiṇṇā satta **hatthapādādīnaṃ saṃbhañjanaṃ paribhañjanaṃ** pāpuṇanti yathā. **Idheva cāti** imasmiñca attabhāve. **Sukhaṃ vā sātāṃ vā na labhantīti** jhānasukhaṃ vā

vipassanāsātaṃ vā na labhanti, kuto maggasukhaṃ vā nibbānasātaṃ vāti adhippāyo.
Maggadīpakanti “maggadīpaka” micceva tehi abhimatam. **Tevijjakanti** tevijjatthañāpakam.
Pāvacananti pakaṭṭhāvacanassammatam pāṭham. **Tevijjānaṃ brāhmaṇānanti** sambandhe
sāmivacanam. **Iriṇanti** araṇṇāniyā idaṃ adhivacananti āha “**agāmakam mahāraṇṇa**”nti.
Anupabhogaruḅkhehi migaruruādīnampi anupabhogārahehi kiṃ pakkādivisarukkehi. **Yatthāti**
yasmim vane. **Parivattitumpi na sakkā honti** mahākaṇṭakagacchagahanatāya. Nātinam byasanam
vināso **ñātibyasanam**. Evaṃ **bhogasīlabyasanesupi**. Rogo eva byasati vibādhatīti **rogabyasanam**.
Evaṃ **diṭṭhibyasanepi**.

554. Nanu jātasaddeneva ayamatto siddhoti codanamapaneti “**yo hī**”tiādīnā. Jāto hutvā
saṃvaḅḅhito **jātasamvaḅḅhoti** ācariyena (dī. ni. ṭī. 1.554) vuttam, jāto ca so saṃvaḅḅho cāti
jātasamvaḅḅhoti pana yujjati visesanapanipātattā. **Na sabbaso paccakkhā honti** paricayābhāvato.
Ciranikkhantoti nikkhanto hutvā cirakālo. Ciraṃ nikkhantassa assāti hi **ciranikkhanto**.
“Jātasamvaḅḅho”ti padadvayena atthassa paripuṇṇābhāvato “tamena”nti kammapadam “**tāvadeva**
avasāṭa”nti puna visesetīti vuttam hoti. **Dandhāyitanti** vissajjane mandattam saṅkavutti, tam pana
saṃsayavasena cirāyanam nāma hotīti āha “**kaṅkhāvasena cirāyitatta**”nti. **Vitthāyitanti**
sārajjitattam. Aṭṭhakathāyam pana vitthāyitattam nāma thambhitanti adhippāyena
“**thaddhabhāvaggahaṇa**”nti vuttam. **Appaṭihatabhāvam dasseti** tasveva anāvaraṇaṇābhāvato.
Nanvetampi antarāyapaṭihatam siyāti āsaṅkam pariharati “**tassa hī**”tiādīnā. **Mārāvattanādivasenāti**
ettha cakkhumohamucchākālādī saṅgayhati. **Na sakkā tassa kenaci antarāyo kātum** catūso
anantarāyikadhammesu pariyaḅpanabhāvato.

555. Uiccupasaggayoge lumpasaddo, lupisaddo vā uddharaṇatto hotīti vuttam “**uddharatū**”ti.
Upasaggavisesena hi dhātusaddā atthavisesavuttino honti yathā “ādāna”nti. Pajāsaddo
pakaraṇādhigatattā dāraḅkavisayoti āha “**brāhmaṇadāraka**”nti.

Brahmalokamaggadesanāvaṇṇanā

556-7. “**Apubbanti** iminā saṃvaṇṇetabbatākāraṇam dīpeti. Yassa atisayena balaṃ atthi, so
balavāti vuttam “**balasampanno**”ti. Saṅkham dhameṭīti **saṅkhadhamako**, saṅkham dhamayitvā tato
saddapavattako. “Balavā”tiādivisesanam kimatthiyanti āha “**dubbalo hī**”tiādi. Balavato pana
saṅkhasaddoti sambandho. **Appanāva vaṭṭati** paṭipakkhato sammadeva cetaso vimuttibhāvato, tasmā
evaṃ vuttanti adhippāyo.

Pamāṇakatam kammaṃ nāma kāmāvacaram vuccati pamāṇakarānam saṅkilesadhammānam
avikkhambhanato. Tathā hi tam brahmavihārapubbabhāgabhūtam pamāṇam atikkamitvā
odissakānodissakadisāpharaṇavasena vaḅḅhetum na sakkā. Vuttavipariyāyato pana **rūpārūpāvacaram**
appamāṇakatam kammaṃ nāma. Tenāha “**taṅhī**”tiādi. Tattha arūpāvacare odissakānodissakavasena
pharaṇam na labbhati, tathā disāpharaṇaṇca. Keci pana “tam āgamanavasena labbhatī”ti vadanti,
tadayuttam. Na hi brahmavihāranissando āruppam, atha kho kasiṇanissando, tasmā yaṃ subhāvitam
vasībhāvam pāpitaṃ āruppam, tam **appamāṇakanti** daṭṭhabbam. “Yaṃ vā sātisayam
brahmavihārabhāvanāya abhisāṅkhatena santānena nibbattitam, yaṇca brahmavihārasamāpattito
vuṭṭhāya samāpannam arūpāvacarajjhānam, tam iminā pariyaḅyena pharaṇapamāṇavasena
appamāṇakata”nti apare. Vīmaṃsitvā gahetabbam.

Rūpāvacarārūpāvacarakammeti rūpāvacarakamme ca arūpāvacarakamme ca sati. **Na ohīyati na**
tiṭṭhatīti katūpacitampi kāmāvacarakammaṃ yathādhigate mahaggatajjhāne aparihīne tam abhibhavitvā
paṭibāhitvā sayam ohīyakam hutvā paṭisandhim dātum samatthabhāve na tiṭṭhati. “Na avasissatī”ti
etassa hi atthavacanam “na ohīyatī”ti, tadetaṃ “na avatiṭṭhatī”ti etassa visesavacanam,
pariyaḅyavacanam vā. Tenāha “**kiṃ vuttam hotī**”tiādi. **Laggitunti** āvaritum nisedhetum. **Ṭhātunti**
paṭibalaṃ hutvā paṭiṭṭhātum. **Pharivāti** paṭipharitvā. **Pariyādiyitvāti** tassa sāmattiyam khepetvā.

Okāsaṃ gahetvāti vipākādānokāsaṃ gahetvā, iminā “laggituṃ vā ṭhātuṃ vā”ti vacanameva vitthāretīti daṭṭhabbaṃ. “**Atha kho**”tiādi atthāpattidassanaṃ. Kammaṃsa pariyādiyaṇaṃ nāma tassa vipākuppādanāṃ nisedhetvā attano vipākuppādanamevāti āha “**tassā**”tiādi. **Tassāti** kāmāvacarakammaṃsa **vipākaṃ paṭibāhitvā**. **Sayamevā**ti rūpārūpāvacarakammameva. **Brahmasahabyataṃ upaneti** asati tādisānaṃ cetopañidhiviseseti adhippāyo. Tissabrahmādīnaṃ viya hi mahāpuññānaṃ cetopañidhivisesena mahaggatakammaṃsa parittakammaṃsa vipākaṃ na paṭibāhatīti daṭṭhabbaṃ.

Atha mahaggatassa garukakammaṃsa vipākaṃ paṭibāhitvā parittaṃ lahukakammaṃsa kathamattano vipākassa okāsaṃ karotīti? Tīsupi kira **vinayagaṇṭhipadesu** evaṃ vuttaṃ “nikantibaleneva jhānaṃ parihāyati, tato parihīnājhānattā parittakammaṃsa laddhokāsa”nti. Keci pana vadanti “anīvaraṇāvattthāya nīkantiyā jhānassa parihāni vīmaṃsitvā gahetabbā”ti. Idamettha yuttatarakāraṇaṃ – asatipi mahaggatakammuno vipākapaṭibāhanasamatthe parittakamme “ijjhāti bhikkhave sīlavato cetopañidhi visuddhattā sīlassā”ti (dī. nī. 1.504; saṃ. nī. 4.352; a. nī. 8.35) vacanato kāmabhāve cetopañidhi mahaggatakammaṃsa vipākaṃ paṭibāhitvā parittakammuno vipākokāsaṃ karotīti. **Evaṃ mettādivihārī**ti vuttanayena appanāpattānaṃ mettādīnaṃ brahmavīhārānaṃ vasena vīhārī.

559. Paṭhamamupanidhāya dutiyaṃ, kimetaṃ, yamupanidhīyatīti vuttaṃ “**paṭhamamevā**”tiādi. **Majjhimaṇṇāsake** saṅgītanti ajjhāharitvā sambandho. Punappunaṃ saraṇagamaṇaṃ daḷhataraṃ, mahapphalataraṇca, tasmā dutiyampi saraṇagamaṇaṃ katanti veditabbaṃ. **Katipāhaccayenā**ti dvīhatīhaccayena. **Pabbajitvā**ti sāmaṇerapabbajjaṃ gahetvā. **Aggaññasuttampi** (dī. nī. 3.112) amuṃyeva vāsetṭhamārabha kathesi, nāññanti ñāpetuṃ “**aggaññasutte**”tiādi vuttaṃ. Tattha āgatanayena **upasampadañceva arahattañca alatthum** paṭilabhiṃsūti attho. Yamettha atthato na vibhattaṃ, tadetaṃ suviññeyyameva.

Iti sumaṅgalavilāsiniyā dīghanikāyaṭṭhakathāya paramasukhumagambhīraduranubodhatthaparidīpanāya suvimalavipulapaññāveyyattiyajanaṇāya ajjavamaddavasoraccasaddhāsati dhitibuddhikhantivīriyādidhammasamaṅginā sātṭhakathe piṭakattaye asaṅgāsaṃhīravīsāradaññācārīnā anekappabhedasakasamayasaṃyantaragahanajjhogāhīnā mahāgaṇīnā mahāveyyākaraṇena ñāñbhivamaṃsadhammasenāpatināmatherena mahādhammarājādhirājagaruṇā katāya sādhuvilāsiniyā nāma līnatthapakāsaniyā tevijjasuttavaṇṇanāya līnatthapakāsanaṃ.

Tevijjasuttasaṃvaṇṇanā niṭṭhitā.

Tatridaṃ sādhuvilāsiniyā sādhuvilāsinitasmim hoti –

Byañjanañceva attho ca, vinicchayo ca sabbathā;
Sādhakena vinā vutto, natthi cettha yato tato.

Sampassataṃ sudhīmataṃ, sādhuṇaṃ cittatosanaṃ;
Karoti vividhaṃ sāyaṃ, tena **sādhuvilāsini**ti.

Nigamanakathā

Ettāvatā ca –

Saddhamme pāṭavatthāya, sāsanassa ca vuddhiyā;
Vaṇṇanā yā samāradhā, sīlakkhandhakathāya sā.

Sādhuvilāsini nāma, sabbaso pariniṭṭhitā;
Paṇṇāsāya sādhikāya, bhāṇavārappamaṇato.

Anekasetibhindo yo, anantabalavāhano;
Sirīpavarādināmo, rājā nānāraṭṭhissaro.

Jambudīpatale ramme, marammavisaye akā;
Tambadīparaṭṭhe purama, **amarapura**nāmakaṃ.

Maṅḍalācalasāmantama, erāvātīnadissitama;
Nānājanānamāvāsama, hemaṃpāsādalaṅkataṃ.

Tatrābhisekapatto so, rajjama kāresi dhammato;
Rājāgāramahāthūpama, akāsi sampasādanama.

Uddhammaṃ ubbinayaṅca, pahāya jinasāsanaṃ;
Visodhesi yathābhūtaṃ, satataṃ daḷhamānaso.

Teneva kārite ramme, chāyūdakasamappite;
Dvipākāraparikkhitte, bhāvanābhiratārahe.

Mahāmunisamaññā yā, sambuddhasammukhā katā;
Paṭimā taṃpāsādamhā, ujuāsannadakkhiṇe.

Asokārāmaārāme, pañcabhūmimahālaye;
Ratanabhūmikitti vhaṃye, dhammapāsādalaṅkate.

Tathā dakkhiṇadeviyā, nagarasamīpe kate;
Pubbuttare **jayabhūmi-kittā**bhidhānakepi ca.

Tathevuttaradeviyā, nagarabbhantare kate;
Soṇṇaguhathūpantike, **parimāṇaka**nāmake.

Tathā ca uparājena, kate nagarapacchime;
Mahāguhathūpantike, **maṅgalāvāsana**make.

Iti soṇṇavihāresu, vasaṃnekesu vārato;
Sakkato sabbarājūnaṃ, tikkhattuṃ laddhalaṅchano.

Ñāṇābhivaṃsadhmmasenaṃpatīti suvikhyāto;
Dvevibhaṅgādidhāraṇā, upajjhācariyataṃ patto.

Laṅkādiṇpāgatānampi, paradīpanivāsinaṃ;
Bhikkhūnaṃ vācako dhammaṃ, paṭipattiṃ niyojako.

Yaṃ nissāya visodhesi, sāsanaṃ esa bhūpati;
Atthabyañjanasampannaṃ, so'kāsi vaṇṇanaṃ imaṃ.

Sambuddhapariniḃbānā, pañcatālīsake' ddhake;
Tisate dvisahassee ca, sampatte sā suniṭṭhitā.

Peṭakālaṅkāravhaṃyaṃ, nettisaṃvaṇṇanaṃ subhaṃ;
Imaṅca saṅkharontena, yaṃ puññaṃ pasutaṃ mayā.

Aññampi tena puññaena, patvāna bodhimuttamaṃ;
Tārayitvā bahū satte, moceyyaṃ bhavabandhanā.

Sadā rakkhantu rājāno, dhammeneva pajaṃ imaṃ;
Nīratā puññakammesu, jotentu jīnasāsaṇaṃ.

Ime ca pāṇino sabbe, sabbadā nirupaddavā;
Niccaṃ kalyāṇasaṅkappā, pappontu amataṃ padanti.

Iti dīghanikāyaṭṭhakathāya sīlakkhandhavaggasaṃvaṇṇanāya

Sādhuvilāsinī nāma abhinavaṭṭikā samattā.

Sīlakkhandhavaggaabhinavaṭṭikā niṭṭhitā.